

Istraživanje alevizma

Porijeklo, vjerovanja, historija, kultura, izvorna djela i obrazovne institucije

Özgür Sözeri

Ja sam jedan od sljedbenika Muhameda Alija

Ja sam jedan od potomaka Hajdarovih, ljudi pod ogrtačem

Pripadam školi mišljenja Imama Džafera Sadika

Ja, ožalošćeni Hatajđyi, došao sam tražiti vašu pomoć

(Šah Ismail Hatayi)

Predgovor

Kako bi se postiglo razumijevanje neke teme, nužno je istražiti njezine teorijske temelje. Kada je riječ o alevizmu, uglavnom se fokus stavlja na sociološke načine življenja, pri čemu teorijske osnove alevizma često, svjesno ili nesvjesno, bivaju zanemarene. Naravno, pri tome se mora obratiti pozornost na to da su anadolijski kizilbaški aleviti stotinama godina imali mali ili nikakav pristup vlastitim pisanim djelima, i zbog toga su njihove teorijske osnove dobrim dijelom izgubljene ili nisu mogle biti autentično prenesene. Stoga ne čudi da danas postoji više teorija i definicija u vezi sa alevizmom. Neki ovaj pojam čak opisuju kao „nejasan“ ili „misteriozan“. Neke analize govore o „nekoliko alevizama“, zato što, prema njihovoj interpretaciji, postoji više formi alevizma. Prve dvije tvrdnje pokušavaju se osloniti na sociološke analize, dok treća tvrdnja ima za cilj otuđenje alevizma od njegovog identiteta. U sljedećim poglavljima će se detaljnije obrađivati primjeri neosnovanih spekulacija, hipoteza i definicija otuđenja. Međutim, prije nego što se pozabavimo različitim stavovima i teorijama, bitno je utvrditi uzroke svih ovih rasprava.

U jednoj izreci Imama Alija, vezano za ovo, stoji sljedeće:

„Vjera u Boga se ne može spoznati preko ljudi. Ona se samo i jedino može spoznati obilježjima istine. Spoznaš li istinu, onda spoznaješ Istinitog.“¹

Da bi se istražio pravi identitet alevizma, potrebno se držati preporuke Imama Alije. Ovo prije svega znači da korijeni alevizma moraju biti detaljno istraženi prije nego što se uđe u razmatranje različitih tumačenja. Konačno, očito je da se alevizam ne može istraživati i određivati isključivo posmatranjem današnje prakse. U suprotnom se ne bi mogli dobiti vrijedniji rezultati istraživanja, a pojavila bi se prethodno spomenuta pogrešna tumačenja i zablude. U skladu s tim, svaki vjerujući alevija, i svako drugi ko se želi ozbiljno baviti alevizmom, ne bi trebao biti zadovoljan trenutnim stanjem alevizma, već bi trebao provesti naučno istraživanje teorijskog i praktičnog stanja alevizma. Stoga bi mudri savjet Imama Alije trebao biti vodič u potrazi za istinom. Jer kada se jednom shvati stvarno stanje, različite interpretacije i zablude vezane za alevizam sadašnjosti neće ga moći zbuniti. Moći će ih klasificirati jasno i bez napora. U nastavku će historija alevizma, kao i alevijsko učenje, biti detaljnije istraženi i osvijetljeni. Pri tome će kao osnova istraživanja biti uzet anadolijski alevizam. Time se misli na onaj alevizam koji se proširio od Horasana² preko Anadolije pa sve do balkanskih zemalja, a danas ga prakticiraju aleviti različitih etničkih grupa.

¹ Medžlisi: Bihar ul-Anwar, svezak 68. str. 120

² Horasan je historijska regija u Centralnoj Aziji između sjeveroistoka Irana, južnog Trukmenistana i sjeverozapadnog Afganistana u području današnjih država Afganistana, Irana, Tadžikistana i Uzbekistana.

Ova je knjiga namijenjena široj publici, zbog čega su izostavljeni dijakritički znakovi. U tom kontekstu su za sljedeća istraživanja korišteni izrazi iz arapskog, perzijskog ili turskog načina izražavanja, kako čitatelji koji su upoznati s ovim pojmovima ne bi bili ometani tokom čitanja. Naprimjer, arapski pojam Ahlulbait preveden je na Ehli Bejt, a turski pojmovi bektaši ili kizilbaši, u skladu s bosanskim pravopisom. Također, arapska imena kao Kadhim (tur. Kazim) ili Ridha (tur. Riza), kao i stručne pojmove poput Rafidhi (tur. Rafizi), ostavljeni su u skladu s arapskim izgovorom.

Nusajrije ili arapski aleviti (tur. Arap Alevileri) u ovoj knjizi neće biti obrađivani pošto su historijski izvori, kao i teološke i kulturološke razlike naspram anadolskih alevita, prevelike. Ova tema zahtijeva posebnu obradu kako bi (arapski) alevizam bio autentično prikazan.

Napomena prevodioca

Budući da su šiitska i alevitska profetologija u odlučujućoj mjeri zasnovane na unutarnoj, odnosno duhovnoj hermeneutici, korisno bi bilo osvrnuti se na jedan termin koji će se često pojavljivati u ovom tekstu. Riječ je o terminu „misticizam“, koji je široko u upotrebi, naročito u jeziku zapadnih škola mišljenja i teologija. Suprotno vrlo raširenom mišljenju među zapadnjacima, islamski nauk unutarnjosti nema ništa zajedničko s „misticizmom“. Primarno, misticizam je nešto posve svojstveno kršćanstvu i samo se pogrešnim izjednačavanjem može tvrditi da se njegove manje ili više tačne jednakovrijednosti mogu naći i na drugom mjestu. Neke vanjske sličnosti u korištenju određenih izraza jesu, nesumnjivo, uzrok te zablude, ali je nikako ne mogu opravdati pred razlikama koje se odnose na samu suštinu. Cijeli misticizam pripada, samim određenjem, vjerskom području; dakle, proističe čisto i jednostavno iz izvanjskog. A osim toga, cilj kojem teži zasigurno je daleko od reda čiste spoznaje. S druge strane, mistik, budući da ima „nedjelatan“ stav i da se prema tome ograničava na primanje onoga što mu dolazi na neki način samo od sebe i bez ikakvog njegova poticaja, ne bi mogao imati postupak. Dakle, tu ne može biti mističnog tarikata i tako nešto je nezamislivo, jer je u biti protivrječno.

Osim toga, mistik, budući da je uvijek sam, i to uslijed same „nedjelatne“ naravi svog „ozbiljenja“, nema ni šejha ili „duhovnog učitelja“ (što, naravno, nema ništa zajedničko s „upraviteljem svijesti“ u vjerskom smislu), ni silsilu ili „lanac“, kojim bi mu se prenosio „duhovni utjecaj“ (koristimo taj izraz da bismo prenijeli što je moguće tačnije značenje arapske riječi bereket), jer je, uostalom, drugo neposredna posljedica prvog. Pravilno prenošenje „duhovnog utjecaja“ ono je što bitno obilježava „uvođenje“ i čak ono što ga tačno sačinjava, i zato smo gore upotrijebili tu riječ da prevedemo tesavuf; islamski nauk unutarnjosti, kao uostalom i svaki istinski nauk unutarnjosti, jeste „uvodni“ i ne može biti ništa drugo. I ne zalazeći čak u pitanje o razlici ciljeva, razlici koja, uostalom, proističe iz same razlike između dva područja na koja se oni odnose, možemo reći da su „mistični put“ i „uvodni put“ potpuno nespojivi uslijed njihovih odgovarajućih svojstava. Dodamo li tome da

u arapskom ne postoji nijedna riječ kojom bi se približno mogla prevesti riječ „misticizam“, tada i pretpostavka koju ona izaziva predstavlja nešto potpuno strano islamskom predanju.

1 Uvod

Kod literature na temu alevizma mora se uvijek obratiti pažnja na cilj poduhvata. U ovoj knjizi će se obraditi historijski razvoj alevita, i to što je moguće objektivnije. Potrebno je istražiti ko je zaista alevija i na šta se alevizam oslanja. Neodlučan čitatelj može se tokom suočavanja s ovom tematikom samostalno odlučiti gdje bi se želio smjestiti.

Druga objavljivanja, međutim, imaju za cilj da postignu iskrivljenost činjenica, kao i otuđenje od alevita i njihovih stvarnih izvora. Povremeno se takozvane učene osobe u javnosti prezentiraju kao vodeće alevitske ličnosti, koje pod krinkom alevizma ipak šire samo nacionalističke i društvene ideje. Budući da su na ovaj način nastale različite konstrukcije o alevizmu, neizbježno nastaju i smutnje, što zauzvrat dovodi do toga da se sve više alevija, tražeći blagostanje od robusnog načina mišljenja u svakodnevnicu i životnog stila, okreće ka drugim religijama, školama mišljenja i ideologijama. U nekim slučajevima ovi „eksperti“ i „prosvijećeni“ koji istražuju alevizam do te mjere iskrivljuju činjenice da svoje čitatelje ciljano usmjeravaju ka umjetno konstruiranim rezultatima. Kako bi se efektivno suprotstavilo ciljanoj asimilaciji, od najvećeg je značaja da se ova stajališta tačnije prouče i pokažu stvarni sadržaji alevizma. Nadalje, alevizam se mora ispitati od samih njegovih temelja.

2 Značenje pojma alevi

Prije nego pređemo na pitanje „ko je alevit?“, mora najprije biti rasvijetljen korijen riječi koja označava alevita, kako bismo dobili razumljiv odgovor na postavljeno pitanje. U vezi sa nastajanjem riječi alevit, postoji nekoliko definicija prema kojima se riječ pripisuje različitim etničkim i vjerskim zajednicama.

U skladu sa turskom definicijom pojma alevi, radi se o kombinaciji riječi Ali i evi (njegova kuća), pri čemu zaključak dovodi do izostavljanja prvog. Prema tome pojam alevi, bi značio Alijeva kuća. Po ovoj teoriji bi nasljednici i najbliži sljedbenici Ali ibn Ebi Taliba (599-661) bili nazvani alevitima. Ipak, ova definicija potpuno izuzima iz obzira arapski aspekt riječi i predstavlja pojam alevi kao potpuno turski. U skladu sa arapskom gramatikom, izvodi se veza sa osobom Ali ibn Ebi Talibom. Ime Ali je sastavljeno iz slova ayn na početku, jednim lam na sredini i jednim ja na kraju. Kako bi se na arapskom jeziku izrazila pripadnost i slijeđenje osobe ili grupe, dodaje se riječ ja. Budući da se spajanjem od Ali i ja dvoje ja nađu jedno za drugim i tako nastaje pojam alii, prvo ja u skladu sa arapskom gramatikom mijenja se u waw, tako da nastaje riječ alevi. Međutim, prema turskom čitanju pojam alevi se govori

i piše. Tome još treba da dodamo činjenicu da historijski zapisi jasno ukazuju da su se Idrisidi (788-985) u Maroku, Fatimidi (909-1171) u Egiptu, Sulejmanidi (1086-1138) u Jemenu kao i Hamudidi (1016-1158), koji su vladali u djelovima Pirinejskog poluotoka, nazivali kao alevi ili alawi. Kraljevske porodice u Maroku³ i Jordanu koriste ovu titulu do danas.

Još jedna definicija poziva se na teoriju koja se zasniva na pojmu alevi, a izvodi se iz staroturske riječi alev (plamen). Uzimajući u obzir pravopis termina alevi i alev po perzijskom pismu⁴, koji se upotrebljavao sve do 1928. n.kr. u području današnje Turske, nailazi se na veliko odstupanje. Dok riječ alevi, upravo kao ime Ali, počinje arapskim slovom ajn, alev se piše sa elifom. Najpoznatiji zastupnik alev-teorije je Erdogan Çinar (rođ. 1957.), koji je istovremeno i pokretač pokreta išikizma. On od 2000. godine zastupa kontroverznu tezu da su aleviti potomci Luvijaca, koji su po arheološkim istraživanjima naseljavali Malu Aziju prije 4.000-5.000 godina. U svojim knjigama ispred pojma luvi stavlja slovo „a“, kako bi zadržao riječ aluvi. Uglavnom se oslanja na ove sličnosti (aluvi i alevi) i pokušava uspostaviti religioznu i kulturološku poveznicu između Luvijaca i alevizma. Međutim, koliko ova teza odgovara istini, može se jasno zaključiti iz švicarskog istraživačkog instituta Luvijjskih studija: „U određenim izvještajima društvenih medija se trenutno izlaže pretpostavka da su članovi religijske zajednice alevita potomci Luvijaca. Naklada Luvijjskih studija ima veliko poštovanje prema alevitima. Ipak, nije moguće da su oni u srodstvu sa Luvijcima. Pojam „luvijski“ se odnosi na multietničke i višejezičke gradove-države i malo carstvo koje je tokom srednjeg i kasnijeg bronzanog doba bilo u maloj zapadnoj Aziji. Luvijjski jezik, jezik indogermanskog porijekla, činio je najveću jezičnu skupinu, i time je tvorio najveću govornu skupinu. Luvijsko hijeroglifsko pismo se nakon 600 pr. Kr. nije više upotrebljavalo, dok se luvijjski jezik zadržao sve do rimskog perioda. Alevizam ima svoj izvor u turskoj kulturi. Ovo vjersko učenje se proširilo u 13. i 14. stoljeću nakon dolaska ogusko-turkmenskih plemena iz centralne Azije (Horasan) u Anatoliju – više od hiljadu godina nakon nestanka luvijjskog jezika. Arheološka istraživanja ne prikazuju dokaze o povezanosti između Luvijaca i današnjih naroda koji naseljavaju Tursku. Sa sigurnošću ne postoji direktna povezanost između Luvijaca i današnje vjerske zajednice.”

Posljedično ovom pokušaju definicije nedostaju historijski i znanstveni dokazi po kojim bi se mogla dokazati kulturološka ili religiozna povezanost sa Luvijcima. Također, treba naglasiti da zagovornici alevitske definicije zauzimaju jak antiislamski stav i da žele da alevizam smjeste van islama. Stoga, sljedeća poglavlja kritički i opširno istražuju ovu tezu.

U ovoj knjizi se koristi definicija Ali ibn Ebu Taliba jer odgovara historijskim izvorima, prema kojima se termin alevi koristi za potomke i sljedbenike Imama Alija.

³ Alawidi su od 1664 vladajuća kraljevska dinastija u Maroku.

⁴ Sve do uvođenja latinskog pisma 1928. godine, pod utemeljiteljem Turske Republike Mustafe Kemala Atatürk (1881-1938), na području današnje Turske govorio se osmanski turski. Osmanski se bazira na anadolijско-turkom oguskom jeziku koji je koristio perzijsko pismo. Krajem 15. stoljeća prihvatao je u sve većoj mjeri arapske i perzijske elemente. Nadalje, osmanski turski je bio službeni i književni jezik Osmanskog carstva. Na ovom jeziku je napisan najveći dio alevitskih izvora, kao što je, naprimjer, djelo u kojem su sakupljene izreke Imama Džafer es-Sadika po imenu „Buyruk“. I Osmanlije i aleviti koriste ovo pismo kod pisanja svojih djela.

2.1 Historijski razvoj naziva alevi

Ovo poglavlje obuhvata kompleksnu temu historijskog razvoja alevizma. S jedne strane, alevi se može razmatrati kao pojam „alevi“, a s druge strane može se razmatrati značenje ovog termina koji je danas uobičajeno u upotrebi. Ali oboje se može obrađivati u historijskom kontekstu i djelomično je to međusobno povezano. Fokusiranje isključivo na pojam „alevi“ i pretraživanje historijskih knjiga nije ono što nas vodi željenome cilju. U tom smislu, sama formulacija nije važna koliko je važna stvarna povezanost sa Imamom Alijem. Kako bismo shvatili veze, provodi se hronološki pregled alevita od doba Poslanika a.s. do danas. Pritom se detaljno objašnjava koje su titule bile relevantne za alevite u svakom pojedinom razdoblju, kao i njihova pozadina.

2.1.1 Za života Poslanika Muhameda, as.

Najprije je potrebno napomenuti da pojam „alevi“ nije bio u upotrebi za vrijeme života Poslanika Muhameda as. Sljedbenici Poslanika Muhameda su jednoglasno nazivani muslimanima, iako su pritom neki, zbog njihove duboke naklonosti prema Poslaniku, nazivani muhamedancima.⁵ Nakon što je Poslanik Muhamed u brojnim prilikama i mama Alija imenovao za svoga zvaničnog nasljednika, prvog Imama i predvodnika sveukupne islamske zajednice (arab: umma)⁶, slijeđenje Imama Alija se povećalo. Tako je došlo do toga da su se neki prijatelji Poslanika Muhameda okupili oko Imama Alija, i smatrali ga budućim zapovjednikom pravovjernih.⁷ Najpoznatiji Poslanikovi prijatelji, koji su iskreno i neprestano bili podrška Imamu Aliju su Mikdad ibn Esved, Amar ibn Jasir, Selman el Farsi i Ebu Zer Gafari. Iako se spomenuti prijatelji Poslanika Muhameda, na osnovu njihove odanosti i naklonosti prema Imamu Aliju sa današnje pozicije mogu posmatrati kao aleviti, Poslanik Muhamed je ove plemenite osobe nazvao Alijevim šijama (Alijeva stranka)⁸, a ne alevitima. Kako bi se ovo pojasnilo, potrebno je još spomenuti da se termin Alijeve šije ne smije gledati kao neko razgraničenje naspram drugih frakcija. Za vrijeme života Poslanika Muhameda još nisu postojale različita politička grupiranja unutar islama. Već je prije svega Poslanik Muhamed želio da istakne vrline Imama Alija i njegovih sljedbenika, tako što ih je nazivao Alijevim šijama. On ih je više puta javno hvalio i naglašavao da je slijedeći kur'anski ajet objavljen zbog ovih plemenitih prijatelja Poslanika as.:

⁵ Naprimjer, Selman al-Farsi, Poslanikov prijatelj koji je bio porijeklom iz perzije, nazivan je Selmanom Muhamedancem.

⁶ Jedan od takvih događaja koji se zbio na Gadir Humu, bit će pojašnjen u jednom od sljedećih poglavlja.

⁷ U skladu sa alevitskim predajama, ove četiri osobe se ubrajaju među 17 Kemera (opasanih). U sljedećim poglavljima će značenje 17 opasanih biti posebno objašnjeno.

⁸ Šija Ali ima značenje “pomoćnik, sljedbenik, na strani Alija as.”

„Zaista, oni koji vjeruju i čine dobra djela, oni su, zbilja, najbolja stvorenja.“⁹

Nadalje, položaj sljedbenika Imama Alija tematiziran je u brojnim predajama od Poslanika Muhameda:

„O Ali! Na sudnjem danu tvoji sljedbenici (šije) i ti, doći ćete Allahu, zadovoljni i sretni, i doći će mu tvoji neprijatelji, ljutiti i tvrdoglavi.“¹⁰

„Ovo je za tebe i tvoje sljedbenike (šije)! (...)Kunem se onim koji moj život drži u svojoj ruci, da će ovaj čovjek (Ali) i njegovi sljedbenici biti spašeni na Sudnjem danu!“¹¹

2.1.2 Za vrijeme Umejada i Abasida

Budući da su, nakon preseljenja Poslanika Muhameda, neki od njegovih prijatelja, opsjednuti željom za vlašću, ignorisali testament naređen od Boga u vezi sa mandatom predvodništva (arap. wilaya) Imama Alija, došlo je neizbježno do pojave dvije velike frakcije. Prije svega, sljedbenici Alijeve šije, koje je pohvalio i Poslanik Muhamed, javno su osudili nasilno preuzimanje vlasti prve trojice halifa, tako da je pojam šija dobio i jednu političku dimenziju. Međutim, neutralni izraz šija u tom periodu nije se koristio isključivo za podržavatelje Imama Alija, nego, u skladu sa svojim leksičkim značenjem, također i za sljedbenike neke druge osobe, naprimjer Osmanove šije ili kasnije Muavijine šije.

Dok su se i dalje sljedbenici Poslanikove porodice (Ehli Bejt) nazivali Alijevim šijama, jer su svih dvanaest Imama po alevitskom, odnosno alidijskom učenju jednako sveti, ostale frakcije su mijenjale svoja imena zavisno od toga koji halifa je bio aktuelno na vlasti. Međutim, sa preuzimanjem vlasti Umejada, uveden je pojednostavljen naziv Ehli sunnet vel džemat. Kroz to se namjerno željela osigurati sopstvena vlast, tako što se među stanovništvom htio ostaviti dojam da postupaju po odredbama Kur'ana i Poslanikove tradicije (arap. sunna). Pri tome se trebalo spriječiti promjenu naziva stranke ovisno o halifi na vlasti, kako bi se mogla stvoriti odgovarajuća protuteža ekvivalentna stalnoj Alijevoj stranci.

⁹ Sura el-Beyine, ajet 7. (98:7)

¹⁰ Ova izjava Poslanika as. se prenosi u sljedećim sunitskim djelima. Ebu Nu'aym al-Isbahani: Hilyat ul-Awliya Tom. 4, str. 329; Ahemd ibn Hanbel. Fadha 'il al-Sahaba Tom 2, str. 655; Haythami Majma'al-Zawa'id, tom. 9, Br. 14168, tom 10, str. 21-22; Ibn Athir:al-Nihaya fi Gharib al-Hadis, tom 4, str.106; Ibn Askari:Tarikh Dimashq, tom. 42, str. 331-332.; Ibn Hajar: Al-Sawa'iq al Muhriqah. Poglavlje 11.str. 247; Hatib al-Bagdadi: Tarikh Baghdad, tom.12, str. 289; Tabarani: Mujam al-Kabir, tom. 1, str.319.

¹¹ Ova izjava Poslanika as. se također prenosi u sljedećim sunitskim djelima: Ibn Askari. Tariq Dimašq, tom.42, str. 333; Ibn Manthur fi'l Tefsir bil Ma'thur, tom. 15, str. 577; Suyuti: Hadislerle Kur'an tefsiri – ed-Durru'il Mensur fi'l-Me'sur, tom. 15, str. 540 f.; Tabari. Tafsir Džami'al-Beyan, tom. 33, str. 146.

Pošto su umejadske halife odbacivali pravo Ehli Bejta nad islamskom zajednicom, a njihove sljedbenike progonili i ubijali, to samo potvrđuje da su oni zanemarili odredbe Kur'ana i Poslanikove tradicije. Naročito nakon okrutnog ubistva Imama Husejna na Kerbeli, formirao se otpor naspram tlačiteljske politike Umejada pod vodstvom nekoliko Alijevih potomaka. Budući da se termin alevi u ovom periodu isključivo odnosio na potomke Imama Alija¹², pobune Zejda¹³ i njegovog sina Jahje protiv Umejada¹⁴ nazivane su u islamskim historijskim zapisima alevijskim i alidijskim pobunama. Naprimjer, izjava Imama Sadika (702-765) spominje sljedeće:

„Mi smo alevijuni (aleviti), baš kao što su i naše šije (sljedbenici) također aleviti. A oni su najbolja stvorenja.“¹⁵

Nadalje, ustanci u Horasanu (Iran) za vrijeme Abasida¹⁶, nazivani su alidijski odnosno alevitski, jer ih je predvodio sin Imam Musa el Kazima as., sedmog Imama. Kada su potomci Imama Alija godine 864. svoju moć proširili na područje današnjeg Mazanderana (Iran) i osnovali neovisno Alidisko carstvo Dajlamita, izraz alevi više se nije koristio isključivo za izravne potomke, već za sljedbenike Ehli Bejta. Također, iz prvih napisanih knjiga islamske historije jasno se može zaključiti da je pojam alevi odnosno alawi primjenjivan kako za potomstvo tako i za sljedbenike Imama Alija.

¹² Danas se primjenjuje izraz Sejid za muške i Sejida ili Sejide za ženske naslijednike Fatime i Imama Alija odnosno Poslanika Muhameda.

¹³ Zejd ibn Ali bio je sin Imam Zayn ul-Abidina i unuk Imama Husejna. Shodno historijskim zapisima, rodio se 699. godine. Nakon tragičnog ubistva Imama Husejna i njegovih sljedbenika na Kerbeli, masovno se pojačalo tlačenje i protjerivanje sljedbenika Ehli Bejta. Pošto su represije za vrijeme vladavine Hišam ibn Abdumalika doživjele svoj vrhunac, Zejd ibn Ali pozvao je 740. godine na ustanak protiv Umejada i ubrzo nakon toga je ubijen na užasan način. Nakon što je njegovo obezglavljeno tijelo bilo izloženo pogledima tri godine na ulaznoj kapiji grada Kufe, njegovi sljedbenici su nekako uspjeli ukrasti njegove posmrtno ostatke i tajno ga ukopati u Kufi. Izvještaji ukazuju da je njegova odrubljena glava pokopana u Egiptu.

¹⁴ Umejadi su bili arapska dinastija koja je nasilnički vladala islamskim svijetom od 660. do 750. godine. Nakon ubistva trećeg halife Osmana ibn Affana (574–656), Umejad Muavija ibn Ebu Sufijan (603-680) pokrenuo je rat protiv Imama Alija i kroz brojne prevare i lukave metode domogao se hilafeta. Nakon ubistva Imama Alija naložio je ubistvo Njegovog sina Imama Hasana (624–670) kako bi svog sina Jezida (644-683) imenovao za svoga nasljednika. Ovo je, međutim, dovelo do tragedije Ašure, ubistva Imama Husejna (626-680) i njegovih 72 sljedbenika i srodnika na Kerbeli u Iraku.

¹⁵ Tabarsi: Miškat ul-Anwer fi gayr al-Ahbar, tom. 2, str. 320 (Hadis 1904).

¹⁶ Abasidi su bili između 750. i 1517. godine druga najvažnija vladajuća dinastija islamskog carstva, koja je putem ustanka protiv krvoločnih Umejada došla na vlast. Kako bi osigurali podršku ostalih velikih dijelova islamskog društva, Abasidi su javno osudili vladavinu Umejada, koju je stanovništvo uveliko preziralo, kao i njihovo protivljenje Ehli Bejtu. Podržani od raznih etničkih i društvenih skupina, uspješno su se pobunili protiv Umejada i tako preuzeli vlast u islamskom carstvu. Nakon preuzimanja vlasti, Abasidi su znatno nadmažili Umejade u nasilnim postupcima protiv Ehli Bejta i njihovih pristaša.

Naprimjer, sunitski historičar Tabari¹⁷ (839-923) je u svome poznatom djelu Tarikah ar-Rusul wal-Khulafa alevitske odnosno alidijske ustanke opisao na sljedeći način:

Prvi ustanak Alida (Alevi) bio je u Basri. Sredinom mjeseca ševala 200 g.n.kr. Ali ibn Muhamed ibn Ahmed ibn Ali ibn Isa ibn Zejd ibn Ali ibn Husejn ibn Ali ibn Ebu Talib u Furat al-Basri ustao protiv Abasida.

Te godine (260 n.kr.) također Alija ibn Zejd al-Alevi, predvodnika Kufljana, ubio je predvodnik Zandža (Zanj).¹⁸

Ibn Asir¹⁹ (1160-1233) bio je poznati sunitski historičar iz dvanaestog stoljeća i u svome poznatom djelu al-Kamil fit-Tarik također je upotrijebio izraz alevi za sljedbenike Imama Alija as. u različitim epohama:

Ibrahim (ibn Muhamed al-Imam)²⁰ bio je čestita, časna i velikodušna osoba. Kada je došao u Medinu, dijelio je hranu među stanovnicima. On je dao Abdullah ibn Hasanu petstotina dinara i Džafer ibn Muhamedu²¹ hiljadu dinara. Također je ostavio alidima (alevitima) brojnu robu.

On je odašiljao obavijesti, te je pozivao, pored alida, i druge grupe ljudi. Među njima su bili također Imam Džafer ibn Muhamed ibn Ali ibn Husejn²², Husejn ibn Ali ibn Husejn ibn Ali, Hasan ibn Ali ibn Hasan ibn Ali ibn Husejn ibn Ali i grupa ljudi Kurejša.

Šemsudin Usume ibn Eba Abdullah ibn Ali, zastupnik alevita (sljedbenika Imama Alija) u Bagdadu, umro je te godine (1061 nakon hidžre). Njegov nadimak je bio al-Murteza.

Vojnici egipatskog fatimijskog vladara al-Mustansir Billah al-Alavi zauzeli su grad Tirus (Libanon) u mjesecu Džumad el-Ahiru godine (1093).

¹⁷ Tabari je bio značajni sunitski historičar i učenjak perzijskog porijekla iz 17. stoljeća. Po historijskim zapisima rođen je 839. a umro 923. godine.

¹⁸ Historijski ustanak Zanj (869-883) u južnom Iraku protiv Abasidskog hilafeta. Taj pokret je predvodio 'Ali ibn Muhamed, koji se često naziva vođa Zanja. Zanj = naziv za crne robove i doseljenike iz istočne Afrike (posebno sa područja današnje Tanzanije, Kenije i Mozambika)

¹⁹ Ibn Asir je bio arapski sunitski historičar kurdskog porijekla. Po historijskim spisima, rođen je 1160, a umro 1233. godine.

²⁰ Ibrahim ibn Muhamed, kojeg se nazivalo al-Imam, bio je brat prvog abasidskog halife Ebu al-Abbas as-Saffah. Kada je Ebu Muslim al-Horasani 747. godine pozvao na ustanak protiv Umeja, imenovao je najprije Ibrahim al-Imama, a nakon njegove smrti Ebu al-Abbas as-Saffaha za halifu. Prvi nikada nije mogao preuzeti svoj mandat.

²¹ Imam Džafer Sadik

²² Imam Džafer Sadik

Nakon što je Alaadin zauzeo grad Gazni (Afganistan), spalio ga je. Alide (alevite), koji su njegovog brata zarobili, bacio je sa jednog brda, a mjesto u kojem je njegov brat pogubljen potpuno je uništio.

Nadalje je osmanlijski historičar Ahmed Dževdet Paša (1822-1895) upotrebljavao u svom poznatom djelu *Kisas-i Enbija ve Tevrah-i Hulefa* pojam alevi za potomke. kao i za sljedbenike Imama Alija:

S druge strane, Kajs je bio veliki arapski ratnik i mislilac, tako da je veliki broj ratobornih Alida (sljedbenika Imama Alija) okupio oko sebe i odbio slijediti Muaviju.

(...) Pri utemeljenju dinastije Abasida, pleme Beni Hašim se podijelilo na srodnike Ebu Taliba i Al-Abasa. Kada su Abasidi (prividno) pozvali narod Imamu Rizi iz Poslanikove porodice i time oslabili abasidsku državu, ustali su alidi (sinovi Imama Musa-i Kazima) protiv Abasida te su pozvali narod da se zakune na vjernost Imamu Rizi iz Poslanikove porodice.

Kada je njegova svetost Imam Muhamed Dževad (Taqi), jedan od dvanaest Imama, kao što je prije spomenuto, preminuo 220. godine po Hidžri, njegov sin Ali Naki preuzeo je njegovo mjesto i postao predvodnik Alida (sljedbenika Imama Alija). Iako se povukao u svoju kuću i bio zauzet bogoslužjem, halifa al-Mutevekil ga je optužio da kod sebe posjeduje oružje i zabranjene dokumente, te je naredio njegovo zatvaranje. Kada su vojnici ušli u njegovu kuću, našli su ga kako u jednoj zaključanoj prostoriji uči Kur'an.

Kada je na ovakav način al-Muntasir postao halifa, poboljšala se sigurnosna situacija Alida (sljedbenika Imama Alija). Ponovo je dozvoljeno obavljanje posjete (zijaret) mezaru Imama Husejna na Kerbeli. Isto tako, legitimno vlasništvo Ehli Bejta, područje Fedeka, vraćeno je potomcima Imama Hasana i Husejna.

Također je i seldžučki veliki vezir Nizamul-Mulk (1018–1092) u svom djelu *Sijasetname* grupe u Dajlamu i Tabaristanu nazivao alevitima:

Šiitski zapovjednik iz Taberistana²³ stavio je alide (sljedbenike Imama Alija) pod svoju zaštitu. Stanovici Daylama su ustali protiv njega i rekli. "Izloži pravne odluke i dokaze od učenjaka iz Horasana i Transaksonije²⁴ i dokaži da su ljudi vašeg vjerovanja čestiti muslimani. Ukoliko su to riječi Boga Svemoćnog i njegovog Poslanika, prihvatit ćemo vašu konfesiju; inače u drugom slučaju, ovu ćemo stvar riješiti krvavo. Mi smo odrasli na planinskom zraku, te stoga malo Imamo znanja o vjerskim pitanjima i pravnim školama." Kada je potom došao Ebu

²³ Taberistan je sjevernoperzijska provincija.

²⁴ Transaksonija (sa one strane Oksusa: staro ime za rijeku Amu Darja (današnji Uzbekistan, Tadžikistan, Trukmenistan, Afganistan) ime je važne historijske regije u zapadno centralnoj aziji koja obuhvaća stare metropole Samarkand i Buharu.

Hatam iz Reja za Daylan, otišao je do Asfar ibn Širuya (umro 931), vođi Daylamita, i udružio se s njim. On se javno proglasio kao alide (alevi) i ustvrdio je da vladavina Daylamita nije njihovo pravo i da vlast treba da bude u rukama alida (sljedbenika Imama Alija).

Spomenuti primjeri objašnjavaju da su sljedbenici, a tako i protivnici Ehli Bejta, naziv alevi odnosno alavi upotrebljavali za potomke i sljedbenike Imama Alija. Pored naziva šija i alevi, postupno se za sljedbenike Imama Alija ustalio i termin džafari nakon njegove smrti. Konačno, nakon smrti Poslanika Muhameda, došlo je do raznih mimoilaženja u tumačenju vjerskih propisa (fikh). Kroz političke nemire i brutalne borbe za prevlast između Umejada i Abasida sredinom osmog stoljeća, Imam Džafer Sadik je za kratak vremenski period pronašao priliku da proširi osnove stvarnog islama. Budući da su za to vrijeme drugi učenjaci prakticirali samostalno zaključivanje i donošenje odluka (idžtihad) i svoje lične poglede, koje su iz Kur'ana i prakse Poslanika Muhameda ili predaja (ahadis)²⁵ izražavali, nastale su brojne pravne škole (mezheb). Dok neke pravne škole nisu uspjele izgraditi veliki utjecaj i zbog toga su s vremenom potpuno nestale, neke su se održale sve do današnjih dana. Trenutno među sunitskim muslimanima postoje uglavnom četiri pravne škole koje upućuju na njihove učitelje²⁶. Zejdi²⁷ i ismailiti²⁸ su još dvije islamske frakcije ove epohe, koje svoje korijene imaju u Ehli Bejtu, ali se razlikuju po broju Imama u odnosu na duodecimalne Šije (sljedbenike Dvanaest Imama).²⁹ Od desetog stoljeća su se zato nametnuli nazivi Isna Ašarija (dvanaesto imamske-šije) odnosno imamiye (imamiti) sljedbenici Dvanaest Imama, kako bi se razlikovali.

²⁵ Hadis, odnosno islamska predaja, seže sve do Poslanika Muhameda i njegovog Ehli Bejta preko autentičnog lanca prenosilaca (arap. *isnad*). Ipak, neki hadisi koji su preneseni u sunitskim zbirkama hadisa od sljedbenika Ehli Bejta, a na osnovu sumnjivih i problematičnih prenosilaca kao što je Ebu Hurejre, ocijenjeni su kao nevjerodostojni. Međutim, predaje od odanih sljedbenika Ehli Bejta se, već zbog samog njihovog lanca prenošenja, smatraju pouzdanim i vjerodostojnim.

²⁶ Ebu Hanife Numan ibn Sabit (699–767), onaj po kome je nazvan hanefijski mezheb; Muhamed ibn Idris eš-Šafi (767–820), onaj po kome je nazvan šafijski mezheb; Malik ibn Enes (715–796), onaj po kome je nazvan malikijski mezheb; i Ahmed ibn Hanbel (780–855), onaj po kome je nazvan hanbelijski mezheb. Ove četiri osobe se u sunitskoj tradiciji nazivaju *eimmetu-l-erbe'a* (četiri Imama).

²⁷ Zejdije su vjerska skupina u šiitskom islamu koja je proistekla u osmom stoljeću uslijed jedne podjele unutar duodecimalnog šiizma. Ova frakcija je nazvana po Zejdu ibn Aliju el-Zeinul-Abidinu (umro 740. godine), unuku Imama Husejna. Godine 740. on se podigao u Kufi protiv vladavine Umejada i pri tome brutalno ubijen. Ova frakcija unutar šiizma je danas poznata i kao petolmamski šiizam, pošto umjesto Imama Muhameda el-Bakira (676–732), njegovog brata Zejda smatraju Imamom.

²⁸ Ismailije su vjerska skupina u šiitskom islamu koja je u osmom stoljeću proistekla kao rezultat razilaženja unutar duodecimalnog šiizma. Nazvana je po Ismailu (719/728–755), sinu Imama Džafera es-Sadika, a danas se naziva sedmolmamski šiizam, pošto Ismaila smatraju sedmim Imamom.

²⁹ Kako ne bismo igubili fokus sa alevizma, na ovom mjestu ćemo se ustegnuti od preciznije analize ovih struja.

2.1.3 Za vrijeme Osmanlija i Safavida

Do prve polovine 15. stoljeća, ne mogu se primijetiti značajni prekidi ili novi pojmovi unutar alevitskog, odnosno šiitskog islama. Tek sa sljedbenicima safavidskog reda Šejh Hajdara (1460-1488) pojavila se jedna alevitska frakcija koja je za raspoznavanje nosila crveno pokrivalo za glavu sa dvanaest umetaka, i zbog toga su nazvani kizilbaš³⁰ (crvene glave). Kod ovog pokrivala za glavu radi se o tkanini koja je izrezana na dvanaest dijelova, omotanih u obliku vrča oko bijelog turbana. Od safavidskog razdoblja, izraz kizilbaš uživa veliku popularnost, prvenstveno među sljedbenicima Ehli Bejta turskog i perzijskog porijekla. Naprimjer, šiitske manjine u Pešavaru (Pakistan) i Afganistanu i danas nazivaju kizilbaš, zbog regionalnih razlika u izgovoru. Također su i zapadni orijentalisti spomenuli postojanje šiitskih skupina kizilbaša u svojim djelima na sljedeći način:

Izvorno, kizilbaše su bili pleme tatarskih konjanika iz istočnog Kavkaza. Oni su formirali okosnicu stare perzijske vojske koja je sa Nader Šahom (1688-1747) umarširala u Indiju. Mnogi veliki mogulski ministri, naprimjer Mir Džumla II., najpoznatiji veliki vezir iz vremena Aurangzeba (1618-1707), bili su kizilbaše. Oni su formirali jednu važnu vojnu naseobinu u Kabulu. Svi koji žive u današnjem Pandžabu potomci su kizilbaša koji su se za vrijeme vladavine Nader Šaha tamo nastanili. Oni su svi šiiti.³¹

Nakon prvog Anglo-afganskog rata (1839-1842), jedna grupa kizilbaša je iselila iz Afganistana, kako bi se nastanila u kolonijaliziranoj Indiji. Njihov predvodnik, Ali Riza Kan kizilbaš (umro 1865.), za lojalnost je dobio od Britanaca 147 sela.³² Ove bilješke potvrđuju da pojam kizilbaš postoji još od tog vremena. Pošto je književni jezik 16. stoljeća ustvari bio perzijski, pojam kizilbaš preveden je na perzijski kao surhser (znači crvenoglavi), a u osmanskim i safavidskim izvorima korišten je kao sinonim za kizilbaš.

Dok aleviti i šiiti titulu kizilbaš i surhser smatraju počasnom, taj pojam se u sunitskom svjetonazoru uglavnom upotrebljava s prizvukom preziranja ili pogrdnosti. Razlog zbog kojeg se danas šiiti i aleviti u dosta tačaka međusobno razlikuju i manje su više otuđili jedni od drugih najvećim dijelom leži u tome što su ih vladari tlačili i progonili. Prije svega, ovaj razvoj se vraća na vrijeme ratnih sukoba između Osmanlija i Safavida, u kojima su desetine hiljada sljedbenika Ehli Bejta u Osmanskom carstvu proganjani, protjerivani i nemilosrdno ubijani. Na ovaj način Osmanlije su uspjele umetnuti klin među sljedbenike Ehli Bejta i time spriječiti

³⁰ Kizilbaši („crvene glave“) bili su od sredine 15. stoljeća sljedbenici alevitskog sufijskog reda Safavida. Njihovo ime se izvodi iz karakterističnog crvenog pokrivala za glavu *tark-e haydari* (Hajdarov šljem) sa dvanaest umetaka, koje je, prema predaji, uveo šejh toga reda, šejh Hajdar (1460–1488). Iako su porijeklom turkmenski, izraz *kizilbaš* se danas više ne koristi za označavanje etničke grupe, a u određenim regijama postao je sinonim kako za alevite, tako i za šiite.

³¹ Wikeley: Pandžabi muslimani, str. 121.

³² Green: Afghanistan's Islam, str. 28; Rieck: The Shias of Pakistan, str.10.

kulturološku razmjenu. Sistematsko proganjanje poznatih alevitskih mislilaca tematizirano je u poetskoj formi:

Pir Ali³³

O Jezide, ti misliš da ćeš se izvući
Zasigurno će osveta te stići
Šta će biti s tobom, jer Mehdi će doći
Vile raskošne oduzete će ti biti

Jednog dana gazija Mehdi za Rumeliju³⁴ će stići
I dvorci i tornjev uništeni će biti
Zastavu Dvanaest Imama će podići
Sa crvenom krunom će nam doći

Ne misli Osmane³⁵ da ćeš se izvući
Lav Božiji, šahov sin, će doći
Udarcem jednim sa trona će te skinuti
Vladare će iz razorene zemlje prognati

Jednog dana gospodar ovog svijeta će doći
Pravo Dvanaest Imama će promicati
Sve Jezidove pristalice će uništiti
Pitajte za stanje vjernika

Pir Ali žudi za Mehdijem
Crven mu je ogrtač, zelena je zastava
Potrčimo za njim u bašču dženetsku
Jezidovi sljedbenici će biti svi otjerani.

³³ Pir Ali, odnosno Sejid Ali biog je alevitski pjesnik iz 16. stoljeća. Pretpostavlja se da je poticao iz provincije Sivas i da je bio sin Pir Sultan Abdala. Isto tako se pretpostavlja da je 1527. učestvovao u ustanku Šah Kalender Čelebija. Njegov grob nalazi se u selu Banaz.

³⁴ Rumelija odnosno Rumeli znači zemlja Rimljana ili Rumelaca. Od 15. stoljaća Turci su nazivali dio osmanskog carstva koji je ležao na evropskom djelu, na balkanskom poluotoku.

³⁵ Misli se na osmanlijske sultane.

Pir Sultan Abdal³⁶

Kada istinski voliš Pira svoga
Osmanlije zahtjevaju tvoja dobra
Putem mimo zakona ne mogu poći
Sa ove visoravni svome Šahu³⁷ćemo doći

Bitka kod Ćaldirana u kojoj su se sukobile trupe Osmanlijske vojske Sultana Javuz Selima³⁸ (1470-1520) sa safavidskim Šah Ismail Hatajem³⁹ (1487-1524) je za historijski razvoj alevizma od najvećeg značaja.

³⁶ Pir Sultan Abdal bio je najpoznatiji alevitski pjesnik i učenjak u osmanskome carstvu. Po historijskim zapisima, on bi trebalo da je došao na ovaj svijet 1480. godine. Usmenim predanjima se njegovo ime navodi kao Hajdar. Titulu Pir i Sultan mu je dodijelilo alevitsko stanovništvo kao počast. Budući da je on kao putujući derviš doprinio širenju učenja o Ehli Bejtu u Anatoliji, nazvan je Abdal. Pošto je za vrijeme njegovog života Osmansko carstvo bilo u intezivnom sukobu sa Safavidima, optužen je za špijunažu i u Sivasu pogubljen vješanjem. O tačnom datumu njegovog pogubljenja ne postoje tačne informacije. Pretpostavlja se da je obješen između 1547-1550 godine.

³⁷ Ozmen: Alevi-Bektaši Siirleri Antolojisi, tom. 2, str. 258.

³⁸ Javuz Sultan Selim, odnosno Selim I., rođen 1470. godine, bio je deveti osmanski sultan. Izveo je puč protiv svoga oca Bajazita II., a umro je 1520. od zarazne bolesti. On je prvi osmanski sultan koji je za vrijeme svoje vladavine ponio titulu halife od Abasida, koji su bili pod vlašću egipatskih Memluka, te se nazvao *Hadimul-Haramayn* (Zaštitnik svetih mjesta). Time je postao prvi halifa turskog porijekla. Aleviti ga ubrajaju u niz brutalnih vladara pošto je izveo masakr nad anatolijskim alevitima. Zato su mu dodijelili nadimak Javuz (Okrutni). Iz fetve koju je 1512. godine izdao tadašnji šejhul-islam, muftija al-Hamza, jasno proizlazi da je po naređenju Javuz Selima izvršen masakr nad alevitskim kizilbašama. U ovoj pravnoj presudi kizilbaše su proglasili otpadnicima (arap. *murtad*) i nevjernicima (arap. *kafir*), a njihovo ubijanje učinili obaveznom (arap. *vadžib*) za svakog vjernika. Historijski izvori navode da je prilikom ovog masakra pobijeno više od 40.000 nedužnih ljudi, među njima žene, djeca i starci.

³⁹ Šah Ismail Hataji, odnosno Ismail I., bio je šesti poglavar safavidskog reda i istovremeno prvi šah Safavidskog carstva. Prema historijskim zapisima, na ovaj svijet došao je 1487. godine u iranskom gradu Ardebilu. Nakon svog djeda šejh Džunejda i oca šejh Hajdara, značajno je doprinio osnaženju Safavidskog carstva. Njegova majka bila je Halime Alam Šah Begum, kćerka ak-kojunlu vladara Uzun Hasana (1423–1478).

Kada je Ismailov otac 1488. godine ubijen po naređenju Ferruh Jesara (1462–1500), vladara dinastije Širvanšah, jednogodišnji Ismail poslan je, zajedno sa majkom i braćom Sultan Alijem i Ibrahimom, kod ak-kojunlu vladara Jakuba u Širaz, gdje su četiri i po godine bili zatočeni u zamku Istahr. Nakon Jakubove smrti, njegov sin Rustem Bej preuzeo je upravljanje dinastijom Ak Kojunlu i oslobodio ih iz zarobljeništva. Ipak, kada je uvidio da su sinovi i pratnja (kizilbaše) šejh Hajdara prijetnja za njegovu vladavinu, naredio je ubistvo Sultan Alija, legitimnog nasljednika šejh Hajdara i poglavara safavidskog reda.

Zato su elitne kizilbaše najprije pomogle Ismailu i Ibrahimu da pobjegnu iz zatočeništva prema Ardebilu, a nakon toga za Lahidžan. Tamo je mladi Ismail imao priliku da od alevitskih učenjaka izučava osnove vjerovanja (arap. *Aqaid*), tumačenje Kur'ana (arap. *Tafsir*), kao i da proširi znanje iz arapskog i perzijskog jezika. Uz to, ratnici kizilbaše obučavali su ga ratnim vještinama. Godine 1501. utemeljio je u Tabrizu Safavidsko carstvo, nakon što ga je 7.000 kizilbaš ratnika iz turkmenskih plemena Ustaglu, Šamlu, Rumlu, Tekeli, Zulkadir, Avšar, Kačar i Varsak imenovalo za šaha.

Njegov prvi službeni čin bio je održavanje javne propovijedi o Dvanaest Imama (tr. *Oniki Imam Hutbesi*) i ozvaničenje džaferijske pravne škole (tr. *Džaferi Mezheb*) kao službene konfesije Safavidskog carstva. Za vrijeme njegove vladavine u carstvu je, pored birokratskog perzijskog, uveden turski (azerbejdžanski) jezik na dvoru i u vojsci. Utemeljenje jakog turskog carstva, naklonost anadolskih kizilbaša prema Šah Ismailu, kao i brojni politički ustanci alevitskih plemena turskog porijekla u Osmanskom carstvu, izazvali su veliku nelagodu

U ovoj bitci osmanlijske trupe, prije svega zbog nadmoći u naoružanju, odnijele su pobjedu nad alevitskim Safavidima. Sa vojskom od 80.000 odanih vojnika Šah Ismail Hataji suprotstavio se brojčano nadmoćnijim osmanlijskim trupama. Kada je trećeg dana, iako ranjen, želio preći u kontranapad, morao je, zbog malog broja preživjelih vojnika, napustiti bojno polje. Kao poraženi na bojnom polju, aleviti su od tada bili u bjekstvu od antisafavidskih osmanlijskih progonitelja. Bili su prinuđeni da se povuku u svoje enklave, zbog čega je kontakt sa drugim sljedbenicima Ehli Bejta, naročito Safavidima, bio otežan, a na kraju i potpuno prekinut.

Kada su osmanlijski vladari spoznali da protjerivanjem i masakrom nije moguće provesti cilj prisilne asimilacije ili poništenja alevitskog stanovništva, koncentrisali su se na alevitske vjerske obrazovne institucije. Sunitski učenjaci koji su bili odani vladarima infiltrirali su se u red Hadži Bektaš Velija i doveli ga pod državnu kontrolu. Osmanska državna politika predviđala je u ovom smislu asimilaciju, krivotvorenje, kao i na kraju iskorjenjivanje alevitske vjere. Cilj ovih nastojanja bio je, prije svega, ciljana i stupnjevita podjela anadolijskog alevitskog stanovništva u različite frakcije⁴⁰, kako bi se spriječila mogućnost ujedinjenja alevitskog stanovništva protiv Osmanskog carstva. Najkasnije od 16. stoljeća posebna pažnja se posvećivala potčinjavanju i formiranju alevitskih slojeva društva koji će biti podložni Osmanskom carstvu. Svi oni Aleviti koji su bili pod utjecajem infiltriranog beктаšijskog reda i koji su s vremenom postali lojalni (urbani) aleviti Osmanskom carstvu, od tada su se nazivali Bektašijama, dok je pojam kizilbaš odnosno rafidi⁴¹ (otpadnici, arab: rafidhi) korišten za dobronamjerne seoske alevite koji su bili naklonjeni Safavidima. Stoga su osmanski vladari anadolijske sljedbenike Ehli Bejta rijetko ili gotovo uopće nisu označavali alevitima u to vrijeme. Pir Sultan Abdal opisivao je u jednoj od svojih pjesama oblačivanje od Osmanlija na sljedeći način:

Pir Sultan kaže:

„Proklet bio Jezid!

Prokletnički njegovi lažljivci!

Ovo je bojno polje, izađite na otvoreno!

Nazivate li nas rafidijama? Recite!“

kod osmanlijskih vladara. Ovo je na kraju dovelo do toga da su se Šah Ismail i osmanlijski sultan Javuz Selim 1514. godine sudarili u bitci kod Čaldirana.

Pošto su osmanlijske trupe, po naredbi sultana Selima Javuza, upotrijebile vatreno oružje protiv kizilbaša koji su se borili sabljama, Šah Ismail je ranjen u ruku i pao je povrijeđen sa konja. Kako bi zaštitio život Šah Ismaila, njegov prijatelj (tr. *Musahip*) Mirza Ali Sultan povikao je da je on šah i tako pomogao stvarnom šahu da se izvuče sa bojnog polja. Šah Ismail umro je 24. maja 1524. godine u 37. godini života, te je ukopan u Ardebilu u dergjahu safavidskog reda.

⁴⁰ Aleviti, kizilbaši, tahtači, fellah, čepni, beктаši itd.

⁴¹ Pojam *rafidi*, odnosno *rafidija* (otpadnik, disident), klevetničko je obilježje koje je za vrijeme Emevija i Abasida korišteno za sljedbenike Ehli Bejta. Neki suniti ovaj prezrivi izraz koriste do danas za sljedbenike Ehli Bejta, budući da aleviti i šiiti odbacuju prvu trojicu halifa. Iz sunitske perspektive, time odbacuju „pravi“, naime sunitski islam.

Zbog tlačiteljske i progoniteljske politike u Osmanskom carstvu, upotreba termina alevit se izgubila, pošto su se vladari libili da svoje protivnike nazivaju alevitima, kao nasljednicima i sljedbenicima Imama Alija. Konačno, bojali su se da ustanici koje je predvodilo alevitsko svećenstvo ne izazovu simpatije među sunitima. Alevitski učenjaci su se uglavnom u svojim djelima nazivali alevitima, kako bi izrazili svoje slijeđenje Ehli Bejta. Ova činjenica je Na primjeru Pir Sultana opisana na sljedeći način:

Ljubav me izluđuje oduvijek,
Husejni, alevi sam ja. Šta hoćeš ti?
Zašto me vrijeđaš, neprijatelju puta?
Husejni, alevi sam ja. Šta hoćeš ti?

Imam Ali je suština vječnosti⁴²
Čak je i otrov iz ruke pira iscjeljujući
Naš pomagač je Muhamed al-Mustafa
Husejni, alevi sam ja. Šta hoćeš ti?

Dobili smo odobrenje od Imama Džafera, obavezne molitve
farz⁴³ i sunnet⁴⁴ od Musa-al Kazima
Milost vjernicima, prokletstvo na Jezida
Husejni, alevi sam ja. Šta hoćeš ti?

Ja sam svjetlost Imama Rize
Ja sam Ali rođen na Kerbeli
Ja sam melek smrti poricateljima, Jezidovcima
Husejni, alevi sam ja. Šta hoćeš ti?

Ja sam Muhamed Taki, ja sam Ali Naki
Pio sam od svog pojitelja Hasana al-Askerija
Oh dervišu, tajni uputitelj je Ali
Husejni, alevi sam ja. Šta hoćeš ti?

Pir Sultan pozva u Jemen i Indiju
Gospodaru Vremena dao sam zavjet, obećanje vjeere
Husejni, alevi sam ja. Šta hoćeš ti?

⁴² Ayn-i-beka: oko postojanja

⁴³ Farz: vjerska obaveza

⁴⁴ Sunnet: vjerska praksa

Iz stihova alevitskih mislilaca i pjesnika, kao što je Kul Šukru⁴⁵ ili Mehmed Ihlasi⁴⁶, također se može vidjeti da je pojam alevi i dalje bio široko rasprostranjen u Anadoliji:

Mehmed Ihlasi:

Mi smo zajednica alevijska, Hajdara
U moru spasa našao sam blago
Džaferije smo mi Elhamdullillah⁴⁷, džaferije
Našao sam svoje mjesto u plesu vjere.

Kul Šukru:

Zašto tužno plačeš jadikujući nad svojom nevoljom?
Kuju bol ima onaj ko voli Alija?
Kome se žališ na svoju patnju?
Kuju brigu ima onaj ko voli Alija?

Muhamed je Ali i Ali je Muhamed
Hasan i Husejn preuzeli su na sebe trud
Ne otvaraj nikome svoju ruku osim Aliju
Kuju brigu imao onaj ko voli Alija?

Imam Zejnu Abidin se pojavio sa Imamom Bakirom
Imam Džafer je kiša⁴⁸ za onoga ko iznosi svoju tugu,
Kojom aleviti kvase svoja lica
Kuju brigu ima onaj ko voli Alija?

Imam Kazim, Riza Šah-e Horasana

⁴⁵ Kul Šukru je bio bektašijski pjesnik koji je živio od kasnog 18. stoljeća do sredine 19. stoljeća. Također je pod pseudonimima Šukija i Deli Šukru pisao alevitsku poeziju. Pored toga, nisu prenesene detaljnije informacije o njegovom životu. Ipak, prenosi se da je jedno vrijeme služio u Dergjahu Abdul Muse, a kasnije u Kajgusuz Abdal Dergjahu u Kairu.

⁴⁶ Ihlasi je bektašijski pjesnik iz 19. stoljeća, čije pravo ime je bilo Mehmed. Iako je stalno koristio pseudonim Ihlasi, pod imenom Tokmak Baba stekao je veliku slavu. Prenosi se da je bio učenik Hafiz Salih Babe, predvodnika reda Karjagdi Babinog Dergjaha. Nakon njegove smrti 1899. godine, ukopan je u dvorištu tog reda u Istanbulu.

⁴⁷ Alhamdulillah: Hvala Bogu

⁴⁸ Kiša milosrđa

Imam Taki i Naki su utjeha za patnje
Bliži su nam nego mi sami sebi, oh Šah-e Merdan
Kuju brigu ima onaj ko voli Alija?

Imam Askeri, gospodar vremena Mehdi
Derviši uvijek u pokretu i lutanju, ludi Šukru, ovo je polje za bezbrižne
Kuju brigu ima onaj ko voli Alija?

Neki istraživači su mišljenja da je pojam išk najprije koristio Hadži Bektaš u mističnom značenju kao „čije unutarnje biće je prosvijetljeno“. Po jednoj drugoj teoriji, prag (tur: ešik), u skladu sa staroturskim (osmanskim) izgovorom, izgovara se kao išik, što aleviti smatraju svetim jer simbolizira ulazak u mistično područje (dergjah). Bazirano na ovoj teoriji smatra se da se alevitsko stanovništvo naziva Išiklar odnosno Işklar. U skladu sa trećim mišljenjem, naziv išk primjenjivan je na narodne pjesnike (tur: aşık), zbog toga što su učenje o Ehli Bejtu širili među anadolijskim stanovništvom. Dok su aleviti ove definicije koristili s ponosom, osmanlijski vladari primjenjivali su ih u pogrdnoj formi za alevitsko stanovništvo.

U vezi s tim, skrećem pažnju na to da se antiislamski orijentirani pokret Išikçilik pozivao u svojim teorijama često na pojam išik-insanlari (svjetlosni ljudi), kako bi uspostavio navodnu povezanost sa Luvijcima. Ipak, kod boljeg sagledavanja, može se primijetiti da se zastupnici ove teze ne mogu pozvati ni na kakve naučne dokaze, nego s velikom maštovitošću uspostavljaju navodnu povezanost alevita sa Luvijcima. Znanstvenici koji se bave istraživanjima na ovom polju ukazuju da se nikakvi kulturološki ili religiozni sporazumi između alevita i Luvijaca ne mogu dokazati.

Uzimajući sve zajedno u obzir, dolazi se do rezultata da je u 16. stoljeću, pored nekih regionalnih naziva za anadolijske alevite, korišten izraz: rafidije, kizilbaši, bektaši ili išiklar.

2.1.4 U sadašnjosti

Pojam alevi ponovo se pojavljuje u službenim osmanskim dokumentima tek u 19. stoljeću. Sve do tada ljudi su upotrebljavali samo nazive alevi, kizilbaš, bektaši, džafəri i dijelom šija, naizmjenično. Isto tako, sve do danas nailazimo na elegantne nazive Seyyid-i Sadat (Gospodar Gospodara) ili Evlad-i Resul (Poslanikovo potomstvo) kako bi se odala posebna počast onima čije porijeklo vodi do Poslanikove porodice. Unutar alevitske zajednice se zato ove dvije počasne titule naglašavaju kako bi se iskazala odanost vjerskom vođstvu, odnosno uzorna uloga Poslanikove porodice.

Iako su od vremena preseljenja Poslanika Muhameda pretežno postojale sunizmom prožete dinastije, koje su vladale većim dijelom islamskog svijeta, s vremenom je došlo neizbježno do različitih strujanja i oblika šiitskog i alevitskog islama. Ipak, činjenica je da su šiiti, zbog svoje naklonosti prema Ehli Bejtu, bili protjerivani i tlačeni; za mnoge alevite bilo je dovoljno da prevladaju teološke i kulturološke razlike kako bi ih simpatisali i s njima saosjećali. Zbog toga

se aleviti do 20. stoljeća identificiraju također i sa drugim sljedbenicima Ehli Bejta. Naprimjer, pakistanskog predsjednika Zulfikar Alija Bhutta (1928-1979) dugo se smatralo alevitom zbog njegovog šiitskog porijekla.

Tek s porastom ideologija stranih alevizmu (komunizam, nacionalizam itd.) pokušavale su neke grupe anadolske alevite i dalje držati u izolaciji kako bi ih na taj način mogle bolje instrumentalizirati za svoje političke ciljeve. Iako su ove političke spletke ostavile zasigurno dalekosežne posljedice među nekim alevitima, buđenje alevita nije moglo biti zaustavljeno. Aleviti, žedni znanja, nisu dozvolili da budu spriječeni da saznaju informacije o osnovama njihove religije, koje su im stoljećima uskraćivali tiranski vladari. Kako bi se i dalje izvršio utjecaj i prouzrokovalo nejedinstvo među njima, šire se različiti pogledi i teorije o stvarnom porijeklu alevizma. U sljedećim poglavljima razmotrit ćemo ove različite teze i njihove zastupnike.

2.2 Ko je alevit?

Ukratko, na početku postavljeno pitanje može se odgovoriti na sljedeći način: alevit je neko ko ispovijeda vjeru Imama Alija, i u skladu s tim djeluje. Ma koliko ova definicija djelovala jednostavno, utoliko se čini teškom njena primjena u svakodnevici. Naravno, cilj ovdje nije klasificirati ljude unutar ili izvan prethodno izložene definicije, već se, zapravo, radi o tome da se omogući pristup tragateljima prema njihovim vlastitim vjerskim učenjima. Jer, vremenom je značenje pojma alevi upotrebljavano na kontradiktorne načine. Zbog pojašnjenja je neophodno poduzeti negativnu definiciju: nije dovoljno biti rođen u alevitskoj porodici kako bi bio alevit. Kako je to objasnio Hadži Bektaš Veli, vjera se postiže razumom (tr: iman akil uzeredir). Ova izjava objašnjava da je oponašanje roditelja u vjerskim pitanjima u alevizmu isključeno. Posljedično, kao i u svim drugim religioznim pravcima, tako i kod alevizma, postoje osnove vjerovanja i uvjerenja koje se moraju internalizirati i živjeti. Zbog toga je od najvećeg značaja da se proučava osobnost i život Imama Alija ako se na sebe primjenjuje samo obilježje alevi, što pretpostavlja sljedbeništvo Imama Alija. Kako se iz historijskih izvora jasno može zaključiti, Imam Ali je živio pod brigom Poslanika Muhameda i slijedio ga pri svakom njegovom koraku. On je na najbolji način obrazovan i odgojen od Poslanika Muhameda i pripremljen za njegov kasniji zadatak kao Imama, tako da je Poslanik rekao:

„On (Ali) je prvi, ko je povjerovao meni i objavi koja mi je došla i ko će mi na Sudnje danu pružiti ruku. On je Siddik⁴⁹, on je Faruk⁵⁰ islamske zajednice. On rastavlja istinu od neistine i on je predvodnik pravovjernih.“⁵¹

⁴⁹ Siddik (arab: iskreni) je nadimak Imama Alija. Kako bi ovu vrlinu pripisali Ebu Bekru, suniti su otuđili ovaj nadimak od Imama Alija i pripisali ga Ebu Bekru, kako bi mu iskazali počast.

⁵⁰ Faruk (arab: razdvajanje istine od neistine) je nadimak Imama Alija. Kako bi Omeru, drugom halifi, suniti pripisali vrlinu, ova titula je otuđena, i do danas je suniti koriste kao nadimak Omeru.

„Ja sam grad znanja, a Ali je vrata toga grada. „

„Ja (Muhamed) sam upozoritelj, Ali je vodič. Nakon mene će biti samo ispravno upućeni, koji se tebe (Ali) drže.“

Jednako tako postoje propisi kao i zapovijedi koje vjernik mora slijediti. Nekoga ko je rođen u alevitskoj porodici najprije se smatra samo djetetom alevitskih roditelja. Tek kada osoba internalizira alevitske osnove i svjesno se odluči za alevitski put, može se nazvati alevitom. Apsurdno je klasificirati ljude kao alevite samo zato što su rođeni u alevitskoj porodici, dok osnove alevizma ili čak religije kao takve odbijaju. Posljedično tome, osobu koja alevizam posmatra izvan islamskih okvira i odbacuje osnovne postulate alevizma ni u kojem slučaju ne može se nazvati alevitom. Kako bismo ovu situaciju objasnili, možemo pretpostaviti da neko ko je rođen u kršćanskoj porodici jednog dana odluči da više ne vjeruje u Isusa, Bibliju i druge središnje osnove kršćanstva. Bilo bi izuzetno čudno da se jedna osoba naziva kršćaninom, a istovremeno odbija osnovne sadržaje kršćanskog učenja. Jednako tako bilo bi kontradiktorno kada bi se osoba nazivala alevitom, a istovremeno odbijala suštinske izvore alevizma i orijentirala se van islamskog učenja.

3 Teorije o prirodi Alevizma

3.1 Da li je alevizam neovisna religija (din)?

Niz autora koji istražuju na području alevizma zastupaju stajalište da je alevizam neovisna religija. Tim prije svega treba naglasiti da je alevizam vjera izvan islama. U tom kontekstu autor Fuat Bozkurt definira alevizam na sljedeći način:

„Po mome uvjerenju, alevizam je nastao, proizašavši kroz niz društvenih rekonstruiranja u Anadoliji. Iako je to isključivo anadolijska religija, mogu se prepoznati različite karakteristike drugih predazijskih religija. Međutim, islam joj je bio samo nametnut i nije mogao izvršiti značajan utjecaj.“

Poruka ove izjave je nedvosmislena i očita. Po ovoj tvrdnji, alevizam je nastao kroz sintezu različitih bliskoistočnih religija. Isto tako, ova teza postavlja da je alevizam jedna neovisna i nova religija koja tek samo pokazuje neke islamske elemente. Kada se pozovemo na druge istraživače⁵², trebalo bi da je alevizam nastao kroz doticaj elemenata iz židovstva, kršćanstva, zoroastrizma, šamanizma, hinduizma, jezidizma i još nekih religija. Čudno je da se zastupnici ove teorije, bilo da je riječ o naučnim ili nenaučnim objavljivanjima, oslanjaju

⁵¹ Ibn Askari: Tarih Dimašk, tom.1, str. 87.

⁵² Neki autori koji zastupaju ovu tezu su: Čemšid Bender, Nejat Birdogan, Fuat Bozkurt, Anton Josef Dierl, Mehmet Eroz, Ismet Zeki Eyubodžlu, Lutfi Kaleli, Baki Oz, Ali Sumer, Cemal Šejner & Riza Zelyut.

na teško održive tvrdnje. U jednoj od ovih teza pokušavaju očajno pokidati mudre misao tokove u pjesmama visoko uglednih alevitskih filozofa, kao što je Junuz Emre⁵³, Pir Sultan Abdal, Šah Ismail Hatayi, Seyyid Nesimi⁵⁴ ili Fuzuli⁵⁵, kako bi potkrijepili svoje tvrdnje. Nakon detaljnijeg promatranja njihovih istraživačkih metoda, brzo postaje jasno da se ovi pisci nisu nimalo potrudili kako bi shvatili dublja značenja i mudrosti ovih dragocjenih pjesama. Osim toga, ove osobe ne slijede ništa manje osim intencije da iskrive osnove vjerovanja alevizma.

Kako bi se čitatelju ponudila objektivna i sveobuhvatna predodžba vezano za ovu tematiku, sigurno je od koristi da se osvrnemo na osobine ovih ličnosti. Kako će u narednom poglavlju biti iscrpno obrađeno, neki od ovih autora sami se otvoreno očituju kao ateisti, u osobi Poslanika Muhameda vide tek samo filozofa i dovode u pitanje predvodništvo (arap: Wilaya, tr: Velayet) Dvanaest Imama.

Stoga se mora postaviti pitanje u kojoj mjeri su izjave takvih osoba o alevizmu autentične, ukoliko strastveno odbacuju elementarne osnove alevizma i očito ih iz osobnih motiva, a ne naučne objektivnosti, izlažu. Na kraju, upitno je da li spomenuti stručnjaci, koji tumače tekstove alevitskih pjesnika i učenjaka, mogu iste interpretirati i izlagati dok osnovne principe alevitskog učenja kao takve ne prihvataju.

⁵³ Junus Emre je bio poznati anatolijski putujući derviš i mistik, a danas ga se smatra začetnikom turske pjesničke kulture. Pošto ne postoje tačni podaci o njegovom obrazovnom putu, pretpostavlja se da je pohađao medresu i tako govorio arapski i perzijski jezik. Još pored toga se pretpostavlja da je bio stručnjak za grčku mitologiju i historiju. Iako su njegovi pogledi na misticismizam, kao i brojne pjesme, izvršili veliki utjecaj na alevizam, on uživa veliko interesovanje i od turskih sunita. Po historijskim zapisima, rođen je 1240., a umro 1321. godine.

⁵⁴ Seyyid Imadeddin Nesimi bio je poznati azerbejdžansko-turkmenski pjesnik divanske poezije po tradiciji sufija hurufija. Po historijskim zapisima, on je 1369. godine došao na svijet u azerbejdžanskom gradu Šamahiju. Prenosi se da je odrastao u mjestu Nesim (Irak) i da je pored arapskog i perzijskog jezika stekao duboko duhovno sufijsko znanje. Prenosi se da je bio zet nasljednika i halife Fadlullaha Asterabadija (1340–1394), kasnijeg utemeljitelja hurufijskog reda. Ponekad ga zbog sličnosti imena zamijene s alevitskim pjesnikom Kul Nesimijem (17. st.). Zbog njegovih proturječnih stavova prema ortodoksnom islamu, Seyyid Nesimi je od tadašnjih vladara bio proganjan. Nakon što je Timur Lenk (1336–1405) ubio Fadlullaha Asterabadija, Nesimi je izbjegao u Siriju. Zbog njegovih pogleda prema misticismizmu, on je proganjan i u Siriji, proglašen otpadnikom (arap: murtad), a potom je 1417. godine u Alepu živ oderan (skidanje kože sa živog tijela).

⁵⁵ Mehmed Fuzuli je jedan od najvećih i najpoznatijih alevitskih pjesnika. Njegovo pravo ime glasi Muhamed ibn Sulejman. On potječe iz porodice iz linije Bayata, turskog plemena Oghusen (tr. Oğuz), koji su napustili nomadski život i nastanili se u današnjem Iraku. Pošto jedva da postoje dostupni dokazi, pretpostavlja se da je rođen 1483. godine, tokom dinastije Akkoyunlu, u Kerbeli, Nedžefu ili mjestu Kale u blizini grada Kirkuka. Prvo školsko obrazovanje stekao je od svog oca, koji je kao ugledan vjerski učenjak djelovao u gradu Hille (grad između Bagdada i Nedžefa). Iako je malo poznato o njegovim obrazovnim stupnjevima, iz njegovih djela jasno proizilazi da je morao dobiti veoma dobro obrazovanje iz islamskih znanosti. Njegove pjesme napisane su na turskom, perzijskom i arapskom jeziku, što također ukazuje na njegovu obrazovanost. U suprotnosti naspram drugih turskih divanskih pjesnika svoga vremena, on je svoje pjesme pisao na jednostavan i narodu razumljiv način. U svojim pjesmama uglavnom je obrađivao mistične teme i naklonost prema Ehli Bejtu, tako da je izvršio utjecaj na mnoge pjesnike divanske poezije koji su nakon njega došli. Pretpostavlja se da je 1556. godine umro od kuge ili epidemije kolere u Kerbeli. U svojim pjesmama namjerno je koristio pseudonim Fuzuli, što znači „prekomjerno“, kao i „od velike vrijednosti“ (množina od fadl)

Stoga je očito da se sa antiislamskim i time antialevitskim pristupom ovoj tematici nije u stanju prepoznati dublja značenja i mudrosti u izjavama velikih alevitskih mislilaca i duhovnjaka, niti ih potpuno ispravno reproducirati.

U jednoj od idućih teorija, postavke za svoje tvrdnje temelje na paralelama sa drugim bliskoistočnim i predislamskim religijama. Argumenti i dokazi koji se u ovom smislu iznose moraju se kritično preispitati, pošto nisu bazirani ni na kakvim naučnim istraživanjima. Iako za istraživanje porijekla alevizma nije neophodno biti musliman, ovi istraživači ne smiju pristupati alevizmu sa svojim vlastitim antiislamskim svjetonazorom i tumačiti ga prema vlastitim idejama. Konačno, očita je nužnost imati suosjećanje sa alevitsko-islamskom mišlju i strukturom analize kako bi se time dobili valjani rezultati. Međutim, s obzirom na to da autori tako kruto pokušavaju uspostaviti vezu između alevizma i bliskoistočnih i predislamskih religija, neizbježno se dolazi do zaključka da su ovi istraživači ili vrlo nesposobni ili djeluju iz osobnih razloga, poput političke motivacije.

Kao i svi muslimani, također i alevitski muslimani su čvrstog uvjerenja da je od Poslanika Adema do Poslanika Muhameda poslano 124.000 poslanika sa jednakom porukom i religijom, te je time prva religija na zemlji vjera u jednog boga (monoteizam).

Nastajanje politeističkih religija može se pratiti (iz islamske perspektive) do činjenice da su se ljudi s vremenom odvojili od pravog puta i vođstva Poslanika a.s. Pri tome su ove novonastale religije, pored njihovih zabludjelih uvjerenja, i nadalje zadržale obilježja izvornog monoteističkog vjerovanja. Zato nije čudno da su se božanski vjerski elementi poslaničke linije od Adema do Poslanika Muhameda pronalazili i u bliskoistočnim i predislamskim religijama. Uostalom, sve ibrahimovske religije zasnivaju se na jednoj izvornoj religiji, zbog čega se podrazumijeva da moraju postojati sličnosti među ovim vjerskim pravcima.

Nadalje, ovi samozvani prosvjetitelji ne spominju da se prilikom analize ovog osjetljivog pitanja mora napraviti razlika između kulture i religije, jer je stav islama prema stranim kulturama izuzetno značajan. Suprotno uvriježenom mišljenju da je islam usko povezan s prisilnom arabizacijom, islamska učenja poticala su nastavak i njegovanje kulturnih elemenata sve dok nisu u proturječju sa islamskim propisima. Visoka vrijednost koja se pridaje kulturnoj raznolikosti u islamu također je vidljiva u sljedećim kur'anskim ajetima:

“O ljudi, Mi vas od jednog čovjeka i jedne žene stvaramo i na narode i plemena vas dijelimo da biste se upoznali. Najugledniji kod Allaha je onaj koji Ga se najviše boji, Allah, uistinu, sve zna i nije Mu skriveno ništa.”⁵⁶

A da je tvoj Gospodar htio, sve bi ljude sljedbenicima jedne vjere učinio. Međutim, oni će se uvijek u vjerovanju razilaziti.”⁵⁷

⁵⁶ Sura al-Hudžuret, ajet 13 (49:13)

⁵⁷ Sura Hud, Ajet 118 (11:118)

A Jedan od dokaza Nejgovih je stvaranje nebesa i Zemlje i također raznolikost vaših jezika i boja vaših. U tome su zaista pouke za oni koji razumiju.⁵⁸

Zbog toga su brojni kulturni elementi različitih naroda mogli nastaviti da postoje, a koji nisu bili u suprotnosti sa islamom. Prema tome, elementarna religijska uvjerenja i vjerski sadržaji stalno su u svojoj srži isti i zbog toga ne trpe nikakvu promjenu. Nasuprot tome, kulture koje nastaju spajanjem različitih, kako materijalnih tako i nematerijalnih vrijednosti, time bivaju izložene prirodnim promjenama. One bivaju prožete novonastajućim datostima pa tako i promjenama. Kako bi se inače danas drugačije objasnili divergentni kulturološki elementi unutar iste vjerske zajednice? Američki religijski sociolog Peter Ludwig Berger vezano za ovo navodi sljedeću definiciju o kulturi:

„Kultura je ljudski proizvod i mora stalno biti obnavljana. Otuda su kulturološke strukture izložene sigurnoj promjeni.“

Na osnovu velike tolerancije naspram kulturoloških elemenata iz predislamskog perioda, koji nisu u suprotnosti sa islamom, ti narodi su svoju tradiciju i običaje nastavili da njeguju i nakon njihovog prelaska na islam, te nastavili da ih prakticiraju. Konačno, Malik al-Aštar⁵⁹ je od Imama Alija imenovan za upravitelja Egipta, i njemu je bilo naloženo da poštuje različite kulture koje nisu u suprotnosti sa islamom. Iz ovog naloga Imama Alija jasno je zaključiti da ne postoje ograničenja pri očuvanju kulturoloških elemenata iz predislamskog perioda, sve dok su ti običaji, tradicija i postupci u saglasnosti sa islamskim propisima. Polazeći od ovog stajališta, nije održiva tvrdnja da je alevizam van islama, i da je to vjerovanje na koje je islam izvršio samo površno utjecaj, zato što se u alevizmu mogu pronaći predislamski kulturološki elementi. I pored toga su spomenuti autori odlučni da javnosti nametnu svoja stajališta. Tako se naprimjer tvrdi da Čerag⁶⁰ svoju svetost povlači iz svetosti vatre, i time zoroastrizma, jer se vatra u zoroastrizmu smatra svetom. Po ovoj logici, svaki bi čovjek morao dokazati

⁵⁸ Sura ar-Rum, Ajet 22 (30:22)

⁵⁹ Malik al-Aštar, punog imena Malik ibn el-Haris al-Nakhai, bio je plemenski vođa iz Jemena i veoma blizak povjerenik i sljedbenik Imama Alija, koji je za vrijeme Poslanika Muhameda prihvatio islam. Prema zapisima, izgleda da se rodio 589. godine. Tokom vladavine trećeg halife Osmana učestvovao je u pokopu poslanikovog prijatelja Ebu Zerra, te je zbog toga protjeran u Homs (Sirija). Kada su se nemiri povećali u cijeloj zemlji, otišao je u Medinu i učestvovao u opsadi Osmanovog sjedišta moći. Nakon ubistva Osmana, Malik je bio jedan od najutjecajnijih ljudi koji su pozivali na vjernost Imamu Aliju. Zato mu je kasnije Muavija prebacivao da je bio saučesnik pri Osmanovom ubistvu. Tokom halifata Imama Alija učestvovao je u bitci kod Deve i bitci na Sifinu, te ga je nakon toga Imam Ali imenovao za upravitelja Mosula i Šingaka kako bi odbacio Muavijin utjecaj. Kada je Muavija nakon bitke na Sifinu želio proširiti svoj utjecaj na sjevernu Afriku, Imam Ali ga je imenovao za upravitelja Egipta. Ipak, prije nego što je mogao ući u Egipat, 658. godine otrovan je od Muavijinih sljedbenika. Njegov sin Ibrahim b. Malik al-Aštar (636-691) bio je jedan od ljudi koji su htjeli osvetiti ubistvo Imama Husejna i priključio se ustanku Muhtara al-Thakafija (623-687).

⁶⁰ Čerag u Alevitskoj upotrebi označava nešto kao svjetlost svijeće i pali se tokom ceremonije Džem, a vezano za ajete 35-36 24. sure Nur iz Kur'ana. Pri tome se jedna za drugom upale tri svijeće uz riječ: Bi nur-Azametike (Svjetlo tvoje uzvišenosti) Ya Allah ya Allah ya Allah. Ve bi Nur-u Nubuvvetike (i svjetlom tvoga poslanstva) ya Muhamed ya Muhamed ya Muhamed. Ve bi Nur-u Velajetike (i svjetlom tvoga predvodništva) ya Ali ya Ali ya Ali! Ovaj dio džem ceremonije se naziva buđenje svijećom. Tokom džem cereominije buđenje božanskog svijetla zauzima poseban značaj. Osoba koja izvodi ovo bogoslužje, naziva se ili čeragdži ili delilci (osvjetlitelj).

zoroastersko porijeklo budući da vatru koriste svi ljudi na svijetu. Isto tako moralo bi se, po toj teoriji, kako u judeizmu, tako i u kršćanstvu podozrijevati zoroasterski korijeni, jer svijeća igra veliku ulogu kod judeizma prilikom Hanuke⁶¹ i blagdana Sabbat⁶². Pri tome se nešto ne mora nužno smatrati svetim samo zato što se koristi. Naprotiv, islam potiče kulturološku raznolikost među vjernicima sve dok ti običaji i praksa nisu u suprotnosti sa islamskim propisima. Budući da slavlja festivala, praznika i dana žalosti nužno moraju slijediti fiksni kalendar, u muslimanskoj kulturnoj sferi postoje dva kalendara. Dok se islamski praznici i dani žalosti temelje na lunarnom kalendaru (arap. Taqvim Hidžri Qamari)⁶³, oni kulturni praznici koji potječu iz predislamskog perioda općenito se slave prema solarnom kalendaru (arap. Taqvim Hidžri Šemsi⁶⁴).

Pošto su nearapski narodi prije prihvatanja islama svoja kulturološka slavlja, praznike i dane žalosti najčešće obilježavali po solarnom kalendaru, one praznike koji nisu ni u kakvoj suprotnosti sa islamom nastavili su i dalje njegovati po solarnom kalendaru. Istovremeno su one običaje i prakse koji nisu u saglasju sa islamskim propisima napustili. Kako bismo ovo naglasili s posebno interesantnim primjerom, može se spomenuti blagdan nove godine Nouruz (tr: Nevruz). Nouruz u prevodu znači „novi dan“ i svake godine se obilježava kod mnogih azijskih naroda po solarnom kalendaru 21. marta. Iako se historijski posmatrano radi o prazniku starom 2.500 godina iz bliskoistočnog ili centralnoazijskog kulturnog prostora, sve do današnjeg dana se obilježava prvenstveno u perzijskom, kurdskom i turkmenijskom kulturnom prostoru 21. marta. Međutim, u arapskom kulturnom prostoru se festival Nouruz jedva susreće, pošto Arapi koriste islamski lunarni kalendar. Shodno tome, nastaje fenomen da anadolijski aleviti, iranski šiiti, kao i afganistanski šiiti, obilježavaju dan Nouruz, ali šiiti u arapskom kulturnom prostoru (Irak, Sirija, Libanon itd.) ne slave ovaj dan. Zagovornici ove tradicije oslanjaju se na predaje da se više značajnih događaja dogodilo na ovaj dan. Vezano za ovo, od Imama Džafer Sadika se prenosi:

„Dan Nevruz je dan na koji je Poslanik Muhamed u Gadir Humu tražio da se da prisega Imamu Aliju, kada su prisutni potvrdili njegovo predvodništvo (arap: Wilaya).“

⁶¹ Hanuka (Festival svjetla) koji traje osam dana, slavi se jednom godišnje kao sjećanje na ponovno posvećenje Drugog Hrama (Zerubabelov hram) u Jerusalemu 164 godine pr. Krista.

⁶² Sabat (dan mirovanja) u Judeizmu sedmi dan u sedmici (Subota), dan na koji ne treba da se radi.

⁶³ Taqvim Hidžri Kamari označava islamsko računanje vremena po lunarnom kalendaru, koji počinje iseljenjem Poslanika Muhameda iz Meke 622 godine n.kr. Pošto kod lunarnog kalendara slijedi vremensko računanje po Mjesečevim fazama, zavisno od lunarne faze je kraća je 10 ili 11 dana od gregorijanskog kalendara.

⁶⁴ Taqvim Hidžri Šemsi označava islamsko računanje vremena po solarnom kalendaru, koje počinje iseljenjem Poslanika Muhameda iz Meke 622. godine n. e. U perzijskom, afganistanskom i kurdskom kulturnom prostoru se pored islamskog mjesečevog kalendara primjenjuje i islamski solarni kalendar. U Osmanskom Carstvu ova vrsta islamskog računanja vremena se također koristila. Preračun islamskog kalendara moguć je jednostavnim oduzimanjem broja 621. Tako 2018. godina po gregorijanskom kalendaru odgovara 1397. godini u islamskom solarnom kalendaru.

Dobro za one koji su ostali pri tome, a teško onima koji su otkazali svoju vjernost. Nevruz je onaj dan, na koji je plemeniti Poslanik Imama Alija u jednoj dolini spojio sa Džinima⁶⁵, kako bi od njih zatražio zakletvu na vjernost. Nevruz je onaj dan, na koji je Imam Ali u bitci kod Nahravana⁶⁶ odnio pobjedu. Nevruz je onaj dan na koji će se pojaviti naš uzdignuti (Imam Mehdi), i na koji će mu Allah dati da odnese pobjedu nad Dedžalom⁶⁷.

U skladu sa drugim hadisima na dan Nevruza trebalo bi da se nasukala lađa poslanika Nuha na planini Džudi, a i da je poslanik Ibrahim porušio kipove. Zato je izgleda Poslanik Muhamed na ovaj dan dobio svoju prvu objavu i Imama Alija nakon osvajanja Meke podigao na svoja ramena, kako bi očistio Kabu od kipova.

Pored toga može se skrenuti pažnja u ovom kontekstu na komstvo (tur: kirvelik)⁶⁸, koje je vjerovatno preuzeto iz religijske prakse jezidijskih Kurda.

Pošto prakticiranje kumstva ni u kom pogledu nije u suprotnosti sa islamskim vjerskim sadržajem, preuzeto je u kulturu življenja prije svega od istočnoanadolijskih alevita, kao i od sunitskih Kurda i šiitskih Azeri-Turaka, koji žive u geografskoj blizini jezidskih Kurda. Pri tome, kod zapadnoturskih alevita (npr. Tahtači) kumstvo nije rasprostranjeno. Prema tome, obilježje prakse Kirvelika se ne može prihvatiti kao obilježje alevizma i, uopšteno posmatrano, ne može se preko ovog običaja alevizam dovesti u vezu sa jezidizmom. Prema tome, kod kurdskih sunita i šiitskih Azeri-Turaka moraju se tražiti drugačije dodirne tačke sa jezidizmom, što bi vodilo još jednoj većoj zabludi. Treba reći da alevizam podržava kulturne izraze koji nisu u suprotnosti sa učenjem Poslanika Muhameda, Dvanaest Imama i alevitskih svetaca. Na temelju ovih dokaza proizlazi zaključak da alevizam nije samostalna religija, nego da ga treba svrstati unutar islama. U sljedećoj pjesmi Pira Sultana Abdala ova činjenica jasno dolazi do izražaja:

⁶⁵ Džin je u islamskom učenju biće koje se ne može čulima percipirati. Nasuprot ljudima, koji su stvoreni od blata, i melecima, koji su stvoreni od svjetlosti, oni su stvoreni od vatre (pogledaj: Sura al-Hidžr, 27. ajet). U islamskim izvorima se prenosi da se radi o nematerijalnim bićima koja posjeduju razum (arap: Aql) i koja, pored ljudi i meleka, žive u paralelnom svijetu na Zemlji. Zbog toga su oni ljudima vidljivi samo u izvanrednim situacijama.

⁶⁶ Nahravan je mjesto na kojem se vojska Imama Alija sukobila s odmetnutim haridžijama. Haridžije su se nakon bitke na Sifinu (657) okrenuli protiv legitimnog halife Imama Alija i objavili mu rat. Prethodno su haridžije prinudili Imama Alija na primirje s Muavijom, pošto su ovi, kao prevaru protivničkih trupa, listove Kur'ana nabili na koplja i time preplašili haridžije. Nakon toga su naivni među vojnicima Imama Alija odbili da se bore protiv Muavijine vojske, pošto nisu htjeli da se bore protiv Knjige Božije. Kada su kasnije uvidjeli svoju grešku, optužili su Imama Alija za otpadništvo, te su se borili protiv njega i njegovih sljedbenika.

⁶⁷ Dedžal se u islamskim izvorima opisuje kao zla osoba koja će se pojaviti prije Dana proživljenja (arap: Yaum al-Qiyama). Njegova pojava će se dogoditi kratko prije povratka Imama Mehdiya i poslanika Isa. Uporediv je sa antikristom i židovskim predajama o Armilusu.

⁶⁸ Pod kirvelik (kumstvo) razumijeva se preuzimanje takozvanog kumstva kod obrezivanja djeteta. Ova osoba u određenom smislu izvršava očinsku ulogu i pri obrezivanju drži dijete. Zavisno od regije, za to se primjenjuju nazivi kirve, kivra ili kivre.

Gledao sam ružičnjak sa jedinom ružom
Ali je onaj koji dolazi sa jutarnjim povjetarcem
Muhamed je vodič na Sudnjem danu
Ali je onaj koji nosi zastavu islama

3.2 Alevizam je pravna škola (mezheb)?

Arapski pojam za pravnu školu glasi mezheb (tr: mezhep) i izvodi se iz arapskog glagola zahaba (ići). Mjesto nastanka različitih pravnih škola u islamu smješta se oko 100. godine nakon Poslanika Muhameda, pošto za vrijeme njegovog života nisu postojale pravne škole unutar islama. Naime, bilo je isključeno da nastupe različiti pogledi i prakse u vjeri, pošto su muslimani u tom periodu, kod svih pitanja koja bi se pojavila, mogli posjetiti Poslanika kao zadnju vjersku instancu. Neposredno nakon preseljenja Poslanika Muhameda, nastala su prva razmimoilaženja u mišljenju među muslimanima kada su neki prekršili prisegu koju su dali na Gadir Humu i porekli predvodništvo Imama Alija. Prije svega jer su mnogi muslimani ignorisali pravo na vođstvo, kao i interpretativni autoritet Ehli Bejta nad časnim Kur'anom, nastala su različita strujanja. Samo se mali broj muslimana pozvao na časne ajete iz Kur'ana i predaje Poslanika Muhameda o Ehli Bejtu. Neki primjeri za takve Poslanikove izjave, koje se mogu naći čak i u sunitskim djelima o predajama, glase:

„Ostavljam vam dvije vrijedne stvari: časni Kur'an i moj Ehli Bejt.“

„Ja sam grad znanja, a Ali je vrata toga grada.“

„Moj Ehli Bejt je kao Nuhova lađa.“

Iako je vođstvo islamske zajednice pripadalo Imamu Aliju, ovi događaji su doveli do nezakonitog preuzimanja vlasti prve trojice halifa, što je dovelo do tvrdnje u sunitskom islamu da nasljednik Poslanika nije određen Božijim naređenjem i utvrđen od Njegovog Poslanika, nego da je ta odluka prepuštena muslimanima.

Isključujući cijelu islamsku zajednicu, nekoliko osoba⁶⁹ se okupilo 632 godine nakon preseljenja Poslanika Muhameda u mjestu Sakifa, kako bi odredili nasljednika Poslanika. Dok su Ehli Bejt i vodeći pripadnici Hašimija⁷⁰, bili zauzeti sa ukopom Poslanika, Ebu Bekr (572-634) je izoliran od javnosti izabran za halifu. Iz jedne razmjene pisama između Muavije⁷¹ i

⁶⁹ Kod ovih osoba radi se o Ebu Bekru, Omer ibn al-Hatabu i Ebu Ubejdi od iseljenika (arap: Muhadžira) kao i Saad ibn Ubada i Sabit ibn Qays od pomagača (arap: Ensar).

⁷⁰ Hašimije (arap. Beni Hašim) je iz plemena Kurejš. Poslanik Muhamed i Imam Ali bili su pripadnici toga plemena.

Muhamed ibn Ebu Bekra⁷², vjernog sljedbenika Imama Alija, jasno se vidi da je događaj u Sakifi od kasnijih halifa korišten kao opravdanje za nezakonitu uzurpaciju halifata. Sadržaj ove razmjene pisama ne omogućuje samo veliki uvid u tok ovih dešavanja pokoljenjima koja dolaze, nego rasvjetljava misaonu strukturu obje strane:

Pismo Muhameda ibn Ebu Bekra Muaviji:

Ovo je pismo od Muhameda ibn Ebu Bekra zabludjelom sinu Sahra (Ebu Sufjana). Selam onima koji se pokoravaju Allahu i predaju Mu se. Bez sumnje, Allah je stvorio svoja stvorenja sa svom Svojom uzvišenošću, suverenošću i moći, bez da podlegne slabosti ili naporu. On ih je stvorio kao Svoje robove, iako nema potrebu za njihovim stvaranjem. Na kraju, podijelio ih je u dvije grupe: nesretne i sretne, zabludjele i one koji su na pravom putu. Potom je Svojim vječnim znanjem odabrao one koji su na pravom putu. Među njima je odabrao Muhameda (neka su Allahov selam i blagoslov na njega i čeljad njegovu) za svoje poslanstvo i učinio ga sigurnim za Svoju objavu. On ga je poslao kao pečat prethodno objavljenih knjiga i

⁷¹ Muavija ibn Ebu Sufjan bio je sin Ebu Sufjana (560–652), koji je predvodio vojsku kurejšijskih idolopoklonika u bitkama na Uhudu i Hajberu. Prema historijskim zapisima, rodio se 602. godine. Muavijina majka bila je Hind bint Utba (580–635), poznata ličnost Meke, koja je prilikom bitke na Uhudu naredila ubistvo Hamze ibn Abdulmutaliba (568–625), amidže Poslanika Muhameda, a potom oskrnavila njegovo tijelo. Kada su muslimani zauzeli grad Meku 630. godine, Muavija je zajedno sa svojim ocem Ebu Sufjanom i majkom Hind prihvatio islam iz straha da se muslimani ne osvete.

Nakon preseljenja Poslanika Muhameda 632. godine, tokom halifata Omera, Muavija je učestvovao u bitkama protiv Bizantijaca, te je na kraju 640. godine imenovan upraviteljem Sirije. Kada je Osman ubijen, Imam Ali je uz pomoć naroda dobio vlast na koju je imao pravo. Sa početkom halifata Imama Alija, Muavija je smijenjen sa svoje pozicije upravitelja Sirije. Plašeći se da će njegovo uklanjanje dovesti do slabljenja Umejada, izazvao je vojnu pobunu protiv legitimnog halife, Imama Alija. Bitka u kojoj su se suočile vojske Imama Alija i Muavije u historijskim knjigama navedena je kao rat na Sifinu.

Nakon pogibije Imama Alija, Muavija je nastavio rat sa Imamom Hasanom, nasljednikom Imama Alija. Kada je iračko stanovništvo odbilo podršku Imamu Hasanu i prinudilo ga na primirje sa Muavijom, Muavija je uzurpirao halifat, imenovao sebe halifom i time ustanovio dinastiju Umejada. Kada je 680. godine preminuo, ostavio je svoga sina Jezida kao nasljednika, iako je to bilo u suprotnosti sa uslovima mirovnog ugovora koji su stajali u sporazumu sa Imamom Hasanom.

⁷² Muhamed ibn Ebu Bekr se rodio 632. godine, u kratkom periodu prije ili nakon oprosnog hadža Poslanika (arap: *Hajjat al-Wida*). Kada je njegov otac Ebu Bekr preminuo, imao je tri godine. Zajedno sa svojom majkom Esmom bint Umays (umrla 661), koja je bila odana sljedbenica Ehli Bejta, preselio se u kućanstvo Imama Alija. Tako je on odrastao pod nadzorom Imama Alija.

Muhamed ibn Ebu Bekr je bio jedan od najpoznatijih kritičara trećeg halife Osmana i učestvovao je u opsadi sjedišta Osmanove vladavine. Nakon Osmanovog ubistva, Muhamed ibn Ebu Bekr je bio jedan od najutjecajnijih ljudi koji su pozivali na vjernost Imamu Aliju. Zato mu je kasnije Muavija prebacivao da je bio saučesnik u ubistvu trećeg halife. Tokom halifata Imama Alija, učestvovao je u bici kod Deve i bici na Sifinu, te je na kraju imenovan za upravitelja Egipta kako bi suzbio Muavijin utjecaj.

Kada je Muavija, nakon bitke na Sifinu, mogao proširiti svoj utjecaj na sjevernu Afriku, sirijska vojska pod komandom Amra ibn Asa umarširala je u Egipt. Nakon borbe, Muhamed ibn Ebu Bekr je zarobljen. Kako bi se narugao vojsci Imama Alija, po Muavijinom nalogu Muhamed ibn Ebu Bekr je ubijen 658. godine, svezan za leš magarca i spaljen. Nadalje, njegova otkinuta glava poslana je u Kufu kako bi ponizio protivnika (Imama Alija). Ovaj brutalni čin doveo je do toga da se Poslanikova žena Aiša bint Ebu Bekr okrenula protiv Muavije i politički se distancirala od njega.

kao poslanika i uputitelja za šerijat. On je ljude pozivao mudrošću i dobrim savjetima na put Gospodara. Ovom pozivu se kao prvi odazvao njegov brat i rođak Ali ibn Ebu Talib (neka je Allahov mir na njega) tako što je prihvatio islam. On (Ali) je potvrdio njegovu poruku, dao mu prednost u odnosu na svu ostalu rodbinu i pokušavao ga zaštititi, žrtvujući se prilikom svih opasnosti. On (Ali) pobijedio je one koji su se borili protiv Muhameda, a bio je u miru sa onima koji su bili u miru sa njim. Nikada se nije sustezao da se žrtvuje – niti u svojim borbama (džihad), niti ga je bilo kojom drugom prilikom neka osoba nadišla ili dosegla njegov stupanj. Onda vidim tebe (o Muavija) kako mu konkurišeš, iako si ti ono što jesi! Ko si ti, a ko je Ali? On je prvi musliman među ljudima i raspolaže iskrenom namjerom, najčistijeg je porijekla, ima najčestitiju ženu (Fatima) i najuzvišenijeg rođaka (Muhameda). Nasuprot tome, ti si prokleti sin prokletnika (Ebu Sufjana). Ti i tvoj otac uvijek ste pokušavali napasti Allahovu vjeru i ugasi Allahovo svjetlo. Pri tome ste se služili svim mogućim sredstvima; tvoj otac je na ovome putu sa tom namjerom umro, kako bi ovaj zadatak nastavio, a ti postao nasljednik svoga oca. Najjasniji dokaz za to jeste da su vođe protivnika i onih koji stvaraju probleme protiv Allahovog Poslanika kod tebe našli utočište. Potvrda za moje riječi o Alijevoj iskrenosti jeste to da su uz njega, i pored njegovih očitih vrlina, i ensarije (medinski pomagači) i muhadžiri (mekanske izbjeglice), u Kur'anu pohvaljeni. Oni su ti koji su uzeli svoje sablje i pod njegovom se komandom hrabro i bez straha borili i žrtvovali svoje živote za njega. Oni su ti koji vide vrlinu u slaganju s njim, a nemoral u suprotstavljanju njemu. Sram te bilo što pokušavaš da se mjeriš sa Alijem, dok je Imam Ali povjerenik (arap: wasi), nasljednik (arap: waris) Allahovog Poslanika i otac njegovih unuka. Ali je prvi koji slijedi Poslanikove naredbe i posljednji koji ga je napustio prije njegove smrti. Allahov Poslanik ga je uveo u svoje tajne i obznanio ga kao svoga sudruga. Ti si, s druge strane, njegov neprijatelj i sin njegovog neprijatelja! Zadovolji se nepravdom dok je još u tvojoj ruci! Neka ti pri tome društvo pravi Amr ibn As.⁷³ Izgleda da je smrt blizu i da su tvoje obmane postale neučinkovite. Uskoro će postati jasnije šta nam sudbina sprema. Znaj da pokušavaš da prevariš Allaha zato što si izgubio nadu u Njegovu milost i što se osjećaš sigurnim od Njegovih zamki. Međutim, Allah te posmatra i hvata. Ti varaš samog sebe naspram Njega. Neka je Allahov mir na one koji su na pravom putu.

⁷³ Amr ibn As je u svojoj mladosti bio poznati arapski trgovac. Tokom svojih poslova u Abesiniji sklopio je blisko prijateljstvo sa kraljem Negusom. Zato je kao izaslanik Kurejšija (danas uporedivo sa ambasadorom) poslan kako bi vratio muslimane koji su tražili azil kod kršćanskog kralja Negusa. U ratovima kod Uhuda i Hendeka komandovao je konjičkim jedinicama kurejšijskih idolopoklonika. Godine 629. iz političkih interesa prihvatio je islam. Tokom vladavine Imama Alija učestvovao je u bici na Sifinu na strani Muavije, gdje je svojom lukavštinom i spletkaroškom strategijom, posebno arbitražom koja je išla u Muavijinu korist, stekao veliku popularnost. Nakon ubistva Imama Alija 661. godine, Muavija ga je imenovao upraviteljem Egipta, gdje je vladao sve do svoje smrti 664. godine.

Muavijino pismo Muhamedu ibn Ebu Bekru:

Od Muavije ibn Ebu Sufjana Muhamedu ibn Ebu Bekru, koji okrivljuje svoga oca. Selam onima koji su pokorni Allahu. Dobio sam tvoje pismo. Nakon što si u njemu pohvalio Allahovu moć i uzvišenost i nakon što si spomenuo odabranost Njegovog Poslanika, naveo si nekoliko riječi i time doveo do izražaja slabost svojih misli, kao što je kuđenje tvoga oca (Ebu Bekra). U tvome pismu si izložio slavnu prošlost Ali ibn Ebu Taliba, njegovu bliskost i njegovu podršku Allahovom Poslaniku, kao i njegovo samopožrtvovanje u momentima straha i opasnosti, i time nisi istakao svoje vrline, nego si istakao vrline drugoga. Hvaljen neka je Allah koji je vrline od tebe oduzeo i odredio ih nekome drugom!

Za vrijeme života Allahovog Poslanika mogli smo, zajedno sa tvojim ocem, jasno vidjeti ispravnost i superiornost Ali ibn Ebu Taliba. Ipak, kada je Allah uzeo sebi dušu svoga odabranog Poslanika, tvoj otac i njegov Faruk (Omer), dvojica saveznika, stali su u opoziciju spram Alija i oduzeli mu njegovo pravo. Nakon toga su ga pozvali na vjernost i odricanje. Kada se on (Ali) odupro i kada im je otežao njihov halifat, utopili su se u brige i donijeli opasne odluke vezane za njega, tako da je bio prisiljen na zakletvu vjernosti. I pored toga, Ebu Bekr i Omer sve do svoje smrti nisu dozvoljavali da Ali učestvuje u njihovim poslovima niti su mu povjeravali svoje tajne. Nakon njih je na vlast došao Osman ibn Affan. Također, i on je nastavio da ide putem ove dvojice. Ali ti i tvoj predvodnik Ali pokušali ste da ga ponizite. Zato su pobunjeničke grupe, koje su bile daleko od istine, tražile njegov život i ubile ga.

Tako je tvoj otac, Ebu Bekr, bio lično taj koji je uspostavio temelje i na njima zidove za ovu stvar (opoziciju Imamu Aliju). Ako je naš stav ispravan, onda je tvoj otac na čelu ovog postupka. Ako je naš stav nezakonit, tvoj otac je taj koji je za to postavio kamen temeljac. Mi smo, s druge strane, samo njegovi partneri ili oni koji hodaju njegovim putem i oponašaju njegova djela. Da tvoj otac prije nas nije izveo ova djela, mi se ne bismo mogli postaviti protiv Ali ibn Ebu Taliba i morali bismo se potčiniti njegovim naredbama. Međutim, kada smo vidjeli šta je tvoj otac učinio, stali smo u njegove stope i slijedimo njegove postupke. Zato ne okrivljuj svoga oca niti okrivljuj druge! Selam onima koji su se vratili sa krivog puta i koji su se pokajali!

Pored otvorenih dokaza poznati historičari kao što je Taberi⁷⁴ u svome djelu Tarikh ar-Rasul wal-Muluk wal-Khulafa i Ibn Asir⁷⁵ u svome djelu al-Kamil fit-Tarikh su ove teme prešutjeli, jer su bili shvatanja da „neobrazovani ljudi“ istinu ne mogu podnijeti.

Kada je vladavina terora Umejada konačno popustila i Abasidi oko 750. godine preuzeli vlast nad halifatom, nastupio je veliki vakuum što se tiče znanja i vladanja među stanovništvom. Abasidi su bili toliko zauzeti konsolidacijom pri utvrđivanju moći da Imama tog vremena,

⁷⁴ Taberi je bio značajan sunitski historičar i učenjak perzijskog porijekla. Prema historijskim zapisima, trebalo bi da je rođen 839., a umro 923. godine.

⁷⁵ Ibn Asir je bio porijeklom arapski ili kurdski sunitski historičar. Po historijskim zapisima, rođen je 1160., a umro je 1233. godine.

Imama Džafer Sadika, nisu mogli nadzirati i ograničavati. Zbog toga je on, tokom te epohe, iako za kratko vrijeme, neometano mogao širiti istinski islamski iman i islamske znanosti u skladu sa učenjem Ehli Bejta. Ova situacija navela je također brojne učenjake toga vremena, među njima učenike Imama Džafer Sadika, da šire svoje sopstvene stavove i interpretacije kur'anskih ajeta, poslanikove prakse (Sunna), kao i islamskog prava (Fiqh). Sljedbenici Imama Džafer Sadika i njegovog čistog učenja nadalje su nazivani Džaferije, odnosno sljedbenici Džaferijske pravne škole. Pošto je iz toga vremena proistekao veliki broj pravnih škola, među kojima i sunitske pravne škole Hanefijska, Šafijska, Malikijska i Hanbelijska, svi oni muslimani koji su se vodili uputama Ehli Bejta nazivani su Džaferije. Među sunitskim pravnim školama naročito je Hanefijska razvila veliki utjecaj, pošto su se jako orijentisali prema Abasidima koji su imali moć vladanja.

Kada je početkom 13. stoljeća postalo jasno da veliki broj pravnih škola dovodi do zbunjenosti unutar islamske zajednice, vlastodršci su ograničili pravne škole na Hanefije, Šafije, Malikije i Hanbelije, koji se od tada smatraju ispravnim (sunitskim) pravnim školama. Sve druge pravne škole su uslijed toga ili izgubile utjecaj ili su ih, iz političkih razloga, vlastodršci zabranili. Ipak, iako ograničenje na ove četiri pravne škole treba da pruži pregled o religijskim stavovima muslimana, sve do danas se pojavljuju neslaganja među njima. Ova neslaganja u prošlosti su bila tako velika da su se čak Hanefije i Šafije međusobno optuživali za otpadništvo. Naprimjer, sunitski učenjaci su u različitim vremenskim epohama svoje stavove o drugim pravnim školama na sljedeći način izražavali:

Hanefijski učenjak Muzafer at-Tusi Šafi (13. vijek): „Kada bi bilo po meni, uveo bih porez na glavu (džiziju) za sljedbenike Hanbelijske pravne škole.“

Malikijski učenjak Ebu Bekr al-Makkari: „Svi sljedbenici Hanbelijske pravne škole su nevjernici (kuffar).“

Hanbelijski učenjak Ibn Hatam al-Hanbali (854-938): „Onaj ko nije Hanbelija, bez sumnje nije musliman.“

Sunitski historičar Ibn Kesir ad-Dimiški (1300-1373) međukonfesionalne svađe opisao je na sljedeći način: „Hanbelije su zapalili Šafijske džamije. Hanefijski pravници su sa propovjedaonica donosili presude protiv Hanbelijske i Šafijske pravne škole i njihovih sljedbenika. Zbog neslaganja između Hanefija i Šafija zapaljeni su mnogi bazari i škole.“ Nakon što smo detaljno ispitali nastanak pravnih škola, sljedeći korak je da se otvori pitanje da li se kod Džaferijske pravne škole radi o petoj pravnoj školi. U nastavku će biti rasvijetljena pozadina označavanja alevita sljedbenicima Džaferijske pravne škole. Kao što je već spomenuto, Imam Džafer je našao kratku priliku, za vrijeme političkih nemira i brutalnih borbi za prevlast između Umejada i Abasida, da proširi među ljudima osnove istinskog i neiskvarenog islama. Dok su sunitski učenjaci širili svoje sopstvene stavove i interpretacije kur'anskih ajeta, Poslanikove prakse kao i islamskog prava, koji su dijelom bili veoma

kontradiktorni, Imam Džafer Sadik je, po alevitskom uvjerenju, božansko znanje neizmijenjeno i bez bilo kakvih dodataka ili nedostataka stekao preko svojih pravednih predaka.⁷⁶ Stoga je od najvećeg značaja naglasiti da Imam Džafer Sadik nije osnovao svoju novu pravnu školu, odnosno konfesiju. Uostalom, preko njegovih predaka postoji nepatvorena i neprekinuta linija do Časnog Kur'ana i poslaničkog načina djelovanja (Sunneta). Učenja koja je Imam Sadik širio među muslimanima stoga su ujedno i poruke koje je učio Poslanik Muhamed. Prema tome, ne mogu se uočiti razlike između učenja Poslanika Muhameda i učenja Imama Džafera Sadika ili kasnijih Imama Ehli Bejta. U skladu sa tim, aleviti sadržaj svoje vjere ne izvode od Imama Džafera Sadika, već od svih Dvanaest Imama uz plemenitog Poslanika Muhameda. Uostalom, Imamstvo predstavlja nastavak poslanstva, zbog čega Imami posjeduju i potpuno znanje Kur'ana i poslaničke prakse. Stoga se alevizam nipošto ne može smatrati (samo) pravnom školom. Sunitske pravne škole, s druge strane, moraju se osloniti na stavove svojih učenjaka, koji zbog nepoznavanja Kur'ana i islamske jurisprudencije mogu imati pogrešne stavove. U tom smislu je Poslanik Muhamed u brojnim prilikama naglasio položaj Dvanaest Imama i njihov mandat predvođenja islamske zajednice, pri čemu su ovi dokazi zapisani čak i u brojnim sunitskim izvorima.

Sunitski historičar i učenjak Kunduzi (1814-1877) u svome poznatom djelu Yanabi al-Mawadda Dvanaest Imama je čak poimenice spomenuo⁷⁷. Isto tako su od utemeljitelja po čijim imenima su sunitske pravne škole⁷⁸ dobile imena prenesene izjave u autentičnoj formi, koje na nedvosmislen način obznanjuju uzvišenost i prednost Ehli Bejta:

Ebu Hanife: „Da nisam dvije godine učio pred Imamom Džaferom Sadikom, bio bih izgubljen.“

Muhamed ibn Idris aš-Šafi: „Ako ljubav prema Porodici Muhamedovoj znači otpadništvo (rafid), onda neka ljudi i džini svjedoče da sam ja rafidija.“

Malik ibn Anas: „Nijedno oko nije vidjelo, niti je uho čulo, da je neko u svom znanju, bogobojznosti (taqwa) i pouzdanosti bolji od Džafera ibn Muhameda as-Sadika.“

Ahmed ibn Hanbel, znanstvenik na polju hadisa i utemeljitelj hanbelijske pravne škole, rekao je sljedeće kada je naišao na jedan hadis čiji su prenosioci bili isključivo Imami Ehli Bejta: „Kada bi se jedan ludak suočio sa ovim dokazima, doživio bi ozdravljenje!“

⁷⁶ Preci Imama Džafer Sadika, počevši od njegovog oca, su: Imam Muhamed Bakir, Imam Ali Zejnul Abidin, Imam Husejn, Imam Ali, i preko svoje pranane, sveti Poslanik Muhamed.

⁷⁷ Šejh Qunduzi: Yanabi ul-Mawadda, poglavlje 94, str. 445.

⁷⁸ Ipak, treba naglasiti da su četiri sunitska „Imama“ – Ebu Hanifa, Malik, Šafi i Ahmed ibn Hanbel – izdavali sopstvene pravne odluke (arap. *fetva*) i djelovali suprotno izjavama Ehli Bejta, te ih se, posljedično tome, ne može smatrati odanim sljedbenicima Ehli Bejta. Naprimjer, metoda izvođenja zaključka putem analogije (arap. *qiyas*), koja se pripisuje Ebu Hanifi, razlikuje se od onoga na što je Imam Džafer Sadik ukazivao govoreći o značaju upotrebe razuma (arap. *aql*).

Pored ovih čvrstih priznanja, dvorski učenjaci, željni vlasti, pokušavali su prikriti uzvišenost i superiornost Ehli Bejta kako bi učvrstili pravo na vlast vlastodržaca. S tim u vezi, Abasidi su utemeljili pravne škole u ime Hanife, Malika, Šafija i Ahmeda ibn Hanbela kako bi među muslimanima prouzrokovali nejedinstvo i razmimoilaženje u mišljenjima. Pošto se sljedbenici Ehli Bejta za vrijeme nastajanja ovih pravnih škola nisu obraćali sunitskim učenjacima, nego Imamu Džaferu Sadiku, koji je po alidijsko-šiitskom razumijevanju bio istinski reprezent islama, otprilike od sredine osmog vijeka drugi muslimani počeli su ih nazivati džaferijama.⁷⁹ Na to još treba dodati da su sljedbenici Ehli Bejta protjerani iz društvenog središta, pri čemu se isključivanje od fanatičnih sunita zadržalo dobrim dijelom i do danas.

Također se treba preispitati pitanje da li se aleviti također nazivaju džaferijama i kako upotrebljavaju pojam džaferi. Kod dubljeg istraživanja alevitske poezije i tekstova mogu se naći mnoge poveznice sa pravnom školom Imama Džafera Sadika. U sljedećem dijelu treba da nam bude pružen manji uvid u puninu alevitskih izvora o pripadnosti alevita Džaferijskoj pravnoj školi Virani Abdal⁸⁰:

Muhamed Bakir je duša moga tijela,
Džafer as-Sadik je moja religija, moja vjera,
Musa-i Kazim je lijek za moju bolest
Izgubio sam svoj imetak, Ali je moje bogatstvo.

Šah Ismail Hatayi:

Jedan od sluga Muhamed Alijevih sam ja,
Jedan sam od stranke Haydarove, od ljudi pod ogrtačem,
Od pravne škole Imama Džafer Sadika mučenik sam Hatayi, došao sam do istine.

Na čelu nosim boju crvenu,
Smisao iznjedrimo iz svojih stanja

⁷⁹ Na ovom mjestu se mora naglasiti da Imam Džafer Sadik nije utemeljio novu pravnu školu. On je samo prenio stvarnu poruku Kur'ana i Poslanikovog Sunneta preko nepogrešivog lanca bezgrešnih ličnosti svojih predaka.

⁸⁰ Virani Abdal često se naziva predstavnikom hurufijskog pokreta, budući da se u njegovim stihovima mogu pronaći hurufijski simboli, slova i brojevi. I pored toga, on je pjesnik alevitsko-bektašijske tradicije. Spada u sedam velikih alevitskih pjesnika, te ga aleviti slave zajedno s Fuzulijem, Nesimijem, Yeminijem, Šah Hatyijem, Pir Sultan Abdalom i Kul Himmetom. Iz *Velajatname* Demira Babe proizlazi da je tečno govorio arapski i perzijski jezik. Zbirka njegovih pjesama (*Divan*) objavljena je u izdanju istanbulske izdavačke kuće *Maarif Kütüphanesi*. Postoji i djelo *Virani Baba Risalesi*. Iz danas dostupnih dokaza proizlazi da je djelovao između 1587. i 1618. godine u Nedžefu kao čuvar mauzoleja imama Alija te da je kao vjerski učenjak držao predavanja. Također se prenosi da je imao veoma blizak kontakt sa šahom Abbasom I, unukom šaha Ismaila. Na jednom povratnom putovanju prema Nedžefu posjetio je Demira Babu (Bugarska) i od njega dobio počasnu bektašijsku titulu *baba*. Prenosi se da se kasnije nastanio u tekiji Hafiz-dede u blizini grada Karlova, gdje je i umro.

Slijedimo put Imama Džafera,
Mi smo oni koji kliču "Muhamed Ali".

Kul Huseyin⁸¹:

Naša pravna škole je Džafer, put spasa,
Onaj ko nije postao džaferija, ostao je haridžija⁸²,
Jer haridžija siječe Mehdijevu sablju na komade,
Mi smo vojnici Mehdija, Gospodara Vremena.

Kul Himmet⁸³:

Muhamed Bakir je došao,
Imam Džafer je put uspostavio,
Ebu Muslim⁸⁴ je udarao sjekirom,
Učinio je to vičući "Ali, Ali"

⁸¹ Kul Huseyin je bio alevitski pjesnik iz 16. vijeka. Iako o njegovoj ličnosti i njegovim djelima ne postoje pisani dokazi, njegova pjesma sa pitanjima i odgovorima otkriva da je bio savremenik Pir Sultan Abdala i Kul Himmeta. O njegovom porijeklu, kao i datumu rođenja i smrti, ne postoje pouzdane informacije.

⁸² Haridžije su grupa koja je, nakon Muavijine prevare u bici na Sifinu, prinudila svoga zapovjednika Imama Alija na primirje sa neprijateljskim trupama. Kada su shvatili da je primirje bilo ustvari Muavijina prevara, ipak su prebacili Imamu Aliju da je otpao od vjere i objavili mu rat. Pošto Haridžije ni Muaviju niti Imama Alija nisu htjeli priznati kao halifu, planirali su atentate na obojicu. Dok je Haridžija Abdurahman MuDžem svoj plan uspješno sproveo i Imama Alija smrtno ranio otrovanim mačem prilikom sabah-namaza u Kufi, pokušaj atentata na Muaviju nije uspio.

⁸³ Kul Himmet je bio značajan alevitski pjesnik iz 16. vijeka. Međutim, jedva da postoje pouzdane bilješke i informacije o njegovoj ličnosti. Pretpostavlja se da se u selu Varsil (današnji Gorumlu) u blizini mjesta Almus u provinciji Tokat rodio i umro. Iz njegovih pjesama proizlazi da je živio za vrijeme vladavine safavidskog vladara Šah Tahmasba (1514–1576) i Šah Abbasa (1571–1628). Istovremeno, pretpostavlja se da je bio učenik (tr. talip, odnosno *murid*) ili blizak prijatelj sa Pir Sultan Abdalom. Zato se njegovo ime najčešće spominje u vezi sa Pir Sultan Abdalom i Šah Ismailom Hataijem. Sve tri osobe spadaju u red takozvanih sedam velikih pjesnika (tr. *Yedi Ulu Ozan*).

⁸⁴ Ebu Muslim Horasani, punog imena Abd ar-Rahman ibn Muslim al-Horasani, rođen je 718. godine i bio je zemljoposjednik porijeklom iz Perzije, koji je dao doprinos u svrgavanju Umejada i dolasku na vlast Abasida 750. godine. Zato što su se Abasidi, ubrzo nakon što su preuzeli vlast, osjetili ugroženo od njegovog rastućeg utjecaja na državni aparat, abasidski halifa Ebu Džafer al-Mensur ga je dao pogubiti 757. godine u gradu Madainu (*Seleukia-Ktesiphon*). Sve do danas uživa veliki ugled među alevitima, pošto se digao protiv protivnika Ehli Bejta, Umejada, i osvetio ubistvo Imama Husejna.

Šahi⁸⁵:

Moj pir mi je usadio mudrost Šah-i-velayeta⁸⁶,
Postao sam blizak njemu
Moje spoznaja Imam Džafer as-Sadika je učvršćena
Zavjetovao sam se Allahu, prijatelju moj, hvala ti

Seher Abdal⁸⁷

Od Imama Zejnil Aba došao je Bakir, potpuni uputitelj,
Želiš li ispravnu pravnu školu, ne okreći se od puta Imama Džafera.

Noksani⁸⁸:

Stalno se sjećamo Muhameda Bakira,
Džaferije smo mi, slavimo Boga,
Nekad pomišljamo na sedam džehenema,
Nekad kružimo u vatri ljubavi.

Također se u poznatom izvornom alevitskom djelu Imama Džafer as-Sadika Buyruk (Upute Imama Džafer Sadika) mogu pronaći jasni dokazi za upotrebu pojma džaferijska pravna škola:

Moja pravna škola je istina, to je džaferijska pravna škola, sve druge su nevažee.

⁸⁵ Šahi je bio poznati alevitski pjesnik iz 16. vijeka. O njegovom stvarnom identitetu, njegovom rođenju i datumu preseljenja, kao i o njegovim djelima, nema mnogo informacija. Pretpostavlja se da je živio u Diyarbakiru i da je bio blizak prijatelj i sljedbenik Šah Ismaila Hataija. Iz njegovih dostupnih pjesama jasno proizlazi da je bio majstor poetske umjetnosti. Pretpostavlja se da je ime Šah prihvatio zbog naklonosti prema Šah Ismailu Hataiju.

⁸⁶ Šah-i Velayet (Kralj predvodništva). Ovaj naziv se primjenjuje na Imama Alija, kao legitimnog nasljednika Poslanika Muhameda.

⁸⁷ Seher Abdal je bio poznati beктаšijski narodni pjesnik iz 16., odnosno 17. vijeka. O njegovom stvarnom identitetu, njegovom rođenju i datumu preseljenja, kao i o njegovim djelima, postoji veoma malo informacija. Samo se zna da je spadao u *Abdallar* dervise, koji su se smatrali muridima Sejid Battal Gazija.

⁸⁸ Noksani se rodio krajem 18. vijeka, po imenu Ismail, u turskom Erzurumu. U skladu sa uslovima njegovog vremena, njegov otac mu je omogućio obrazovanje u medresi. Nakon završetka školovanja radio je kao učenik u službi Sadik Dede iz plemena Seyyid Agučan. Od Seyyid Sadik Dede kasnije je dobio nadimak Noksani. Za kratko vrijeme stekao je veliku popularnost zahvaljujući pjesmama koje je napisao po alevitsko-beктаšijskoj tradiciji. Prenosi se da je 1872. preselio u Erzurumu i da je tu i ukopan.

U istoj knjizi se prenosi zavjet, koji se zahtjeva od vjernika kada želi da postane punopravni član alevitske zajednice. Tamo se kaže:

Ja sam sluga kralja ljudi⁸⁹.

Ja pripadam krvnoj liniji, ljudi pod ogrtačem⁹⁰.

Ja pripadam pravnoj školi Imama Džafera Sadika.

Moj vođa je Muhamed, moj uputitelj Ali.

U ovom poglavlju je prikazano da se alevizam orijentira prema učenju Dvanaest Imama i da nije samostalna pravna škola kako se to predstavlja u religijsko-pravnom smislu tog termina. Iako se vezano za ovo mogu pronaći brojni dokazi da su se aleviti stoljećima nazivali džaferijama i da se u mnogim alevitskim djelima pojam džaferi i džaferijska pravna škola svjesno upotrebljavao, mora se naglasiti da, kako aleviti tako također i šiiti, žestoko odbacuju tvrdnju da je Imam Džafer Sadik osnovao pravnu školu. Samoproglašenje džaferijama ili sljedbenicima džaferijske pravne škole služi samo da bi se napravila razlika naspram sunitskih pravnih škola i time se samo želi izraziti odanost slijedenju Dvanaest Imama. Iz ovog razloga se u alevitskim djelima i pjesmama naglašava pripadnost džaferijskoj pravnoj školi. Na kraju, pravna škola se oslanja na neovisnom pravnom rasuđivanju (arap. iđtihad), koje se primjenjuje kada se iz Kur'ana, Poslanikove prakse (sunnet) ili predaja (hadis) ne može izvući jasan odgovor u religioznim pitanjima, te se mora očitovati sopstveno mišljenje. Pošto je rezultirajuća pravna presuda lično mišljenje mudžtehida (pravnika), drugi pravnik može izraziti drugačije mišljenje. Zbog toga se unutar četiri glavne sunitske pravne škole mogu primijetiti različite prakse, pošto njihovi pravni stručnjaci izvlače različite zaključke iz vjerskih izvora. Sljedbenici Ehli Bejta, naspram toga, pozivaju se pored Kur'ana i poslaničke upute i na upute Dvanaest Imama, koje se smatraju Kur'an an-natiqom.⁹¹ (Kur'an koji govori) i nemaju nikako potrebu za idžtihadom. Samostalno donošenje pravnih odluka dobilo je na značaju tek nakon velike skrivenosti⁹² (Ghajbat ul-Kubra) Dvanaestog Imama, jer

⁸⁹ Misli se na Imama Alija.

⁹⁰ Misli se na porodicu Poslanika Muhameda, među njima su Imam Ali, Fatima, Imam Hasan i Imam Husejn.

⁹¹ Pojam *Kur'an an-natiq* znači Kur'an koji govori i objašnjava važnost bezgriješnog Imama koji ne objašnjava samo Kur'an, nego ga i živi, te živim primjerom pokazuje šta je postupanje po Kur'anu. Slijedno tome, njegove upute jednake su uputama časnog Kur'ana. Tokom bitke na Sifinu, Amr ibn As, sljedbenik Muavije, shvatio je da je Muavijina vojska pred porazom u bici, te je zbog toga poduzeo podmukli plan tako što je stranice Kur'ana zabio na vrhove kopanja kako bi ih vojnici podigli visoko. Na ovaj način je uspio da malu grupu unutar vojske Imama Alija zbuni i učini nesigurnom. Kada je Imam Ali svojim borbama ukazao da je on Kur'an koji govori, a da protivnici samo zloupotrebljavaju Kur'an, ova mala grupa se odvojila od Imama Alija. Nadalje je ova otpadnička grupa nazvana haridžijima.

⁹² Pojam gajbet, odnosno skrivenost, označava posebnu razinu stvarnosti u kojoj je niz svetaca – među kojima su imam Mehdi, Isa i Hidr – nevidljiv za većinu ljudi. Skrivenost imama Mehdija dijeli se na malu i veliku skrivenost. Nazivom mala skrivenost (*al-gajba al-sugra*) označava se početna faza skrivenosti imama Mehdija koja je trajala oko 70 godina. Ona je započela smrću 11. imama Hasana al-Askarija 872. godine i trajala je sve do 939. godine. U ovom periodu Imam Mehdi je održavao kontakt sa sljedbenicima Ehli Bejta preko četiri

vjernici više ne mogu direktno pitati nekog od Dvanaest Imama za vjerske propise. Jednostavno rečeno, to znači da su upute Poslanika Muhameda i Dvanaest Imama jednake zapovijedima i zabranama Kur'ana. Na temelju ove činjenice ne može se zapravo govoriti o džaferijskoj pravnoj školi, budući da Imam Džafer Sadik, niti bilo koji drugi Imam, nisu izrazili vlastite stavove o islamskim pitanjima. Prema alevitskom vjerovanju, njihove izjave ne predstavljaju njihovo vlastito subjektivno mišljenje, već nepatvorenu poruku Kur'ana. Umjesto džaferijske pravne škole, stoga se zapravo može govoriti o Isna 'ashariyya (Dvanaestolmamske šije), odnosno Imamijama, budući da su pored Kur'ana, djela i hadisi svih 14 bezgriješnih (14 Masum) pravno obavezujući za sljedbenike Dvanaest Imama.

3.3 Da li je alevizam red (tarikat)?

Baš kao što je riječ za pravnu školu (arap. mezheb), riječ za red (arap. tarikat) počinje od značenja „slijediti put“. Razlika između pravne škole i reda je u tome što pravna škola svoj put temelji na Kur'anu, poslaničkoj praksi (arap. sunnet), tradiciji (arap. hadis) i razumu (arap. akl). Međutim, tarikat u alevitskom smislu je put koji, na temelju učenja Ehli Bejta, vodi ljude Bogu kroz ljubav, mudrost i znanje. Drugim riječima, mezheb opisuje teološki put kroz islamsko pravo (arap. šerijat). Tarikat, s druge strane, definira mistični put kroz znanje (arap. marifet) do božanske istine (arap. hakikat). Ljudi koji prakticiraju islamski misticizam (tesavvuf) pod vodstvom duhovnog vođe poznatog kao muršid⁹³ (uputitelj) ili pir (učitelj), bivaju nazivani kao talip (učenik) ili murid (sljedbenik onaj koji želi znanje).

U vezi sa ovim, jednim dijelom se uspostavlja teorija da alevizam potječe iz bektašijskog reda, čiji korijeni se mogu pratiti do 13. vijeka. U narednoj teoriji se alevizam povezuje sa safavidskim redom odnosno kizilbašima⁹⁴, čije se porijeklo može pratiti sve do 14. vijeka, oboje su dobili na značaju tek utemeljenjem Safavidskog carstva. Kako bi se pravilno odgovorilo na ove teze, unaprijed je potrebno rasvijetliti nastanak pojmova kizilbaš i bektaši.

posrednika (*sufara*). Nakon smrti četvrtog posrednika 941. godine, imam Mehdi se povukao u veliku skrivenost (*al-gajba al-kubra*), koja traje i danas.

⁹³ Muršid je titula velikog učitelja (tr. pir). U alevizmu se muršidom smatraju one osobe koje posjeduju potpuno i duboko znanje o Kur'anu i učenju Ehli Bejta i koje vode porijeklo od Poslanika. Stoga su odgovorne za predsjedanje, odnosno vođenje zajednice.

⁹⁴ Kizilbaš (crvenokosi) bili su, otprilike sredinom 15. vijeka, sljedbenici alevitsko-sufijskog reda Safavida. Njihovo ime proizilazi iz karakterističnih crvenih kapa za glavu *Tark-e Haydari* sa dvanaest umetaka, koje je, kako se čini, uveo njihov učitelj reda Šejh Hajdar (1460–1488). Iako izvorno turkmenski, izraz *kizilbaš* se danas više ne upotrebljava za etničku grupu, nego se u određenim regijama upotrebljava kao sinonim za alevite i šiite.

3.3.1 Kizilbaš

Kao što je prethodno već spomenuto, za vrijeme Osmanskog carstva alevite i šiite se nazivalo kizilbašama. Stoga je veoma važno da se pozabavimo sadržajem ovog pojma. Dok jedan dio istraživača pojam kizilbaš posmatra kao naziv za anadolijske alevite, drugi ga smatraju nazivom koji označava misticizmom prožete šiite kao kizilbaše. Bazirano na nekoliko usmenih predaja, nastajanje pojma kizilbaš (crvenokosi) u ovom se kontekstu vezuje za nekoliko historijskih događaja:

1. Bitka na Uhudu i pogibija Ebu Dujana⁹⁵
2. Ranjavanje Poslanika u bitci na Uhudu,
3. Zauzimanje utvrde Hajber,
4. Bitka na Sifinu,
5. Uspon Safavida

U jednoj poznatoj predaji kaže se da je Ebu Dujana oko glave omotao crvenu maramu kako bi time izrazio svoju želju za mučeništvom na bojnopolju. Zagovornici ove teorije stoga se pozivaju na to da je pojam kizilbaš prvi put u ovoj bici primijenjen na bojnopolju. Prema drugoj predaji, bijeli turban kojim se Poslanik Muhamed omotao oko glave nakon ranjavanja prilikom bitke na Uhudu, ofarban je krvlju u crvenu boju. Druga teorija prati porijeklo izraza kroz događaje vezane za Imama Alija. Prema prvoj predaji, Imam Ali nosio je crvenu traku oko glave tokom osvajanja tvrđave Hajber. Prema drugoj predaji, izraz potječe iz bitke na Sifinu, gdje se kaže da je cijela vojska Imama Alija nosila crvene trake na glavama, te su ih stoga neprijateljske snage nazvale kizilbaš.⁹⁶

Na ovom mjestu mora se istaći da su do sada spomenuta četiri događaja primarno prenesena u usmenoj formi. Pri tome treba imati na umu da su se sva četiri događaja u arapskom kulturnom prostoru dogodila u 7. vijeku. Stoga se može isključiti mogućnost da je turski pojam kizilbaš našao primjenu tokom ove epohe u tim područjima. Međutim, mogla bi se postaviti pretpostavka da je postojao arapski pojam koji se kasnije, kao kizilbaš, prenio u turski jezik. Zbog toga su neki istraživači postavili tvrdnju da je pojam kizilbaš izveden iz

⁹⁵Ebu Dujana (pravo ime mu je bilo Simak ibn Harša) bio je poznati ashab i prenosilac hadisa. U islamskim izvorima se bilježi da je u bici na Uhudu na bojno polje izašao sa crvenom trakom na glavi. Prema popularnom vjerovanju među alevitima, porijeklo izraza *kizilbaš* vezano je za ovaj događaj. Kada su idolopoklonici iz Meke napali poslanika Muhameda, Ebu Dujana je stao ispred Poslanika i, zadobivši rane, 625. godine postigao šehadet.

⁹⁶ Hajber je ime oaze sjeverno od Medine, u kojoj su izvori prvobitno pripadali Jevrejima. Nakon uspostave islamskog sistema vladanja u Medini kroz poslanika Muhameda 622. godine, jevrejska plemena su se uplašila za gubitak svog utjecaja na vlast. Oni su se udružili sa idolopoklonicima iz Meke; međutim, kada su njihove intrige propale, ratni huškači i predvodnici su se zabarikadirali u tvrđavi Hajber i otuda napadali muslimanske karavane. Nakon što su 628. godine muslimani opkolili utvrdu Hajber i pod vodstvom Imama Alija je zauzeli, vratio se mir u regiju. Ovo je imalo za posljedicu da su se mnoga plemena pridružila poslaniku Muhamedu i prihvatila islam.

arapske riječi ra's ahmar (crvena glava). Međutim, budući da u historijskim zapisima ne postoje dokazi za to, može se pretpostaviti da su te tvrdnje iznesene kako bi se uspostavila veza sa spomenutim događajima.

Ukratko, može se reći da četiri do sada spomenute definicije mogu biti samo spekulativna tumačenja, budući da se ne mogu pronaći naučni dokazi o događajima koji se dovode u vezu s pojmom kizilbaš.

U drugoj predaji porijeklo pojma pripisuje se šejhu Hajdaru, poglavaru safavidskog reda (tur. Safevi tarikati). Prema izvještajima, on je u snu vidio dvanaest Imama i, na njihovu zapovijed, naredio svojim sljedbenicima da nose Tark-e Haydari („Hajdarovu kapu“) – crvene pokrivke za glavu sa dvanaest umetaka.

Za razliku od prve četiri tradicije, korištenje naziva kizilbaš za vrijeme safavidskog perioda potvrđeno je i historijskim zapisima. Ipak, moguće je pretpostaviti da su se Safavidi prilikom odabira imena oslonili na spomenute teorije.

Naročito jer su aleviti zbog svojih vjerskih uvjerenja, njihove odanosti prema Ehli Bejtu i veze sa Safavidima stotinama godina bili proganjani, samonaziv „kizilbaš“ i danas igra važnu ulogu u njihovoj samoslici. Izraz „kizilbaš“ koristi se i u savremenom jeziku i u alevitskim pjesmama. Naprimjer, narodni pjevač Aşik Jener⁹⁷ izražava svoju kritiku stalne klevete protiv alevita na sljedeći način:

Muavija je lukav, sin varalice

Njegov sin Jezid je još veća varalica od njega

Prokletnik, koji se naziva Ibn MulDžem⁹⁸,

Dali je on kizilbaš ili karabaš?⁹⁹

Aşik Gulabi¹⁰⁰, savremeni narodni pjesnik, također osuđuje negativnu upotrebu izraza kizilbaš, i to izražava u sljedećoj pjesmi:

Nevjernik nas naziva kizilbašama,

Znaš li ko je kizilbaš?

Od Alija smo potekli

Znaš li ko je kizilbaš?

⁹⁷ Aşik Jener je rođen 1928. godine pod imenom Hadži Jener u selu Tanir, u blizini grada Afšina u provinciji Kahramanmaraš. Još u djetinjstvu zanimao se za *aşiklik* tradiciju, kao i za poetsku umjetnost. U mladim godinama pronašao je mogućnost da se bavi alevitskom poetskom tradicijom i pjesmama. Nakon što je 1946. diplomirao na seoskom institutu Hasanoglan, radio je kao bolnički zaposlenik u Kayseriju i Istanbulu. Godine 1962. bio je devet mjeseci zatvoren iz političkih razloga. Umro je u Istanbulu 2009. godine, gdje je i pokopan.

⁹⁸ Ibn MulDžem je ubica Imama Alija.

⁹⁹ Pojam *karabaš* („crna glava“) u turskom se jeziku često koristi kao ime za psa. U ovoj pjesmi pojam, međutim, upućuje na desničarsku populističku ideologiju turskih nacionalista, čiji je amblem sivi vuk (*bozkurt*).

¹⁰⁰ Aşik Gulabi Gultekin je rođen 1950. godine u selu Čajan, u provinciji Çolum, i spada u najpoznatije alevitske narodne pjevače (Ozna) toga vremena.

Čovjeka i životinju Allah je stvorio
Nevjerniče, ukloni sumnju iz svog srca
Od koga si laž o nama napamet naučio?
Znaš li ko je alevi?

Gulabi sam ja, šta da kažem nezalicama?
Ni na koji način ne razgovaraj sa poricateljima, slijepim
Alevit je gospodar nad rukom, slabinama i jezikom¹⁰¹
Znaš li ko je kizilbaš?
Znaš li ko je alevi?

Također se može vidjeti da je alevitski pjesnik Sejid Gazi Mahzuni bio oklevetan od strane većinskog stanovništva jer je s ponosom koristio izraze alevi, džaferi i kizilbaš.

Ako me pitaš za moju pravnu školu, o Zahide¹⁰²
Ja sam alevit, husejnija, džaferija,
Ako tražiš i dokaz za izvrsnost Hel Eta¹⁰³
Ja sam alevit, husejnija, džaferija,

Alijev miljenik se zovu kizilbaš,
Četiri knjige svjedoče da je Ali volio Boga.
Ovo je predaja koju spominje Poslanik,
Ja sam alevit, husejnija, džaferija

Lawlake Lawlak¹⁰⁴ Uzvišeni naređuje,
Znaj ovo je objavljeno o njima,

¹⁰¹ Izjava „Eline, diline, beline sahib ol“ (Gospodar nad tvojom rukom, jezikom i slabinama) od Hadžo Bektša Velija opisuje alevitsku etiku. Rukom ne počinuti ništa loše, jezikom ne širiti neistine, i slabinama blud ne činiti.

¹⁰² Iako se pojam zahid može prevesti kao pobožni asketa, na ovom mjestu se misli na religioznog fanatika.

¹⁰³ Pojam *Hel eta* ukazuje na suru *el-Dahr* (76) i opisuje događaj kada su se Imam Hasan i Imam Husejn razboljeli u djetinjstvu. Prenosi se da je Imam Ali zbog toga zavjetovao trodnevni post, kako bi njegovi sinovi što prije ozdravili. Kada su Fatima i oba sina, Imam Hasan i Imam Husejn, saznali za ovaj zavjet, priključili su se postu s istom namjerom. Nakon prvog dana posta, u vrijeme iftara, neko je pokucao na vrata tražeći hranu. Na to su mu oni dali svu hranu koju su imali, a svoj post prekinuli samo vodom. Kada je drugog dana siroče pokucalo na vrata, dali su mu hranu kojom su namjeravali prekinuti post i ponovo post prekinuli samo vodom. Trećeg dana na vrata je u vrijeme iftara pokucao rob i tražio hranu. Kada su mu i ovaj put pružili svoju hranu, objavljeni su ajeti 7-9 sure *el-Dahr*. Budući da ova sura, koja se zove još i sura *el-Insan*, počinje riječima *Hel eta*, ovaj se termin u alevitskoj literaturi često koristi za opis trodnevnog posta. U svakodnevnoj upotrebi, međutim, govori se o Hidir-postu, pošto se u sva tri slučaja (siromah, siroče i rob) radilo o Hidru (tur. *Hizir*).

¹⁰⁴ Referenca na dobro poznatu predaju u kojoj Bog govori Poslaniku Muhamedu: Lawlake lima khalakat al-Aflak (Da tebe nije bilo, ne bih stvorio svjetove.)

Nije li ajet Fi e-Qurba dovoljan dokaz?
Ja sam alevit, husejnija, džafferija.

Istovremeno, alevitski pjesnici u svojim pjesmama upotrebljavaju perzijski izraz surhser¹⁰⁵ kao sinonim za kizilbaše:

Čankirli Zahmi¹⁰⁶:

Kako si prezren zbog prolazne askeze?
Daleko je njegovo djelo od licemjerja
Nepošteno prema Čankirli Zahmiju, siromahu
Neki kažu rafidi, a neki kažu surheser.

Dürri¹⁰⁷

Mi smo ljudi odanosti, Surhserima nas zovu,
Naša namjera je stvarni Šah, od koga mi ne odstupamo,
Budući da je Bog Dürri uputio, rasprava je nepotrebna
Jedan je naš voljeni, neprijatelja nećemo moliti

Osim toga, u zapisima Osmanskog Carstva, pored alevita u Anadoliji, i šiiti u Azerbejdžanu, Iraku i Iranu, koji su se borili na strani šaha Ismaila, nazivani su kizilbašama. Važno je napomenuti, kada je riječ o današnjoj upotrebi pojma kizilbaš, da se ovaj naziv u Turskoj isključivo upotrebljava za alevite. U zemljama kao što su Azerbejdžan, Iran, Irak, Pakistan ili Afganistan, također se neka šiitska plemena nazivaju kizilbašama.

Iako je safavidski red utemeljenjem safavidske vladavine velikim dijelom izgubio svoj teološki značaj i poprimio političku funkciju, on sve do danas igra značajnu ulogu, prije svega jer se pojam kizilbaš upotrebljava za alevitsko stanovništvo. Ipak, alevizam se ne može svesti na safavidski red, pošto je pored toga u različitim epohama postojalo još alevitskih redova.

¹⁰⁵ Surhser je prevod turskog pojma kizilbaš na perzijski. Pojam je u osmanskim i safavidskim izvorima upotrebljavan istoznačno za opis kizilbaša.

¹⁰⁶ Čankirli Zahmi, čiji stvarni identitet je nepoznat, bio je veoma uspješan pjesnik 19. vijeka. Poznato je da potječe iz turske provincije Čankiri, i da se obrazovao u medresi. Prema historijskim zapisima, preselio je 1863. godine.

¹⁰⁷ Duri je bio alevitski pjesnik iz 19. vijeka.

3.3.2 Bektašije

Prema historijskim zapisima, Hadži Bektaš Veli je u 13. vijeku uspostavio vjersku instituciju (tur. dergah) u blizini grada Nevşehir u današnjoj Turskoj, kako bi sljedbenicima Ehli Bejta pokazivao pravi put. U konstantnoj borbi protiv brutalnih vladara svoga vremena, Hadži Bektaš Veli je, u stalno otežanim uvjetima za anadolsko stanovništvo, prenosio znanje Ehli Bejta i značajno doprinio širenju alevizma. Osim toga, njegove religijske i socijalne aktivnosti postavile su temelje za generacije željne znanja i tragatelje za istinom, čime čak stotinama godina nakon svoga preseljenja utječe na dinamiku alevitskog islama.

Dergah Hadži Bektaš Velija je vremenom stekao toliki značaj unutar anadolijskog stanovništva da su ovu obrazovnu instituciju finansijski pomagali osmanski sultani sve do 16. vijeka. Osim toga, formirala se vojna elitna jedinica Osmanskog Carstva uglavnom od bektašijskih Janičara¹⁰⁸ (tur.: Yeniçeri). Sa usponom Safavida sredinom 16. vijeka, red je naišao na veliku sumnjičavost među autoritarnim vladarima i odanim dvorskim učenjacima Osmanskog Carstva. Osmanski sultani bojali su se da bi se sljedbenici i simpatizeri bektašijskog reda, zbog svoje privrženosti Ehli Bejtu, mogli udružiti sa Safavidima protiv Osmanlija. Stoga su, po naredbi osmanskog sultana Bajazita II (1448–1512), učenjaci odani režimu dovedeni na čelo bektašijskog reda kako bi se Dergah Hadži Bektaša otuđio od njegove prethodne svrhe kao središta vjerskog obrazovanja. Kao rezultat ove politike infiltracije Osmanskog Carstva, jurisprudencija (arap. fikh) u redu, koja je bila bazirana na učenju Ehli Bejta, sve se više iskrivljavala. Osim toga, brojne sunitske dogme uključene su u pisana djela bektašijskog reda, od kojih se neke mogu pratiti do danas. Na ovom mjestu mora se naglasiti da se ovo iskrivljavanje nije događalo samo unutar bektašijskog reda. Slično tome, dominantni sunitski redovi, poput mevlevija¹⁰⁹ i melamije¹¹⁰ vremenom je proganjao kritički osmanski državni aparat, jer su njegovali duboku naklonost prema Ehli Bejtu, i nisu se striktno držali sunitskog razumijevanja islama. Mevlevijski red, koji se dugo držao podalje od političkih i socijalnih dešavanja, nije privlačio veliku pažnju vlastodržaca. Ipak, osmanski vladari su s vremenom mevlevijske dervişe počeli percipirati kao prijetnju. Kada su Safavidi u 16. vijeku dobili na političkom utjecaju, Osmanlije su ojačale sunitsku granu mevlevijskog reda i popunile je vjerskim kadrom odanim državi. Ova osmanlijska sustavna politika sunizacije na kraju je dovela do toga da je mevlevijska grana u 17. vijeku

¹⁰⁸ Janičari su bili u osmanskom carstvu elitne vojne jedinice i pripadale su bektašijskom redu. Činili su sultanovu počasnu gardu i dosegli najveće položaje u osmanskoj državnoj hijerarhiji. Trupe su nastale u 14. vijeku a raspuštene su 1826 godine.

¹⁰⁹ Mevlevije obrazuju poznato sufijsko bratstvo. Nastanak ovog reda vezan je za perzijskog mistika Dželaludina Rumija (1207-1273), također poznatog kao Mevlana.

¹¹⁰ Red melamija također predstavlja još jedno poznato sufijsko bratstvo. Nastanak ovog reda vezuje se za turskog sufiju Hadži Bajram-Veliju. Hadži Bajram-Veli bio je turski pjesnik, sufija i utemeljitelj bajramijskog reda. Bio je učenik predvodnika safavidskog reda, šejha Hamidudina. Prema historijskim zapisima, rođen je 1352. godine, a preselio je 1430. godine. Njegov mauzolej se nalazi u Ankari.

službeno postala državni red (tur. Devlet tarikati). Kaže se da su se neki sultani, veziri i vodeći državnici čak pridružili ovom redu. Osmanlije su prvenstveno provodile politiku klasifikacije vjerskih institucija kao sunitske (tur. Ehl-i Sünnet) i nesunitske (tur. Ehl-i Sünnet dışı). Dok su sunitski utjecaj politički i finansijski privilegovali, osmanlijski vladari su povukli svoju podršku onim pokretima koji nisu odgovarali njihovom razumijevanju islama.¹¹¹ Ovo je išlo čak tako daleko da su neki nesunitski predvodnici redova proganjani i ubijani. Represalije su se naročito pojačale za vrijeme života Šejh Bedrudina¹¹², Šahkulu Sultana¹¹³ i za vrijeme Dželali-ustanaka¹¹⁴. Naprimjer, predvodnik melamijskog reda, Ismail Mašuki (1508–1528), pogubljen je zajedno sa svojim učenicima jer im se prebacivalo da šire djelovanje suprotno uvjerenjima sunitskog islama i bezbožništvo (tur. zındıklık, mülhidlik). Ovu (jednim dijelom) uspješnu sunitsku politiku asimilacije protiv mevlevijskog i melamijskog reda vladajući krugovi i njima odani pisci i danas navode kao glavni argument za navodno sunitske korijene alevizma. Prije svega, u nedavno objavljenim knjigama,

¹¹¹Neke od ovih struja su: babaije, abdalije, bektašije, hurufije, kizilbaše, kalenderije, hajdarije i melamije.

¹¹²Šejh Bedrudin bio je značajan vjerski pravnik, sufija i pobunjenik u Osmanskom Carstvu, koji je zastupao mističnu teoriju *wahdat al-wujud* („jedinstvo postojanja“). Rođen je 1358. godine u dvorcu po imenu Samavna, kao sin kadije od Samavne (*Kadisioğlu*). Prenosi se da je u Siriji i Egiptu studirao teologiju, filozofiju, logiku i misticizam.

Godine 1411. Musa Čelebi (1388–1413), koji se sam proglasio sultanom tokom osmanskog međuvladanja, imenovao je šejha Bedrudina za *kadi-askera* (vrhovnog sudiju). Kada je Mehmed I (1389–1421) 1413. godine nasilno svrgnuo svog brata Musu Čelebija, šejh Bedrudin je smijenjen s pozicije vrhovnog sudije. Zajedno sa svojim pratiocima i učenicima, Börklüce Mustafom i Torlak Kemalom, šejh Bedrudin je inicirao ustanak u regiji Deliorman protiv osmanskog sultana. Nakon što je pobune Börklüce Mustafe i Torlak Kemala krvavo ugušila turska vojska, podrška šejhu Bedrudinu drastično je opala, te se morao s preostalim pobunjenicima sam boriti protiv osmanske vojske, pri čemu je zarobljen. Nakon toga je izveden pred sud i pogubljen 1420. godine u Serezu, gdje je tada rezidirao sultan Čelebi Mehmed.

¹¹³Šahkulu Baba bio je predvodnik Šahkulu ustanka protiv Osmanskog Carstva u regiji oko Antalije. Ponekad ga se zbog sličnosti imena zamijeni sa alevitskim mistikom Šahkulu Sultanom, utemeljiteljem istoimenog Šahkulu Sultan Dergaha u Istanbulu. On je bio sin Halife Hasana, pratitelja šejha Hajdara Safavija. Zajedno sa svojim ocem, Šahkulu je bio u službi Safavida. Kada je njegov otac, Hasan Halifa, imenovan za zastupnika šejha Hajdara u Anadoliji, otac i sin su se vratili u mjesto Teke u Anadoliji i vrbovali tamošnje stanovništvo za safavidski red. Proglašenjem Safavidskog Carstva pod šahom Ismailom Hataijem, osmanski vladar počeo se osjećati ugroženim od Šahkulu Babinih aktivnosti. Zato je okrivljen zbog misionarenja šizma. Iako je sa svojim sljedbenicima uspio odbiti nekoliko napada Osmanlija, prilikom jedne bitke kod Sivasa 1511. godine je poginuo. Zbog toga što je anadolijske kizilbaše mobilizirao protiv Osmanskog Carstva, njegovo ime Šahkulu (Šahov sluga) u osmanskim zapisima prezrivo je zavedeno kao Šejtankulu (Sluga šejtana).

¹¹⁴Dželalijski ustanci bili su niz alevitskih ustanaka u Anadoliji protiv autoriteta Osmanskog Carstva u 16. i 17. vijeku. Naziv datira od ustanka alevitskog propovjednika šejha Dželala 1519. godine u blizini Tokata. Nakon njegovog ubistva dogodili su se sljedeći ustanci: 1526-1528, 1595-1610, 1654-1655 i 1658-1659 godine, koji su svi skupa nazvani dželalijskim ustancima.

Naročito su se seminomadski i nomadski turkmenski aleviti, koji su igrali posebnu ulogu u utemeljenju Osmanskog Carstva, osjećali sve više potlačenim zbog rastuće sunitske državne politike, te su se priključili pobunama. Ustanci su obustavljeni tokom vladavine Murata IV (1612-1640). Bili su to najveći i najdugotrajniji ustanci u historiji Osmanskog Carstva, koji su odnijeli mnogo života među alevitskim stanovništvom.

bektašijski red se često neosnovano poredi sa prinudno regrutiranim mevlevijskim i melamijskim dervišima, te se zbog toga opisuje kao sunitski sufijski red.

Izveštaji o historijskom razvoju, kao i infiltracija bektašijskog reda kroz sunitske učenjake odane vlastima, najvećim se dijelom u ovim knjigama zanemaruju ili potpuno prešućuju.

Ukratko, može se vidjeti da je Hadži Bektaš-Veli postavio temelje bektašijskom redu kako bi sljedbenicima Ehli Bejta omogućio slobodnu razmjenu znanja. Malo-pomalo, država je ovaj red ipak instrumentalizirala za svoje svrhe i suštinski doprinijela tome da je bektašijski red unutar alevitskog stanovništva izgubio na značaju.

3.3.3 Osmanlijsko-safavidski konflikt

Utemeljenje Safavidskog Carstva (1501–1736) pod šahom Ismailom Hataijem za veoma kratko vrijeme izazvalo je veliko oduševljenje među alevitskim stanovništvom. Posljedično tome, sunitske Osmanlije su ubrzo uzdižuću safavidsku vlast osjetile kao prijetnju.

U početku osmanski vladari nisu doživljavali safavidski red u Ardebilu kao ozbiljnu prijetnju izdaleka, jer je taj red do tog perioda preuzeo uglavnom religijsku funkciju. Ipak, osnivanjem Safavidskog Carstva, šah Ismail Hataji je, pored svoje obaveze kao poglavara reda (*pir*),¹¹⁵ pripala i politička uloga kao državnika.

S druge strane, to je vodilo do toga da se u Anadoliji znatno poveća broj sljedbenika (*tur. talip*), koji su se sada usmjeravali po uputama šaha Ismaila Hataija. Dok je alevitsko stanovništvo Anadolije naziv *kizilbaş* sada smatralo počasnim, sunitski dvorski učenjaci u Osmanskom Carstvu koristili su ovaj pojam u fetvama, u kojima su pozivali na progon i ubijanje *kizilbaş*a, kao vrstu vrijeđanja i ponižavanja. Time je Safavidski red, koji je vremenom dobio na značaju, kao i njegovi sljedbenici, trebao biti difamiran kao sekta koja je zastranila i pod vodstvom sunitskih Osmanlija potučena. Neki od ovih učenjaka su *kizilbaş*e proglasili odmetnicima u svojim traktatima i pravnim presudama. Išli su toliko daleko da su, ne samo klasificirali eksproprijaciju *kizilbaş*a, njihovo ubijanje i porobljavanje članova njihovih porodica kao dopušteno, već su to čak proglasili i vjerskom dužnošću.¹¹⁶ Iz knjige *Selimšahname* sunitskog učenjaka kurdskog porijekla Idris-i Bitlisija¹¹⁷ (1452-1520) u jednom

¹¹⁵ Perzijski pojam *pir* znači „stari mudri čovjek“ i zato se u alevitskoj govornoj upotrebi koristi u značenju učitelja. Pored pojmova *seyyid-i sadat* (gospodin gospode) i *evlad-i resul* (Poslanikov potomak), pojam *pir* koristi se kao počasna duhovna titula, koja svoje porijeklo u historijskim bilješkama vodi sve do poslanika Muhameda i dvanaest Imama. Pošto je kroz historiju bilo brojnih podjela u plemenskoj lozi, pravi se razlika i između brojnih porodica *ocak* (centara duhovne tradicije), kao što su Baba Mensur (12. vijek), Baba Kurejš (12. vijek) itd.

¹¹⁶ Mađu ove koruptivne vjerske učenjake spada spadaju Šejh ul-Isma'il Ali Cemal Efendi (umro 1526.), Kemal Pašazade (1468-1534) i Muftija Nureddin Hamza Saru Gorez (umro 1512.).

¹¹⁷ Idris-i Bitlisi bio je sunitski historičar, vojskovođa i visokopozicionirani službenik u Osmanskom Carstvu, kurdsog porijekla, koji je 1452. godine došao na svijet u Bitlisu ili Diyarbakiru. Njegovo puno ime glasi Hakimuddin Idris ibn Husamuddin Ali el-Bitlisi. Zato što se tokom osmanlijsko-safavidskog konflikta udružio sa sunitskim Osmanlijama i donio brojne vjerske presude (*fatawa*) protiv Safavida *kizilbaş*a, u Anadoliji je hiljade

od najkrvoločnijih dvorskih učenjaka i pokretača ovih pogroma nad alevitima, može se vidjeti da je tadašnji osmanski sultan Javuz Selim naredio ubistvo svih kizilbaša u dobi od sedam do sedamdeset godina. Kao rezultat ovih dekreta, samo za vrijeme vladavine Javuza Selima pogubljeno je 40.000 anadolskih alevita, uključujući žene, djecu i starije osobe. Nadalje, u Dergah Hadži Bektaš-Velija sve su se više infiltrirali sunitski režimski učenjaci po nalogu osmanskog sultana. Međutim, to je rezultiralo značajnim pokretom otpora pod vodstvom Kalendera Čelebija protiv ovog vjerskog otuđenja bektašijskog dergaha, koji je formiran ubrzo nakon smrti Balim-Sultana.¹¹⁸ Budući da su prethodne osmanske politike prouzrokovale velike podjele unutar anadolijskog stanovništva, ustanak Kalender Čelebija¹¹⁹ nije imao velik priliv sljedbenika, te je za vrijeme vladavine osmanskog Sultana Sulejmana I. (1494-1566) krvavo ugušen. Također se formirao veliki otpor unutar bektašijskih elitnih jedinica (janjičara) naspram načina postupanja osmanskih sultana. Kontinuirani pokret otpora unutar bektašijskog reda, kao i unutar vojske, protiv osmanske politike tlačenja naveo je osmanske vladare da na kraju pristupe još strožijim mjerama. Tako su još neke režimu odane osobe dovedene na čelne pozicije bektašijske institucije i unaprijedilo se širenje iskrivljenog mišljenja. Na ovaj način su osmanski vladari pokušavali red Hadži Bektaš-Velija korak po korak otuđiti od alevitskog vjerovanja i okrenuti ga u pravcu režima. Istovremeno su se osmanski vladari pobrinuli za širenje vjerskih presuda (fetvi) kako bi porastao antagonizam i otklon prema alevitima među neukim sunitskim stanovništvom, a pojam kizilbaš ušao u upotrebu kod većine u sunitskom društvu kao pokudan naziv za sljedbenike Ehli Bejta. Stoga su vodeći dužnosnici i službenici koji su osudili transformaciju i promjene načela unutar bektašijskog reda bili ili smijenjeni sa svojih dužnosti ili čak likvidirani.¹²⁰

Nakon što su osmanski vladari početkom 16. vijeka pokušali uskladiti bektašijski red s lojalnim vođama, u 19. vijeku poduzeli su mnogo drastičnije mjere. Po naređenju sultana Mahmuda II (1785-1839), svi bektašijski dergasi su 17. jula 1826. godine ili zatvoreni ili

alevita progonjeno i pogubljeno. Zbog toga ga mnogi aleviti nazivaju Iblis-i Bitlisi („šejtan iz Bitlisa“). Umro je u Istanbulu 1520. godine i pokopan je na poznatom mezarju Ejub Sultan. Članovi njegove porodice su vladali još dugo nakon toga kao kneževi Bitlisa.

¹¹⁸ Balim Sultan se često pogrešno naziva drugim Pirom (*Pir-i Sani*) nakon Hadži Bektaš Velija, pošto se njega smatra osnivačem i inicijatorom bektašijskog reda. Po historijskim zabilješkama, rođen je 1457. godine u grčkom gradu Dimetoka. Godine 1501., sultan Bajazid II, koji je tvrdio da je prišao bektašijskom redu, imenovao ga je za poglavara (*postnišin*) Hadži Bektaš Velijinog dergaha u Nevşehiru. Cilj ovog imenovanja od osmanskog sultana bio je, u prvoj liniji, suprotstavljanje utjecaju Safavida na alevite u Anadoliji.

¹¹⁹ Kalender Čelebi bio je *postnišin* (predvodnik reda) Hadži Bektaš Velijinog dergaha, koji je po historijskim zapisima na ovaj svijet došao 1476. godine. Pokrenuo je protupokret protiv politike asimilacije unutar Hadži Bektaš Veli dergaha. Međutim, ovaj pristup je shvaćen kao pobuna protiv osmanske vlasti. Zbog bliskosti sa Safavidima, Kalender Čelebi je ubijen 1527. godine zajedno sa svojim sljedbenicima (*murid*) po naređenju osmanskog sultana Sulejmana I (1494-1566).

¹²⁰ Sultan Sulejman I naložio je da se likvidiraju vodeći dužnosnici i državnici; čak je i svoje sinove, šehzade Mustafu (1515-1553) i šehzade Bajazita (1525-1561), hladnokrvno dao ubiti jer im je prebacio bliskost s bektašijskim redom i nastojanje da osnaže utjecaj tog reda u osmanskoj upravi.

oduzeti i predati nakšibendijskom redu.¹²¹, kako bi ubrzali sistematično sunitiziranje alevitskog stanovništva. Kasnije se ovaj događaj u osmanskim historijskim izvorima spominje kao Vaka-i Hayriye (blagoslovljeni događaj). Potom su Pir Hamdullah-Čelebi, kao i Mehmed Nebi Dede Baba (1813–1834), smijenjeni sa svojih vodećih pozicija u redu, a zamijenio ih je Mehmed Said Efendi, predstavnik nakšibendijskog reda. Dok je Pir Hamdullah-Čelebi¹²² bio proganjan u Amasyu (Turska), Mehmed Nebi Dede Baba stavljen pod nadzor šejha Mehmeda Said Efendije. Budući da su osmanski vladari željeli izolirati alevite od njihovih pisanih izvora i neiskrivljenih temelja, pustili su da preko svojih režimu odanih učenjaka šire lažne informacije o Hadži Bektaš-Veliju, koji je kao veliki učenjak bio od centralnog značaja za anadolijske alevite. Tako je, naprimjer, uspostavljena tvrdnja da je Hadži Bektaš sunitiski teolog, tako što su se u njegovom poznatom djelu Makalat pripisale veličanstvene osobine prvoj trojici halifa: Ebu Bekru, Omeru i Osmanu. Na osnovu ovoga, potpuna autentičnost određenog sadržaja Makalata danas mnogi znanstvenici dovode u pitanje. Osim toga, oni dijelovi teksta koji trebaju dokazati sunitiski identitet Hadži Bektaš-Velija ne mogu se naći ni u prevodu knjige Šahrāma Bahadora Čaračea, niti u verziji Diyanet izdavaštva. Ukratko, može se zaključiti da je kizilbaški pokret dosegao vrhunac usponom Safavida u 16. vijeku i stekao značajnu podršku među anadolskim stanovništvom. Osmanski vladari, koji su smatrali rastući utjecaj Safavida u Anadoliji alarmantnim, slijedili su dvije različite metode. S jedne strane, poticali su infiltraciju učenjaka lojalnih režimu u najveću alevitsku obrazovnu instituciju, Dergah Hadži Bektaš-Velija, pokušavajući tako odvratiti alevitsko stanovništvo od simpatija prema Safavidima. U tu svrhu, osmanski vladari provodili su politiku podjele alevitskog stanovništva na „lojalne“ bektašije i „pobunjene“ kizilbaše. Tako je osmansko-safavidski sukob doveo do razvoja nekih regionalnih i kulturnih razlika između safavidskih kizilbaša i bektašija. S druge strane, progonili su i ubijali veliki dio anadolskog stanovništva zbog njihovog alevitskog identiteta. Osmanska politika progonstva na kraju je kulminirala zatvaranjem i eksproprijacijom svih bektašijskih dergaha 1826. godine po nalogu osmanskog sultana Mahmuda II, koji je vodstvo nad tim zajednicama predao nakšibendijskom redu. Slično tome, pravne presude vjerskih stručnjaka dovele su do sve veće antipatije prema

¹²¹Nakšibendijski red, odnosno nakšibendijski tarikāt, poznati je sunitiski sufijski red koji je u 14. vijeku nastao u Centralnoj Aziji. Kao osnivač reda važi Bahauddin Nakšibend (1318–1389) iz Buhare (Uzbekistan). Od njega red vodi duhovnu liniju (*silsila*) do sunitskog halife Ebu Bekra.

Ovaj red i danas igra veliku ulogu u životu sunitskih sufija. Naprimjer, uspjeli su proširiti svoj utjecaj i pored zabrane državno-autonomnih vjerskih centara u obliku derviških centara iz 1925. godine, koju je uveo Mustafa Kemal Atatürk. Tursko-islamski pokreti, poput poznatog Nur-Džemata ili Sulejmanijskog pokreta, mogu se pratiti sve do ideologije nakšibendijskog reda. Osnaživanjem političkog sunitskog islama u Turskoj pod vlašću AKP-a, nakšibendijski red pronašao je mogućnost da učvrsti svoj utjecaj u društvu. Najpoznatiji predstavnik nakšibendijske struje je islamski propovjednik Ahmet Mahmut Ünlü (rođen 1965. u Istanbulu), kojeg njegovi sljedbenici nazivaju Džubbeli Ahmet Hodža. Zbog antialevijskih i antišijitskih osjećaja nakšibendijskog reda još iz vremena Osmanskog Carstva, oni su odigrali važnu ulogu u usponu IS-a protiv dominantno šijitske vlade u Iraku.

¹²² Pir Mehmed Hamdullah Čelebi došao je na ovaj svijet 1767. godine, a nakon smrti svog oca, Pira Fejzullaha Čelebija, 1824. godine postao je poglavar (*postnišin*) dergaha Hadži Bektaš Velija. Kada je osmanski sultan Mahmud II (1785–1839) 1827. godine rasformirao korpus janjičara i dergah Hadži Bektaša predao nakšibendijskom redu, Pir Mehmed Hamdullah Čelebi izveden je pred šerijatski sud sa zahtjevom za pogubljenje, nakon čega je proganjan u Amasyu, gdje je 1836. godine preminuo.

alevitima među sunitskim stanovništvom, a izraz kizilbaš počeo se koristiti u pogrdnom smislu.

Može se ustvrditi da su, kako bektašije, tako i safavidski red, pored svoje vjerske, imali i jednu političku funkciju unutar alevitskog stanovništva. Stoga su se zagovornici teorije reda prvenstveno oslanjali na historijske događaje kako bi naglasili historijski određene razlike između kizilbaša i bektašija, te kako bi ograničili pojavu alevizma samo na ova dva reda. Korijeni alevizma mogu se pratiti sve do učenja Poslanika Muhameda i njegovog Ehli Bejta.

3.4. Je li alevizam pretjerivanje (ghuluw)?

Sve do današnjeg vremena, od mnogih sunita, a dijelom također i od nekih šiita, može se čuti tvrdnja da je alevizam jedna forma ghuluw-pokreta (pretjerivanja). Međutim, prije nego što se provede detaljnija analiza ove teze, zasigurno je od koristi da se pozabavimo uopćeno doslovnim značenjem pojma ghuluw. U skladu s arapskim jezikom, pojam se može na bosanski jezik prevesti kao prekoračenje granice, pretjerivanje ili ekstremizam. Neko ko takvo pretjerivanje prakticira naziva se ghali.

U Kur'anu se s ovim u vezi spominje nekoliko primjera za ovakav način razmišljanja. Primjer za to je poslanik Uzejr¹²³, koji je stotinu godina nakon svog preseljanja na onaj svijet ponovo od Boga proživljen, kako bi zaboravljenu poruku Tore ponovo proširio među Sinovima Israilovim. Potom je od jedne grupe Židova nazvan Sinom Božijim, kako se može zaključiti iz sljedećeg Kur'anskog ajeta:

„Jevreji govore: ‘Uzejr je Allahov sin’, a kršćani kažu: ‘Mesih je Allahov sin’. To su riječi njihove, iz usta njihovih, oponašaju riječi nevjernika prijašnjih – ubio ih Allah! Kuda se odmeću?“¹²⁴

Vjerovatno ovaj pogled Židova, pored grčke Zeus-Herkules mitologije¹²⁵, olakšao je nastajanje kršćanskog učenja o svetom trojstvu. Međutim, Kur'an odbacuje ovu doktrinu i osuđuje božanstvenost poslanika Isusa (arap. Isa):

¹²³ Uzejr, odnosno Ezra, bio je vjerovjesnik koji je poslan u periodu između 500. i 400. godine pr. Krista narodu Benu Israil (potomcima poslanika Jakuba). U židovskim i kršćanskim zapisima spominje se da je Uzejr nakon progonstva iz Babilona živio u Perzijskom Carstvu. Godine 458. pr. Krista oslobodio je 5.000 osoba iz plemena Benu Israil iz babilonskog zatočeništva i s njima odselio u Jerusalem. Također se prenosi da je dao značajan doprinos reformaciji judaizma, odnosno reformaciji povratka Mojsijevoj poruci. Prema nekim savremenim istraživačima, Uzejr i Ezra bi zapravo trebale biti dvije različite osobe.

¹²⁴ Sura at-Tawba, ajet 30 (9:30).

¹²⁵ Prema grčkoj mitologiji, iz veze između božanstva Zeusa i smrtnice došlo je na svijet dijete po imenu Heraklo. Pošto je Heraklo posljedično tome sin ovozemne majke i grčkog boga Zeusa, on kao polubog raspolaže nadljudskim moćima. Vjerovatno je ova mitologija utjecala na kršćansku doktrinu trojstva.

„O sljedbenici Knjige, ne zastranjajte u svome vjerovanju i o Allahu govorite samo istinu! Mesih, Isa, sin Merjemin, samo je Allahov poslanik, i Riječ Njegova koju je Merjemi dostavio, i Duh od Njega; zato vjerujte u Allaha i Njegove poslanike i ne govorite: ‘Trojica su!’ Prestanite, bolje vam je! Allah je samo jedan Bog – hvaljen neka je On! – zar On da ima dijete?! Njegovo je ono što je na nebesima i ono što je na Zemlji, i Allah je dovoljan kao svjedok.“¹²⁶

„Nevjernici su oni koji govore: ‘Bog je – Mesih, sin Merjemin.’ (...)”¹²⁷

Iz prethodno spomenutih primjera može se jasno zaključiti da su u drugim vjerskim pravcima izgrađeni pretjerani stavovi o poslanicima. Posljedično tome, nije ništa posebno da je unutar Islama bilo takvih pogleda koji su, zaslijepljeni izvrsnošću Ehli Bejta, razvili kult božanstvenosti. Poslanik Muhamed je vezano za ovo u jednom hadisu hvalio Imama Alija i predskazao da će se u budućnosti formirati jedna grupa koja će pretjerivati vezano za njegovu ličnost:

„Oh Ali! Ti si kao Isa, kojeg su Židovi pokorili (u njihovom neprijateljstvu) i koji su otišli tako daleko da su njegovu majku oklevetali. Međutim, kršćani su ga toliko zavoljeli da su ga uzdigli na položaj Boga, koji mu ne dolikuje.“

Također je Imam Sadik u ovom kontekstu rekao:

„Neka Allah prokune one koji o nama iznose tvrdnje koje nisu naše. Neka Allah prokune one koji nas uzdižu iz robovanja Allahu na veće visine, iako smo od Allaha stvoreni. Njemu vraćeni i svi naši poslovi su u Njegovoj ruci.“

Ne može se poreći da je kroz historiju bilo itekako ljudi i grupa koji su zastupali pretjerivanja u stajalištima o poslanikovoј porodici, što se može jasno zaključiti iz spomenutih predaja. Iako se nastajanje kao i širenje takvih pogleda na uvjerenje može tražiti u više uzroka, glavni uzrok bez ikakve sumnje jeste nedostatak religioznog obrazovanja kod takvih ljudi. Konačno, veliki dio stanovništva patio je pod političkom diskriminacijom vladajućih elita Umejada (661–750), Abasida (750–1258), Seldžuka (1038–1194) i Osmanlija (1299–1923) i nije imao pristup religioznim izvorima. Kao posljedica stotinama godina dugog religioznog i političkog progona i ugnjetavanja, i oskudnog religioznog obrazovanja, formirali su se različiti mitovi i priče o božanstvenosti Dvanaest Imama među neukim stanovništvom. Ovaj proces je posebno potican tako što su neki vladari širili priču da je Alevizam ustvari jedan perfidni pokret, koji na osnovu pretjerane ljubavi i naklonosti prema Ehli Bejtu ličnosti Imama Alija pripisuje božanstvenost. Od osmog Imama, Ali Riza (Imam Ali Riza), sa ovim u vezi je sljedeće preneseno:

„Naši protivnici su proširili tri vrste izjava o našim vrlinama. Prva izjava uključuje pretjerivanje (arapski: ghuluw). Druga vrsta uključuje potcjenjivanje u vezi sa našim djelima. Treća vrsta se odnosi na objavljivanje nedostataka i mana naših protivnika. Kada se ljudima

¹²⁶ Sura an-Nisa, ajet 171 (4:171).

¹²⁷ Sura al-Ma'ida, ajet 17 (5:17).

kaže za pretjerivanje, oni misle da naši sljedbenici vjeruju u našu (navodnu) božanstvenost, i stoga ih proglašavaju hereticima. Kada im se prenose izvještaji koji nam pripisuju mane, oni dovode u pitanje našu nepogrešivost. Kada naši neprijatelji zbog njihovih djela otvoreno bivaju proklinjani, to se koristi kao povod da se nas poimenice proklinje.“

Jedan od razloga širenja gulowskih stavova o alevitima može se pratiti do nekolicine beznačajnih pojedinaca, koji su nastojali privući pažnju među neukim stanovništvom i prevarom osigurati ugledan položaj u društvu kao učenjaci. S druge strane, dvorski učenjaci odani državi i protivnici alevita širili su glasine i pretjeranim stavovima o alevitima, kako bi ih ismijali unutar većinskog sunitskog društva. Dok je prva (antidržavna) skupina širila takve fanatične stavove prema vlastitim interesima, druga (lojalna) skupina težila je cilju sistematskog klevetanja. Iako takve gulowske stavove još uvijek sa odobravanjem zastupa nekolicina neukih pojedinaca, alevitska zajednica u cjelini im se žestoko protivi. Dakle, u kojoj se mjeri ovo pretjerano uvjerenje može pripisati alevitskoj zajednici u cjelini?

Kao što je prethodno već objašnjeno, alevizam se odnosi na Imamat i mandat predvodništva (arap: wilaya, tur: velayet) Dvanaest Imama. Ovaj mandat vodstva Ehli Bejta također izražava položaj da je Imamat Ehli Bejta iznad poslanstva predislamskih poslanika. Prema Kur'anu, svi predislamski poslanici, od Adema do Muhameda, poslani su da postupno pripreme čovječanstvo za savršenu Božiju religiju, Islam:

(...) Sada sam vam vjeru vašu usavršio i blagodat Svoju prema Vama upotpunio i zadovoljan sam da vam Islam bude vjera.(...) ¹²⁸

Stoga su svi poslanici težili cilju proglašavanja vrlina Poslanika Muhameda i njegove porodice, Ehli Bejta, te pripremi čovječanstva za njihov dolazak. Iz islamskih predaja pri tome još proizlazi da je misija svih poslanika povezana s prihvaćanjem mandata vodstva Poslanika Muhameda i Dvanaest Imama. U tom kontekstu može se pozvati, naprimjer, sljedeći ajet, koji je objavljen u vezi sa Ademovim pokajanjem (arapski: Tewba): „I Adem primi neke riječi od Gospodara svoga, pa mu On oprosti; On, doista, prima pokajanje, On je milostiv.“ ¹²⁹

Pored alevitskih i šiitskih učenjaka, također su i poznati sunitski znanstvenici Kur'ana i hadisa u svojim djelima prenijeli da se odlomak „neke riječi“ odnosi na Ehli Bejt. Većina islamskih učenjaka je stoga na ovom mjestu saglasna da je Adem recitirao imena Ehli Bejta kako bi njegovo pokajanje bilo prihvaćeno. Slično tome, sunitski učenjak Muinudin Miskin al-Harawi (umro 1502.) prenio je sljedeći događaj od Imama Džafera Sadika u svom djelu Mearidž un-Nubuwwa fi Medaridž al-Futuwwa:

„Dok su Adem i Hava bili u raju, došao je Džibril, uzeo Adema za ruku i pokazao mu palaču. Pločice su bile od zlata i srebra, a prozori od zelenog smaragda. Unutar palače nalazilo se

¹²⁸ Sura Al-Ma'ida, ajet 3 (5:3)

¹²⁹ Sura Al-Baqara, ajet 37 (2:37)

prijestolje od crvenog rubina. Na prijestolju su bile dvije naušnice i ogrlica od svjetlosti. Kad je Adem ugledao prijestolje, divio se njegovoj ljepoti i izgledu, zaboravljajući ljepotu stanovnika raja (arapski: Huri). Divio se ljepoti prijestolja i upitao: 'Gospodine, čija je ovo slika?'“

Tada je čuo glas koji je rekao: “Ovo je slika Fatime Zehre, kćerke moga Voljenog¹³⁰. Kruna na njenoj glavi predstavlja svjetlost njenog oca. Ogrlica simbolizira njenog muža, Imama Alija. Naušnice, s druge strane, simboliziraju njena dva sina, Hasana i Husejna.“

Tada Džibril reče: „Podigni pogled!“

Kada je Adem pogledao prema gore, ugledao je petero vrata, koja su sva bila otvorena. Na svakim od njih bilo je napisano nekoliko riječi.

Na gornjim vratima je pisalo: Ana al-Mahmud ve hadha Muhamed.¹³¹

Na drugim vratima je stajalo: Ana al-Ala ve hadha Ali.¹³²

Na trećim vratima je stajalo: Ana al-Fatir ve hadhi Fatima.¹³³

Na četvrtim vratima je stajalo: Ana al-Muhsin ve hadha Hasan.¹³⁴

Na petim vratima je stajalo: Mink al-Ihsan ve hadha Husejn.¹³⁵

Tada je Džibril rekao: „Ademe, zapamti ova imena i dobro ih zapamti. Doći će vrijeme kada će ti ova imena trebati.“

Kada je jednog dana Adem protjeran iz raja, plakao je (iz pokajanja) tri stotine godina. Tada je ponovo čuo glas iz nevidljivog, koji ga je podsjetio na imena, pa je Adem podigao ruke i izgovorio sljedeću molitvu:

„Ya Mahmud, ya Ali ul-Ala, ya Fatir, ya Muhsin wa oh mink al-Ihsan. Iz ljubavi prema Muhamedu, Aliju, Fatimi, Hasanu i Husejnu oprosti mi i primi moje pokajanje!“

Nakon što je Adem izgovorio ovu molitvu, Bog, Najmilostiviji, odgovorio je sljedeće: „O Ademe, da si me iz milosti prema ovih petero ljudi zamolio da oprostim grijehe tvojih potomaka do Sudnjeg dana, učinio bih to samo zbog ovih petero.“

Također, poznati sunitski učenjak u oblasti Kur'ana i hadisa, Dželaludin Sujuti, prenosi sljedeći razgovor između Poslanika Muhameda i njegovog prijatelja Ibn Abasa: Abdullah ibn Abbas upitao je Božijeg Poslanika: „Sa kojim riječima je Adem tražio oprost, tako da mu je Bog prihvatio njegovo kajanje?“

¹³⁰ Poslanik Muhamed, kojeg se također naziva i Habibullah (Voljeni Božiji).

¹³¹ Ja sam Mahmud (Hvaljeni) a ovo su Muhamedova vrata.

¹³² Ja sam Ala (Uzvišeni) a ovo su Alijeva vrata.

¹³³ Ja sam Fatir (Stvoritelj) a ovo su Fatimina vrata.

¹³⁴ Ja sam Muhsin (Dobročinitelj) a ovo su Hasanova vrata.

¹³⁵ Ja sam Ihsan (Savršeni) a ovo su Husejnova vrata.

Božiji Poslanik mu je odgovorio: „Adem je izgovorio sljedeću molitvu: 'Moj Gospodaru, primi moje pokajanje iz ljubavi prema Muhamedu, Aliju, Fatimi, Hasanu i Husejnu i oprosti mi!' Na osnovu ove molitve, Allah je prihvatio njegovo pokajanje.“

Kao što proizlazi iz upravo spomenutih predaja, Adem je prihvaćeno pokajanje od Boga jedino i samo zbog zazivanja imena Ehli Bejta, koji raspolažu većim autoritetom i položajem nego što ga on ima. Stoga se u islamskoj govornoj praksi titula Hatam ul-Anbiya (Pečat Poslanika) primjenjuje za Poslanika Muhameda, kako bi se naglasio veći stupanj njegovog poslanstva. Nadalje, velika većina islamskih učenjaka saglasna je da Imam, zastupnik (arap. Halifa) odnosno nasljednik (arap: Wasi) Poslanika Muhameda, raspolaže istim pravima i autoritetom u vjerskim i svjetovnim pitanjima. Prema tome, misija koju nastavlja Dvanaest Imama nakon preseljenja Poslanika Muhameda, superiorna je u odnosu na sve poslanike iz predislamskog perioda, jer bi to inače značilo degradaciju Božije misije. Ovaj temeljni princip učenja sljedbenika Ehli Bejta osnažen je predajom Poslanika Muhameda, koja je također i u sunitskim izvorima okvalifikovana kao autentična i pouzdana:

„Ko god želi vidjeti Ademovo znanje, Nuhov razum, Ibrahimovu strpljivost, Jahjinu uzdržanost i čednost, kao i srdžbu i veličanstvenost Musaovu, treba da pogleda Alija, sina Ebu Talibovog.“

Još jedna tačka sporenja u ovom kontekstu je optužba da aleviti imaju pretjerane stavove u svom vjerovanju u Mehdiu. Pa ipak, vjerovanje u Mehdiu sastavni je dio svih islamskih pokreta od rane historije islama. Jedina je razlika u tome što sljedbenici Ehli Bejta čekaju povratak Dvanaestog Imama Muhameda ibn Hasana al-Mehdija¹³⁶, dok većina sunitskih učenjaka vjeruje u rođenje Imama Mehdiu neposredno pred pojavu Imama u sumrak vremena (ili pred kraj vremena). Sunitski učenjak Ibn Haldun (1332-1406) pruža opći opis vjerovanja u Mehdiu u svome djelu Muqadima:

Znaj da je među većinom muslimana kroz sva vremena poznato da se na kraju vremena mora pojaviti čovjek iz redova vjernika koji će ojačati vjeru i pomoći da pravda prevlada. Muslimani će ga slijediti, a on će preuzeti islamske zemlje. Zvat će se Mehdi. Odmah nakon toga pojavit će se Dedžal i svi sljedeći događaji koji su, prema autentičnim hadisima, preduvjeti za početak drugog sata (Proživljenje). Nakon toga Isa će sići i ubiti Dedžala. Ili će Isa sići zajedno sa Mehdiom i pomoći mu pri ubijanju Dedžala i pridružiti mu se pri obavljanju namaza.

Kako se iz islamskih izvora može jasno zaključiti, Mehdi će biti osoba iz porodice Poslanika Muhameda. Njegov uzvišeni položaj također je naglašen činjenicom da će poslanik Isa klanjati iza njega i stajati uz njega. Kao što kršćanska teologija tvrdi da će Isus Krist sići s neba i uspostaviti kraljevstvo Božije, povratak Isa očekuje se i u islamu na kraju vremena. Stoga je sljedeća predaja također autentično prenesena u brojnim sunitskim djelima: „Mehdi je iz ove islamske zajednice. On će biti Imam (predvodnik) Isau.“

U još jednom hadisu od Poslanika Muhameda kaže se:

¹³⁶ Detaljne informacije o ličnosti Imama Mehdiu bit će obrađene u poglavlju 3.4 Predvodnička misija (Imamat).

„Učenjaci moje zajednice (arap: Umma) su ravni vjerovjesnicima Beni Israila.“

U tom kontekstu treba naglasiti da su se mnogi sunitiski učenjaci oslanjali na potonju predaju kako bi naglasili navodno visok status Poslanikovih ashaba (arap: Sahaba). Međutim, paradoksalno je da su sljedbenici Ehli Bejta često kroz historiju bili optuživani za fanatičnost i pretjerivanje u vjerovanju jer su istu predaju primjenjivali na superiornost Dvanaest Imama. Ipak, kada se gore spomenuta predaja razmatra u kontekstu hadisa „Ja sam grad znanja, a Ali je vrata toga grada. Ko želi da uđe u grad, mora proći kroz vrata!“, dolazi se do zaključka da samo Ali i njegovi nasljednici mogu biti uspoređeni sa vjerovjesnicima Beni Israila (Sinova Izraelovih). Iz razgovora između Imama Alija i Sasaa ibn Suhan al-Abdi¹³⁷ prenosi se sljedeće:

Sasaa: „Jeste li vi časniji od Adema?“

Imam Ali: „Ružno je hvaliti se sobom. Ali da Allah nije rekao sljedeće, ne bih odgovorio: „i o blagodati Gospodara svoga kazuj!“¹³⁸ Ja sam časniji od Adema! Na nebu osim pšenice, sva milost, utjeha i blagodati su bili pripremljeni za Adema. „Kada mu je to zabranjeno, izašao je iz raja i samilosti Allahove, tako što je jeo pšenicu. Dok se meni, Allah Svemogući, iako mi nije zabranio da jedem pšenicu, slobodnom voljom držim podalje od pšenice, jer ne težim ka svjetovnim stvarima.“

Sasaa: „Jeste li časniji od Nuha?“

Imam Ali: „Ja sam također časniji i od Nuha! Kada je Nuh pozivao svoju zajednicu Allahu, oni su ga odbili. Osim toga, oni su ga porekli i mučili. Na kraju ih je on, na okončanju svoje strpljivosti, prokleo, tako što je rekao sljedeće: 'I Nuh reče: Gospodaru moj, ne ostavi na Zemlji nijednog nevjernika.'“¹³⁹ Međutim, ja sam bio strpljiv nakon voljenog Božijeg Poslanika, mir neka je na njega i njegovu porodicu, i ni u kojem slučaju nisam prokleo ovu zajednicu, iako je bila vrlo okrutna i tvrdoglava prema meni.“¹⁴⁰

Sasaa: „Jeste li vi časniji od Ibrahima?“

Imam Ali: „Ja sam časniji od Ibrahima! On je pitao Allaha Svemogućeg: 'Moj Gospodaru, pokaži mi kako mrtve oživljavaš!' Na to je Allah Svemogući upitao: 'Zar još uvijek ne vjeruješ?' On (Ibrahim) reče: 'Vjerujem, ali pitam kako bi se srce moje smirilo.' Na to je Allah Svemogući rekao: 'Uzmi četiri ptice' – reče On – 'isijeci ih, pa pojedine komade njihove stavi

¹³⁷ Sasaa ibn Suhan, poznati prenosilac predaja kako kod sunita tako i kod šiita, okvalifikovan je kao vjerodostojan. Bio je poznati govornik i sljedbenik Imama Alija, a učestvovao je u bitkama kod Džamela i Siffina. Prema predajama, Muavija ga je protjerao iz Kufe jer je njegovao duboku naklonost prema Poslanikovoј porodici. Umro je 666. godine u Bahreinu, u izgnanstvu.

¹³⁸ Sura ad-Duha, sjet 93 (93:11)

¹³⁹ Sura Nuh, ajet 26 (71:26)

¹⁴⁰ U poznatoj predaji *el-Šikšikija*, Imam Ali kaže u ovom kontekstu:

„Smatrao sam postojanost prema ovome mudrijom (nego da se borim za halifat). Onda sam ostao strpljiv suočen s trnom u svome oku i stezanjem u grlu, dok gledam kako se moje naslijeđe pljačka, sve dok prvi (Ebu Bekr) nije otišao svojim putem i predao halifat onome (Omeru) poslije njega.“

na razne brežuljke, zatim ih pozovi, brzo će ti doći. Znaj da je Allah silan i mudar.”¹⁴¹ „Ali, ja uvijek govorim da neće biti povećanja u mom uvjerenju (arap. Yaqin), pa čak i onda kada bi se svi velovi uklonili.“

Sasaa: „Jeste li časniji od Musa?“

Imam Ali: „Ja sam časniji od Musa! Kada je Allah Uzvišeni poslao Musa egipatskom faraonu, on (Musa) je rekao: 'Gospodaru moj' – reče – 'ja sam ubio jednog njihovog čovjeka, pa se bojim da i oni mene ne ubiju.'“¹⁴² Ali ja se nisam sustezao kada me je voljeni Poslanik poslao mnogobošcima, kako bi ih obavijestio o Suri at-Tawba. Iako sam pobio većinu njihovih ljudi i dostojanstvenika, nisam osjećao strah, i svoju sam misiju izvršio sam i glasno, kako bi me mogli dobro čuti.

Sasaa: „Jeste li časniji od Isaa?“

Imam Ali: „Da, ja sam časniji i od Isaa! Kada se Merjem, kćerka Imranova, trebala poroditi, bila je u Beyt ul-Maqdis¹⁴³. Tada je čula glas: „O Merjem! Napusti ovu kuću Božiju. Jer ovo je kuća Božija, a ne kuća za porođaj.“¹⁴⁴ „Dok, kada je moja majka Fatima, kćerka Asadova, bila pred samim porodom, ušla je u Mesdžid al-Haram¹⁴⁵, tražila je pribježište kod Kaabe i molila je Allaha da joj olakša porod. Na to su se otvorili zidovi Ka'be i čuo se jedan glas da kaže: „O Fatima, uđi u ovu kuću.“ Nakon čega je Fatima ušla i u Božijoj kući donijela mene na svijet. Ova privilegija nije data nikome ni prije niti nakon mene.“

Spomenute predaje tako potvrđuju da aleviti ni u kom slučaju ne pretjeruju vezano za svoje uvjerenje prema Ehli Bejtu, te je optužba prema ghuluw (pretjerivanju) očito samo jedna kleveta. Nadalje, treba naglasiti da ovo stajalište ne zastupaju samo sljedbenici Alevita. I u prošlosti i u sadašnjosti mnogi sunitski učenjaci smatraju da je Imam Ali superiorniji od svih poslanika (osim Poslanika Muhameda) i Poslanikovih prijatelja (arap: Sahaba). Naprimjer, sunitski učenjak Hakim al-Haskani (umro 1096.) spomenuo je 201 kur'anski ajet o vrlinama Imama Alija i njegovih nasljednika iz njegovog potomstva u svom poznatom djelu Šahwahid al-Tanzil, koje se još uvijek smatra pouzdanim izvorom za kur'ansku egzegzu temeljenu na tradiciji među sunitskim učenjacima.

U ovom kontekstu se od Džabir ibn Abdullaha¹⁴⁶ prenosi slijedeće:

¹⁴¹ Sura al-Baqara, ajet 260 (2:260)

¹⁴² Sura al-Qasas, ajet 33 (28:33)

¹⁴³ Bejtu-l-makdis, odnosno Hram u Jerusalemu, nalazio se na Brdu hrama. Ovim pojmom označavaju se dva svetišta iz različitih epoha, od kojih oba danas ne postoje. Prvi Solomonov hram (hram Sulejmana, a.s.) bio je glavno svetište Kraljevstva Judeje i uništen je 586. godine prije Krista kada su Babilonci osvojili Jerusalem. Drugi Herodov hram bio je svetište Judejaca koji su se vratili iz progonstva. Nakon što je hram proširio Herod Veliki (73. g. pr. Kr. - 4. g. pr. Kr.), opljačkan je, zapaljen i uništen nakon što su rimske trupe osvojile Jerusalem 70. godine.

¹⁴⁴ Porođajni bolovi doveli su je do palminog debla. Ona je rekla: „Kamo sreće da sam ranije umrla i da sam potpuno u zaborav pala!“ (Sura Merjem, ajet 23).

¹⁴⁵ Mesdžid el-Haram znači „sveto mjesto bogoslužja“ i nalazi se u Mekki. U njoj se nalazi središnje islamsko svetište, Kaba. Zajedno sa Mesdžid en-Nebijem (Poslanikovom džamijom) u Medini i džamijom El-Aksa u Jerusalemu, Mesdžid el-Haram spada u jedno od tri najsvetija mjesta u islamu.

Bez ikakve sumnje, Allah je Alija, njegovu ženu Fatimu i njegove potomke (11 Imama) imenovao predvodnicima ljudi. Oni su u ummetu vrata znanja. Svako onaj ko ih slijedi ispravno je upućen!

Optužba da aleviti obožavaju Imama Alija ili njegove potomke je, stoga, u konačnici neutemeljena. Takva načela vjere ne mogu se naći ni u teoretskim ni u živim praksama alevita. Stoga se alevizam ne može opisati kao Ghuluw pokret ili nešto slično. Istovremeno, mora se istaknuti da su sljedbenici svake religije i denominacije u određenoj mjeri razvili ekstremistička i pretjerana uvjerenja. U konačnici, svaka poštena osoba mora priznati da u svim glavnim svjetskim religijama postoje fundamentalistički pokreti uz liberalne. Isto tako, ne mogu se iz pojedinih ekstremističkih slučajeva izvlačiti zaključci o načelima vjere neke skupine u cjelini.

3.5 Da li je alevizam kulturna forma anadolijskog sunizma?

Ovo poglavlje detaljnije ispituje tvrdnju da je alevizam kulturni oblik sunitskog islama. Zagovornici ove teorije tvrde da se alevizam razvijao paralelno s dominantno sunitskim shvaćanjem islama na bliskoistočnom kulturnom području i da se razlikuje od tradicionalnog sunizma samo po kulturnim elementima i pretjeranoj vezanosti za Ehli Bejt. Zagovornici ove teorije, poput Ethema Ruhija Figlalija i Abdulkadira Sezgina, koriste mudru retoriku kako bi pokušali pobuditi simpatije za sunizam unutar alevitskog stanovništva naglašavajući položaj Ehli Bejta iz sunitske perspektive. Međutim, paradoksalno je da istovremeno veličaju one despotske vladare koji su vijekovima progonili i ubijali sljedbenike Poslanikove porodice. Čak i iz površnog pogleda na historiju Umejada, Abasida, Seldžuka i

¹⁴⁶ Džabir ibn Abdullah el-Ensari bio je poznati prijatelj poslanika Muhameda i, nakon njegova preseljenja, iskreni sljedbenik Ehli Bejta. Prenosi se da je rođen 605. godine u Medini. Događaj pod ogrtačem (arap. *Hadis el-Kisa*), u kojem je Poslanik Muhamed sakupio Imama Alija, Fatimu, Imama Hasana i Imama Husejna pod svoj ogrtač, prenosi se od njega u autentičnoj formi. Zahvaljujući tome, kao dijete je upoznao poslanika Muhameda i prihvatio islam.

Prenosi se da mu je Poslanik Muhamed prerekao dug život (93 godine) i susret s petim Imamom, Muhamedom el-Bakrom. Za vrijeme Poslanikova života učestvovao je u ukupno 19 odbrambenih bitaka. Nakon Poslanikove smrti, odbio je prisegu na vjernost prvoj trojici halifa i ostao uz Imama Alija. Za vrijeme Imama Alija sudjelovao je u bitkama kod Siffina i Nahravana. Nakon mučeničke smrti Imama Alija, branio je Imamat Imama Hasana, a kasnije i Imama Husejna.

Tokom tragedije na Kerbeli, njegova poodmakla životna dob i sljepoća spriječili su ga da se bori uz Imama Husejna. Međutim, nakon njegove smrti, prkosio je omejadskoj zabrani posjećivanja mezara Imama Husejna te je, u pratnji svog učenika Atije ibn Sa'da, posjetio groblje u Kerbeli četrdesetog dana (*arba'in*) od ubistva Imama Husejna. Marš od Kufe do Kerbele na *arba'in* postao je sastavni dio ceremonije žalosti za Imamom Husejnom.

Budući da mu je bilo predskazano da će se susresti s Imamom Muhamedom el-Bakrom, dugo je sjedio ispred groba poslanika Muhameda kako bi Imamu prenio Poslanikove pozdrave. Prenosi se da mu je jednog dana prišao Imam i pozdravio ga. Unatoč sljepoći, kaže se da je Džabir odmah prepoznao petog Imama po hodu, koji je nalikovao Poslanikovom, te mu poljubio ruku. Budući da je, unatoč sljepoći i poodmakloj životnoj dobi, osudio nasilje Omejada nad Ehli Bejtom, otrovao ga je Hadždžadž ibn Jusuf 698. godine. Ukupno mu se pripisuje preko 1.500 predaja.

Osmanlija može se zaključiti da su mnogi njihovi tiranski vladari obznanjivali naklonost prema Poslanikovoј porodici. Unatoč tome, progonili su i ubijali sljedbenike Ehli Bejta, koji nisu prihvaćali druge vladare osim mandata vodstva (arap: Wilaya, tur: Velayet) Dvanaest Imama, kao što su rafidije ili murtedi¹⁴⁷ (otpadnici).

U tom kontekstu, može se ukazati na Abaside, koji su pod izlikom kažnjavanja neprijatelja Poslanikove porodice pozivali na pobunu protiv tiranskih Umejada, samo da bi počinili mnogo veće zločine protiv Imama i njihovih odanih sljedbenika ubrzo nakon preuzimanja vlasti. Prenosi se da je prvi abasidski halifa Ebu al-Abbas al-Saffah¹⁴⁸ (722-754) kleknuo na zemlju i rekao sljedeće kada mu je donesena odrubljena glava umejadskog halife Merwana ibn Muhameda¹⁴⁹ (688-750):

„Hvaljen neka je Allah, koji mi je dao pobjedu nad tobom! Sada više nisam zabrinut za vrijeme moje smrti. Jer sam dvije stotine Umejada ubio u zamjenu za ubistvo Husejna, njegove braće i ashaba. U zamjenu za ubistvo mog rođaka Zejda ibn Alija spalio sam kosti Hišam ibn Abdulmalika¹⁵⁰. Kao zamjenu za ubistvo moga brata Ibrahima, ubio sam Mervan ibn Muhameda.“

Ali uskoro nakon što su Abasidi osvojili vlast, počeli su da ugnjetavaju Imame i njihove odane sljedbenike. Naprimjer, peti abasidski halifa i Halifa Harun ar-Rašid¹⁵¹ (763-809), kao i njegov

¹⁴⁷ Pojam *murted* u arapskom jeziku znači apostat ili otpadnik od islama. Iako se u Kur'anu opisuje slobodna volja ljudi pri odabiru vjere: „I reci: 'Istina dolazi od Gospodara vašeg, pa ko hoće – neka vjeruje, a ko hoće – neka ne vjeruje!'“ (Sura El-Kehf, ajet 29), zbog pogrešnog tumačenja islamskog zakona (*šerijat*), fanatični krugovi smatrali su napuštanje islama kažnjivim djelom te su ga sankcionisali smrtnom kaznom. Budući da su sljedbenici Ehli Bejta masovno kritikovali vladajuće sisteme Omejada, Abasida i Osmanlija, oni su često, i iz političkih razloga, proglašavani otpadnicima, nakon čega su mnogi od njih pogubljeni.

¹⁴⁸ Abu Abbas es-Seffah rođen je 722. godine i bio je prvi halifa dinastije Abasida, na vlasti između 750. i 754. godine. Njegov otac, Muhamed ibn Ali, bio je praunuk Abbasa, amidže poslanika Muhameda. Nakon što je njegov stariji brat Ibrahim 749. godine umro u umejadskom zatočeništvu, Abu Abbas je preuzeo vodstvo abasidskog pokreta i uz pomoć ustanka Abu Muslima el-Horasanija predvodio svrgavanje Omejadске dinastije. Njegov nadimak es-Seffah („Krvoprolivač“) dat mu je jer je bio veoma brutalan prema svojim protivnicima. Umro je 754. godine u Bagdadu i ostavio halifat svome bratu Abu Džaferu el-Mensuru.

¹⁴⁹ Mervan ibn Muhamed, odnosno Mervan II. Bio je četrnaesti halifa dinastije Umeja.

¹⁵⁰ Hišam ibn Abdulmelik bio je deseti halifa omejadске dinastije. Kada je njegov brat Jezid II 724. godine umro, preuzeo je halifat i, nakon dvanaest godina vladavine, ostavio je svoju titulu svome rođaku Velidu ibn Jezidu (Velid II). Prema historijskim zapisima, rođen je 691. i umro 743. godine.

¹⁵¹ Harun er-Rešid bio je peti halifa abasidske dinastije. Rodio se 763. godine za vrijeme vlasti svoga oca el-Mehdija u Reyu (današnji Teheran), te je nakon smrti svog brata el-Hadija preuzeo halifat. Proveo je najveći dio svog života u Bagdadu (Irak), ali je pri kraju svoga halifata živio u Rakki (Sirija). Kada je 809. godine tokom vojnog pohoda u Horasanu umro, pokopan je u gradu Tusu (današnji Mešhed). Kako bi osigurao podršku stanovništva, na početku svoga halifata glumio je ljubav i naklonost prema Ehli Bejtu. Zato je, između ostalog, dao sagraditi mauzolej Imama Alija u Nedžefu i tadašnjem Imamu, Musa el-Kazimu, otvoreno iskazivao veliko poštovanje. Ipak, iz straha da bi aleviti mogli politički osnažiti i halifat predati legitimnom Imamu, Musa el-Kazimu, dao je sedmog Imama pritvoriti i otrovati u zatvoru.

sin Abullah Memun¹⁵² (786-833) glumili su ljubav i odanost prema Poslanikovoј porodici, kako bi si osigurali podršku muslimanskih masa. Dok je Harun ar-Rašid dao izgraditi mauzolej Imama Alija, dao je sedmog Imama, Musu al-Kazima (Imam Musa al-Kazim), dugo vremena držati u zatvoru i otrovati. S druge strane, njegov sin Memun učinio je Imama Ali Rizu (Imam Ali Riza), protiv njegove volje, namjesnikom kako bi ugušio ustanke pod njegovom vlašću i kako bi smirio sljedbenike Ehli Bejta. Nakon što je Abdullah Memun slomio najveći ustanak Alida, odnosno Alevita, dao je Imama Ali Rizu podmuklo otrovati.

Također, ni u sadašnjoj situaciji nije drugačije. Tursko predsjedništvo za vjerska pitanja (Diyanet İşleri Başkanlığı), koje sebe smatra naslijeđem Osmanlija, pokušava nastaviti svoju politiku asimilacije u tom kontekstu. Dok su osmanlijski diktatori ocrnjavali Alevite kao rafidije ili murtede zbog njihove srodnosti s alevitsko-šiitskim Safavidima i pokušavali ih asimilirati putem svojih odanih dvorskih učenjaka, Diyanet također pokušava definirati alevizam kao kulturni izraz sunitskog islama:

„Alevizam nije ni religija niti pravna škola (mezheb). Prije je to kultura s folklornim elementima, pjesmama, dugovratim instrumentom (saz) i bektašijskim šalama.“¹⁵³

Službeno, konačno izvješće turske vlade o situaciji turskih alevita (Alevi Çalıştayları Nihai Raporu), napisano 2010. godine, donosi sljedeće objašnjenje:

„U tom smislu, anadolski alevizam je relativno nov pojam. On odražava sintezu onih vjerskih i kulturnih uvjerenja koja su se razvila od političkih i vjerskih diferencijacija koje su se formirale unutar Turaka od predislamskog perioda. Posljedično, alevizam se može posmatrati kao svjetonazor u kojem se ta različita uvjerenja spajaju.“

I pored ove nedosljedne definicije, isti izvještaj usklađuje alevizam sa sunizmom:

„Dok se sunizam manifestira kroz svoje pisane, formalne i normativne karakteristike, alevizam, koji se prenosio usmeno, privlači pažnju svojom kulturnom orijentacijom i sklonostima. Iako se mogu spomenuti neke sličnosti između sunizma i alevizma, jako teško je moguće insistirati na zajedničkom identitetu s njihovim vjerskim naglascima i praksama, ponašanjima, ceremonijama i referentnim sistemima, jer se oni značajno razlikuju. S druge

¹⁵² Abdullah el-Me'mun bio je sin halife Haruna er-Rešida i iranske sluškinje Meradžil. Po historijskim zapisima, rođen je 786. godine, šest mjeseci prije svog polubrata Muhameda el-Emina. Pošto je njegov polubrat Emin sin hašimijke Zubejde, rođakinje abasidskog halife Abu Džafera el-Mensura, on je 802. godine imenovan nasljednikom prijestolja prije svog starijeg brata Me'muna. Međutim, Me'mun je imenovan za upravitelja Horasana kao drugi prijestolonasljednik.

Nakon smrti halife er-Rešida, izbila je krvava borba između polubraće Me'muna i Emina za nasljeđivanje prijestolja. Uz podršku iranskog naroda, koju su Arapi ignorisali, Me'mun se uspio nametnuti u borbi za halifat. Ubrzo nakon preuzimanja vlasti, broj takozvanih alidskih ustanaka naglo je porastao zbog odmazde protiv pristaša Ehli Bejta. Kako bi privremeno ugušio političke ustanke i otpor alevita, Me'mun je za svog nasljednika (*veli ahd*) imenovao osmog Imama, Ali er-Ridu.

Kada je shvatio da njegova strategija ne dovodi do slabljenja, već do jačanja sljedbenika Ehli Bejta, podlo je otrovao Imama Ali er-Ridu. Kako bi prikrio ubistvo, naredio je da se Imam Ali er-Rida pokopa pored njegovog oca, Haruna er-Rešida, u gradu Tusu (današnjem Mešhedu). Abdullah el-Me'mun umro je 833. godine u dobi od 48 godina, a halifat je ostavio svome bratu Abu Ishaku el-Mu'tesimu.

¹⁵³ www.diyenet.gov.tr/tr/icerik/aciklama-alevlik/5936.

strane, vjerske i kulturne sklonosti alevita i sunita, utemeljene na islamu, imaju moć stvoriti neporeciv afinitet. Ustvari, upravo te sklonosti utemeljene na islamu značajno smanjuju, pa čak i kompenziraju ozbiljnost strukturnih razlika na razini doktrine i prakse od samog početka.“

Ovim ambivalentnim pristupom turska država pokušava ocrniti uvjerenja alevita kao neislamska i istovremeno ih predstaviti kao kulturni otisak sunitskog islama. Sistematska asimilacija alevitskog stanovništva koju provodi turska država stoga je očita. Međutim, završno izvješće namjerno ne daje jasnu definiciju pojma kako bi prikrilo sistematske pokušaje asimilacije turske države. Umjesto toga, ovaj cilj se slijedi preko pera režimu odanih autora i akademika. U tom pogledu, svjesno se upotrebljavaju principi autoritarnih vladajućih dinastija, u kojima su režimski učenjaci pisali pravne odluke kao i priče u knjigama koje su išle u prilog vladarima. Naprimjer, osmanlijski sultani su od 16. vijeka preko državi odanih učenjaka uvjerenje alevita ocrnjavali i poduzimali brojne pokušaje da ih iskrivljuju. Danas su to vjerski autoriteti koji teže političkoj moći i stoga usklađuju svoje vjerskopravne stavove s diktatima turske države. Naprimjer, pisac Ethem Ruhi Figlali sljedećom izjavom uspostavlja most sa sunitskim islamom:

„Nezamislivo je da se osobnost Hadži Bektaš Velija spominje u neislamskom kontekstu. Naprotiv, on je pridonio nastanku nove vjere iz turske kulture i islamske religije. On je preteča sunitskog turskog identiteta.“

Kao i mnogi akademici, naprimjer Čenkus Učer¹⁵⁴, sve sunitske sufijske struje, koje uspostavljaju vezu sa Imamom Alijem, klasificira kao alevite (tr. Alevi-Meşreb). Pritom, Učer previđa činjenicu da mnogi od spomenutih sunitskih sufijskih pokreta žestoko odbacuju naziv alevi. Slično tome, glavne alevitske figure poput Abdala Muse¹⁵⁵, Ahi Evrana i Geyikli Babe¹⁵⁶ se u ovim okvirima predstavljaju kao preteče sunitsko turskog identiteta:

¹⁵⁴ Cengiz Uçar je profesor na Univerzitetu Yildirim Beyazit u Ankari. Od 19. avgusta 2015. godine član je Odbora za vjerska pitanja pri Predsjedništvu za vjerska poslove (Diyanet İşleri Başkanlığı).

¹⁵⁵ Abdal Musa Sultan bio je jedna od najvećih vodećih ličnosti kod alevita, koji je instituciju alevizma u Anadoliji učvrstio u 13. vijeku i stotine ljudi odgojio i obrazovao u skladu s islamskim principima. Kao jedan od duhovnih halifa (u smislu zastupnika i nasljednika) Hadži Bektaš Velija, Abdal Musa Sultan je za vrijeme svog života ostvario veliki doprinos za duševni smiraj ljudi, zbog čega i danas uživa veliki ugled kod alevita. Najveći dio znanja o njegovom životu i djelima preuzet je iz zapisa arhiva osmanlijske dinastije ili iz legendi (*Menakib*, odnosno *Velajetname*). Prije svega, djelo *Velajetname-i Sultan Abdal Musa* pruža značajne informacije o njemu. Prema predaji, odrastao je kao siroče jer mu je otac rano umro. U zapisima se Laylar Ata spominje kao njegov djed, a Hasan Gazi kao njegov otac. Na temelju ovog opisa može se zaključiti da su Hadži Bektaš Veli i otac Abdal Musa Sultana bili rođaci.

Iako o njegovom obrazovanju nije mnogo otkriveno, na temelju činjenice da je osnovao obrazovnu ustanovu (tekiju) i tamo obučio veliki broj islamskih mistika, može se zaključiti da je i u mladosti morao steći izvrsno obrazovanje. Njegov grob nalazi se u selu Teke, u okrugu Elmalı u provinciji Antalija.

¹⁵⁶ Geyikli Baba bio je alevitsko-turkmenski duhovnik koji je živio u selu Babasultan u Bursi. Pored svih značajnih alevitskih derviša, on je nakon što su Osmanlije osvojile Bursu, pod vlašću sultana Orhana, zauzeo visoku funkciju. U knjizi njegovog savremenika Junusa Emrea navodi se njegovo ime kao Hasan. Iz historijskih zapisa proizlazi da je iz Khoya (Azerbejdžan) došao u Anadoliju i nastanio se u selu Babasultan. Također se prenosi da je rođen 1275. i da je umro 1350. godine.

Hadži Bektaš Veli bio je ašik-paša, poput Junus Emrea i Mevlane (Dželaludin Rumi), šerijatski predstavnik sunitskih mistika i daleko od bilo kakve vrste licemjerja, zlobe i nevjerstva.

Ako se po strani ostave sumnje u Hadži Bektaš Velijevu čvrstu predanost sunitsko-sufijskom razumijevanju ili shvaćanju islama koje je proturječno tadašnjoj percepciji njegovog vremena, može se prepoznati da je bio sljedbenik Ahmeda Jesevija.

Isto tako, sunitski teolog Jašar Nuri Ozturk (umro 2016), koji uživa veliko poštovanje među alevitima zbog svog sekularnog svjetonazora i odbacivanja umejadskog shvaćanja islama, opisao je Hadži Bektaš Velija kao sunitskog učenjaka.

Hadži Bektaš Veli je sljedbenik islamskog misticizma (sufizma) prema principima Kur'ana i sunneta.

Može se sažeti da zagovornici ove teze uglavnom teže političkom cilju učinkovite sunizacije anadolskog alevitskog stanovništva. Djelomično uz državnu podršku, alevitski mislioci i učenjaci potiču se na stvaranje sunitskog identiteta, iako se iz djela i postupaka ovih plemenitih ličnosti može jasno zaključiti da oni smatraju pravo predvodništva (arap: wilaya) od Boga datim Ehli Bejtu. Nasuprot tome, sunitski islam ne predviđa božanski imenovano (nepogrešivo) vodstvo nakon Poslanikove smrti. Stoga se postavlja pitanje: Kako se iz ove perspektive ozbiljno može tvrditi da je alevizam kulturni izraz sunizma, dok su bitna načela vjerovanja kontradiktorna? Alevizam se, s druge strane, isključivo oslanja na učenje Poslanika Muhameda i Ehli Bejta. U ovom trenutku može se postaviti i sljedeće pitanje: Kada se pojavio alevizam?

Jer je iz historijskih izvora i autentično klasificiranih predaja jasno da je pridržavanje Imama Alija nekoliko puta naglašeno tokom Poslanikovog života; posljednji put na Gadir Humu. Odmah nakon smrti Poslanika Muhameda, odani sljedbenici Imama Alija nazivani su alevi, iako su se u to vrijeme nazivali Ši'at Ali (Alijeva stranka)¹⁵⁷. Stoga bi se čak moglo provokativno tvrditi da se alevizam, u smislu sadržaja, a ne u smislu naziva, pojavio čak i prije sunizma. Jer dok se teološki temelji alevizma nakon Poslanika Muhameda u potpunosti temelje na učenjima Dvanaestorice Imama, definicija sunizma (arap. Ehli Sunna we-Džemaa)¹⁵⁸ oblikovana je preuzimanjem vlasti koje su izvršili Umejadi.

U tom smislu na početno pitanje može se odgovoriti rekaviši da, zbog ovih značajnih i temeljnih razlika, alevizam nije kulturni fenomen sunitskog islama.

¹⁵⁷ Šija Ali: pomagači, sljedbenici, Alijeva stranka.

¹⁵⁸ Ehli sunnet ve-l-Džema'a, odnosno „narod tradicije i jedinstva“, čine najveću denominaciju u islamu i poznati su kao suniti. Ovaj izraz, koji je nastao iz političkih razloga najmanje vijek nakon smrti poslanika Muhameda, namijenjen je izražavanju činjenice da se neko vodi Kur'anom i Poslanikovom tradicijom (arap. *sunnet*).

Ovaj naziv najvjerovatnije potječe od modificirane hadiske verzije o „dvije dragocjenosti“ (*sekalejn*), u kojoj se kaže da je Poslanik Muhamed muslimanima ostavio dvije vrijedne stvari: Kur'an i svoj sunnet. Međutim, izvorni oblik predaje spominje izraz „Ehli Bejt“ umjesto izraza „sunnet“.

3.6 Da li je alevizam vezan za turski identitet?

Još jedna grupa se približava alevizmu sa nacionalnim vrijednosnim predstavama i pokušava religiozni identitet alevizma istjerati iz svakodnevice. Naročito kroz politički konflikt između lijevo i desno orijentiranih frakcija u sedamdesetim i osamdesetim godinama prošlog stoljeća, došla je teza o turskom porijeklu alevizma. Kako bi povećali svoj politički uticaj, nacionalna udruženja su pokušavala širiti teoriju da se korijeni alevizma mogu pronaći isključivo u turcizmu. Pri tome se pozivaju na poznate alevitske ličnosti, koje su bile ključne u širenju islama u zemljama turskog govornog područja. U tom kontekstu često se spominju imena Seyyida Battala Gazija, Hadži Bektaša Velija, Abdala Muse, Geykili Babe, Ahija Evrana, Yunusa Emrea i drugih alevitskih vođa. Turski nacionalisti stoga navode tursko porijeklo ovih velikih alevitskih mislilaca kako bi definirali alevizam kao kulturni oblik (sunitskog) turcizma.¹⁵⁹ Kao što je prije spomenuto, nakon smrti Poslanika Muhameda došlo je do odstupanja od istinske misije islama, što je dovelo do ponovnog buđenja arapskog nacionalizma. Posebno tokom razdoblja Umejada, a dijelom i tokom ranih faza abasidskog razdoblja, Perzijanci i Turci koji su prešli na islam bili su izloženi brojnim nepravdama i nazivani Mawali (u značenju „štićenici“ ili „podanici“, često korišteno u pogrdnom, drugorazrednom smislu).

Ovaj historijski period je ključan za razumijevanje tenzija između univerzalne poruke islama i etničkih aspiracija tadašnjih vladajućih elita.¹⁶⁰

Slično tome, perzijski jezik, koji je u to vrijeme bio dominantan u poeziji, mogao je izvršiti svoj utjecaj na turske dinastije Seldžuka (1040–1307) i Osmanlija (1299–1922). Međutim, zahtjevi turkmenskog stanovništva da svoja vjerska uvjerenja uče na turskom jeziku uglavnom su ignorirale turske vladajuće dinastije, koje su perzijski proglasile službenim i dvorskim jezikom. Samo su derviši poznati kao Horasan Erenleri (doslovno: mudraci Horasana) i Rum Abdallari (doslovno: derviši Anadolije)¹⁶¹, koji su pronašli utočište u Anadoliji tokom migracije naroda za vrijeme mongolskih invazija podučavali osnovne vjerske vrijednosti na turskom jeziku. Posebno kada su velika područja Bliskog istoka patila pod brutalnom mongolskom okupacijom, ovi derviši širili su učenja Ehli Bejta među stanovništvom i

¹⁵⁹ Treba naglasiti da zagovornici sunitsko-islamske i tursko-islamske teorije imaju slične, ili nekad preklapajuće, stavove. Budući da se obje frakcije temelje na sunitskom islamu, ne mogu se utvrditi značajni kriteriji razgraničenja. Jedina je razlika u tome što jedna frakcija naglašava sunizam, dok se druga usredotočuje na turski identitet.

¹⁶⁰ Pojam *mawali* (množinski oblik izraza *mewla*) koristio se i u predislamsko i u ranoislamsko doba za ljude koji su bili pod zaštitom jednog od arapskih plemena i klanova. Dok se u predislamsko doba izraz *mawali* koristio za ljude koji su došli pod zaštitu jačeg i moćnijeg plemena, u ranoislamsko doba nearapski muslimani koji su prešli na islam nazivani su *mawali*. Kod takvog prelaska na islam pravilo je bilo da je osoba od koje su primili islam njihov zaštitnik.

¹⁶¹ Dok su Horasan Erenleri širili islam na muslimanskim teritorijama, Rum Abdallari su djelovali u područjima koja su bila pod bizantijskom, odnosno kršćanskom vladavinom.

organizirali pokrete otpora protiv mongolske okupacije, što je rezultiralo jačanjem islamskog identiteta među anadolijskim stanovništvom.

Dok su turski nacionalisti pokušavali alevizam, bazirano na ovim historijskim činjenicama, definirati kao kulturnu formu sunitskog turcizma, oslanjali su se istovremeno na tradiciju Osmanlija i održavajući distancu prema alevitima, koji su više puta pozivali na ustanke u Osmanskom Carstvu zbog socijalno-političkih neprilika.

Kako bismo razumjeli ambicije ovih nacionalizmom motiviranih pokušaja definiranja, prije svega moramo ispitati historijske događaje Osmanskog Carstva. Posebno nakon bitke kod Čaldirana 1514. godine, aleviti su bili izloženi sistematskom progonu Osmanskog Carstva jer su simpatizirali šaha Ismaila i Safavide. Dok su arapski i perzijski sljedbenici Ehli Bejta uglavnom uspjeli izbjeći masakre osmanlijskih vladara zbog svog geografskog položaja, anadolijski aleviti u srcu Osmanskog Carstva osjetili su izravnu agresiju. Kako bi spriječili ponovni porast prosafavidskog otpora protiv Osmanlija, aleviti su ili ubijeni ili protjerani, što je ozbiljno desetkovalo alevitsko stanovništvo.¹⁶² Ovo ugnjetavanje i neprijateljstvo prema alevitima trajali su stoljećima. U velikim dijelovima turskog stanovništva, od kojih se neki još uvijek smatraju kao Osmanlı torunları (potomci Osmanskog Carstva), negativan stav prema alevitima još uvijek je opipljiv, jer se do danas često ne smatraju punopravnim muslimanima. Naprimjer, turski nacionalistički političar Yahya Kemal Beyatli (1884–1958) u svojoj pjesmi Selimname, pogrdno je nazvao alevite rafidi, kizilbaš i surhser:

Okupatori arapskih teritorija (memluci), čekajte svoje vrijeme
Pred tobom će biti kažnjen vladar surhsera,
Kao po nemilosrdnoj zapovjedi, uzdiže se mitska ptica (Simurgh-e Homa)¹⁶³

Sa Tugrom otišlo je pismo vladaru kizilbaša,
Najprije su neposlušne rafidije bijesno napale naše lijevo krilo
Borba se učini beznadežnom na našem lijevom krilu.

Dok je jedan dio stanovništva u regiji Crnog mora, uslijed progona i politike asimilacije osmanske vlasti, bio prinuđen na prelazak na sunizam, u drugim regijama aleviti su se služili principom takijje¹⁶⁴, kako bi prikrili svoj alevitski identitet. Iz straha da bi ova praksa mogla biti otkrivena i državna represija mogla biti još i pojačana, svoj alevitski identitet su čak držali

¹⁶² Iako ne postoje službeno potvrđeni podaci o trenutnom broju alevita, njihov se udio trenutno procjenjuje na otprilike 15% ukupnog turskog stanovništva.

¹⁶³ Ptica Homa je mistična ptica iz iranskih legendi i basni.

¹⁶⁴ *akija*, odnosno metod prikrivanja vlastitih vjerskih uvjerenja u islamu, primjenjuje se kada je ugrožen sopstveni život ili život drugih ljudi. Prema islamskim predajama, Poslanikov prijatelj Ammar ibn Jasir prvi je upotrijebio princip prikrivanja. Kada su njegove roditelje od izmučili mekanski mnogobošci i pred njegovim očima hladnokrvno ih ubili, on je islam prividno porekao kako bi spasio svoj život. U Kur'anu se ova praksa odobrava u posebnim slučajevima. Vezano za ovo, pogledati suru En-Nahl, ajet 106.

u tajnosti i od sopstvenih potomaka, tako da se nekada po uvjerenju alevitsko stanovništvo sve više okretalo sunizmu. Jer su naredne generacije odrastale sve više u sunitskom okruženju i jednim dijelom više nisu znali da su njihovi preci bili vjernici aleviti, koji su se samo iz nužde javno deklarirali kao suniti i svoju pripadnost alevitskom islamu morali negirati. Uslijed asimilacione politike pod osmanlijskim vladarima, aleviti su stoljećima bili izolirani te su mogli tek ograničeno doći do religioznog znanja. Ono što su alevitski teolozi uspjeli sačuvati od vjerskog znanja u udaljenim selima i regijama, prenošeno je prvenstveno u usmenoj formi i na ovakav način s generacije na generaciju dalje prenošeno. Međutim, kroz stoljeća je došlo, kao i kod svih vrsta usmenog prenošenja, do velikog gubitka informacija kao i formiranja u dijelom različitim regionalnim shvatanjima alevizma. Zato također ne čudi da je danas alevizam postao igračka različitih ideoloških skupina, koje po svojim sopstvenim predodžbama postavljaju definicije alevizma. U tom kontekstu, turski nacionalizam dovodi do tursko-islamske sinteze¹⁶⁵, koju je prvi put predložio konzervativni historičar Ibrahim Kafesoglu. On je utemeljio intelektualno udruženje Aydinlar Ocagi. Kafesoglu se pozivao u svojoj teoriji, tursko-islamske sinteze na prvu tursko-islamsku dinastiju Karahaniden¹⁶⁶ u jedanaestom stoljeću i smatrao je simbiozu Turske stepske kulture i islama kao jedno usavršavanje. Turskim vladajućim familijama koje su slijedile nakon Karahanida pripisuju se značajne uloge kod širenja nacionalno-islamskog identiteta. Posebno se pri tome ističu sunitske vladajuće familije Seldžuci i Osmanlije. Kako bi dobili podršku alevitskog stanovništva, turski nacionalisti ponekad pokušavaju dodijeliti značajnu ulogu i Safavidima i Kadžarima, pri čemu je njihov turcizam jasno naglašen, ali se njihov šiitski identitet posebno ne tematizira.

Turcizam je u skladu sa tursko-islamskom sintezom samo moguć u vezi sa sunitskim islamom. Primarni cilj ovog intelektualnog udruženja bio je potisnuti utjecaj marksističke ideologije, koju se smatralo opasnošću za turske vrijednosti. Iako je turska vojna hunta imala rezerve prema islamskom fundamentalizmu nakon puča 1980., vojska je pokušala promovirati islamsko-konzervativne ideje, budući da je vojska također smatrala rastuću socijalističku ideologiju u zemlji prijetnjom vladajućem državnom sistemu. Jačanjem islamsko-konzervativnog i nacionalističkog tabora, vojska je tako postigla promjenu u ravnoteži snaga i uspjela je obuzdati političke nemire u zemlji.

Rastuća moć fundamentalističkih skupina izazvala je veliku nelagodu među alevitskim stanovništvom, koje je stoljećima bilo masovno progonjeno pod osmanskim vlašću. Osnivanjem Republike Turske, aleviti su postali odane pristaše sekularizma, jer ovaj ustavni model strogo odvaja državne i vjerske vlasti. U konačnici, aleviti su vjerovali da se praktičnom provedbom sekularizma više neće morati bojati velike vjerske diskriminacije.

¹⁶⁵ Tursko-islamska sinteza (*Türk-İslam Sentezi*) politički je desničarska islamsko-konzervativna ideologija koja kombinira turski nacionalizam i islam.

¹⁶⁶ Karahanidi su bili turska vladajuća dinastija čiji su vladari prešli na islam 960. godine i u 11. i 12. stoljeću vladali Srednjom Azijom.

Upravo zbog te odvojenosti mnogi aleviti sebe smatraju ponosnim zagovornicima sekularne Republike Turske sve do danas.¹⁶⁷

Nadalje, kemalisti¹⁶⁸ pokušavaju preko sekularizma, naročito preko ličnosti Mustafe Kemala Atatürka¹⁶⁹, preuzeti utjecaj na dlevitsko stanovništvo. Pošto je Mustafa Kemal Atatürk okončao osmanski halifat i postavio temelje za sekularnu Tursku, on uživa do današnjih dana veliki ugled među većinom alevitskog stanovništva. Konačno, aleviti, omraženi u Osmanskom Carstvu, u sekularnoj Republici Turskoj više ne moraju strahovati od represije sunitskih fanatika. Međutim, zahvaljujući Prezidiju za vjerska pitanja, koji je osnovan 1924. godine, načelo sekularizma nikada nije u potpunosti provedeno. Iako je odvojenost države i religije utvrđena u turskom ustavu, država se opunomoćila predsjedništvom za vjerska pitanja i pokušala uspostaviti republikansko-sekularnu i etnonacionalnu državu islama u društvu. Pod izgovorom da osigura teritorijalno jedinstvo države (protiv kurdskih separatista), interesi različitih konfesionalnih zajednica bili su i nastavljaju da se zanemaruju, i isključivo se propagira hanefijsko-sunitsko tumačenje islama. Time Turska država nije samo prekršila svoju obavezu neutralnosti naspram svih konfesionalnih skupina, nego si je istovremeno pripisala isključivi monopol i kontrolu nad vjerom. Nadalje, kemalistička elita pokušala je preko velikog broja sunitskih teologa, kao što su naprimjer Jašar Nuri Öztürk

¹⁶⁷ Međutim, upitno je može li se alevizam pomiriti sa sekularizmom s teološkog gledišta, budući da to proturječi temeljnim načelima alevizma. Uzimajući u obzir da se podjela muslimana pripisuje činjenici da sljedbenici Ehli Bejta – za razliku od sunitskih muslimana – smatraju poslanika Muhameda i dvanaest Imama kako duhovnim tako i svjetovnim vođama i odbacuju tvrdnje sunitskih halifa o vođstvu, sekularizam se nipošto ne može smatrati ciljem ili čak idealom iz alevitske perspektive. Prema ovom primjeru, prvenstveno su potomci Ehli Bejta (dede, pir, muršid) ti koji su stoljećima preuzimali svjetovno i duhovno vođstvo alevitskih seoskih zajednica. Ovaj pristup je jasno vidljiv kada pir ili dede preuzima ulogu tužitelja i suca prije početka ceremonije džem kako bi osigurao svjetovni mir (rizalik) unutar zajednice. U ovoj prilici on sluša probleme unutar zajednice, pa čak i izriče kaznene mjere za teške prekršaje. Tek kada je svjetovni mir unutar zajednice uspostavljen, može se otpočeti s ceremonijom Džem.

¹⁶⁸ Kemalizam (*Kemalizm*), odnosno ataturkizam (*Atatürkçülük*), osnivačka je ideologija Republike Turske, proglašene 1923. godine.

¹⁶⁹ Mustafa Kemal Atatürk, odnosno Mustafa Kemal-paša (1881–1938), bio je nakon Prvog svjetskog rata utemeljitelj Republike Turske koja je proizašla iz Osmanskog Carstva i bio je njen predsjednik od 1923. do 1938. godine. Njegove zasluge kao oficira prilikom odbrane poluotoka Galipolija 1915. godine protiv savezničkih trupa, koje su pod kontrolu htjele staviti Dardanele, kao i odbrambena bitka 1921. godine protiv Grka koji su bili prodrli u Anadoliju, učinile su ga simbolom turske nacionalne svijesti. Kao šef države koji je promovirao modernizaciju svoje zemlje prema zapadnim modelima, stvorio je sekularni tip države, jedinstven u muslimanskom svijetu, ukidanjem sultanata i halifata, kao i provođenjem dalekosežnih društvenih reformi. Zbog svog pristupa provedbi reformi, njegova osobnost ponekad je vrlo kontroverzna među sunitima i alevitima. Dok ga fanatični suniti optužuju za antiislamski stav i stoga ga žestoko odbacuju, on uživa veliko poštovanje među alevitskim stanovništvom do danas zbog ukidanja halifata. Konačno, osnivanjem republike, aleviti su dobili građanska prava koja su im bila uskraćena pod Osmanskim Carstvom. Istovremeno, na njegovu ličnost kritički gledaju aleviti s kurdskog govornog područja zbog njegovog stava tokom masakra u Dersimu 1938. godine.

(1951–2016) ili Hajdar Baš (1947–2020)¹⁷⁰ da izvrši utjecaj na alevitsko stanovništvo. Spomenuti stručnjaci i teolozi zastupaju liberalan islam u skladu sa sekularnim razumijevanjem i istovremeno uzimaju pravu ulogu Ehli Bejta iz sunitskih izvora. Aleviti, koje je sunitska većina stoljećima marginalizirala i odbacivala, slave ih upravo iz tog razloga. Nadalje, snažan povratak velikih segmenata turskog stanovništva sunitsko-islamskoj baštini Osmanlija gura alevite sve više u ruke kemalista, koji sebe vide kao čuvare sekularne Turske. Zbog ove potencijalne opasnosti, kemalizam je desetinama godina uspio osigurati naklonost alevitskih birača bez potrebe da uzima u obzir njihove vjerske, političke i društvene želje i potrebe. Putem vlastitih televizijskih stanica i novina, koje djeluju kao dio ove propagandne mašinerije, Hajdar Baš, naprimjer, promiče tursko-islamsku sintezu. Primarni cilj cijele inscenacije je otkloniti rezerve prema turskim pokušajima asimilacije, a istovremeno probuditi simpatije prema sekularnom razumijevanju islama po hanefijskom tumačenju. Naprimjer, Jašar Nuri Ozturk osvrnuo se na zločine učinjene prema Ehli Bejtu i time naglasio njihov upraviteljski položaj nad islamskom zajednicom. Istovremeno je hvalio i veličao ulogu Ebu Hanife, nazivao ga je po sunitskoj tradiciji Imam Azam (tur. İmam-i Azam), dakle veliki Imam. Nadalje, negirao je postojanje Imama Mehdi¹⁷¹, i čekanje na Dvanaestog Imama nazivao je šejtanskom igrom, što je jasan napada na temeljni dio alevitskog učenja. Cilj ovih stručnjaka je bio prije svega uspostaviti simpatije među alevitskim stanovništvom prema vladajućem sistemu i istovremeno ih spriječiti da dublje istražuju alevizam.

Dok se Ozturk i Baša razumijeva kao suniti, koji gaje veliku ljubav prema Ehli Bejtu, neki drugi protagonisti tursko-republikanske propagande idu korak dalje i predstavljau se kao aleviti. Naprimjer, sunitski teolog¹⁷² Mustafa Cemil Kilić (rođen 1975.) predstavlja se kao alevit i pokušava svojim knjigama i predavanjima steći ugled i priznanje u alevitskoj zajednici. Uočljivo je prije svega da on u svojim knjigama naglašava svoje turkmensko porijeklo, dok zapravo vodi svojevrstu bitku protiv Kurda, i dovodi u pitanje postojanje kurdskih alevita. Istovremeno, vodi propagandu za ultranacionalističku MHP¹⁷³, čiji sljedbenici se nazivaju Sivi Vukovi (tr.: Bozkurtlar), i citira stavove desno orijentiranog političara Umut Ozdaga, kao Naprimjer sljedeći:

¹⁷⁰ Hajdar Baš bio je sunitski pisac, teolog i istovremeno predsjednik partije BTP (*Bağimsız Türkiye Partisi* – „Partija nezavisne Turske“). Pored toga, bio je vlasnik poznatih televizijskih kuća kao što su Av TV, Kadırga TV, Köy TV, Meltem TV, Mesaj TV i Sihat TV, kao i dnevnih novina *Yeni Mesaj* i časopisa *İcmal*.

¹⁷¹ Mehdi je, prema tradicionalnom islamskom tumačenju, potomak poslanika Muhameda koji će na kraju vremena ukloniti nepravdu sa Zemlje. Način i uslovi njegove pojave iscrpno se obrađuju u brojnim hadiskim zbirkama. Prema alevitskom učenju, dvanaesti Imam, Muhamed Mehdi, vratit će se nakon svog vremena u skrivenosti (*gajb*) i spasiti čovječanstvo.

¹⁷² Kao što je već prethodno spomenuto, biti alevit nije bazirano na pravu po rođenju. Otuda je svakom sunitu otvorena mogućnost da se upozna sa osnovama alevizma i na toj osnovi pređe na alevizam. Međutim, pošto Mustafa Cemil Kiliç u svojim knjigama djelom sunitske, a djelom praznovjerničke teze produbljuje, mora se iskrenost njegovih riječi dovesti u pitanje.

¹⁷³ Milliyetçi Hareket Partisi (Partija nacionalnog pokreta) je desničarska partija. MHP slovi za političku ruku Idealista (*Ülkücüler*) ili Sivih vukova.

Religiozna interpretacija turskog nacionalizma je nažalost još uvijek veoma sektaška. Ipak, ma koliko jedna religijska skupina unutar turskog naroda bila velika, turski nacionalizam mora obuhvatiti sveukupnu tursku naciju, a ne samo jedan dio. Iako se jedan veliki dio turske nacije evroazijskog bloka smatra muslimanima, postoje kršćanski, židovski, šamanski i budistički elementi. Pri tome se ne smije zanemariti broj turskih šiita i alevita kako u Turskoj, tako i u evroazijskom području. Povrh toga, ne smije se previdjeti da najveći dio Turaka koji žive u Iranu izražava šiitsko vjerovanje.

Iako se općenito smatra da su turski nacionalisti prevladali problem alevita i sunita, političke i društvene prepreke su i dalje vidljive u svakodnevnom životu. Istaknute kontradikcije između alevizma i sunizma stoga služe kao alati u psihološkoj borbi protiv turske nacije. Turski nacionalisti su stoga obavezni raditi na uklanjanju alevitsko-sunitske omče kao i obezbijediti društvenu integraciju. Oni koji se smatraju turskim nacionalistima, a i dalje slijede uske sektaške pristupe, štete, iako ne htijući, turskoj naciji i turskom nacionalizmu. Iako se ove rečenice na prvi pogled mogu smatrati veoma pozitivnim – pošto se osuđuje stotinama godina star konflikt između alevita i sunita – ne smije se zanemariti da je alevitima turski nacionalizam nametnut. Da pored većine alevita koji potiču iz turskih plemena, znalački se prešućuje da postoje aleviti drugih etničkih skupina.

U svojim predavanjima i knjigama Kılıç pored toga još njeguje kult ličnosti Atatürka. Na nekim mjestima čak iznosi teze koje proturječe temeljima alevizma, čak ide tako daleko da Ataturka naziva Mehdijem:

Dok su neki redovi i zajednice sunitskog islama doveli svoje neprijateljstvo prema Ataturku do te mjere da su ga proglasili Dedžalom¹⁷⁴ (varalicom), ispitat ćemo stav alevita i bektašija po ovom pitanju. Mora se naglasiti da je naklonost prema Ataturku među alevitima i bektašijama toliko intenzivna i izražena da je u njihovim očima Ataturk bio, ne samo veliki junak i vođa, već i spasitelj Mehdi.

Pri tome Kilić potvrđuje, bez da se poziva na alevitske izvore, stoljetnu klevetu da aleviti vjeruju u božanstvenost Imama Alija.¹⁷⁵ Međutim, umjesto da opovrgava ove neodržive optužbe, on ih samo pojačava i tvrdi da je božanstvenost Imama Alija usidrena u mističnom učenju alevizma, na sljedeći način:

„Arapsko značenje riječi Ali je 'Uzvišen'. Uzvišenost u njegovom imenu treba shvatiti kao znak njegove iznimnosti, budući da njezino porijeklo leži u Bogu. Stoga aleviti i bektašije čvrsto vjeruju da on (Imam Ali) posjeduje božanske osobine. Ovo uvjerenje protivnici alevita koristili su kao izgovor da optuže alevite za idoliziranje Imama Alija. Međutim, ova optužba

¹⁷⁴ Dedžal se u islamskim zapisima opisuje kao zla osoba koja će se pojaviti prije Dana proživljenja (*Yaum al-Qiyama*). Njegova pojava događa se malo prije povratka Imama Mehdija i poslanika Isaa. On je uporediv s Antikristom u kršćanskoj tradiciji i s jevrejskim predajama o Armilusu.

¹⁷⁵ Ova tema se obrađuje u poglavlju „Da li je alevizam pretjerivanje“.

je neutemeljena budući da shvaćanje „Wahdat al-Wudžud“¹⁷⁶ (Jedinstvo postojanja) čini temelj alevizma. Posljedično, vjerovanje u božanstvenost Imama Alija temelji se na činjenici da se Bog manifestira u čovjeku.

Nadalje tvrdi da se alevizam temelji na navodnom kultu božanstva Imama Alija:

„Vjerovanje u božanstvo Imama Alija također ima tragove drevnih (predislamskih) turskih vjerovanja. S obzirom na činjenicu da su velika većina alevita i bektašija Turci i Turkmeni, pripisivanje božanstva osobi Imama Alija može se bolje objasniti. Prema poznatoj istraživačici Irene Melikoff, aleviti i bektašije koristili su imena, kvalitete i atribute koje su drevni (predislamski) Turci koristili za svog boga neba, za Imama Alija. S ove tačke gledišta, možemo reći da bog neba drevnih (predislamskih) Turaka i dalje postoji u vjerovanju današnjih alevita i bektašija, koji predstavljaju čisti oblik turskog identiteta, u obliku Imama Alija. Stoga moramo braniti božanstvenost Imama Alija, nepokolebljivo i pod svim uvjetima, naspram poricatelja, netolerantnih i površnih stavova!“

Iako bi trebalo da je on kao teolog svjestan posredovanja (arab. Tawassul, tr. Tevessul)¹⁷⁷ u alevizmu, on argumentira iz sunitske perspektive, i time osnažuje rezerve prema alevizmu.

Kilić pripada krugu kontroverznog alevitskog klerika İzzetina Dogana¹⁷⁸ i njegove džem fondacije (tr. Cem Vakfi), koju on smatra jednom od najvažnijih alevitskih organizacija. džem naklada je poznata po tome da njeguje jedan ekstreman Ataturk kult i uživa posebnu bliskost sa državom. Pritom, naklada se često optužuje da propagira učenje blisko sunizmu. Kako bi alevitsko stanovništvo dalje vezali za tursku državu i kako bi sačuvali slijepu poslušnost prema kemalističkoj eliti, državi bliske organizacije i udruženja slijede osnaženje kulta ličnosti Atatürka. Otuda je država prije svega nametnula obavezu da se portreti Mustafe Kemala Atatürka drže u džem-kućama¹⁷⁹ na šta se aleviti s pravom žale. Iako bi se

¹⁷⁶ *Wahdat al-wujud* (Jedinstvo bitka) filozofsko je shvaćanje jedinstva između Stvoritelja i stvorenja u islamu. Ono opisuje da ne postoji stvarna egzistencija osim Boga, te da mogućnost egzistencije postoji samo kroz Boga. Sve što nije Bog iz nepostojanja je uvedeno u postojanje kroz Njega, pri čemu On uvijek egzistira i jedini je istinski Egzistent.

¹⁷⁷ Tevesul znači zagovornništvo, posredovanje i religiozna je praksa u islamu, u kojoj vjernici uz pomoć jednog posrednika (ar. *wasila*, tur. *vesile*) pokušavaju da ostvare veću bliskost sa Bogom. Ovaj posrednik između ostalog može biti svetac, mezar, jedno lijepo Božije ime ili također i Kur'an. Aleviti koriste pored Poslanika i Ehli Bejta također i svetog Hidra kao posrednika, kada zazivaju „Oh Ali, pomoz!“ (tur. *Ya Ali Medet*) ili „Požuri, o Hidre!“ (tur. *Yetiş ya Hızır*).

¹⁷⁸ İzzetin Doğan rođen je 1940. godine u Malatyi. On je profesor međunarodnog prava te predsjednik i glavni urednik *Cumhuriyetçi Eğitim ve Kültür Merkezi Vakfı* (Republička zaklada za obrazovanje i kulturu), koja je poznata pod kratkim nazivom Cem Vakfı (Džem-zaklada).

¹⁷⁹ Džem-kuće (*Cemevi*) su kako vjerske, tako i obrazovne ustanove alevita. Tako se u Džem-kućama, pored obredoslovlja, obrađuju i društvene teme. Dok su se aleviti za religiozne obrede prije svega okupljali u tekijama i dergahima, današnje Džem-kuće su prije svega pojava modernog vremena. Pošto u islamu nisu definirane konkretne Božije kuće, koncept Džem-kuća ne stoji u suprotnosti s islamom. Prema preovlađujućem mišljenju mnogih alevita i alevitskog svećenstva, koncept Džem-kuće, u usporedbi sa današnjim džamijama, još je više u skladu s principom prvih mesdžida u vrijeme Poslanika Muhameda.

kod ovih pitanja moglo pozvati na princip sekularizma, koji je čvrsto utemeljen u 24. članu turskog ustava, država istrajava na obavezi da ističe portrete Atatürka. Obrazlažući ovaj stav često s argumentacijom da se kod džem-kuća ne radi o islamskim božijim odnosno molitvenim kućama, nego se džem-kućama pripisuje status obrazovnih i kulturnih centara. Kao što je već nekoliko puta naglašeno, alevizam se temelji na božanskoj poruci Poslanika Muhameda. Stoga, svako ko ispovijeda osnove alevizma pripada alevitskoj vjerskoj zajednici; porijeklo osobe nije relevantno. Stoga se, isključivo iz razloga politike moći, sugerira da je pripadnost turskoj etničkoj skupini preduvjet za to da se bude alevit. Porast kurdskog nacionalizma među alevitima koji govore kurdski također se može pratiti do turskog nacionalizma, koji je dugo vremena negirao postojanje kurdskih alevita. Islam, međutim, odbacuje sve oblike rasizma.

Činjenica da ovaj nacionalistički pristup ne odgovara temeljima alevizma jasno se odražava u izjavama Ehli Bejta. Naprimjer, može se ukazati na sljedeću izjavu Džafera as-Sadika:

Onaj ko u svome srcu gaji koliko i trunku rasizma, njega će Allah na Sudnjem danu oživjeti sa arapskim idolopoklonicima!¹⁸⁰

3.7 Da li je alevizam vezan za kurdski identitet?

Na početku ovog poglavlja mora se naglasiti da postoje različite kurdske frakcije i ideologije, koje s druge strane slijede različite političke ciljeve. Iako kurdski nacionalizam ne predstavlja preovlađujuću većinu, ipak zauzima određenu poziciju unutar kurdske politike. U ovom poglavlju bit će bliže objašnjeni definicijski pristupi nekih zagovornika kurdskog nacionalizma u odnosu prema alevizmu.

Kurdski nacionalizam ni na koji način nije inferioran turskom nacionalizmu i, uz navodne paralele između alevizma i zoroastrizma i jazidizma, također ukazuje na važne alevitske figure poput Seyyida Rize (1862–1937). Za razliku od turskog nacionalizma, neki kurdski nacionalisti tvrde da je alevizam neovisna (izvanislamska) religija. Tvrdeći da su Kurdi izvorno bili zoroastrijanci i jazidi, prije njihove prinudne islamizacije u prvim stoljećima islamske ere, pokušavaju se pridobiti aleviti govornici kurdskog jezika, koji su stoljećima bili potlačeni i progonjeni u ime sunitskog islama, za kurdski nacionalizam. Jedan od najpoznatijih zagovornika ove teorije je kurdski pisac A. Medyali,¹⁸¹ koji vjeruje da korijene alevizma može pratiti do zoroastrizma. Drugi predstavnici kurdske teorije također pokušavaju pronaći korijene alevizma hiljadama godina prije pojave islama, jer u alevizmu vide elemente bliskoistočnih religija. Kada se uzme u obzir da se islam smatra ibrahimovskom religijom, ne

¹⁸⁰ Al-Kulayni: *Al-Kafi*, sv. 2, str. 308 (hadis 3); Al-Majlisi: *Mir'at al-Uqul*, tom 10, str. 175.

¹⁸¹ Budući da se u njegovim knjigama, kao ni u tekstovima koji su o njemu napisani, ne spominje njegovo ime, ovdje se citira kao „A. Medyali“.

može se poreći da se korijeni alevizma nalaze hiljadama godina prije pojave islama. Štaviše, u ovom trenutku treba naglasiti da spomenuti stručnjaci nisu mogli dovoljno proučiti vjerovanje alevizma. Uostalom, prema alevitskom vjerovanju, temelj vjere može se pratiti do događaja poznatog kao Qalu Bela.¹⁸² Prema predaji na ovom događaju, koji se desio prije stvaranja vremena i mjesta, Bog je, osim izjave o svom veličanstvu i slavi, dobio i zakletvu na vjernost prema Poslaniku Muhamedu i Ehli Bejtu od duša svih ljudi. U jednoj pjesmi Pira Sultana Abdala, ovo vjerovanje je opisano na sljedeći način:

Pir Sultan sam ja, dao sam zavjet Bogu, Muhamedu i Aliju

Naš Zavjet je od Qalu Bele¹⁸³

Nadamo se zagovoru velikog Hadži Bektaš Velija

Volim Muhamed Alija.

Jednako tako je istina da su mnogi azijski narodi, koji su prihvatili islam od sedmog stoljeća, nastavili njegovati svoje kulturološke običaje i tradicije. Međutim, ovdje treba obratiti pažnju na to da su mnogi narodi svoj religiozni i kulturni život u općem pogledu uskladili prema islamskim propisima. Ako su prethodni običaji i tradicije proturječili islamskim zapovijedima i zabranama, oni su ili ukinuti ili prilagođeni. Istodobno, religije poput jezidizma bile su pod utjecajem islama i stoga i danas pokazuju islamske elemente, budući da su jezidi dugo živjeli pod muslimanskom vlašću. Stoga pokušaj pozivanja na kulturne običaje i tradicije koji možda imaju korijene u zoroastrizmu ne može pružiti uvjerljive dokaze za zoroastrijsko porijeklo alevizma. Ipak, zagovornici ove teorije prvenstveno se oslanjaju na argument da je zoroastrizam bio dominantna religija na Bliskom istoku prije islama te, posljedično tome, da je alevizam nastao iz te religije. S obzirom na to da, osim muslimanskih (sunitskih, šiitskih, alevitskih), jezidskih i zoroastrijskih Kurda, postoje i kršćanske i židovske manjine, ova se teza čini još neodrživijom. Konačno, prema ovoj teoriji, porijeklo judaizma i kršćanstva također bi moralo ležati u zoroastrizmu.

Slično kao kod turskog nacionalizma, zagovornici kurdskog nacionalizma ove teorije pokušavaju zloupotrijebiti alevizam za svoje političke ciljeve tako što se pozivaju na navodnu povezanost alevizma sa kurdsom etničkom skupinom. U skladu s tim, cilj ovih ljudi jeste da alevizam odvoje od njegovog islamskog identiteta, Dvanaest Imama, Časnog Kur'ana, učenja velikih alevitsko-islamskih mistika itd., i reduciraju ga na etnički utemeljenu religiju. Autori kao što su Ünsal Öztürk, Mehmet Bayrak, Hamza Aksüt itd. zastupaju stajalište da jasna većina alevita posjeduje kurdsko porijeklo ili kurdske korijene. Riječ kizilibaš po ovim

¹⁸² Ovaj događaj se tematizira u suri Al-A'raf, ajet 172 (7:172):

„I kad je Gospodar tvoj iz kičmi Ademovih sinova izveo potomstvo njihovo i zatražio od njih da posvjedoče protiv sebe: 'Zar Ja nisam Gospodar vaš?' – oni su odgovorili: 'Jesi, mi svjedočimo' – i to zato da na Sudnjem danu ne reknete: 'Mi o ovome ništa nismo znali'.“

¹⁸³ Prema islamskim predajama, Bog je nakon stvaranja ljudskih duša pitao: „Elestu bi Rabbikum?“ („Nisam li Ja Gospodar vaš?“), na šta su ljudi odgovorili: „Belâ!“ („Jesi, svakako!“). Kada se govori o *Qâlû Belâ* („Oni rekoše: 'Da'“), misli se upravo na ovaj događaj iskonskog zavjeta.

ljudima, upotrebljava se samo za alevite kurdskog porijekla na istoku Anadolije. Kako bi dokazali tezu kurdskog porijekla alevita, neki kurdski nacionalisti idu tako daleko da pokušavaju turskom pojmu kizilibaš dodati kurdski aspekt tako što ga u novije vrijeme prevode kao saresur (crvena glava) na kurdski jezik. S obzirom na to da samonaziv kizilibaš alevitsko stanovništvo upotrebljava s ponosom, neki su se autori, pri njihovim pokušajima da nametnu pojam saresur među alevitima koji govore kurdski ili zaza jezik, distancirali od izraza surhser, budući da taj izraz implicira pripadnost safavidskim šiitima. Međutim, safavidska (turska) i islamska pozadina ove riječi se prešućuje. Potpuno se ignorira činjenica da je izraz kizilibaš jedan samonaziv te se može uočiti u samoimenovanju šiita perzijskog porijekla u Afganistanu i Pakistanu. Pri tome, kurdski nacionalisti koji pokušavaju proširiti pojam saresur zanemaruju činjenicu da kurdski ili zaza aleviti stoljećima, uprkos ugnjetavanju i progonu, nisu napustili turski samonaziv kizilibaš te su ga s ponosom nosili. Naprimjer, upotreba samonaziva kizilibaš može se pratiti u jednoj pjesmi zazaki braće Metin i Kemala Kahramana sve do sadašnjeg vremena:

Hej, Muhamede, kruno Zehrina na nebu
Ah, Ali je pojas oko struka Fatiminog
Oh, zbog toga sam Fatimi rekao: "Ovo je moje stanje, ovo je moje stanje"
Zato kažem Aliju, oh, voljeni, oh, moj Hajdaru
Obraćam se kralju muškaraca, o hrabri čovječe, čovječe bojnih polja
Zato kažem voljenom Aliju, Hajdar-i Kerrar
Zovem ga čovjekom bojnih polja, kraljem muškaraca
O propovjedniče, ne misli pogrešno, ja sam kizilbaš, tako mi Boga, ja sam kizilbaš
Oh, moje srce, tako mi Boga, dobrovoljno sam kod sina Alijevog
Kod neprijatelja Alijevih potpuno sam odbačen
Zato se ne upućuj sa neprijateljima Alijevim na isti put, njih zovem nepravедnicima
Nevјernicima ih zovem, prokletnicima ih zovem, neznalicama ih zovem, Mervanom ih zovem.

Također se može pozvati na slijedeću pjesmu pjesnika Işk Feqira¹⁸⁴, koji je znalački arapskim pojmovima izrazio islamski identitet alevita.

Dozvolite mi da vam pričam o Abu Turabu¹⁸⁵
Iz ljubavi prema njemu, moje srce je gorjelo u žeravici
Iz ljubavi prema Bogu podarena mu je kruna uzvišenosti (Tace Zulcenab)¹⁸⁶

¹⁸⁴ Işk Feqir: Iako se pretpostavlja da je živio u 19. stoljeću, ne postoje pouzdane informacije o njegovom stvarnom identitetu. Iz njegovih pjesama jasno proizlazi da je imao dobro znanje iz islamske teologije, kao i arapskog jezika.

¹⁸⁵ Abu Turab (Otac prašine) nadimak Imama Alija.

¹⁸⁶ Tace Zulcenab (Kruna Uzvišenosti).

Zato zovem Alija La feta illa Ali¹⁸⁷

Ko želi da zna istinu o Aliju,
Mora priznati njegove sinove
On je očita tačka ispod Bismile¹⁸⁸
Zato njegovu sablju zovem La seyf illa Zulfikar¹⁸⁹

Ali je otac Dvanaest Imama
Jezid prima pomoć od Damaščana
Tuga Imama je teška za Fatimu
Zato njegovog neprijatelja zovem Qaum al-Kafiran¹⁹⁰

Muhamed je kruna Zehrina na nebu
Ali je opasač oko Fatiminih struka
Zato se Fatimu zove Khair un-Nisa¹⁹¹
Zato se Alija zove Zawdž al-Batul¹⁹²

Muhamed je grad znanja a Ali su njegova vrata
Ali je zbacio Lata¹⁹³ i Uzza¹⁹⁴ sa kupole Kabe
Ja sam njegov Qitmir¹⁹⁵, moje srce nije daleko od njega
Zato se Alija zove Asadullah¹⁹⁶

Oh asketo, zar Ali nije brat Poslanikov?

¹⁸⁷ La Feta illa Ali (Nema junaka osim Alija) izreka je koju je Poslanik Muhamed izrekao za Imama Alija.

¹⁸⁸ Od Imama Alija se prenosi sljedeća predaja: „Tajna Božijih knjiga je Kur'an, tajna i sadržaj Kur'ana je u suri El-Fatiha, tajna i sadržaj sure El-Fatiha je Bismilla (*bismillahirrahmanirrahim*), tajna i sadržaj Bismille nalazi se u tački ispod slova 'Ba'. A ova tačka, to sam ja.“

¹⁸⁹ La seyf illa Zulfikar (Ne postoji sablja poput Zulfikara) izjava je koju je Poslanik Muhamed izrekao o sablji Imama Alija, prepoznajući njenu simboličku i historijsku važnost u odbrani istine i pravde.

¹⁹⁰ Qaum al-Kafiran (narod nevjernički).

¹⁹¹ Khair un-Nisa (Najbolja od žena).

¹⁹² Zawdž a-Batul (Suprug Fatime al-Batul).

¹⁹³ Al-Lat je jedno predislamsko božanstvo kod Arapa.

¹⁹⁴ Al-Uzza je staroarapsko božanstvo jutarnje zvijezde Venere. Ono je bilo prije pojave islama pored Lata i Manata jedno od tri glavna božanstva u Mekki.

¹⁹⁵ Qitmir je jedan pas, koji je po biblijskom i kur'anskom prenošenju 300 godina spavao zajedno sa sedam spavača (Ashab al-Kahf) u jednoj pećini.

¹⁹⁶ Asadullah (Lav Božiji).

Ti ne moraš tek da pročitaš u Kutub ul-Fuhul¹⁹⁷
Da je hadis Lahmika lahmi¹⁹⁸ objavljen
Zato se Alija zove Akhi Ahmad-e Mukhtar¹⁹⁹

Asket Faqir, ne preziri me, ja sam kizilbaša
Srcem sam vezan za Alijevo potomstvo
Neprijateljima Alijevim sam potpuno suprotstavljen
Zato njegovog neprijatelja zovem Qaum az-Zaliman²⁰⁰

Isto tako Ali Sizer, narodni propovjedač iz provincije Maraš, pojašnjava u jednoj pjesmi da su aleviti kurdskog govornog područja (Kurmanji) naziv kizilbaš, primjenjivali potpuno prirodno:

Ako nas pitate o našem postojanju
Jedno od naših imena je nebo, drugo voda
Hiljadama godina kružimo²⁰¹
Tada su nam melec slavili naša imena
Vjerujući mi smo posvjedočili vjeru
Izveli smo vladara među nama iz linije od Adema, Mjeseca i Sunca, naša je slava.
Stotinudvdesetčetirihiljade puta smo letjeli
Zajedno sa Davudom, Musaom, Isaom i Muhamedom, rekli smo to, objavili smo situaciju
sedamdeset hiljada puta.
Tada za vrijeme velikog potopa, naše ime izvedeno je iz loze šiita²⁰², mi pripadamo frakciji
ispravno upućenih
I tako smo postali krunom sedamdeset dvije nacije
Naše srce je bilo nebesko putovanje Muhamedovo
Kada su Elija, Ilijas i Ali došli smo u do izražaja u četvoro vrata
U jednoj građevini sa četrdeset posjeda osnovat ćemo upravu
Na sudu istine sa sedamnaest sestara
Tada su četrdesetica je postali naša imena

¹⁹⁷ Kutub ul-Fuhul (Knjige učenjaka)

¹⁹⁸ Lahmika lahmi (njegovo meso je moje meso) poznata je izjava poslanika Muhameda o Imamu Aliju.

¹⁹⁹ Akhi Ahmad-e Mukhtar (brat Ahmeda, odabranika).

²⁰⁰ Qaum az-Zaliman (narod zlikovaca)

²⁰¹ Aluzija na pojam *Yeşil Kubbe* (Zelena kupola), koji je bio centar moljenja. Prije stvaranja svijeta, meleki su kružili oko ove kupole moleći i na ovaj način izražavali svoje služenje prema Bogu.

²⁰² Šit (lat. *Seth*) treći je sin Adema i Have, rođen nakon Kaina i Abila. Prema islamskom uvjerenju, on je nakon preseljenja Adema na ahiret preuzeo ulogu poslanika i nastavio misiju koju je započeo njegov otac.

Jedan kao četrdeset i četrdeset kao jedan pojavljuje se
Tajnu Alijevu čuvamo u našem porodičnom stablu
Zato je kizilbaš postalo naše ime.

Najveći broj alevita se poziva na porijeklo iz Horasana. Ovo vrijedi za sve anadolijske alevite, bez obzira na to da li govore turski, kurdski ili zaza jezik. Zagovornici teze da je alevizam usko stopljen sa kurdskim etnicitetom prešućuju, međutim, činjenicu da u Horasanu nikako nisu živjeli Kurdi kada su alevitska plemena odselila prema Anadoliji. Safavidi su šiitske horasanske Kurde tamo naselili tek vijek kasnije. Isto tako treba istaći da aleviti koji govore kurdski ili zaza jezik koriste različite samonazive kako bi se razlikovali. Dok se alevitski Kurdi nazivaju Kirdaš i Zaza Kurmandž, alevitski Turci nazivaju se Tirkoman, sunitski Zaza kao Zaza, sunitski Kurdi kao Kur, a sunitski Turci kao Tirk.

Što se tiče navodne kurdske većine među alevitskim stanovništvom, kurdski nacionalisti također ne uspijevaju spomenuti činjenicu da su, primjerice, vrlo velik dio crnomorske regije osvojili i naselili alevitski Čepni Turci²⁰³. U 16. stoljeću formirale su se današnje turske provincije Giresun i Ordu, kao i dijelovi današnjih provincija Trabzon i Gümüshane, koji su činili Vilayet-i Çepni, koji je bio centar tadašnjeg alevitskog stanovništva, slično kao danas provincija Tunceli (Dersim). Iako se ne može definirati jedno etničko porijeklo za sve alevite, neki pisci ipak pokušavaju tvrditi da su aleviti koji žive u pokrajini Erzincan u potpunosti kurdskog porijekla. Tipično za kurdske nacionaliste koji se bave alevizmom jest prije svega pokušaj, na osnovu eventualnih kulturnih paralela alevizma sa predislamskim religijama, da alevizam odvoje od islama i da uspostave povezanost sa jezidizmom ili zoroastrizmom. Ovim pristupom prvenstveno teže prevladavanju svih vjerskih barijera unutar kurdskog stanovništva, što je potrebno da bi ih se ujedinilo pod okriljem kurdskog nacionalizma. Stoga pokušavaju, s obrazloženjem da se kulturološki korijeni kurdskog naroda nalaze u vjerskim zajednicama jezida i zoroastrijaca, prouzrokovati simpatije za kurdski nacionalizam među muslimanskim (sunitskim, šiitskim i alevitskim) Kurdima, te da ih svedu na jedan zajednički imenitelj (kurdizam) i time rastope trenutno preovladavajuću endogamiju.²⁰⁴ Jer ukidanje endogamije, za kurdske nacionaliste smatra se važnim korakom prema rastvaranju vjerskih identiteta unutar raznolikog kurdskog stanovništva. Nacionalisti uklanjanje tih barijera smatraju ključnim korakom za formiranje jednog jedinstvenog i isključivo prema kurdskom

²⁰³ Čepni Turci su važno oghuzsko pleme koje je u 11. vijeku iz centralne Azije preselilo prema Anatoliji. Čepni Turci su igrali veliku ulogu pri osvajanju Anatolije, što se može prepoznati po tome da je u 16. vijeku oko 45 mjesta nosilo njihovo ime. Pretpostavlja se da je jedan veliki dio Čepnija na početku bio alevitskog vjerovanja. Iako je većina Čepnija vremenom sunitizirana, danas postoji još jedna veoma velika alevitska Čepni zajednica u Turskoj. Porijeklo Tahtači alevita koji žive na obalama Egejskog i Sredozemnog mora također se vodi od Čepnija. Još jedna grupa Čepni Turaka, koja pripada alevitskom islamu, živi u provinciji Gaziantep.

²⁰⁴ Endogamija u etnosociologiji označava sklapanje braka unutar sopstvene socijalne grupe ili zajednice. Izbor bračnih partnera slijedi iz istog porijekla ili naroda, vjerske zajednice ili socijalnog staleža. Nasuprot tome je egzogamija, u kojoj je dozvoljeno ili moguće vjenčavanje s nekim izvan sopstvene zajednice.

identitetu fokusiranog stanovništva. Jezidska vjerska zajednica suprotstavlja se u ovom kontekstu kurdskom nacionalizmu, jer mnogi jezidi su uvjereni da je opstanak njihove vjerske zajednice moguć samo kroz održivost njihovih unutarreligijskih bračnih propisa. Iako su kulturološke i religijske razlike između alevizma i druge dvije religije već na prvi pogled jasno vidljive, pisci kao što je Mehmet Bayrak pokušavaju sugerirati povezanost. Jedan od mnogih vidljivih primjera između alevizma i zoroastrizma, kao i jezidizma, jeste uloga žene. Dok žena u alevizmu ima ravnopravnu ulogu u društvu, u praksi u zoroastrizmu žena ima prilično podređenu ulogu. Isto tako žene zauzimaju podređenu ulogu u patrijarhalnoj društvenoj strukturi jezidizma, iako ova religija, po mišljenju eksperata, ne sadrži elemente koji opravdavaju omalovažavanje žene. Za razliku od alevizma, jezidsko učenje ne prihvata kasnije prelaske u njihovu vjersku zajednicu. Slijedno tome, smatra se jezidom samo onaj ko potječe iz jezidske porodice. Alevizam se širio prije svega tako da su veliki alevitski učenjaci, kao što je Hadži Bektaš Veli, podučavali mističnom islamu i stanovništvo Anadolije preobratali na put Ehli Bejta. Kao rezultat toga, alevizam je također stekao znatnu popularnost među svim anadolijskim etničkim skupinama. Dok je većina alevita ili etnički Turci, ili Kurdi, ili Zaze, manje alevitske skupine mogu se naći među Romima ili Armencima. Osim toga, postoje i brojne razlike u vezi sa vjerskim praksama alevizma i dvije druge religije – jezidizma i zoroastrizma. Iako bi svakako bilo korisno detaljno raspraviti te razlike kako bi se suočili s činjenicama oni aleviti koji su zavedeni kurdskim nacionalizmom, ovdje mora biti dovoljan samo jedan primjer kako bi se izbjeglo prekoračenje opsega ove rasprave: kod zoroastrijskog „nebeskog ukopa“ ili „nebeske sahrane“ tijelo umrlog vjernika se ne spušta u iskopanu zemlju, nego se stavlja na neku uzbrdicu, dostupno kako bi ga mogli pojesti gladni lešinari. Alevitski vjernici ovu vrstu pogreba smatraju sknavljenjem tijela umrlog i ona je u potpunosti u suprotnosti s njihovom vlastitom islamskom pogrebnom tradicijom.

Ünsal Öztürk zastupa, poput kurdsko-belgijskog pisca Mehrdada Izadyja, tezu jedne stare mezopotamijske prastare religije po imenu ezdanizam odnosno jezdaizam. Međutim, za razliku od Izadyja, Öztürk klasificira jezidizam, alevizam i ismailizam kao savremene izraze ove religije.²⁰⁵ Öztürk se pritom oslanja na primjer da se kod jesida, alevita i ismailita jednako nalazi zabrana konzumiranja zečijeg mesa, i ovo navodi kao zajedničko obilježje različitih oblika modernog jazdanizma. Pritom se čini da previđa činjenicu da je konzumacija

²⁰⁵ U originalu, prema tezama Mehrdada Izadyja, umjesto Ismailita, koji se nazivaju i Kakai i Ahl-e Haqq, navodi se religiozna zajednica Yarsan.

zečijeg mesa zabranjena u islamu²⁰⁶, posebno u džaferijskoj pravnoj školi²⁰⁷. Također je Öztürk u svom izvještaju izostavio da je konzumacija mesa zeca zabranjena u židovstvu, i smatra se neprihvatljivim u kršćanstvu. U Tori se ova zabrana opisuje na sljedeći način:

Zečevi također preživaju, ali nemaju razdvojena kopita. Stoga su vam nečisti.²⁰⁸

Slično tome i Kaldejci²⁰⁹ i Nestorijanci²¹⁰, koji su među najstarijim kršćanskim zajednicama, zečije meso su smatrali nečistim. Dakle, tabu zeca u alevizmu, koji postoji ne samo među jezidima već i među Židovima, kršćanima i šijama, ne može se definitivno povezati sa spomenutom ezdan-religijom. Nadalje, Öztürk navodi da se vjerske vođe i svećenstvo u ezdaizmu nazivaju šejh, pir ili muršid kako bi se uspostavila veza s alevizmom. Pri tome se zanemaruje činjenica da spomenuti pojmovi imaju arapsko ili perzijsko porijeklo i koriste se kao titule za svećenstvo u mističnim islamskim redovima. Naprimjer, počasni poziv Pir-i Turkistan koriste i aleviti i suniti za alevitskog mistika i učenjaka Hocu Ahmeta Jesevija²¹¹, imenjaka Jesevijskog reda (Jesevi tarikata) i indirektnog učitelja Hadži Bektaš Velija. Nadalje neki pisci poput Mehmeta Bayraka i Hamze Aksüta, pokušavaju prikazati pretežno kurdski Jarsan²¹² kao premošćujući element između alevizma i jezidizma. Kroz Jarsan pokušavaju

²⁰⁶ Iako je Poslanik Muhamed otkrio karakteristike jestivih životinja za vrijeme svog života, ubrzo nakon njegove smrti u islamskom svijetu pojavili su se sporovi jer se većina muslimana nije pridržavala propisa Ehli Bejta. S vremenom su se pojavile različite pravne odredbe, budući da islamski učenjaci nisu mogli istinski razumjeti poruku Kur'ana bez vodstva Dvanaest Imama. Na temelju nekih neprovjerenih predaja, neki suniti učenjaci su stoga izdali odluke o dopuštenosti konzumiranja mesa zeca. Učenjaci šafijske i malikijske škole mišljenja čak su otišli toliko daleko da su proglasili dopuštenom konzumaciju mesa lisice. S druge strane, aleviti, šiiti i drugi sljedbenici Ehli Bejta pridržavaju se tradicija koje su potvrdili Imami Ehli Bejta i žestoko odbacuju konzumaciju mesa zeca.

²⁰⁷ Amuli: Wasail al-Šia, tom.16, S.316-317.

²⁰⁸ Tora, Levi (3), 11:6-6.

²⁰⁹ Kaldejska-katolička crkva je zajednica istočnosirijske crkve, njezin poglavar je babilonski patrijarh.

²¹⁰ Asirska Crkva istoka je neovisna istočna crkva sirijske tradicije, koja slijedi stope drevnog kršćanskog katolika Seleucije-Ktesifona, koji je nastao u Sasanidskom carstvu.

²¹¹ Hoca Ahmed Yesevi rođen je 1093. godine u gradu Sayramu i bio je značajan turski mistik u području današnjeg Kazahstana. Smatra se jednim od najvažnijih učenjaka i vodećih mislilaca alevizma, te se u alevitskim izvorima spominje u istom redu s drugim velikim alevitskim duhovnicima. Prema predajama, Hoca Ahmed Yesevi je potomak Muhameda ibn el-Hanafije, sina Imama Alija. Njegov otac, šejh Ibrahim, umro je dok je on još bio mali dječak. Potom je s porodicom odselio u grad Yasi (današnji Turkistan, Kazahstan). Tamo je bio učenik Arslana Babe, poznatog muršida (sufijskog učitelja) tog regiona. Nakon njegove smrti, Ahmed Yesevi je otišao u Buharu kako bi nastavio studije i postao učenik Jusufa Hamedanija. Kasnije se vratio u Yasi, gdje je doprinio širenju islamskog misticizma. Umro je 1166. godine u Yasiju. Njegov mauzolej sagrađen je po inicijativi timuridskog vladara Timura između 1389. i 1405. godine.

²¹² Yarsani, odnosno Ehl-e Haqq, vjerska su zajednica osnovana u 14. stoljeću od Sultana Sahaka, koja pored šiitskih elemenata prije svega ima jasne jezidske utjecaje. Yarsani su porijeklom iz regije između autonomne kurdske regije u Iraku oko Halabje i Irana, tačnije Lorestana i Kermanšaha. Temelji njihovih vjerskih uvjerenja

pokazati navodno srodstvo između alevitskih i jezidijskih doktrina, budući da jarsanska vjera, uz šiitske i mistične islamske elemente, uključuje i osnovne značajke jezidske vjere. Dakle, za ove pisce Jarsan predstavlja svojevrsni prijelaz između jezidske i alevitske vjere. Iako većina Jarsana, koji su porijeklom iz Iraka i Irana, pripadaju kurdske etničkoj skupini (Guran odnosno Goran), postoje također i male grupe arapskih, perzijskih, lurijskih i azerbejdžanskih Jarsana. Iako se Jarsani samonazivaju Ehl-e Haqq (ljudi istine), zbog kulta božanstva oko Imama Alija često ih se naziva Aliullahi (obožavaoci Alija). Slijedno tome, Jarsane se od savremenih islamskih učenjaka smatraju potomcima kufskog huluwa (oni koji pretjeruju), budući da njihova vjerovanja sugeriraju površno islamizirane, politeističke mitologije. Ipak, Mehmet Bayrak pokušava povući paralele između Jarsana i alevizma. Hamza Aksüt, s druge strane, posmatra Jarsane kao alevitsku potskupinu.

Međutim, na ovom mjestu treba napomenuti da dolazi do prirodnog miješanja kulturnih i vjerskih elemenata kada mnoge religije i kulture žive u neposrednoj geografskoj blizini i u bliskom su kontaktu jedna s drugom. To također objašnjava zašto su mnogi muslimani usvojili određene elemente iz regionalno susjednih religija u svoje kulture, elemente koji ni na koji način nisu u suprotnosti sa islamskim propisima. Kako bismo razjasnili ovaj proces, svakako je korisno razmotriti savremeni primjer: muslimani (i drugi nekršćani) koji su emigrirali u zapadne zemlje ponekad slave kršćansku kulturu i vjerske blagdane. Čak i ako se, naprimjer, Božić ne slavi u istoj mjeri kao u kršćanskoj zajednici, mnogi muslimani obilježavaju rođendan poslanika Isusa zajedno sa svojim kršćanskim susjedima. U najmanju ruku, usvojena je tradicija razmjene darova s porodicom i prijateljima na ovaj dan ili kupovine poklona djeci od nemalog broja muslimana koji žive na Zapadu. Niko ne bi, bazirajući se na ove činjenice, došao na ideju da traži korijene ovih muslimana u kršćanstvu samo zato što također i oni slave Božić.

Stoga aleviti tvrdnju da porijeklo alevizma leži u kurdske proto-religiji, temeljenoj na (navodnim) kulturnim ili religijskim paralelama između alevita i predislamskih vjerskih zajednica u Anadoliji, usko isprepliću s poviješću turskih alevita. Posljedično, većina alevitskih djela dostupnih danas napisana je na turskom jeziku, a ceremonije Džem²¹³ pretežno se održavaju na turskom jeziku. Ipak, tursko ili kurdske porijeklo alevizma ne može se definitivno utvrditi. Konačno, kao što je prethodno objašnjeno, ime alevizma može se pratiti do Imama Alija i njegovih potomaka, koji, iz etnološke perspektive, nisu bili ni Turci

sažeti su u knjizi *Kalam-e Saranjam*, koju je u 15. stoljeću napisao Sultan Sahak. Pri tome, neki istraživači su uspostavili tvrdnju da Yarsani odbacuju Kur'an i poslanstvo Poslanika Muhameda, a istovremeno vjeruju u božanstvenost Imama Alija. Pošto se ove informacije ne mogu sa sigurnošću ustvrditi, mora se skrenuti pažnja da se ovdje možda radi o klevetama i glasinama.

²¹³ Džem ceremonija je mistično-islamska molitvena ceremonija (arap. *Zikr*), koju aleviti u pravilu prakticiraju uoči petka (četvrtak navečer). Pri ovoj ceremoniji vjernici se sjećaju, obilježavaju i slave Boga, Poslanika Muhameda i Ehli Bejt pomoću mistično-islamskih pjesama (tr. *deyiş*) koje se izvode uz žičani instrument – saz. Nadalje, tokom ceremonije izvodi se *semah*, vrsta ritualnog plesa koji se otprilike može usporediti sa vrtećim dervišima svjetski poznatog mevlevijskog reda. U alevizmu se *semah* povezuje i sa *Semaom* Poslanika Muhameda, koji je, prema predaji, izveo sa 40 svetaca, tzv. *Krklera* (Četrdesetorica), po povratku sa uzašća na nebo (Miradž), kao i s *tavafo*m, ophodnjom oko svete Kabe.

niti Kurdi. Časni Kur'an objavljen je Poslaniku Muhamedu na arapskom jeziku, a kasnije je preveden na sve jezike kako bi se čovječanstvo obavijestilo o univerzalnoj poruci islama. Danas nearapski muslimani predstavljaju većinu islamske zajednice. Iz Kur'ana i predaja Ehli Bejta može se zaključiti da nacionalističko postupanje i rasizam ne nalaze nikakvo prihvatanje u islamu i smatraju se zlom. U tom kontekstu, Cemal Şener, poznati alevitski učenjak, sažeo je precizno ovaj problem:

„Svi aleviti u Turskoj nisu Kurdi. Naravno, nisu ni svi Kurdi aleviti; među Kurdima postoje aleviti, hanefije i šafije. Iako se u Turskoj susreću i kršćanski Kurdi, u historijskom razvoju Anadolije postoje i turski aleviti koji su kasnije prihvatili kurdsku etničku pripadnost i kurdski aleviti koji su asimilirani u tursko društvo. Dok biti alevit predstavlja vjersku razliku, biti Kurd predstavlja razliku na temelju rase i etničke pripadnosti. Dok turski aleviti pretežno žive u regijama Çorum, Amasya, Tokat, Yozgat i okolini, kurdski aleviti uglavnom žive u regijama Sivas, Erzincan, Tunceli, Elazığ, Maraş i okolnim područjima. Prva skupina govori turski, dok druga skupina govori kurdski (kurmandži ili zaza).“

Ukratko: Zagovornici ove teze teže ujedinjenju svih Kurda pod jednim krovom. Nesumnjivo je da je okupljanje različitih vjerskih pokreta radi njegovanja zajedničke kulturne baštine među Kurdima svakako dobrodošlo. Međutim, problematično je što zagovornici ove teze izvlače povijesne kulturne ili vjerske događaje iz konteksta i, namjerno ili nenamjerno, iskrivljuju alevitska učenja. Slično tome, porast kurdskog nacionalizma među alevitima koji govore kurdski jezik može se pripisati i turskom nacionalizmu, koji je dugo vremena nijekao postojanje kurdskih alevita. Islam, međutim, odbacuje sve oblike rasizma. Sljedeće se prenosi od Imama Alija u tom smislu:

Što se tiče Iblisa²¹⁴, on se prema Ademu ponašao rasistički, zbog njegovog porijekla i napao ga je na osnovu onoga kako je on stvoren i rekao je: “Ja sam od vatre a ti si od gline.”

3.8 Da li je alevizam povezan sa socijalističkim svjetonazorom?

Nakon prethodno raspravljenih teza koje ograničavaju alevizam na određenu etničku skupinu, postoji i jedna grupa koja pristupa temi sa socijalističke perspektive. Takozvani alevitski socijalisti²¹⁵ svoje argumente temelje na izjavama i djelima poznatih alevitskih mislilaca poput Pir Sultana Abdala (1480.-1550.) ili šejha Bedreddina (1358-1420), i predstavlja ih kao pionire socijalizma, dosljedno zanemarujući vjerski karakter ovih

²¹⁴Iblis je prema islamskim predajama sotona (arap. *šejtan*) i stvoren je od vatre. Služio je Bogu hiljadama godina prije nego što je bio iskušen poniznošću pred Ademom. Pošto se usprotivio naređenju da učini sedždu (padanje ničice) pred Ademom, pao je u Božiju nemilost i bio je prognan. Prije toga kretao se u društvu meleka i obavljao molitve Bogu onako kako su to činili meleki. Ova priča se u islamskim krugovima izlaže kao upozorenje od rasizma, budući da se Iblis smatra prvim rasistom, jer je svoje stvaranje od vatre smatrao boljim od Adema, koji je stvoren od gline.

²¹⁵ Pojam „alevitski socijalisti“ u sebi sadrži kontradiktornost, pošto u alevizmu Bog zauzima centralnu ulogu. Naspram toga, socijalizam dovodi u pitanje postojanje Boga. Zato pojava kombinacije ova dva pojma djeluje više nego upitno. Jedan od najpoznatijih zagovornika ovih „alevitskih socijalista“ je sunit Faik Bulut, koji u svojoj knjizi vodi socijalističku propagandu protiv alevizma.

plemenitih ličnosti. Nadalje, usvajaju teorije triju prethodnih skupina i pokušavaju alevizam odvojiti od njegovog islamskog identiteta i posmatrati ga kao naslijeđe bivših bliskoistočnih kultura. Naprimjer, pisac Lütfi Kaleli (rođen 1939), koji je autor nekoliko eseja i knjiga o alevizmu, tvrdi da je alevizam kultura:

„Anadolijski alevizam je jedna zasebna kultura.“²¹⁶

Zastupnici ove teze hvale alevitsku društvenu strukturu²¹⁷ i pokušavaju povući paralele sa svojom vlastitom. Međutim, bliže ispitivanje socijalističkih teza prvenstveno suočava čovjeka sa snažnom kritikom religije, što je jasno vidljivo u temeljnim izjavama osnivača socijalizma. Dok Karl Marx²¹⁸, koji je svojom knjigom Kapital, udario temelje socijalizma samu religiju smatrao „opijumom naroda“²¹⁹. Lenjin²²⁰ je čak religioznost označio²²¹ kao „neprosvijetljenost i zatupljenost“²²².

Nakon što je u prethodnim poglavljima utvrđen religijski (islamski) identitet alevizma, znatno je teže uočiti navodne paralele između socijalizma i alevizma, posebno s obzirom na to da su aleviti duboko ukorijenjeni u svojim vjerskim običajima i tradicijama. Stoga zagovornici socijalističke teorije pokušavaju pridobiti simpatije i podršku za socijalizam koristeći alevitsku retoriku, istovremeno omalovažavajući temeljne alevitske vrijednosti kao zastarjele i prevaziđene zbog njihovih bliskih veza s islamom. Cilj ovog pristupa je dvostruk: prvo, pojačati predrasude prema alevitima unutar sunitske većine ocrnjavanjem islamskih (ili islamski poznatih) temeljnih vrijednosti u ime alevizma, i drugo, dodatno marginalizirati alevite unutar antireligijske sfere, socijalističkoj ideologiji ponuditi svojevrsno utočište od rastuće mržnje unutar pretežno sunituskog stanovništva. Jedan od najpoznatijih zagovornika socijalističke definicije alevizma je sunitski autor Faik Bulut, koji vodi pravi križarski rat protiv temelja alevizma. U svojim publikacijama osuđuje one pobožne alevite koji se distanciraju od materijalističkog, ateističkog i marksističkog svjetonazora, a umjesto toga se posvećuju svojoj vjeri, i naziva ih yobaz (religioznim fanaticima). Bulut i njemu slični idu čak i dalje, pa

²¹⁶ Kaleli: Aliveligi Kültür Saymayan Kültürsüzdür – „Pir Sultan Abdal“ Magazin (1993/5)

²¹⁷ Ovdje se misli na socijalnu strukturu alevitskog društva, naprimjer, ulogu žene u alevitskoj zajednici, ulogu alevitskih duhovnika, posebno rješavanje sporova među ljudima, i uopćeno pristup alevita društvenim problemima itd.

²¹⁸ Karl Marx (1818-1883), slovi kao utemeljitelj znanstvenog socijalizma.

²¹⁹ Marx Engelsova djela, tom I str.378.

²²⁰ Vladimir Iljič Uljanov (1870–1924), poznatiji kao Lenjin, slovi kao vođa Oktobarske revolucije (1917) u Sovjetskom Savezu. Pri tome, Lenjin slovi kao teoretičar proširene teze Karla Marxa.

²²¹ Preporučljiva publikacija na temu komunizma i alevizma je sljedeća knjiga: Özsevim, *Kritika komunističkog razumijevanja na osnovama riječi hz. Alija*, Alevi Verlag (Alevi izdavaštvo) (2016).

²²² Lenjinova djela, tom 10, str.73.

optužuju poslanika Muhameda i Imama Alija da su prisilno islamizirali azijske narode. Stoga se zalažu za „alevizam bez Alija“ (tur. Ali'siz Alevilik).²²³ Jedna mala grupa unutar Ali'siz Alevilik strujanja je takozvana Devrimci Aleviler Birlidži (Udruženje revolucionarnih alevita), koje je po njihovim navodima 2014. godine osnovano u Njemačkoj, i teži ka jednom reformisanom alevizmu.²²⁴ Za ovu svrhu propagiraju reformu pogrebne i džem ceremonije, kako bi alevizam očistili od njegovih islamskih vjerskih elemenata, kako se može zaključiti iz sljedećih redova:

Sažimajući ova priznanja, važno je naglasiti da se vjerski običaji moraju provoditi na jeziku koji ljudi razumiju. Nadalje, moraju se pročititi od izjava, pravila i praksi svih nebeskih religija, posebno islamskih vrijednosti poput Allaha, Muhameda, Imama Alija, Ehli Bejta i dvanaest Imama. Također, iako mnogim alevitima teško pada ova činjenica, treba naglasiti da te vrijednosti nemaju mjesto unutar ceremonije Džem.²²⁵

Da bismo došli do motivacije pokreta Ali'siz Alevilik, koji tvrdi da alevizam nema veze s islamom i drugim svjetskim religijama, moramo pomnije ispitati povijesne događaje i djela Imama Alija. Zagovornici ove teze prvenstveno se oslanjaju na historijske dokaze, tvrdeći da je Imam Ali, svojim poznatim mačem Zulfikarom, nasilno preobratio azijske narode na islam. Posebno se naglašavaju njegovi herojski podvizi u bitkama na Bedru, Uhudu, Hendeku i Hajberu. Međutim, oni prikladno izostavljaju činjenicu da su te bitke za vrijeme Poslanikovog života potaknuli politeistički i despotski vladari Arapskog poluotoka, koji su nastojali nasilno spriječiti mirno širenje islama. U konačnici, poruka islama dovela je do rastuće pobune protiv tiranskog iskorištavanja i ropstva koje su činili Arapi Kurejšije. Muslimani, prvenstveno Poslanik Muhamed i Imam Ali, težili su cilju pravednog društva i zbog toga su se borili protiv nehumanog sistema politeizma. Činjenica da su Poslanik Muhamed i Imam Ali bogatstva i blaga, koja su zaplijenili u bitkama protiv despotičkih arapskih vladara, pravedno dijelili među muslimanima, vodila je ka tome da je sve više ljudi bilo fascinirano pravednošću i postajali su muslimanima. Do smrti Poslanika Muhameda stoga ne može biti govora o prisilnom islamiziranju preko ruke Imama Alija, pošto je postati musliman značilo poboljšanje životnih uslova za većinu siromašnih Arapa.

Nakon smrti Poslanika Muhameda, Imama Alija i njegove vjerne prijatelje izopćili su njegovi politički protivnici. Prva dvojica halifa, Ebu Bekr i Omer, koji su ignorirali Poslanikovu oporuku i koji su si halifat priskrbili dijelom kroz intrige, a dijelom i nasiljem, pokušavali su da si osiguraju podršku muslimana. Pošto si dugoročno nisu mogli osigurati podršku muslimana, pokušavali su osvajačkim poduhvatima odvratiti pažnju od stvarnih problema u

²²³ Neki idu čak tako daleko da nazivaju Imama Alija „ubicom“, koji je navodno mnoge ljude ubijao, kako bi širio islam na arapskom poluotoku.

²²⁴ www.alev-i.com/alev-i-yol-cem-erkaninda-reform-oneri-ozeti-dab/. (Posljednji pristup: 10.06.2019).

²²⁵ www.alev-i.com/erkan/alevilikte-hakka-ugurlama-erkani/. (Posljednji pristup: 10.06.2019)

islamskim zemljama Arapskog poluotoka. U konačnici, brojni ratovi koje su vodili za vrijeme prve trojice halifa vodili su ka tome da su važna područja Iraka, Sirije, Egipta kao i Perzije osvojena. To je s druge strane imalo za posljedicu da ove halife, i pored njihove nepravednosti prema Poslanikovoј porodici, od mnogih muslimana budu prihvaćeni kao „branitelji islama“ i „legitimne halife“. Međutim, u tom kontekstu treba naglasiti da, u znak prosvjeda protiv nelegitimnih postupaka prvih halifa, ni Imam Ali ni njegovi odani sljedbenici nisu sudjelovali u osvajačkim pohodima. Stoga ne čudi da su ljudi na osvojenim teritorijama, posebno Perzijanci, razvili afinitet prema protivnicima halifa. Slijedeći načelo „neprijatelj mog neprijatelja je moj prijatelj“, neki od prisilno preobraćenih stanovnika razvili su naklonost prema Imamu Aliju i njegovim potomcima. Posljedično, čak ni tokom vladavine prve trojice halifa ne može se govoriti o dvoličnosti Imama Alija.

I nakon što je Imam Ali 656. godine preuzeo halifat u trajanju od četiri godine, ne može biti govora o prisilnoj islamizaciji. Historijski zapisi prvenstveno pokazuju da je Imam Ali prvenstveno stavljao veliki naglasak na pravednu upravu i društvenu strukturu tokom svog hilafeta. Važnost pravde u upravljanju vidljiva je u pisanim uputama koje je izdao svojim upraviteljima nakon što ih je imenovao. Na osnovu etničkog odgoja Poslanika Muhameda, kojeg je od svog ranog djetinjstva uživao, Imam Ali je tokom svog kratkog hilafeta poduzimao velike napore i razvio sopstvene metode kako bi odstranio socijalnu i političku nepravdu u islamskom društvu. Njegov prvi čin kao halife bio je da otpusti korumpirane i pohlepne državne službenike i administratore, koji su koristili nepotizam kako bi stekli visoke položaje i obogatili se. Umjesto toga, slao je stručne, pravedne i ljudima orijentirane pojedince kao upravitelje i namjesnike u razne islamske pokrajine, uvijek temeljito provjeravajući njihove postupke i odluke. Na najmanju pritužbu naroda pisao bi pisma guvernerima koje je imenovao, opominjući ih da nikada ne odstupaju od pravde u svojim službenim dužnostima. Njegov vladin mandat, koji je uputio svom najbližem povjereniku Maliku al-Aštaru, upravitelju Egipta, glasi kako slijedi:

„(...) Znaj onda, Malik, da sam te poslao u zemlju koja je prije tebe imala niz promjenjivih, pravednih i tiranskih vlada. Sad će ljudi gledati u tvoje postupke, kao što su gledali na postupke upravitelja prije tebe. Oni će o tebi reći ono što si ti o njima govorio. Uistinu, pravednici su oslobođeni samo onoga što Allah stavlja na jezike Svojih robova, pa najbolje gomilanje za tebe treba biti gomilanje dobrih djela. Zato budi gospodar svojih želja i uskrati svojoj duši ono što ti nije dopušteno, jer uskratiti duši znači činiti joj pravdu, bilo u nečemu što voli ili u nečemu što ne voli. Neka tvoje srce osjeća samllost prema podređenima kao i ljubav i ljubaznost, i ne budi nad njima kao krvoločna zvijer, koja njihovu hranu zaplijeni, jer oni su od dvije vrste: ili su braća po vjeri, ili su tebi jednaki po stvaranju.“²²⁶

Posljedično, ni oni koji su mu bili naklonjeni nisu bili favorizirani, niti su njegovi protivnici bili u nepovoljnom položaju. Stoga su njegove upute naišle na veliko sumnjičenje kod onih koji su se obogatili iz državne riznice tokom vladavine prve trojice halifa, što je dovelo do tri

²²⁶Ali ibn Abi Talib: *Nahdžul-belaga*, str. 267 (53. Uputstva za upravljanje Malik al-Aštaru)

unutarnja islamska ustanka.²²⁷ Ipak, Imam Ali se uvijek pridržavao moralnih načela poslanika Muhameda i nikada nije odstupao od pravde. Iz poznatog djela Nahdž ul-Belaga, koja predstavlja zbirku propovijedi, citata, pouka, uputa i pisama od Imama Alija, jasno se pokazuje njegov karakter pun vrlina. Njegovo velikodušno i pravedno ponašanje prema njegovim protivnicima potvrđuju do današnjih dana islamski i neislamski historičari. Naprimjer, libanski kršćanin i islamski znanstvenik Filip Huri Hitti (1886–1978) osobu Imama Alija opisao je na sljedeći način:

„On je bio hrabar u borbi, razuman pri savjetovanju, elokventan i jasan pri razgovoru, iskren prema svojim prijateljima i velikodušan prema svojim neprijateljima. On (Imam Ali) bio je Sulejman arapske tradicije, jedini koji je u jednoj osobi spojio islamsku hrabrost s poezijom, poslovicama, vjerskom mudrošću i brojnim vrlinama i herojskim djelima.“²²⁸

Također i britanski orijentalist Reynold Alleyne Nicholson (1868–1945) plemeniti karakter Imama Alija opisao je na sljedeći način:

„On (Ali) bio je hrabri ratnik, nadareni savjetodavac, iskreni prijatelj i velikodušan neprijatelj.“

Libanski kršćanin George Jordac (1931–2014) napisao je čak petotomno djelo s naslovom *The Voice of Human Justice* o pravednosti modela vladanja Imama Alija. Škotski esejist i historičar Thomas Carlyle (1795–1881) opisuje Imama Alija sljedećim riječima:

„Nemoguće je ne voljeti ovog mladića Alija. On se otkriva kao stvorenje plemenitog duha, i sada i zauvijek, pun strasti i uzbudljive hrabrosti. U njemu ima nečeg viteškog, hrabar poput lava, a opet s gracioznošću, iskrenošću i odanošću dostojnom kršćanskog viteza.“

Paradoks je u tome što zagovornici „prosvijećenih“ alevita osuđuju osobu Imama Alija, a istovremeno nastoje probuditi simpatije za komunističke despote, diktatore i tirane poput Mao Zedonga (1878–1953)²²⁹ i Josefa Staljina (1878-1953)²³⁰ unutar alevitskog stanovništva. Dok osuđuju osobu Imama Alija, očajnički ga pokušavajući diskreditirati lažnim argumentima, zločini i zvjerstva socijalističkih i komunističkih idola se ili prikrivaju ili veličaju zbog željenog cilja. Jednako je zapanjujuće da predstavnici ovog pokreta, s jedne strane,

²²⁷ Bitke na Džamalu, Sifinu i Nahravanu.

²²⁸ Hitti: *Historija Arapa*, str. 183

²²⁹ Prema stručnim procjenama, između 40 i 76 miliona ljudi stradalo je kao direktna ili indirektna posljedica političkih kampanja poznatih kao „Veliki skok naprijed“ i „Kulturna revolucija“.

²³⁰ Tokom svoje vladavine, Staljin je uspostavio totalitarnu diktaturu i, kao dio političkih čistki, dao pritvoriti nekoliko miliona stvarnih i navodnih protivnika. Tokom njegove diktature, krimski Tatari, volški Nijemci i Čečeni deportirani su u Kazahstan i Srednju Aziju kao potencijalni saradnici, gdje su mnogi deportirani umrli stravičnom smrću.

zagovaraju otpor kapitalističkom američkom imperijalizmu (ponekad čak i oružanom silom), ali istovremeno pokušavaju ocrniti revolucionarnu figuru Imama Alija, koji je cijeli svoj život posvetio borbi protiv ugnjetavanja i uspostavljanju pravde. Jer, za razliku od komunističko-socijalističkih idola, Imam Ali i njegovi nasljednici žestoko su odbacili upotrebu nasilja²³¹ za uspostavljanje pravedne društvene strukture. Konačno, nakon smrti poslanika Muhameda, Imam Ali je svakako mogao tražiti direktnu konfrontaciju sa svojim protivnicima kako bi silom proveo svoje pravo na halifat. Ipak, Imam Ali i njegovi odani saputnici povukli su se s političke scene i, sve dok narod nije izabrao halifu, mirno su radili na socijalno pravednijim životnim uslovima. Tokom svog halifata, Imam Ali je imao brojne prilike da djeluje protiv svojih protivnika, ali se s njima ophodio pravedno. Naprimjer, iako je Abdullah ibn Omer (610–693) odbio dati zakletvu na vjernost Imamu Aliju s namjerom da potkopa njegov autoritet, nije bio ograničen u svojim slobodama jer nije poticao političke nemire i nije predstavljao prijetnju društvenom miru. Čak i kada su se Aiša bint Ebu Bekr i Abdullah ibn Zubejr (624–692) pobunili protiv Imama Alija u bici kod Džamela, poznatoj kao Bitka kod Deve, i doprinijeli smrti desetina hiljada ljudi, Imam Ali se s njima obračunao na pravedan i milosrdan način.

Ovaj miroljubivi stav odražava se i u ponašanju ostalih Imama, koji su također odbacili nasilno uspostavljanje pravednije društvene strukture. Iako je Imam Husejn imao mogućnost da sastavi vojsku iz Hidžaza (današnja Saudijska Arabija) i Jemena i da se vojno suprotstavi despotskoj vladavini Jezid ibn Muavije, on se sa malim brojem pratitelja, među kojima su žene i mala djeca, u pustinji Kerbele suprotstavio protiv nepravdnosti unutar islamskog društva i tu je brutalno ubijen.

Stoga je više nego paradoksalno da zagovornici takozvanog Ali'siz Alevilik pokreta veličaju socijalističke ličnosti, dok Imama Alija zbog njegovog „navodnog“ nasilja pokušavaju ocrniti. Uzimajući u obzir da čak i zapadni orijentalisti, koji uglavnom imaju eurocentričan svjetonazor i podržavaju superiornost zapadne kršćanske kulture, u svojim djelima ističu hrabrost, velikodušnost i pravdu Imama Alija, mora se postaviti pitanje u kojoj su se mjeri ovi „prosvijećeni“ aleviti zapravo bavili osobom Imama Alija. Uostalom, nijedan historijski dokaz ne daje nikakve naznake nepravdnog ili čak proizvoljnog ponašanja Imama Alija. Nadalje, paradoksalno je da prosvećeni aleviti zauzimaju antiislamski stav, iako se dijelom pozivaju na izjave sedam velikih pjesnika (tr.Yedi Ulu Ozan)²³², koji su u svojim pjesmama isključivo izražavali islam i učenje Dvanaest Imama.

Posebno su štetne antiislamske izjave koje objavljuju takozvani „upućeni“ u ime alevita. Spojeno sa socijalističkim parolama, stvoreno je jedno antireligijsko raspoloženje, pri čemu

²³¹ Bitke koje je vodio Imam Ali bile su isključivo odbrambene mjere. Isto vrijedi i za sve ostale Imame podjednako.

²³² Izraz *Yedi Ulu Ozan* (što znači „sedam velikih pjesnika“) koristi se za sljedeće istaknute alevitske mistike koji su odigrali značajnu ulogu u širenju alevitskog učenja na turskom jeziku: Seyyid Nesimi, Pir Sultan Abdal, Kul Himmet, Virani, Yemini, Šah Ismail Hatayi i Fuzuli. Porijeklo izraza *Yedi Ulu Ozan* i razlozi zašto su samo ovih sedam označeni kao veliki pjesnici su sporni. Posljedično, sve veći broj alevitskih intelektualaca sve više odbacuje ili barem koristi s oprezom ovu oznaku.

neuki aleviti, koji su u ime sunitskog islama vijekovima proganjani i masakrirani, bivaju gurnuti u prvi plan kao glavni akteri. Vremenom je kod mnogih sunitskih nacionalista stvoren generalni utisak da aleviti teže transformaciji društvene strukture prema socijalizmu. Taj je dojam u konačnici pridonio već znatnoj rezerviranosti sunitske većine prema alevitima. Kao rezultat toga, 1980-ih i 1990-ih godina došlo je do porasta napada i klevetničkih izjava sunitskih turskih nacionalista usmjerenih protiv alevitskog stanovništva u Turskoj. Iako su se aleviti oduvijek u velikoj većini smatrali muslimanima, sunitska većina, koja se ujedno sve više priklanjala desnom krilu političkog spektra, sve ih je više odbacivala, što je značajno pridonijelo tome da mnogi aleviti razviju simpatije prema marksističkim idejama. Istodobno, poznati alevitski pjesnici i mislioci 20. stoljeća također su se bavili ovim razvojem i u svojim pjesmama naglašavali islamske temelje alevizma. Narodni pjesnik Aşik Mahzuni Šerif²³³ je, naprimjer, napisao sljedeće:

Možda će me prijatelji nazvati fanatikom.
Ali kako je moguće ne voljeti dobrog Alija?
Uostalom, postoji mnogo Alija na ovome svijetu
Ali kako je moguće ne voljeti dobrog Alija?

On je kopao zamke za stope zlikovačke
Kapao med i slatku vodu na jezike dobrohotnih
Vrijedno je pisao knjigu čovječnosti
Ali kako je moguće ne voljeti dobrog Alija?

Ali je moj post, Ali je moj blagdan.
Ali je moja religija, Ali moja vjera,
Neka sam žrtva za Zulfikara, koji odstranjuje zlo
Ali kako je moguće ne voljeti dobrog Alija?

Ali je neograničen, Ali je pravda.
Ali je svakog dana sve dalje od zla
Sljedeđenje Alija nema nacionalnost
Ali kako je moguće ne voljeti dobrog Alija?

²³³ Aşik Mahzuni Šerif rođen je kao Šerif Cirik 1940. godine u selu Berčenek blizu Afšina, u pokrajini Kahramanmaraş. Bio je jedan od najpoznatijih alevitskih pjesnika i pjevača, a često su ga nazivali i „Pir Sultanom 20. stoljeća“. U svojim pjesmama bavio se ne samo vjerskim, već i društvenim i političkim temama. Budući da je u svojim pjesmama izražavao antiameričke stavove i kritizirao domaću i vanjsku politiku turske vlade, bio je zatvoren 1970-ih godina. Na temelju njegove izjave: „Hvala Bogu, ja sam kizilbaş (alevi) i sekularist. Ne samo ja, već cijeli moj klan smo kizilbaşi. Ako je ovo zločin, onda je krivnja mog djeda!“ („*Elhamdülillah kizilbaşım ve laikim. Ben değil yedi sülalem kizilbaşdır. Bir suç varsa o da dedemdedir!*“), optužio ga je Turski sud državne sigurnosti 27. decembra 2001. Međutim, postupak nije mogao biti okončan jer je ubrzo nakon toga umro u Kelnu 2002. godine. Njegov grob nalazi se u blizini Hadži Bektaş Dergaha.

On ne govori laži kao Ebu Bekr.
On ne čini krvave osvete kao Osman.
On ne jede zabranjenu hranu kao Omer.
Ali kako je moguće ne voljeti dobrog Alija?

Mahzuni Šerif sam ja, usahao i požutio
Da, rekao sam, ispunjavam svoj zavjet.
Šta god da sam našao, našao sam kod Alija
Ali kako je moguće ne voljeti dobrog Alija?²³⁴

U ovom kontekstu narodni pjesnik Muhlis Akarsu²³⁵ napisao je sljedeću pjesmu:

Kako da te hvalim, sultane moj?
Imaš hiljadu imena, jedno od njih je Ali
Ti si čovjek čuda, Bektaš Veli
Sin Ebu Sufjana ne poznaje Alija!

Ali je pravi prijatelj potlačenih
Ali je prirodni neprijatelj poricateljima
Ali je drugo ime za Muhameda
Drveće u brdima²³⁶ ne poznaje Alija!

Potok vapi, jadikuje i gori za istinu
Bektašije, prijatelji Božiji, dolazili su i odlazili
Mnogi brodovi su plovili morima
Svaki brod u svjetskim morima ne poznaje Alija!

Posebno je od velike važnosti pjesma Mahzuni Šerifa, u kojoj se oštro kritikuju napori uspostavljanja „alevizma bez Alija“ (Ali'siz Alevilik) u društvu. Prvenstveno zato što je

²³⁴ www.youtube.com/watch?v=0WEgW9ScexU (Poslijednji pristup: 08.06.2019.)

²³⁵ Muhlis Akarsu (1948–1993) bio je alevitski pjesnik i muzičar. Kao dijete naučio je svirati baglamu i sudjelovao je kao zakir (bard) u brojnim *džem* ceremonijama. Akarsu je bio jedna od najistaknutijih osoba alevitske muzike, izvodeći pjesme poznatih alevitskih mislilaca poput Pir Sultana i Kul Himmeta na baglami. Dana 2. jula 1993. godine, dok su prisustvovali festivalu Pir Sultan Abdal u turskom gradu Sivasu, Muhlis Akarsu i njegova supruga zatekli su se u hotelu *Madimak* kada je bijesna rulja turskih nacionalista i sunitskih ekstremista zapalila mjesto održavanja festivala. Muhlis Akarsu, njegova supruga Muhibe Leyla Akarsu i još 35 ljudi ubijeni su u tom podmetnutom požaru.

²³⁶ Aluzija na necivilizirane ljude.

Mahzuni Šerif skladao i izvodio brojne pjesme društvenokritičkog sadržaja uz svoje alevitske pjesme, nekoliko je puta bio zatvaran. Na taj je način tokom svoje karijere stekao simpatije mnogih socijalističkih i socijaldemokratskih skupina.

Kada je tokom 1980-ih i 90-ih sve više ljudi preuzimalo vodeće uloge u alevitskim organizacijama koji su afinitet prema islamu i Imamu Aliju smatrali zaostalošću i netrpeljivošću, Mahzuni Šerif je naglasio svoj alevitski identitet te je stoga bio čak djelomično izopćen.

Slijedom toga, može se zaključiti da se temelji stoljetnog alevizma prirodno ne mogu pronaći u socijalističkom ili čak komunističkom svjetonazoru. Čak i ako se neke temeljne alevitske vrijednosti mogu preklapati sa socijalističkim ili komunističkim vrijednostima, porijeklo alevitskog morala i etike leži u religiji islama. Međutim, upravo taj islam, kao i sve druge religije, komunistički svjetonazor žestoko odbacuje. Konačno, pjesma Hadži Ali Turabi Babe²³⁷, poglavara reda Hadži Bektaš Dergaha, bit će korištena za ilustraciju uloge Imama Alija u alevitskim učenjima:

Koja je potreba opisivati stanje arifa?

Klonite se legendarnih priča

Pokaži mi gdje je onaj koji čini čuda

Mnogo je Alija, ali nijedan nije kao Šahi Merdan²³⁸

3.9 Da li je alevizam identičan (ortodoksnom) šiizmu?

Nakon što smo u prethodnim poglavljima identificirali značajne povijesne i konceptualne paralele i sličnosti sa šiitskim islamom (Šiat Ali, rafidi, džaferije, kizilbaši itd.) uz islamski identitet, ovo poglavlje će se sada pozabaviti mnogo raspravljanom tezom o tome može li se alevizam izjednačiti s (ortodoksnim) šiitskim islamom.

Prije detaljnijeg postupanja s ovim pitanjem, međutim, potrebna je definicija ortodoksije i heterodoksije, budući da se ta dva pojma koriste u kršćanskim i židovskim religijskim studijama te stoga mogu dovesti do zabune ako se koriste neoprezno ili bez komentara u islamskom kontekstu. U konačnici, pojam ortodoksije u svom osnovnom značenju opisuje ispravnost i valjanost doktrine. Međutim, taj se pojam često koristi u značenju preovladavajuće doktrine, budući da ona dominira javnom percepcijom. Isključivo iz tog razloga definira normu i učinkovito se smatra ispravnom i istinitom doktrinom. Nasuprot tome, sve različite doktrine smatraju se heterodoksnim ili iskrivljenim i netočnim.

²³⁷ Hadži Ali Turabi Baba bio je jedan od najpoznatijih alevitskih duhovnika 19. stoljeća. Nakon preseljenja Seyyid Hasana Hüsnü Dedebabe 1848. godine, preuzeo je vođenje Dergaha Hadži Bektaš Velija u Nevşehiru, na čijem je čelu bio devetnaest godina. Nakon što je umro 1869. godine, ukopan je na ulaznom dijelu Dergaha.

²³⁸ Šah-i Merdan (Gospodar hrabrih) je počasna titula Imama Alija. Osim turskih i kurdskih alevita, ovu titulu koriste i šiiti perzijskog porijekla.

Posljedično, pripisivanje ortodoksije tradicionalnom šiizmu u početnom pitanju ne bi se trebalo tumačiti kao „ispravna doktrina“. U konačnici, to bi dovelo do zaključka da bi alevizam trebalo smatrati heterodoksnim ili iskrivljenim ako se mogu uočiti (kulturne ili ritualne) razlike od dominantne šiitske doktrine.

Nakon ove ključne definicije pojma, sada se želimo pozabaviti tezom je li alevizam identičan tradicionalnom šiizmu.

Kao što je prethodno obrađeno, pojam šija (stranka, odnosno sljedbenici) najprije je upotrebljavan od Poslanika Muhameda za neke podržavatelje Imama Alija. Ovi odani sljedbenici se u historijskim zapisima nazivaju šijama i sve do današnjeg dana uživaju veliki ugled među alevitima pod nazivom 17 Kemera (17 Opasanih)²³⁹, jer ih se smatra prvim alevitima (u smislu sljedbenika Imama Alija). Radi se o slijedećim osobama:

1. Selman Farsi

Preselio prirodnom smrću.

2. Ebu Zer la-Gaffari

Umro tokom progonstva po naredbi halife Osmana u pustinji Rabaza.

3. Uvejs al-Karani

Poginuo u bitci na Sifinu.

4. Ammar ibn Jasir

Poginuo u bitci na Sifinu.

5. Malik al-Aštar ibn Haris

Otrovan po Muavijinom naređenju.

6. Muhamed ibn Ebu Bekr

Ubijen po Muavijenom nalogu, mučenjem.

7. Abdullah ibn Abbas

Preselio prirodnom smrću.

8. Harim ibn Haris

Poginuo u bitci na Sifinu.

9. Abdullah ibn Yedi-i Huzai

²³⁹ 17 Kemberbest (17 opasanih) su, prema alevitskim predajama, 17 plemenitih ličnosti koje su, kao znak sljedbeništva i odanosti Imamu Aliji, stavile pojas (*kemer*) tokom okupljanja Četrdesetorice (*Kirkklar Cemi*). Usmena predaja kaže da je nakon svakog uzašašća na nebo (*mi'radž*), Poslanik Muhamed posjetio Četrdesetoricu svetaca i s njima obavio zajednički duhovni ibadet. Na temelju ove tradicije, aleviti obavljaju odgovarajući ibadet u spomen na taj događaj.

Po Muavijinom nalogu ubijen.

10. Abdulah ibn Adil Haris

Po Muavijinom nalogu ubijen.

11. Ebu Hišam Tilhani

Po Muavijinom nalogu ubijen.

12. Haris Šejbani

Po Muavijinom nalogu ubijen.

13. Hašim ibn Utba

Po Muavijinom nalogu ubijen.

14. Muhamed ibn Abu Hazika

Po Muavijinom nalogu ubijen.

15. Murtefi ibn Vezza

Po Muavijinom nalogu ubijen.

16. Saïd ibn Kajs

Po Muavijinom nalogu ubijen.

17. Kenber Ali Sultan

Po nalogu Hadžadža az-Zalima (Hadžadža tiranina) ubijen.

Iz toga slijedi da se ovaj termin koristio za života Dvanaest Imama za sve sljedbenike Ehli Bejta, tako da se i moderni šiizam i moderni alevizam mogu klasificirati pod povijesni termin šija, odnosno povijesni šiizam. U tom smislu, zagovornici ove teze navode nekoliko temeljnih alevitskih izvora, poput Buyruka Imama Džafer Esadika (Zapovijedi Imam Sadika), te naglašavaju da se termin šija koristi sinonimno za opis alevizma. Slično tome, istaknuti alevitski mislioci i pjesnici naglašavali su svoju pripadnost šijama u svojim spisima i pjesmama. Naprimjer, Agahi je u jednoj od svojih pjesama koristio termin šija na sljedeći način:

Agahi sam ja, alevit, moja pravna škola je šiizam, ja sam kizilbaš.

Suze koje teku iz mojih očiju su od tuge Kerbele.

Ne pitajte nikoga o patnji moga Husejna, moga brata

Ako želiš, pitaj Zejn al-Abidin²⁴⁰, ako želiš pitaj majku Zejnebu²⁴¹.

Međutim, kako bismo mogli bolje razumjeti postavljeno pitanje, moramo pobliže ispitati povijesni razvoj šiitskog i alevitskog islama do danas. U konačnici, kroz povijest, s izuzetkom nekoliko kratkih razdoblja, sljedbenici Ehli Bejta uvijek su bili izloženi progonu i ugnjetavanju tiranskih vladara (Umejada, Abasida i Osmanlija) jer su osporavali njihove pretenzije na vlast i naglašavali pretenzije Ehli Bejta na vodstvo.

Kako bi sačuvali svoje živote, mnogi odani sljedbenici dvanaest imama bili su prisiljeni emigrirati u udaljena područja kako bi izbjegli ugnjetavanje i progon državnog aparata. Stoga ne bi trebalo biti iznenađujuće da su se, s vremenom, odvojene od izravnog vodstva dvanaest Imama²⁴², formirali različiti šiizmom prožeti pokreti u svim područjima Zemlje. Jer još za vrijeme života Imama formirale su se neke grupe (zejdijske i ismailijske), koje su dijelom zastupale vrlo različita uvjerenja pošto su bile spriječene u pristupu znanju Poslanikove porodice.

U tom kontekstu, naziv alevija (odnosno u množini alevijuni) u to doba primjenjivan je za sve šiitske grupe. Naprimjer, šiitski ustanci za vrijeme Abasida nazivani su alevitski, odnosno alidijanski ustanci i pobune. Nakon sistematskog ubijanja alevitskog stanovništva pod sultanom Yavuz Selimom u Osmanskom Carstvu, naziv alevija gubio. Možda su se osmanlijski nasilni vladari ustručavali svoje protivnike nazivati alevijama i time nasljednicima i sljedbenicima Ali ibn Ebu Taliba, pošto su neuko sunitsko stanovništvo lagali i obmanjivali svojom prividnom

²⁴⁰ Imam Zejn al-Abidin, četvrti Imam.

²⁴¹ Zejneb bint Ali je kćerka Imama Alija i Fatime Zahre. Po historijskim zapisima, trebalo bi da je rođena 625. godine. Nju se opisuje kao heroinu Kerbele, pošto je nakon ubistva brata Imama Husejna i njegovih sljedbenika, poruku Kerbele odnijela u svijet i obznanila tiraniju i nepravdu Umejada. Nakon što su temelj njenog odgoja postavili Poslanik Muhamed i njena majka Fatime, ona je nakon smrti njene majke u starosti od sedam godina postala polusiroče. Zbog toga je njen otac Imam Ali posebno brižno obratio pažnju na njen odgoj, tako da ona ne samo da je bila učena i izverzirana u tumačenju Kur'ana i predaja, nego također i kod pravnih pitanja (fikh) bila priznata kao autoritet. Nakon savjetovanja sa svojim suprugom Abdullahom ibn Džaferom, pratila je svoga brata Imama Husejna na putu za Kerbelu. Na ovaj put također je povela i svoja dva sina Auna i Muhameda, koji su u borbi postigli šehadet, jer su branili svoga dajdžu Imama Husejna. Nakon ubistva Imama Husejna, Zejneb i Imam Zajn al-Abidin su najprije kao zarobljenici odvedeni u Kufu, a potom odvedeni u Damask. Zejnebin govori i intervencije ispred Jezida predstavljaju stvarno činjenično stanje bitke na Kerbeli. To je spriječilo atentat na Imama Zajna al-Abidina. Tako je na kraju Jezid, preko pritiska javnog mnijenja, bio prinuđen da zatvorenike oslobodi i omogućiti im povratak u Medinu. Prenosi se da je Zejneb četrdeset dana nakon ubistva Imama Husejna (arap. Arbain) na putu za Medinu skrenula preko Kerbele, gdje je Imam Zajn al-Abidin glavu Imama Husejna pokopao zajedno sa njegovim tijelom. Nakon toga, zbog umejadskih represalija, Zejnebin trag se gubi. Sve što se zna jeste da je kasnije otputovala za Siriju 682. godine (dvije godine nakon događaja na Kerbeli) i tamo umrla. Njen mauzolej se nalazi u dijelu grada Zejnebija u Damasku te je vremenom pretrpio velika oštećenja zbog napada vehabijskih terorista u Siriji.

²⁴² Ovo nipošto ne znači da je veza između sljedbenika Ehli Bejta i Dvanaest Imama prekinuta. Vjerujući aleviti i šiiti čvrsto vjeruju da Bog vjernike u svim vremenima stavlja pod vodstvo ispravno vođenog Imama, koji ih s Božijom pomoći u vremenu tlačenja i tiranije stalno drži na pravom putu. Ovo uvjerenje se posebno osnažuje kroz jednu predaju od Poslanika Muhameda, u kojoj daje sljedeću izjavu: „Onaj ko umre, bez da je spoznao Imama svoga vremena, umire smrću neznalice (arap. džahilija).” Aleviti i šiiti vjeruju da, kada dođe vrijeme, 12. Imam će se pojaviti iz skrivenosti (arap. Ghaybat, tur. Gaybet) i preuzeti vodstvo nad svim vjernicima na svijetu, kako bi uspostavio pravednu sveobuhvatnu vlast.

naklonošću prema Poslanikovoј porodici, Ehli Bejtu. Umjesto toga, korišteni su izrazi kizilbaš ili rafidi kako bi se ocrnili i alevije i šije, kao i njihovo vjersko uvjerenje. Iako se samonaziv alevija nalazi u brojnim pjesmama iz različitih perioda, svi sljedbenici Ehli Bejta u državnim zapisima Osmanskog Carstva do 19. stoljeća nazivani su jednostavno šijama. Zbog čega je država nakon toga ponovo počela upotrebljavati naziv alevija, stručnim istraživačima je međutim ostalo nepoznato i dobrim dijelom je otvoren prostor za pretpostavke. Nadalje, alevizam zahtijeva zasebno razmatranje i raspravu. Budući da se razvoj njegove sociokulturne strukture i porijeklo njegovog mističnog istraživanja može pratiti do dvanaestog stoljeća, kada su pretežno turkijska, ali i neka perzijska i kurdska plemena migrirala u zapadnu Aziju. Iako su neki od prvih mistika²⁴³ već živjeli u vrijeme Poslanika Muhameda i Dvanaest Imama, mistični islam doživio je svoje veliko zlatno doba kada su nomadski i polunomadski narodi zapadne Azije prihvatili islam.

Dok su vladajuće dinastije za učvršćenje njihove moći propagirale pet stubova islama (arap. Arkan al-Islam)²⁴⁴ i osnove vjere (arap. Arkan al-Iman)²⁴⁵ kao mjerilo religioznosti i pobožnosti, mnogi mistici²⁴⁶ koji su čisto izvanjsko prakticiranje vjere smatrali nedovoljnim i pored toga se pozivali na unutarnje značenje religijskog djelovanja. Pri tome su svoj kritički i propitivački stav prvenstveno temeljili na sljedećem ajetu iz Kur'ana:

A teško onima koji, kada molitvu obavljaju,
Molitvu svoju kako treba ne obavljaju,
Koji se samo pretvaraju
I nikome ništa ni u naruč ne daju!²⁴⁷

Kako bi se steklo jasnije razumijevanje teme, od najveće je važnosti istražiti ove vjerske prakse, kao i stavove poznatih alevitskih mistika o njima. Zagovornici teze da je alevizam

²⁴³ Prve sufije, po islamskim predajama, postojale su već za vrijeme Poslanika Muhameda u sedmom vijeku. Kao najpoznatiji među njima glasi Uvejs al-Karani (tur. Veysel Karani), jedan jemenski savremenik Poslanika Muhameda. Prije svega u epohi Imama Džafera Sadika formiralo se nekoliko mističnih struja koje su prakticiranje islama po šerijatskim pravilima smatrale nedovoljnim. Stoga su težili istraživanju ne samo „vanjskih“ (zahiri), već i „unutarnjih“ ili „intrinzičnih“ (bit) značenja Kur'ana. Budući da se mnogi od ovih pokreta, u svojoj potrazi za znanjem (arap. marifa, tur. marifet), nisu pridržavali učenja Ehli Bejta, smatra se, iz alevitske perspektive, da su odstupili od pravog puta.

²⁴⁴ Ispovjedanja vjere (arap. šehadet), namaz, post, zekat i hodočašće (hadž).

²⁴⁵ Vjera u Boga (arap. Iman bil Allah), u meleke (Iman bil Malayika), u knjige (Iman bil Kutub), u poslanike (Iman bil Anbyia), u onaj svijet (Iman bil Yawmil Ahir) i predodređenje (Iman bil Qada wa bil Qadr).

²⁴⁶ Jedan od najpoznatijih mistika onog doba je perzijski mistik Haladž al-Mensur. „Husejn ibn Mensur al-Haladž bio je perzijski sufija i pjesnik koji je prije svega djelovao u Bagdadu. Rođen je 858. godine u perzijskoj provinciji Fars. Sve do danas uživa veliku popularnost pod imenom Haladž al-Mensur. Prije svega zbog svojih radikalnih i šokantnih izjava, često je bio optuživan za herezu. Konačno je, po naređenju abasidskog vladara, pritvoren i nakon više godina zatvorenništva na brutalan način 922. godine pogubljen. Haladževa najpoznatija izreka, koja je protumačena kao hereza, bila je: „Ja sam Istina“ (ana al-Haqq), izjava koja se u misticismu (tesavvuf) klasificira kao ekstatični usklik. Međutim, njegovi protivnici optužili su ga da je izrazio: „Ja sam Bog.“

²⁴⁷ Sura Al-Maun, ajet 4-7 (107:4-7)

identičan današnjem šiizmu tvrde u ovom kontekstu da su veliki alevitski mistici i mislioci, poput Pir Sultana Abdala, Šaha Ismaila Hataija, Viranija ili Kul Himmeta, često koristili izraze namaz, post, hadž ili zekat u svojim pjesmama. Međutim, detaljnim ispitivanjem ovih pjesama otkriva se da je, osim praktične primjene, fokus prvenstveno na dubljem, odnosno unutarnjem (batini) značenju postupanja. Naprimjer, Pir Sultan Abdal, jedan od vodećih učenjaka alevizma, odbacio je obavljanje obredne molitve (namaz) prema tumačenju sunitskih vladara u poznatoj pjesmi. Prvenstveno zato što je osudio samu praksu ovih radnji zanemarujući mandat vodstva (wilaya) Dvanaest Imama i pozvao alevitsko stanovništvo da podrži Safavide, optužen je za herezu i obješen po nalogu osmanskih vladara.

Ako me prisile da se ponovo abdestim
Ako me prisile da ponovo namaz obavim
Ako ubiju one koji priznaju Šah Imama Alija
Okrenimo se ove godine Šahu (Ismail).

Slično tome, savremeni alevitski mislioci i pjesnici 20. stoljeća naglašavali su suštinsko značenje tih djela. Naprimjer, mistična koncepcija hodočašća Kabi (Hadž) opisana je u pjesmi Davuta Sularija²⁴⁸ na sljedeći način:

Pojas mu je kruna na njegovoj glavi²⁴⁹
Put spasenja je naušnica na njegovom uhu, skupina spašenih
Srce je Kaba, donesi radost i postani hadžija
Dokaz za to leži kod Davut Sularija

Kako se iz pjesme može jasno zaključiti, pored izvanjskog (zahir) hodočašća, fokus se mnogo više stavlja na dublje, odnosno unutarnje (batini) značenje hodočašća prema Kabi. U konačnici, očito je da hodočašće ne ispunjava stvarni smisao ukoliko ne prouzrokuje pozitivnu promjenu u čovjeku. Isto tako je Ašik Ibreti²⁵⁰, jedan alevitski pjesnik, duboko značenje ovog postupka opisao na sljedeći način:

²⁴⁸ Davut Sulari bio je alevitski pjesnik koji je rođen 1925. godine u Čajirliju, u provinciji Erzinčan. Njegovo ime po rođenju bilo je Davud Adžbaba. Njegov djed, Kaltik Mehmet Aga, bio je pjesnik koji je u njemu još u djetinjstvu probudio naklonost ka komponovanju, pisanju pjesama, pjevanju i sviranju baglame (saz). Njegov pseudonim, Sulari, također mu je dao djed. Sa 17 godina postao je ašik, alevitski pjesnik i muzičar. Sa 22 godine napustio je kuću svojih roditelja i do kraja svoga života selio se od sela do sela kao pjevač. S vremena na vrijeme radio je u Ankari kao pjevač u radio-programima. Mnoga njegova djela napisana su na turskom jeziku, a pored toga postoje djela i na zazajskom jeziku. Umro je 16. januara 1985. godine u provinciji Erzurum. Njegova kćerka Edibe Sulari poginula je prilikom podmetanja požara fanatičnih sunita 2. jula 1993. godine u gradu Sivasu, zajedno s još 32 alevitska umjetnika.

²⁴⁹ Ukazuje na to da je pojas 17 opasnih sastavljen od turbana Poslanika Muhameda.

²⁵⁰ Ašik Ibreti je rođen 1920. godine pod imenom Hidir Gürel u selu Kirkisark, u području Sariza u Kayseriju. Njegove pjesme, koje su objavljene 1960. godine, privukle su veliku pažnju turske javnosti. Na osnovu

Upoznati smo sa abdestom, postom i namazom
O hodočašću, sadaki i očitovanju vjere
Međutim, oponašanjem se ne ispunjavaju Božije zapovjedi
Licemjerna vjera nam nije potrebna

Davuta Sularija i Aşik Ibretija, alevitski mislioci kroz historiju su dosljedno osuđivali isključivo prakticiranje ovih običaja, zanemarujući mandat Dvanaest Imama, kao vjersko licemjerje. Posljedično, mnogi dvorski učenjaci koji su propovijedali državni islam pod utjecajem Umejada i Abasida ocrnjivali su ih kao nevjernike. Ovaj stav alevita jasno je ilustriran u prekrasnoj pjesmi Ediba Harabija²⁵¹:

Bogoslužje zasnovano na svjetovnoj ljubavi i razmetljivosti
Jeste svetogrđe protiv svetosti Setara²⁵²
S takvom molitvom niko ne može biti u društvu Ahmed-i Muhtara²⁵³.

Iako je većina alevitskih vjerskih učenjaka i mistika skladala brojne pjesme i teopoezije o spomenutim vjerskim praksama²⁵⁴, usredotočujući se na pravo značenje tih radnji, predstavnici dogmatskog (sunitskog) državnog islama marginalizirali su ih i masovno progonili. Uslijed toga, mnogi mistici su morali napustiti domovinu i emigrirati na rubove islamske sfere utjecaja, gdje su mogli živjeti po svojim uvjerenjima i bolje širiti svoje stavove. Na taj su se način narodi Anadolije upoznali sa islamom koji je pod utjecajem misticizma. U tom kontekstu treba naglasiti da je većina islamskih mistika davala veliku važnost duhovnom islamu, daleko od bilo kakve sektaške uskogrudnosti. Konačno, imali su odgovornost ujediniti i ojačati napaćeno stanovništvo nakon razorne mongolske invazije u 13. stoljeću. Na ovom mjestu, naprimjer, mogu se spomenuti veliki mistici Hodža Ahmed Jesevi, Hadži

povremeno teških životnih uslova morao je da se bavi raznim zanimanjima; tako da je radio, između ostalog, kao krojač, radnik u kamenolomu, izrađivač instrumenata i fotograf. Njegov fotografski atelje je 1967. godine, prilikom jednog konflikta između alevita i sunita, oštetila je jedna fanatične grupe prilikom napada. Aşik Ibreti, koji je uspio spasiti život prilikom ovog događaja, iselio je zbog finansijskih poteškoća u Istanbul, gdje je 5. novembra 1976. godine umro.

²⁵¹ Edib Harabi, čije pravo ime je Ahmet Edib, a u svojim brojnim pjesmama koristio je pseudonim Harabi, sa sedamnaest godina pristupio je bektašijskom redu i sve do svoje smrti u Istanbulu zarađivao je za život kao pisar. Po historijskim zapisima, rođen je 1853. godine u Istanbulu, a 1917. godine umro je u istom gradu.

²⁵² Arapski pojam Setar je jedno od Božijih Imena i opisuje Njegovo svojstvo pokrivanja pogrešaka i grijeha.

²⁵³ Misli se na Poslanika Muhameda. Jedan od njegovih nadimaka je Ahmed.

²⁵⁴ Mnoge od ovih pjesama mogu se razumijevati kako sa izvanjskog (zahir), tako i sa unutarnjeg (batin) aspekta.

Bektaš Veli, Hadži Bajram-i Veli i Dželaludin Rumi²⁵⁵, koji sve do sadašnjeg vremena uživaju veliku naklonost anadolijskog stanovništva. Također, i sa rastućim sektaškim tendencijama u 16. stoljeću mistici, kao Pir Sultan Abdal, ovakav su razvoj kritizirali i isticali značaj zajedništva unutar muslimana:

O Jezide, mi ne klevećemo

Mi smo od onih koji viču "Muhamed Ali"

Pripadnike mističnog reda, ne pita se za njihovu pravnu školu

Mi smo od onih koji viču "Muhamed Ali"

Pit Sultan svjedoči, da su sveci imućni

Prvo je Muhamed, a potom je Ali

Od njih smo naučili principe Puta

Mi smo od onih koji viču "Muhamed Ali"

Nadalje, bliska veza između anadolijskog alevizma i šiizma, koju je u Safavidsko Carstvo uveo šah Ismail Hataji u 16. stoljeću, istaknuta je u brojnim historijskim zapisima. Historičar Čenar Sener, naprimjer, opisuje ovu okolnost na sljedeći način:

„Šiizam za vrijeme života šaha Ismaila imao je veoma blisku srodnost sa anadolijskim alevizmom. Oboje (alevizam i šiizam) svoje znanje su crpili iz istih ustanova (dergaha i medresa).“

Iz ove izjave jasno proizlazi da alevizam ima historijsku povezanost sa šiizmom, ali se ipak razlikuje od modernog šiizma. U konačnici, nakon bitke kod Čaldirana 1514. godine, u sukobu između osmanskog sultana Selima I. i šaha Ismaila, došlo je do petstogodišnjeg raskola između iranskog šiizma i anadolijskog alevizma. Ovo je vodilo ka tome da su anadolijski aleviti vremenom razvili svoje kulturološke, sociološke i mistične posebnosti. Posljedično, nediferencirano izjednačavanje alevizma sa modernim šiizmom bilo bi zavaravajuće bez potpunog razmatranja povijesnog razvoja šiitskog i alevitskog islama. Posebno s osnivanjem dinastije Fatimida u Egiptu u desetom stoljeću uspio se proširiti utjecaj šija sedmeraca u zapadnoj Aziji. Prvenstveno zato što su ismailiti jasne (arap: muhkam) i dvosmislene ajete iz Kur'ana (arap: mutešabih) tumačili mistično (arap: batin), bili su poznati i kao batinije. Nakon sloma ili raskola Fatimidskog Carstva, vođe ismailitskih nizarija proširili su ova mistično utjecajna šiitska učenja u raznim regijama, od Sirije do istočnog Irana. Jedan od najpoznatijih nizarskih vođa bio je Imamijski (dvanaestolmamski

²⁵⁵ Dželaludin Muhamed Rumi bio je veliki mistik i učenjak u islamskoj historiji. Od njegovih sljedbenika nazvan je počasnim imenom Mevlana (poglavar). Rođen je 1207. godine u Belhu (Afganistan). Njegov otac, Behaudin Veled, bio je ugledni perzijski propovjednik i pravnik koji je predavao islamske nauke na medresi u Konji. Nakon smrti svog oca, preuzeo je njegovu katedru i vodio kontemplativan naučni život. Međutim, njegov život i stavovi temeljito su se promijenili kada je 1244. godine u Konji upoznao Šemsa al-Dina Tabrizija. Nakon smrti svoga mentora, Šems al-Dina Tabrizija, kaže se da se Rumi u tuzi povukao iz javnog života. Godine 1273. pokopan je u mauzoleju u Konji (Turska), koji je kasnije služio kao mjesto okupljanja mevlevijskog reda.

šija) šejh Hasan Sabbah²⁵⁶, koji je zauzeo tvrđavu Alamut u sjevernozapadnom Iranu i odatle predvodio Ismailitske Nizarije. Prvenstveno su se sljedbenici šejha Hasana Sabbaha, poznati kao asasini, borili protiv abasidskih halifa i njihovih zaštitnika, turske seldžučke dinastije, koja je provodila politiku širenja sunizma u Anadoliji. To je doprinijelo činjenici da su i alevitski mistici i šiitski učenjaci osjećali veliku naklonost i simpatije prema šejhu Hasanu Sabbahu i razvijali batinijsko učenje. Naprimjer, duodecimalni šija Nasir ad-Din at-Tusi (1201-1274) pobjegao je pred krvavim pohodom mongolskih napadača u Centralnoj Aziji i našao utočište u utvrdi Alamut, političkom centru ismailita. Neka svoja djela, koja su do danas od najvećeg značaja, napisao je u tom periodu. Na isti način su Imamijski derviši, kao što su Ebu'l Vefa el-Bagdadi²⁵⁷, Baba Iljas el-Horasani²⁵⁸ i Baba Ishak Kefersudi²⁵⁹, po nalogu Nizarija, širili batinijsko učenje u Anadoliji. Većina istraživača zato naglašava da su sufijske struje, kao babailik, hajdarilik, kalenderilik, jesevilik i vefailik, prožete utjecajem batinija. Zbog toga se u islamskoj literaturi pojam šija-batinija često upotrebljava za alevizam.²⁶⁰ Ipak, prije svega zbog mističnog tumačenja šiitskog islama, alevizam se ne može i ne smije poistovjećivati s današnjim šiizmom. Naročito ne ako se uzme u obzir da su se tokom stoljeća neke kulturološke i sociološke posebnosti integrisale u vjerovanje, koje se islamskim propisima ne protive, ali se u šiizmu ne nalaze. Neke od tih posebnosti dolaze do izražaja u ceremoniji Džem. Prije svega nakon što su osmanski vladari alevite izolirali od obrazovnih

²⁵⁶ Šejh Hasan Sabbah bio je vođa ismailitskih nizarija, koji su u zapadnom svijetu veliku prominentnost stekli pod imenom asasini. On se rodio u Komu u dvanaestimamijaskoj šiitskoj porodici. U ranom djetinjstvu s porodicom odselio je u Rej (današnji Teheran), gdje je apsolvirao osnovne religiozne studije. U starosti od sedamnaest godina stupio je u kontakt s ismailitskim fatimidima u Egiptu. Nakon što je za veoma kratko vrijeme internalizirao batinijsko učenje ismailita, izabran je za vjerskog vođu (arap. da'i). Nakon toga, nekoliko godina je širio batinijsko učenje u Siriji i Perziji. Ipak, tek kada je svojom umješnošću zauzeo strateški važnu utvrdi Alamut i stavio je pod svoju kontrolu, utjecaj batinijskog pokreta se značajno povećao. Iz utvrde Alamut razvijao je 34 godine razne vojne aktivnosti protiv vladara abasida i seldžuka. Ovo je suštinski doprinijelo tome da je politički pritisak sa sljedbenika Ehli Bejta skinut i da su oni svoju vjeru mogli slobodno prakticirati. Po historijskim zapisima, trebalo bi da je rođen između 1034. i 1059. godine u iranskom gradu Komu, a da je 1124. godine umro u tvrđavi Alamut.

²⁵⁷ Ebi'l Wafa al-Bagdadi, također nazivan i al-Kakes ili al-Kurdi, rođen je 1026. godine u iračkom selu Kusan. Njegovo puno ime glasi Sejid Muhamed ibn Muhamed Ariz al-Bagdadi Tadž ul-Arifin. Njega se smatra osnivačem Wafiyya tarikata. Iz njegovog djela Menakibname može se zaključiti da njegovo porijeklo vodi od Imama Alija Zejn al-Abidina. Po historijskim zapisima, izvjesno je da je umro 1107. godine.

²⁵⁸ Baba Iljas Horasani bio je učenik Dede Garkina i sljedbenik šiitske grane derviša Abu'l Wafa al-Bagdadija i batinijske struje Wafaiyya derviša. Pored jesevijskih, kalenderijskih i hajdarijskih derviša, on je širio učenje o Ehli Bejtu u Anadoliji. Zato što se digao protiv nepravedne vlasti Seldžuka, on i njegovi sljedbenici su pogubljeni. Po historijskim bilješkama, Hadži Bektaš Veli bio je jedan od njegovih sljedbenika i priključio se Babai-ustanku koji je predvodio Baba Iljas.

²⁵⁹ Baba Ishak Kefersudi bio je učenik Baba Ilijasa, i kao duhovni zastupnik (tr. Halife), predvodio je Babai-ustanak.

²⁶⁰ U sljedećim poglavljima će razlike biti detaljnije obrađene.

institucija u Nedžefu²⁶¹, Kerbeli²⁶² i Ardebilu²⁶³ – kako bi spasili svoj identitet i suprotstavili se asimilaciji Osmanskog Carstva – aleviti su u svoju religijsku svakodnevicu bili prinuđeni integrirati neke posebnosti. Posljedično, izjednačavanje alevizma s modernim šiizmom zanemarilo bi historijsku jedinstvenost alevizma. Čak i ako neki šiiti imaju dobre namjere izjednačavajući ili podređujući alevizam modernom šiizmu, mnogi aleviti te napore tumače kao pokušaje asimilacije. Umjesto toga, obje skupine trebale bi se usredotočiti na svoje zajedničke karakteristike bez ciljanja na pojednostavljivanje. Najvažnije zajedničke karakteristike su Tawalla²⁶⁴ (izjava ljubavi) i Tabarra²⁶⁵ (odricanje), koje su kako za alevite tako i za šiite dva neizostavna temeljna stuba. Pogotovo u vrijeme kada vehabijsko-selefističke terorističke organizacije provode napade na nevine ljude gotovo svugdje u svijetu, posebno ciljajući alevite i šiite na Bliskom istoku, kulturne razlike ne smiju dovesti do toga da sljedbenici Ehli Bejta izbjegavaju međusobni kontakt. Nadalje, aleviti i šiiti crpe temelje svojih vjerskih uvjerenja iz istih izvornih tekstova i zapisa, iako je svaka skupina tokom stoljeća proizvela sopstvene interpretacije određenih sadržaja iz ovih izvora, koje se danas smatraju važnim sastavnim dijelovima ovih struja.

Dakle, šta govori protiv toga da jedan vjernik alevija, u traganju za znanjem o Ehli Bejtu, s poštovanjem sopstvenog religijskog i kulturnog identiteta stupi u vezu s drugim sljedbenicima Ehli Bejta? Uostalom, prkosi zdravom razumu da se sljedbenici Ehli Bejta stalno pozivaju na kulturološke razlike, dok se neprijatelji Ehli Bejta (arap./tur.: nasibi)²⁶⁶

²⁶¹ Nedžef je grad u Iraku i glavni grad istoimene provincije. Svoju poznatost zahvaljuje mauzoleju Imama Alija unutar grada. Džamija koja je u sklopu mauzoleja također je i centar vjerske visoke škole.

²⁶² Kerbela je za alevite i šiite sveto mjesto u današnjem Iraku. Mjesto je steklo tužnu prominentnost kroz žrtvovanje Imama Husejna i njegovih 72 odana sljedbenika 680. godine, što je obilježeno izgrađenim mauzolejom šehida. Prema nekim predajama, ime ishodi iz arapskih riječi *karb* (tuga) i *bala* (bol).

²⁶³ Ardabil je grad na sjeverozapadu Irana, koji je danas većinom nastanjen azerbejdžanskim Turcima šiitske vjeroispovijesti. U gradu se nalazi mauzolej Pira Safija ad-Dina as-Safavija (umro 1334.), osnivača safavijskog reda, i njegovih nasljednika, uključujući šaha Ismaila Hataija, utemeljitelja Safavijskog Carstva.

²⁶⁴ Tawalla opisuje princip naklonosti prema Ehli Bejtu i njihovim sljedbenicima. Njihova osnova zasnovana je na suri Aš-Šura, ajet 23 (42:23), u kojem, vezano za Božijeg Poslanika, glasi: „Na ovaj način Allah šalje radosne vijesti robovima Svojim, onima koji su vjerovali i dobra djela činili. Reci: ‘Ne tražim za ovo nikakvu drugu nagradu od vas, osim da dobrim djelima približite.’ A umnogostručit ćemo nagradu onome ko učini dobro djelo, jer Allah, zaista, mnogo prašta i blagodaran je.” Time ajet naglašava obavezu ljubavi i naklonosti (tur. *tevella*) prema Ehli Bejtu. Iz ovog razloga vjernicima alevitima zabranjeno je da traže razmimoilaženja i razlike među ostalim sljedbenicima Ehli Bejta. Pri tome porijeklo, nacionalnost, boja kože i spol ne igraju ulogu.

²⁶⁵ Tabarra opisuje princip distanciranja od neprijatelja Ehli Bejta. U skladu s ovim principom, vjernik alevit ima zadatak da se suprotstavi kako historijskim protivnicima Ehli Bejta, tako i savremenim neprijateljima, te da svoj otklon i odbojnost otvoreno iskaže prema njima, čak i ako se radi o bliskim članovima porodice. Shodno tome, princip Tabarra (tur. *Teberra*) stoji u direktnoj vezi sa priznavanjem ljubavi (Tawalla) naspram Ehli Bejta. Principi Tabarra i Tawalla zahtijevaju se od prisutnih prilikom početka ceremonije Džem.

²⁶⁶ Pojam nasibi je historijski naziv za ljude koji su osjećali mržnju prema Imamu Aliju i njegovim sljedbenicima. Iako se pojam može naći i u nekim alevitskim izvorima, on se u današnje vrijeme rijetko koristi.

udružuju u borbi protiv njih. Sama činjenica da religiozni fanatici različitih etnija, nacionalnosti, pravnih škola i islamskih uvjerenja međusobno uspijevaju da se ujedine, nalaže uspostavljanje bližeg interesnog zajedništva između alevita i šiita. Jer svako ko je ispitao situaciju brzo će shvatiti da ovi krvožedni teroristi ne prave razliku između alevita i šiita te da je njihovo pravo neprijateljstvo usmjereno prema Imamu Aliju i njegovim potomcima. Posebno zbog krvožednih djela takozvane „Islamske države“ (IS), sljedbenici Ehli Bejta (šiiti i aleviti) u Siriji i Iraku naučili su se usredotočiti na ono što je bitno: svoju odanost prema Ehli Bejtu i suzdržati se od kontroverzi oko različitih tumačenja vjerskog sadržaja i praksi. Ovo jedinstvo značajno je doprinijelo sprječavanju većeg genocida nad alevitima i šiitima u ovoj regiji. Kako bismo naglasili relevantnost ove situacije, citirajmo plemenite riječi alevitskog mislioca Pir Sultana Abdala, koji je prije nekoliko stoljeća pozvao sve sljedbenike Ehli Bejta na ujedinjenje protiv osmanskih vladara:

Dođite duše moje, budimo jedno
Protiv nevjernika podignimo mačeve
Osvetimo Husejnovu krv
Uzdam se u Allaha Uzvišenog.

Da bismo došli do razumijevanja definicije alevizma, alevite i šiite možemo usporediti s braćom. Iako imaju isti temelj (isti otac, ista majka), njihove razlike rezultiraju različitim osobnostima. S obzirom na to da čak i jednojajčani blizanci pokazuju različite karakteristike i osobine, a ipak nisu identični, pokušaj izjednačavanja alevizma i šiizma može se protumačiti kao prozelitizam protiv alevita.

Ukratko, alevizam sebe shvaća kao dio šiitskog islama (stranke Imama Alija), što je jasno vidljivo iz alevitskih izvora, kao što je već spomenuto. Međutim, to je mistični oblik šiitskog islama i stoga pokazuje neke razlike od modernog oblika šiitskog islama kakav se prakticira, naprimjer, u Iranu ili Iraku. Iako postoji konsenzus između tradicionalnih šiita i alevita u vezi sa temeljnim načelima njihove vjere, ne treba zanemariti da su se obje struje različito razvijale nakon 16. stoljeća. Dok su šiitski Safavidi promovirali obrazovne ustanove tradicionalnog šiitskog islama u Nedžefu, Kerbeli i Komu, anadolijski aleviti – zbog političkog progona koje su vršili sunitiski Osmanlije – nisu imali nikakav ili su imali vrlo ograničen pristup svojim religijsko-obrazovnim ustanovama. Pri tome je tradicionalni šiizam prožet perzijskom i arapskom kulturom, dok je anadolijski alevizam najvećim dijelom pod utjecajem turkmenskih putujućih derviša i mistika.

Ovdje se mora naglasiti da se ne govori o sunitima kada se misli na neprijatelje Ehli Bejta. Konačno, ljubav prema Ehli Bejtu, iako nije izražena tako intenzivno kao u alevizmu i šiizmu, također je prisutna u sunitском islamu. Neprijatelji Ehli Bejta (arap. *nasibi*) tokom historije stalno su se predstavljali kao sunitiski muslimani kako bi osigurali saglasnost sunitskog društva, što čine i danas. Naprimjer, Emevije, Abasidi i Osmanlije zloupotrijebili su sunitiski islam u sopstvene svrhe.

Sljedeći prikaz ima za cilj da pruži bliže pojašnjenje historijskog razvoja šiizma i alevizma:

6.-11. stoljeće	Tokom ove epohe, nasljednici Imama Alija nazivani su alevi, a sljedbenici kao šije.	
12.-15. stoljeće	šije batinije – misticizmom prožet šiizmom	imamije (dvanaestoimamske šije) tradicionalni šiizam
16.-18. stoljeće	bektašije kizilbaše	
19.-21. stoljeće	aleviti	

4 Vjerski principi

Na temelju nalaza prethodnih poglavlja, u ovom odjeljku bit će bliže pojašnjeno pet vjerskih principa i temeljnih stubova alevitskog učenja, kako bi se osnažio islamski identitet alevizma. Kao i kod drugih religija, islam je podložan formama uvjerenja kako bi ostvario unutarnje zadovoljstvo čovjeka. Ovo stanje nastupa tek onda kada čovjek postignutu svijest sprovede u dnevnu praksu. Pošto mnogi istraživači, vođeni različitim intencijama, osporavaju različite teze o historijskim korijenima alevizma, bliže promatranje ovih vjerskih principa je od velikog značaja. Dok su neki istraživači pet temeljnih principa alevizma u svojim knjigama dublje obrađivali, neki drugi pokušavaju iste principe izostaviti i prikazati alevizam kao nešto što postoji izvan islama.

Kao što je detaljnije raspravljano u prethodnim poglavljima, neki od ovih istraživača pokušavaju prikazati alevizam kao sintezu bliskoistočnih religija ili kao neovisnu religiju, te alevitsko stanovništvo povesti u nepovratnu asimilaciju. Na temelju tih stavova nastao je takozvani pokret Ali'siz Alevilik (alevizam bez Alija).²⁶⁷

Iako ovaj pokret pokušava iskriviti temeljna načela alevizma, dugoročno neće biti uspješan, sve dok se pobožni aleviti pridržavaju propisa Ehli Bejta i primjenjuju ih u svakodnevnom

²⁶⁷ Kod predstavnika ovog pokreta uglavnom se radi o ateistima i politički motivisanim osobama koje odbacuju islam i zato poduzimaju sve moguće kako bi alevizam prezentirali kao struju izvan islama. Istovremeno izražavaju pogrdne i omalovažavajuće stavove o Poslaniku, Imamima i Kur'anu. Kako bi neuke ljude privukli na svoju stranu, poriču da su poznate vodeće alevitske ličnosti bile muslimani, kao što je Pir Sultan Abdal, i poriču islamski kontekst njihovih pjesama.

životu. U jednoj izjavi Imam Ali je rekao: „Imam potpunu i sigurnu vjeru u Boga i nemam sumnje nikakve u vjerovanje svoje.“²⁶⁸

4.1 Jedinstvo Božije (tevhid)

Apsolutno jedinstvo Boga prvi je i najvažniji princip od pet alevitskih temeljnih načela i temelj za kristalno jasan, kao i potpun monoteizam. Ostala vjerska načela – poslanstvo, Imamat, pravednost i proživljenje – grade se na ovom temelju. Pojam tevhid izvodi se iz arapske riječi ahad (jedan) i izražava jedinstvo, jedinstvenost i ujednačenost. Duboki značaj ovog načela vjere prikazan je u riječima poslanika Muhameda, koji je rekao: „Vjeruj i svjedoči da nema Boga osim Allaha i spasit ćeš se.“

U Časnom Kur'anu, u suri Ihlas, koja je poznata i kao Sura et-Tewhid (sura Jedinstva), opisuju se jedinstvenost i neuporedivost Boga sljedećim riječima: „Reci: 'On je Allah – Jedan! Allah je Utočište svakom! Nije rodio i rođen nije, i niko Mu ravan nije!'“

U Ime Allaha, Milostivog Samilosnog
Reci: On je Allah, Jedan. Allah je Utočište svakom!
Nije rodio i rođen nije!
I niko Mu ravan nije!“²⁶⁹

Pored ovih ajeta iz Časnog Kur'ana, postoje brojna druga mjesta na kojima je princip jedinstva bliže opisan. Kao što se iz sljedećeg ajeta može zaključiti, u raznolikosti stvaranja leži cilj ostvarenja jedinstva sa Bogom. Konačno, ništa ne može postojati bez jedinstva.

Allah je stvoritelj svega i On upravlja svim.²⁷⁰

Tevhid obuhvata sve osobine koje se, između ostalog, bolje opisuju u 99 najljepših Božijih imena (Asma ul-Husna) i svoju potpunu formu odražavaju u jedinstvu. Među alevitima je, naprimjer, upotreba imena Hakk za Boga vrlo česta; potječe od arapske riječi al-Hakk i znači istina ili pravda. Imam Ali je formulisao veoma sveobuhvatan opis jedinstva Boga na sljedeći način:

²⁶⁸ Ali ibn Ebu Talib: Nahdž ul-Belaga (22. govor)

²⁶⁹ Sura al-Ihlas, ajet 1-4 (112:1-4)

²⁷⁰ Sura az-Zumer, ajet 62 (39:62)

„Hvala se duguje Bogu, čiju slavu govornici ne mogu iskazati, čije darove brojitelji ne mogu izbrojiti, a čije pravo ne mogu odužiti oni koji se trude; kojeg razumska hrabrost najviša ne može procijeniti, te shvaćanja zadubljena ne mogu doseći. Njemu – za čije svojstvo nema granice nikakve, niti opisa ikakva – nije određeno vrijeme nikakvo i nije ustvrđeno trajanje nikakvo. On je stvorio svjetove svemoćnošću Svojom, rasijao vjere samilošću Svojom, te Zemlju, koja se tresla, utvrdio brdima. U vjeri je na prvom mjestu priznanje Njega. Savršenost priznavanja Njega jeste svjedočiti Ga. Savršenost svjedočenja o Njemu jest vjerovati u Jednoću Njegovu. Savršenost vjerovanja u Jednoću Njegovu jest smatrati Ga čistim. A savršenost čistote Njegove jeste odricati Mu svojstva, budući da je svako svojstvo dokaz da je ono različito od onog čemu je propisano, a sve ono čemu je nešto propisano različito je od svojstava. Tako, svako ko Bogu pripisuje svojstva priznaje njemu slična, a ko priznaje Njemu slična smatra Ga dvojnošću, a ko Ga smatra dvojnošću priznaje dijelove Njegove, a ko priznaje dijelove Njegove krivo Ga shvaća, a ko Ga krivo shvaća označava Ga, a ko Ga označava ograničava Ga, a ko Ga ograničava određuje Ga brojem. Ko god kaže u čemu je On, drži da je On sadržan, a ko god kaže na čemu je On, smatra da On nije u još nečemu. On je Onaj Koji postoji, ali ne tako da se pojavio iz nepostojanja. On je sa svim stvarima, ali bez da je sa njima povezan; On se razlikuje od svega, ali ne u odvojenosti tvarnoj. On djeluje, ali ne u smislu kretnji i sredstava. On vidi čak i kada nema ništa za gledanje među stvorenjima Njegovima. On je samo Jedan, tako da ne postoji niko s kim se On može družiti ili zbog čijeg odsustva bi se On mogao osjećati usamljeno.“²⁷¹

Jedinstvo Božije obuhvata pri tome neograničenost, što onemogućava izravnu percepciju nesavršenom i ograničenom stvorenju poput čovjeka. Posljedično, kroz historiju su se pojavili brojni nesporazumi i pogrešna tumačenja (arap. tefsir) nekih ajeta iz Časnog Kur'ana. Značajan broj različitih tumačenja Kur'ana može se pratiti do Ebu Hurejre²⁷², koji je izmislio mnoge predaje (hadise) i potom ih pripisao poslaniku Muhamedu. U mnogim njegovim izjavama Bog je opisan kao osoba s ljudskim osobinama. Mnogi sunitski učenjaci stoga smatraju da se Bog može vidjeti u zagrobnom životu, što se iz alevitske perspektive snažno odbacuje. Ajeti koji naizgled govore o Božijim udovima trebaju se shvatiti metaforički, kao što je naprimjer:

²⁷¹ Ali ibn Ebu Talib: Nahdž ul-Belaga (1. govor)

²⁷² Ebu Hurejre se kod sunita smatra vjerodostojnim prenosiocem hadisa, dok ga sljedbenici Ehli Bejta odbacuju. Prenosi se da je nakon bitke na Hajberu 628. godine, dakle tri godine nakon preseljenja Božijeg Poslanika, prihvatio islam. Sve do smrti Poslanika njegovo se ime ne spominje ni kod jednog bitnog događaja. Tako se samo prenosi da se pojavljivao u Poslanikovo blizini kako bi utažio svoju glad. Tokom vladavine trećeg halife Osmana, Ebu Hurejre je izgradio vezu sa Umejadima. U ovom vremenu su nastale prve pohvalne predaje o Umejadima. Tokom vladavine Imama Alija, Ebu Hurejre je radio za Muaviju. Iako sam nije učestvovao u bici na Sifinu, pokušavao je finansijskog pokrovitelja Muaviju podržati izmišljenim hadisima. Ebu Hurejreu se pripisuje prenošenje najvećeg broja hadisa od bilo koje osobe, s 5000 koji su pripisani njemu. Više od 400 njih zabilježeno je u sunitskoj zbirci hadisa, *Sahih al-Buhari*. Time daleko nadmašuje sve ashabe koji su provodili mnogo duže vremena s Poslanikom. Ebu Hurejre je umro 678. u 78. godini života.

„I ne klanjaj se, pored Allaha, drugom bogu! Nema boga osim Njega! Sve će, osim Njegovog lica, propasti! On će suditi, i Njemu ćete se povratiti!“²⁷³

Oni koji su ti se zakleli na vjernost – zakleli su se, doista, na vjernost samome Allahu – Allahova Ruka je iznad ruku njihovih! Onaj ko prekrši zakletvu, krši je na svoju štetu, a ko ispuni ono na što se obavezao Allahu, On će mu dati veliku nagradu.²⁷⁴

Šah Ismail Hatayi je, u ovom kontekstu, značaj jedinstva Božijeg objasnio u jednoj svojoj pjesmi:

Šah, Hatayi, tevhid je more, jedan okean
Nisu od nas oni koji ne svjedoče jedinstvo
Naše naslijeđe dolazi od moga Pira Šejh Safia²⁷⁵
Put Dvanaest Imama je pricip tevhida.

Kul Himmet opisuje jedinstvo Božije na slijedeći način:

Četiri knjige za ovozemni život
Kur'an je Muhamedu u srce stavljen
Kul Himmet je upao u Alijevu nevolju
Rekavši Bog je jedan, Muhamed je Ali.

Nadalje, jedinstvo Božije izraženo je u ispovjedanju vjere (šehadet). Alevi je obavezan internalizirati, ne samo jedinstvo Boga (Tevhid), već i poslanstvo ili misiju (Nubuvet) poslanika Muhameda, kao i vodstvo (Imamat) Dvanaest Imama. Izjava vjere stoga uključuje sljedeće dijelove teksta:

Svjedočim da nema božanstva osim Boga.
Svjedočim da je Muhamed Poslanik Božiji.
Svjedočim, da je Ali štićenik, bliski prijatelj Božiji.²⁷⁶

²⁷³ Sura al-Kasas, ajet 88 (28:88).

²⁷⁴ Sura al-Feth, ajet 10 (48:10).

²⁷⁵ Šejh Safijudin al-Ardebili bio je predak šaha Ismaila, utemeljitelja safavidskog reda. On je bio zet šejha Zahida Gilanija, poglavara zahedijskog reda. Po historijskim zabilježkama trebalo bi da je rođen 1216. i da je umro 1301. godine.

²⁷⁶ Ešhedu an la ilaha illallah.

Ešhedu anna Muhammadan Rasulullah.

Ešhedu anna Aliyyan Waliyullah.

Ovo alevitsko svjedočanstvo vjere među alevitima današnjice poznato je u svojoj kraćoj formi, kao što je u često upotrebi molitva: „Ja Allah, ja Muhamed, ja Ali“. U pravilu se islamsko svjedočanstvo vjere uči na arapskom jeziku, jer se arapski jezik smatra bazom za islam i Časni Kur'an. Međutim, izgovaranje svjedočanstva vjere na maternjem jeziku također je dozvoljeno. Preporučuje se izgovor na maternjem jeziku pošto mnogi ljudi nisu upoznati sa arapskim jezikom te se time gubi stvarno značenje izgovorenih riječi. Posebnost kod svjedočenja vjere je da započinje jasnom negacijom „La“, čime se cilja na negiranje i odricanje od svih drugih božanstava. Jer, po alevitskom uvjerenju, Bog tek onda zauzima mjesto u srcu vjernika kada se on odvoji od svega pogrešnog i preda istini. U ovom kontekstu Derviš Veli, važan alevitski mistik 19. stoljeća, islamsko svjedočanstvo vjere obradio je u svojoj neprocjenjivoj pjesmi na sljedeći način:

Nevolje Imama su nestale,
U ponavljanju La ilahe illallah derviš Veli iskazuje naklonost Ljubavi

Davut Sulari, jedan od najvećih savremenih alevitskih pjesnika 20. stoljeća, opisuje svjedočenje vjere u jednoj od svojih pjesama na sljedeći način:

Neutješan iz ljubavi je Davut Sulari
Njegov govor je med, a on sam je pčela
A tajna hazreti-i Alija, njegov Zaulfikar
Udarimo po vratu odricanje od vjere
Ostvarimo jedinstvo sa Bogom.

4.2 Božija pravda (adala)

Vjerovanje u Božiju pravdu (arap. adala) drugi je alevitski vjerski princip. Konačno, činjenica da Stvoritelj svega stvorenog mora apsolutno biti pravedan jeste logična nužnost, pošto cijela kreacija počiva na pravednom i uravnoteženom redu. Mogućnost suprotnog dovela bi u pitanje Božiju moć, te bi za sobom povukla u kaos sve što postoji, kada ga jedan pravedni Stvoritelj ne bi držao u ravnoteži. Bog sam u Časnom Kur'anu poziva na uspostavljanje pravednosti i upozorava na nepravdu i tiraniju, koju On smatra ružnom i prokletom. On apeluje da vlada pravda, a da se nepravda obavezno izbjegava. Kako bi i moglo biti drugačije – da nešto što On smatra odvratnim čini Svojim atributom, ili da On sam ne posjeduje upravo one attribute koje hvali?

Bog je apsolutno savršen, zbog čega je sve neadekvatno i nesavršeno daleko od Njega. Međutim, tokom razdoblja Emevija i Abasida pojavila se struja koja je, u pokušaju da legitimizuje zločine vladara, dovodila u pitanje Božiju apsolutnu pravdu. Naprimjer, nekoliko dvorskih učenjaka toga vremena postavilo je tvrdnju da bi Bog, na osnovu Svoje beskrajne moći, mogao proizvoljno Jezida ibn Muaviju uvesti u Džennet, dok bi Imama Husejna mogao baciti u Džehennem. Da Bog, koji je iz ničega stvorio postojanje, posjeduje svemoć, po

alevitskom je učenju neporeciva istina. Međutim, proizvoljnost proturječi Božijoj pravednosti te se stoga od sljedbenika Ehli Bejta odlučno odbacuje. Alevizam smatra Boga izvorom dobra i ljepote, dok sve loše i zlo proizlazi iz ljudskih želja:

„Koji sve savršeno stvara, Koji je prvog čovjeka stvorio od ilovače.“²⁷⁷

„Allah neće nikome ni trunku nepravde učiniti. Dobro djelo On će umnogostručiti i još od Sebe nagradu veliku dati.“²⁷⁸

„(...) Gospodar tvoj neće nikome nepravdu učiniti.“²⁷⁹

Kako se može vidjeti iz prethodno spomenutih ajeta, cijela kreacija je stvorena na najbolji mogući način. To znači da sve što s ljudske tačke gledišta ne djeluje lijepo, može se promatrati tek kao subjektivno gledište ili karakterizirati kao loše u usporedbi s drugim stvarima.

Naprimjer, iz ljudske perspektive, zmija ili škorpija smatraju se lošim jer mogu biti opasne. Slično tome, trn se često smatra ružnim u usporedbi s cvijetom jer može uzrokovati ozljede. Međutim, ako se ove naizgled loše stvari promatraju objektivno, s obzirom na njihovu dodijeljenu ulogu u stvaranju, one su zapanjujuća stvorenja. Što se tiče ljudskog ponašanja, gdje su slobodna volja i izbor dani, Bog određene postupke, poput idolopoklonstva, ubistva, bluda, kockanja i nepoštivanja roditelja, smatra ružnim grijesima. Upute i zadaci koje je Bog dao u konačnici služe savršenstvu i dobrobiti čovječanstva, zbog čega kršenje i prestup protiv njih treba smatrati osudom. Budući da Bog utjelovljuje potpuno savršenstvo, tvrdnja da dobro i zlo potječu od Njega potpuno je kontradiktorna. Posljedično, očito je da sve što je dobro i lijepo proizilazi iz savršenstva Božijeg, dok korijen svakog zla leži u nesavršenstvu. Božije zapovijedi i zabrane, koje je On dao čovječanstvu, služe njihovom savršenstvu. Ko god ih krši, djeluje u smjeru nesavršenstva, šteti sebi i griješi. Iz religijske perspektive, čovjek je stoga odgovoran i mora biti odgovoran. Dok čovjek u svojim postupcima misli na sopstvenu korist, božanska mudrost služi svrsi savršenstva i zadovoljstva svih stvorenja. Bog, Sveznajući, posjeduje apsolutno savršenstvo:

„Reci: 'Ko je Gospodar nebesa i Zemlje?' – i odgovori: 'Allah!' Reci: 'Pa zašto ste onda umjesto Njega kao zaštitnike prihvatili one koji sami sebi ne mogu neku korist pribaviti, niti oni mogu od sebe kakvu štetu otkloniti?' Reci: 'Zar su jednaki slijepac i onaj koji vidi, ili zar su isto tmine i svjetlo, ili zar oni koje su učinili Allahu ravnim stvaraju kao što On stvara, pa im se stvaranje čini slično?' Reci: 'Allah je stvoritelj svega i On je Jedini i Svemoćni.'“²⁸⁰

²⁷⁷ Sura as-Sedžda, ajet 7 (32:7)

²⁷⁸ Sura an-Nisa, ajet 40 (4:40)

²⁷⁹ Sura al-Kehf, ajet 49 (18:49)

²⁸⁰ Sura ar-Ra'd, ajet 17 (13:17)

Dakle, Stvoritelj dopušta svim stvorenjima da sudjeluju u Njegovoj beskonačnoj milosti prema svojoj sposobnosti razumijevanja. Budući da se sposobnosti svih stvorenja razlikuju, božanska pravda se percipira drugačije. Posljedično, dužnosti čovjeka prema Stvoritelju povezane su s njegovim sposobnostima i kapacitetima. Stoga se od čovjeka ne traži ništa što nije sposoban učiniti. Sva božanska pravila uzimaju u obzir dobrobit i pojedinca i društva, tako da bude ostvarena sreća kako na ovom, tako i na onom svijetu. Stoga je Gospodar u Kur'anu za ljude sljedeće jednostavno i razumljivo formulisao:

„Allah nikoga ne opterećuje preko mogućnosti njegovih: u njegovu korist je dobro koje učini, a na njegovu štetu zlo koje uradi. (...)“²⁸¹

„Allah želi da vam olakša, a ne da poteškoće imate.(...)“²⁸²

Pir Sultan Abdal na sljedeći način izražava svoje uvjerenje da će Bog provoditi pravdu u zagrobnom životu, i da će tirani dobiti svoju pravednu kaznu za patnju koju su prouzročili:

Ja sam Pir Sultan Abadal, ovaj svijet je prolazan
Pravedni gospodari su otišli, braća su stigla.
Sud Muhamedov je uzvišeno tijelo.
Neka moj slučaj ostane pred ovim sudom.

Karaćaodžlan²⁸³ izražava alevitsko-islamsko vjerovanje da će čovjek iskupiti svoje zločine i grijehe (svoje nepravde) u zagrobnom životu u pjesmi na sljedeći način:

Kamo god da odem četiri knjige su istinite.
Ovaj varljivi svijet pun je teškoća
U Džehenemu nema vatre
Svako nosi svoju vatru odavde sa sobom.

²⁸¹ Sura el-Bekare, ajet 286 (2:286)

²⁸² Sura el-Bekare, ajet 185 (2:185)

²⁸³ Karadžaoglan je bio jedan od najpoznatijih alevitskih poeta 17. stoljeća. Iako se u mnogim pjesmama obrađuje (površna) ovozemna ljubav, u njegovim se djelima također mogu prepoznati mistična značenja. Neke od njegovih dragocjenih pjesama prevela je na njemački jezik, u formi rime, Annemarie Schimmel.

4.3 Vjerovjesništvo (nubuvva)

Vjerovanje u poslanstvo treći je alevitski vjerski postulat. Značenje vjerovanja u poslanstvo i objavu (arap. wahj) proizlazi iz principa univerzalne upute ljudima u cijelom postojanju. Ovaj postulat pretpostavka je za islamski način razmišljanja o jedinstvu. Budući da čovječanstvo može postići savršenstvo samo slijedeći vodstvo, poslanstvo predstavlja značajnu i neophodnu vezu između Stvoritelja (Boga) i stvorenja (čovjeka). Po islamskom shvatanju, tokom ukupne historije čovječanstva poslano je 124.000 poslanika, koji su univerzalnu božansku poruku objavljivali u skladu sa nivoom razvoja naroda toga vremena. Poslanici koji su kao idealni ljudi poruku i uputu prenijeli i po najboljem uzoru praktično pokazali u životu vidljiv su dokaz za primjer kako se treba živjeti objava. Zbog toga poslanstvo pretpostavlja bezgrešnost u postupcima u svim životnim situacijama. Konačno, zadaća poslanika ne može se reducirati samo na prenošenje božanske poruke ljudima. Istovremeno, zaduženi su i za odgoj ljudi kako bi ih doveli do najvećeg stupnja ljudskog savršenstva (arap. kemalat). Drugim riječima, oni pored prenošenja religioznih osnova prate i cilj društvenog odgoja. Zato su poslanici, vezano za ljudsko biće i karakter, na najvećem stupnju potpunosti. Konačno, očito je da osoba kojoj nedostaje ljudsko savršenstvo ne može biti uzor onima koji teže rangu savršenog ljudskog bića (arap. insan-i kamil). U ovom kontekstu nije dovoljno da poslanici raspolažu božanskim znanjem; ovo znanje mora se odražavati u njihovim postupcima. Iako su riječi i učenja poslanika od najvećeg značaja, ponašanje i moral, kao plemenite karakterne osobine, od najveće su važnosti u nadahnjivanju ljudskih srca da slijede božanski put. U sljedećem kur'anskom ajetu poslaniku Muhamedu je objavljeno: „Vi u Allahovom Poslaniku imate divan uzor za onoga koji se nada Allahovoj milosti i nagradi na onome svijetu, i koji često Allaha spominje.“²⁸⁴

Drugim riječima, vjerovjesnici prvenstveno pozivaju ljude na božanske zapovijedi i zabrane kroz svoja uzorna djela i djelovanje unutar društva. U konačnici, osoba ne može služiti kao društveni uzor ako joj nedostaje odgovarajuće ponašanje, moral i karakter. Zato, da bi ispunili svoju misiju božanskih glasnika i vodiča na najsavršeniji način, vjerovjesnici ne smiju pokazivati moralne mane ili nedostatke. Savršenstva božanskih učenja stoga se moraju u potpunosti očitovati u djelima, ponašanjima i kvalitetama poslanika.

Počevši od poslanika Adema, pa preko poslanika Ibrahima, poslanstvo pronalazi svoj vrhunac i zaključak s poslanikom Muhamedom. Kaba, koju je izgradio prvi čovjek i poslanik Adem, od tada simbolizuje liniju veze između poslanika. Stoga su vjerovjesnici ljudi koje je Bog odabrao i koji, kroz božansku objavu, na idealan način objavljuju uzorne poruke porodici, plemenu ili cijelom narodu, koje su oni svojim primjerom živjeli. Vjerovjesnici su živuće objave, koji se, između ostalog, odlikuju time što su Božijom milošću i samoprosvjetljenjem bezgrešni, iako su, kao i svi ostali ljudi, stvoreni sa mogućnošću da pogriješe. Iznimna predanost i odanost Bogu uzrokuju da ne čine prestupe božanskih

²⁸⁴ Sira Al-Azhab, Ajet 21 (33:21)

zakona. Neki vjerovjesnici (arap. nebi) su također i Božiji poslanici (arap. resul), pošto su zaduženi za objavu Božije knjige. Nekolicina vjerovjesnika je pri tome, milošću Božijom, ostvarila i stupanj Imamata, kao što su, naprimjer, poslanik Ibrahim i Poslanik Muhamed. Vjerovjesnik Ibrahim je tokom svoga života prošao razna iskušenja i zato redom postigao titule Allahovog roba (arap. Abdullah), vjerovjesnika (arap. nebi), poslanika (arap. resul) i konačno, na najvećoj razini, Imama. Nadalje, Poslanik Muhamed je također Imam svih poslanika i Imama. Časni Kur'an spominje 27 vjerovjesnika po imenu. Osamnaest ovih vjerovjesnika spomenuto je u ajetima 83-86 sure El-En'am (6):

- | | |
|--------------|--------------|
| 1. Adem | 15. Iljas |
| 2. Idris | 16. Al-Jasa |
| 3. Nuh | 17. Junus |
| 4. Ibrahim | 18. Ejub |
| 5. Ismail | 19. Imran |
| 6. Isak | 20. Zekerija |
| 7. Lut | 21. Jahja |
| 8. Jakub | 22. Isa |
| 9. Jusuf | 23. Hud |
| 10. Musa | 24. Zul-Kifl |
| 11. Harun | 25. Šuajb |
| 12. Talut | 26. Salih |
| 13. Davud | 27. Muhamed |
| 14. Sulejman | |

U ovom kontekstu, Imran²⁸⁵ se u nekim islamskim popisima ne spominje kao vjerovjesnik, a Benjamin²⁸⁶ se smatra vjerovjesnikom. Kao što je prethodno već spomenuto, Bog je tokom ljudske historije slao vjerovjesnike sa različitim zadacima i sposobnostima, pošto su se različiti narodi i zajednice nalazili u različitim razvojnim stadijima. Zbog toga su neki vjerovjesnici (nebi) poslani kao poslanici (resul), pošto su imali izvršiti obuhvatnije zadatke. Iz toga proizlazi da je svaki poslanik (resul) vjerovjesnik, ali svaki vjerovjesnik nije istovremeno poslanik (resul). U Kur'anu se Božiji poslanici opisuju na sljedeći način: „I pošto napusti njih i one kojima su se, mimo Allaha, klanjali, Mi mu Ishaka i Jakuba darovasmo, i obojicu vjerovjesnicima učinismo (...) I spomeni u Knjizi Musaa! On je bio iskren i bio je poslanik, vjerovjesnik. (...) I spomeni u Knjizi Ismaila! On je ispunjavao dato obećanje i bio je poslanik, vjerovjesnik. (...) I spomeni u Knjizi Idrisa! On je bio istinoljubiv i vjerovjesnik.“²⁸⁷

²⁸⁵ Imran je otac Merjemin, majke Isaove.

²⁸⁶ Benjamin je bio brat vjerovjesnika Jusufa, i time sina vjerovjesnika Jakuba.

²⁸⁷ Sura Merjem, ajet 49; 51; 54; 56 (19:49; 51; 54; 56).

Svaki narod je imao poslanika. I kada poslanik njihov dođe među njih, njima će biti pravedno presuđeno, nasilje im neće biti učinjeno.²⁸⁸

Kad im brat njihov Salih reče: "Kako to da se Allaha ne bojite?" (...) I kad im njihov brat Lut reče: "Kako to da se Allaha ne bojite?" (...) Kad im Šuajb reče: "Kako to da se ne bojite?"²⁸⁹

Pri tome su poslanici Nuh, Ibrahim, Musa, Isa i Muhamed nazvani velikim poslanicima ili ljudima odluke (arap. ulu-l-azm), pošto su oni svoje božanske poruke objavljivali i pokazivali čuda. S tim u vezi se po islamskom vjerovanju prenosi da se Poslanik Muhamed tokom nebeskog uzašašća (arap. mi'radž) sreo sa svim vjerovjesnicima i obavio s njima zajedničku molitvu. Još ponad toga, u predajama se prenosi iz alevitskog izvornog djela „Buyruk Imama Džafer es-Sadika“, kao i nekih alevitskih pjesama, da je Poslanik Muhamed na povratku sa Noćnog putovanja (povratak sa nebeskog uzašašća) održao okupljanje 40 svetaca (tur. kirkklar).²⁹⁰ Šah Ismail Hatayi je opisao poslanika Muhameda na sljedeći način:

Šah Hatayi sam ja, o braćo moja u vjeri
Sve stvari su se okrenule na dobro.
Drveće se poklonilo u noći kada se Muhamed rodio.

Isto tako je alevitski pjesnik Teslim Abdal²⁹¹ značaj poslanstva poslanika Muhameda opisao na sljedeći način:

Ti si poslanik, bez ikakve sumnje
Ko ne vjeruje u tebe, nevjernik je, bez vjere je
Šta ima Teslim Abdal od svijeta bez tebe
Ime mu je lijepo, biće mu je lijepo, Muhamed.

Derviš Mehemed²⁹² je obradio u jednoj pjesmi temu vjerovjesništva na sljedeći način:

²⁸⁸ Sura Junus, ajet 14 (10:47).

²⁸⁹ Sura aš-Šuara, ajet 142; 161; 177 (26:142; 161; 177)

²⁹⁰ Kirkklar (Četrdeseterica) su skriveni sveti ljudi u alevizmu. Po alevitskom vjerovanju, nakon povratka s miradža (nebeskog uzašašća), Poslanik Muhamed se zadržao na mjestu Kirklera (turski: *Kirkklar meydanı*), s kojima je, prema alevitskoj tradiciji, svjedočio zajedničkom ritualu.

²⁹¹ Teslim Abdal je bio alevitski mistik 17. stoljeća. Iz njegovih brojnih pjesama proizlazi da ga aleviti slave kao velikog pira. Pri tome se on, zajedno sa Aliodžluom, Dedemodžluom i Kul Nesimom, politički zauzimao za Safavide.

Stotinu dvadeset četiri hiljade vjerovjesnika su istiniti
Njihove duše neokaljane od davnina
Pa ipak, niko kao Muhamed
Objavljene Evanđelje, Psalme i Toru učvrstio je Kur'an.

4.4 Predvodništvo – mandat za vođenje (Imamat)

Vjerovanje u mandat vodstva (Imamat) četvrto je od alevitskih vjerskih načela i smatra se nastavkom vjerovjesništva. U konačnici, božanske objave islama, dovršene kroz poruku poslanika Muhameda, u svom najčišćem i najautentičnijem obliku mogu sačuvati samo oni pojedinci (imami) koji su sami nepogrešivi i čisti. Prema predajama Poslanika Muhameda, te su bezgrešne i nepogrešive osobe Dvanaest Imama. Kako je također zabilježeno u poznatim sunitskim hadiskim djelima, Poslanik Muhamed upućuje da predvodništvo pripada dvanaest osoba, koje su sve do jedne pripadnici plemena Kurejš. Zato su sljedbenici Ehli Bejta (aleviti i šiiti) prihvatili i internalizirali stvarno vodstvo nakon poslanika Muhameda. Suniti, s druge strane, predajama o Dvanaest Imama nisu dali značaja, iako su iste prisutne u njihovim glavnim djelima.

U jednom hadisu koji je priznat od svih muslimana prenosi se da oni ljudi koji nemaju znanje o Imam az-Zamanu (Imamu vremena) umiru smrću džahilijeta (umiru smrću neznalice). Dok se pri tome suniti pozivaju na umrle učenjake koji su, između ostalog, dali imena svojim pravnim školama, sljedbenici Ehli Bejta Dvanaest Imama smatraju prije svega legitimnim, a aktuelnog Dvanaestog Imama, Muhameda Mehdiya, smatraju Imamom vremena. Zato je Imamat neizostavan princip alevitskog vjerovanja. Stvarni bezgrešni Imam ima nalog da vodi ljude, koji prihvataju njegovo predvodništvo, u svim potrebama u životu. Međutim, Imami nisu zaduženi za proglašavanje novih islamskih propisa niti za obnavljanje starih propisa. Umjesto toga, njihov je zadatak objasniti i tumačiti Kur'an i praksu poslanika Muhameda (sunnat). Stoga su Imami, baš kao i Poslanik Muhamed, oslobođeni svih vrsta pogrešaka. Vodeća uloga Imama obuhvata i ovaj i zagrobni život, gdje oni postaju zagovornici (arap. šefa'a) sljedbenika Ehli Bejta. Prema alevitskom učenju, Dvanaest Imama su stoga legitimni nasljednici poslanika Muhameda i čisti nasljednici božanske poruke sve do Sudnjeg dana. S izuzetkom Imama Mehdiya, sve Imame su ubili despotski vladari Emevija i Abasida, te su tako postali mučenici.

Slijede datumi rođenja i smrti Dvanaest Imama:

²⁹² Derviš Mehmed je rođen 1755. godine u selu Isa u blizini grada Arguvana u provinciji Malatija. Njegov otac bio je turkmenski hodočasnik po imenu Sejid Husejn iz Kirkuka, a njegova majka poticala je iz sela Isa i zvala se Fatima. Prenosi se da je nakon svog hodočašća u Kerbelu i Meku bio gost u dergahu Hadži Bektaš Velija u Nevşehiru, gdje je doprinio podučavanju alevitskoj umjetnosti pisanja poezije, uvevši u nju pjesnike Malatjali Ašikija i Šah Sultana. Po historijskim zapisima, umro je 1828. godine.

- | | | |
|-----------|----------------------------|------------|
| 1. Imam | Ali ibn Ebu Talib | |
| Nadimak: | Murteza | Godina 62. |
| Rođen: | 23 pr.H. (599.)-Meka | |
| Preselio: | 40 n.H. (661.)-Nedžef | |
| Otac: | Abu Talib ibn Abdulmutalib | |
| Majka: | Fatima bint Asad | |
| | | |
| 2. Imam | Hasan ibn Ali | |
| Nadimak: | Mudžteba | Godina 46. |
| Rođen: | 3 n.H. (624.)-Medina | |
| Preselio: | 50 n.H. (679.)-Medina | |
| Otac: | Ali ibn Ebu Talib | |
| Majka: | Fatima bint Muhamed | |
| | | |
| 3. Imam | Husejn ibn Ali | |
| Nadimak: | Šehid | Godina 54. |
| Rođen: | 4. n.H. (626.), Medina | |
| Preselio: | 61 n.H. (680.), Medina | |
| Otac: | Ali ibn Ebu Talib | |
| Majka: | Fatima bint Muhamed | |
| | | |
| 4. Imam | Ali ibn Husejn | |
| Nadimak: | Zejn al-Abidin, Sedžad | Godina 55. |
| Rođen: | 38 n.H (658.), Medina | |
| Preselio: | 95 n.H (713.), Medina | |
| Otac: | Husejn ibn Ali | |
| Majka: | Šahrubanu | |
| | | |
| 5. Imam | Muhamed ibn Ali | |
| Nadimak: | Bakir | Godina 56. |
| Rođen: | 57 n.H. (676.), Medina | |
| Preselio: | 114 n.H. (732.), Medina | |
| Otac: | Ali ibn Husejn | |
| Majka: | Fatima bin Hasan | |
| | | |
| 6. Imam | Džafer ibn Muhamed | |
| Nadimak: | Sadik | Godina 63. |
| Rođen: | 83 n.H. (702.), Medina | |
| Preselio: | 148 n.H. (765.), Medina | |
| Otac: | Muhamed ibn Ali | |

Majka:	Fatima bint Kasim	
7. Imam	Musa ibn Džafer	
Nadimak:	Kazim	Godina 45.
Rođen:	128 n.H. (754.), Medina	
Preselio:	183 n.H. (799.), Bagdad	
Otac:	Džafer ibn Muhamed	
Majka:	Hamida Andalusijka	
8. Imam	Ali ibn Musa	
Nadimak:	Riza	Godina 53.
Rođen:	148 n.H. (766.) – Medina	
Preselio:	203 n.H. (819.) – Mešhed	
Otac:	Musa ibn Džafer	
Majka:	Nedžma Hatun	
9. Imam	Muhamed ibn Ali	
Nadimak:	Taki Dževad	Godina 24.
Rođen:	195 n.H. (811.) – Medina	
Preselio:	220 n.H. (835.) – Bagdad	
Otac:	Ali ibn Musa	
Majka:	Sabika	
10. Imam	Ali ibn Muhamed	
Nadimak:	Naki Hadi	Godina 39.
Rođen:	214 n.H. (829.) – Medina	
Preselio:	254 n.H. (868.) – Samara	
Otac:	Muhamed ibn Ali	
Majka:	Samana Magribljanka	
11. Imam	Hasan ibn Ali	
Nadimak:	Askeri Zaki	Godina 27.
Rođen:	232 n.H. (846.) – Medina	
Preselio:	260 n.H. (873.) – Samara	
Otac:	Ali ibn Muhamed	
Majka:	Susan	
12. Imam	Muhamed ibn Hasan	
Nadimak:	Mehdi	
Rođen:	255 n.H. (869.) – Samara	
U skrivenosti od	260 n.H. (874.) – Samara	

Otac: Hasan ibn Ali
Majka: Nardžis

Nakon što smo naveli biografije Dvanaest Imama, na ovom mjestu želimo dopuniti i biografije ostalih dvoje od 14 bezgriješnih (masum), naime poslanika Muhameda i njegove kćerke Fatime Zehre:

13. Muhamed ibn Abdullah

Nadimak: Mustafa Godina 62.
Rođen: 52 p.H. (570), Meka
Preselio: 11 n.H. (632), Medina
Otac: Abdullah ibn Abdumutalib
Majka: Amina bint Wahb

14. Fatima bint Muhamed

Nadimak: Batul, Zehra Godina 18.
Rođena: 8 p.H. (614), Meka
Preselila: 11 n.H. (632), Medina
Otac: Muhamed ibn Abdullah
Majka: Hatidža bint Huwajlid

Unutar alevitske zajednice pojam „14 Masum-u Pak“ upotrebljava za potomke Imama koje su emevijske i abasidske vlasti ubile u djetinjstvu, prije dostizanja puberteta:

1. Mohsen – umro u majčinoj utrobi

Otac: Ali ibn Ebu Talib
Majka: Fatima bint Muhamed

2. Abdullah – 7 godina

Otac: Hasan ibn Ali

3. Kasim – 3 godine

Otac: Hasan ibn Ali

4. Abdullah – 2 godine

Otac: Husejn ibn Ali

5. Ali Asgar – 6mjeseci

Otac: Husejn ibn Ali

6. Kasim – 3 godine
Otac: Ali ibn Husejn
7. Ali – 6 godina
Otac: Muhamed ibn Ali
8. Abdullah – 3 godine
Otac: Džafer ibn Muhamed
9. Jahja – 3 godine
Otac: Džafer ibn Muhamed
10. Salih – 4 godine
Otac: Musa ibn Džafer
11. Tajib – 7 godina
Otac: Musa ibn Džafer
11. Džafer Tahir - 4 godine
Otac: Muhamed ibn Ali
12. Džafer – 1 godina
Otac: Ali ibn Muhamed
13. Kasim - 1 godina
Otac: Hasan ibn Ali

Iako Dvanaest Imama, zbog represalija Emevija i Abasida, za života nisu bili dovoljno priznati i cijenjeni od muslimana, sve do danas ih i suniti cijene kao iskrene, pravedne i uzorne muslimane – od imama Alija do imama Hasana al-Askerija. Sunitska škola mišljenja, ipak, ne smatra Dvanaest Imama legitimnim, od Boga postavljenim bezgrešnim Imamima, suprotno od onoga kako to vide sljedbenici Ehli Bejta.

Kod Imama Mehdija mišljenja se dalje razilaze. Iako svi muslimani prihvataju postojanje jednog Mehdijskog koji će zemlju spasiti od svake nepravde, suniti su mišljenja da se Imam Mehdi tek treba roditi. Međutim, aleviti su čvrstog uvjerenja da je Imam Mehdi sin Imama Hasana ibn Alija al-Askerija, da živi među muslimanima sve do današnjih dana i da on svoje sljedbenike iz skrivenosti upućuje na pravi put Hakk-Muhamed-Ali. Još jedno mjesto sporenja sunita je visoka starost Imama Mehdijskog (1156)²⁹³, pošto ne mogu zamisliti da

²⁹³ Budući da je Imam Mehdi rođen 869. godine, danas, 2025. godine, on je u 1156. godini.

čovjek tako dugo živi. Međutim, sljedbenici Ehli Bejta (aleviti i šiiti) objašnjavaju visoku starost Imama Mehdijsa, između ostalog, sljedećim kur'anskim ajetom:

„Mi smo Nuha narodu njegovu poslali i on je među njima ostao hiljadu, manje pedeset godina, pa ih je potom zadesio potop, zato što su Allahu druge ravnim smatrali.“²⁹⁴

Slično tome, dug život Hidra (tur. Hızır), koji se spominje u različitim vremenskim epohama, sastavni je dio islamskog vjerovanja. Dok se vjeruje da je tokom života Zulkarnejna pio iz Izvora života (arap. 'Ayn al-Hayāt) i da od tada pomaže ljudima u nevolji, njegov susret s Musaom tematiziran je u suri El-Kehf, ajeti 60-82.

Nadalje, dužina života poslanika Isaa sastavni je dio Kur'ana, a potvrđuju ga i muslimani i kršćani. Kur'an o tome navodi sljedeće:

„I kada Allah reče: 'O Isa, dušu ću ti uzeti i k Sebi te uzdignuti i spasiti ću te od nevjernika i učiniti ću da tvoji sljedbenici budu iznad nevjernika sve do Smaka svijeta. Meni ćete se, poslije, svi povratiti i Ja ću vam o onome u čemu se niste slagali presuditi: one koji ne budu vjerovali na strašne muke ću staviti i na ovome i na onome svijetu i niko im neće moći pomoći.' ... A onima koji budu vjerovali i dobra djela činili, On će njima punu nagradu dati. – Allah ne voli nasilnike.“²⁹⁵

Osim njegove odmakle starosne dobi, također i njegovo rođenje, kao i činjenica da je u starosti od pet godina preuzeo Imamatu, teme su o kojima se žestoko raspravlja među muslimanima. Suniti sumnjaju u rođenje imama Mehdijsa budući da je kuća imama Hasana al-Askerijsa u to vrijeme bila pod strogim nadzorom Abasida, a Nardžis, majka imama Mehdijsa, nije pokazivala znake trudnoće. U tom kontekstu, aleviti ukazuju na svete žene Merjem²⁹⁶ i Johebed²⁹⁷, koje prilikom svojih trudnoća nisu pokazivale nikakve znakove trudnoće. Osim toga, treba uzeti u obzir da je kod nekih žena također i u sadašnjosti trudnoća jedva vidljiva skoro pred porod.

Iz predočenih predaja može se zaključiti da je rođenje dvanaestog Imama, Muhameda Mehdijsa, sve do smrti njegovog oca, Imama Hasana al-Askerijsa, 874. godine (i time početak njegovog Imamata) držano u tajnosti. Osim malom broju odanih sljedbenika Ehli Bejta, rođenje Imama je islamskoj zajednici bilo skriveno kako bi se njegov život sačuvao. Dok su suniti muslimani odbijali vodstvo petogodišnjeg dječaka, sljedbenici Ehli Bejta i ovdje upućuju na Kur'an i donose dokaze da su mnogi vjerovjesnici u dječijoj dobi djelovali kao

²⁹⁴ Sura al-Ankabut, ajet 14 (29:14).

²⁹⁵ Sura Al-Imran, ajet 55-57 (3:55-57).

²⁹⁶ Majka Isaova

²⁹⁷ Majka Musaova

poslanici Božiji. Sljedeći primjeri o Isau, koji je kao poslanik govorio Izraelćanima (arap. Bani Isra'il), u ovom kontekstu trebali bi biti dovoljni:

„I dođe ona s njim porodici svojoj, noseći ga. 'O Merjemo' – rekoše oni – 'učinila si nešto nečuveno! Ej ti, koja u čednosti ličiš Harunu, otac ti nije bio nevaljao, a ni mati tvoja nije bila nevaljalica.' A ona im na njega pokaza. 'Kako da govorimo djetetu u bešici?' – rekoše. 'Ja sam Allahov rob' – ono reče – 'meni će On Knjigu dati i vjerovjesnikom me učiniti!'“²⁹⁸

„Kad Allah rekne: 'O Isa, sine Merjemin, sjeti se blagodati Moje prema tebi i majci tvojoj: kada sam te Džibrilom pomogao pa si s ljudima, u bešici i kao zreo muž, razgovarao; i kada sam te pismenosti i mudrosti, i Tevratu i Indžilu naučio.'“²⁹⁹

Isto tako, sljedbenici Ehli Bejta (aleviti i šiiti) navode vjerovjesnike Jahjaa (Ivana Krstitelja) i Jusufa kao primjere onih kojima je Bog u djetinjstvu darovao mudrost i pružio uvid. U tom smislu, sljedeći kur'anski ajet od najveće je važnosti:

„O Jahja, prihvati Knjigu odlučno!“ – a dadosmo mu mudrost još dok je dječak bio.“³⁰⁰

Kada Jusuf reče ocu svome: “O oče moj, sanjao sam jedanaest zvijezda, i Sunce i Mjesec, i u snu sam ih vidio kako mi se pokloniše.“³⁰¹

Kao što je već spomenuto, skrivenost (arap. ghaybah) Imama Muhameda Mehdiya je činjenica koju suniti ne prihvataju. Pri dubljem istraživanju Kur'ana, međutim, vidljivo je da vjerovanje u skrivenost predstavlja osnovni temelj islamskog vjerovanja, koji kod svih muslimana mora biti internaliziran. Pošto broj kur'anskih ajeta koji govore o skrivenosti nadilazi okvir ove knjige, navest ćemo samo nekoliko primjera:

„Allah neće vjernike s licemjerima ostaviti, već će loše od dobrih odvojiti. Allah vama neće ono što je skriveno otkriti, već On za to odabere onoga koga hoće od poslanika Svojih; zato vjerujte u Allaha i poslanike Njegove; i ako budete vjerovali i Allaha se bojali, čeka vas nagrada velika.“³⁰²

„Eto to su neke nepoznate vijesti koje Mi tebi objavljujemo, a ti nisi bio s njima kada su se oni odlučili, i kada su onako lukavi bili.“³⁰³

²⁹⁸ Sura Merjem, ajet 27-30 (19:27-30)

²⁹⁹ Sura al-Ma'ide, ajet 110 (5:110)

³⁰⁰ Sura Merjem, ajet 12 (19:12)

³⁰¹ Sura Jusuf, ajet 4 (12:4)

³⁰² Sura Al-i Imran, 179 (3:179)

³⁰³ Sura Jusuf, ajet 102 (12:102)

„Onima koji se Gospodara svoga boje i kad ih niko ne vidi – oprost i nagrada velika!“³⁰⁴

Pored vjere u skrivenost Imama Mehdiya, također je i vjerovanje u povratak, važan sastavni dio alevitskog vjerovanja, koje se u brojnim pjesmama pojašnjava:

Guzide³⁰⁵ (kaže), poraziti svoj ego izuzetno je teško,
Gdje leži hrabrost u tome, ukloniti ono što nisi postavio?
Današnjem narodu, objaviti istinu,
Dužnost je samo Mehdiyu, Gospodaru Vremena.

Dalje, u još jednoj pjesmi alevitski pjesnik Koksani Baba izražava čežnju za dolaskom Imama Mehdiya na slijedeći način:

Taki i Naki su Imami koji pozivaju ka istini
Hasan ul-Askeri je sultan pojavnih svjetova
Gospodaru Vremena, sa Zulfikarom u ruci
Vrijeme je došlo, pošalji ga oh Allahu!

Noksani sam ja, sjećanje na moga učitelja
Zulfikar u njegovoj ruci, njegov narod leži u krvi,
Ali el-Murteza pojavljuje se u hiljadu i jednom obliku,
Naš učitelj je naš slavuj, Eyvallah.

Pir Sultan Abdal, koji je svojim životom i u svojim pjesmama sadržanim učenjima bio veliki uputitelj anadolskih alevita i sve do danas, izražava svoju ljubav prema Imamatu:

Svjetlost Dvanaest Imama je u nama,
Tajna Šah-i Velayeta³⁰⁶ je u nama
Naše ogledalo je otvoreno, naše srce čisto,
Naša srca su od bisera i korala.

Pored toga, značaj Dvanaest Imama spominje se i u mnogim sunitskim izvorima. Naprimjer, mogu se navesti sljedeći:

³⁰⁴ Sura al-Mulk, ajet 12 (67:12)

³⁰⁵ Guzide Ana je slabo poznata alevitska mistikinja koja je živjela u 18. stoljeću. Poznato je da je bila kćerka tadašnjeg poglavara bektašijskog reda, Fejzullaha Čelebija. Iako njene pjesme sve do danas uživaju veliku popularnost, o njenom životu je preneseno veoma malo podataka.

³⁰⁶ Vodstvo ili predvodništvo, čime se misli na Imama Alija, ali također, ovisno o kontekstu, može se misliti i na Imama Mehdiya.

Poslanik kaže: „Bit će dvanaest predvodnika. Svi će poticati od Kurejšija.“

Preneseno je od Džabira ibn Samure: „Ušao sam sa svojim ocem kod Poslanika, kada sam čuo da je rekao sljedeće: 'Ova stvar (halifat) neće se nikada okončati sve dok ih među halifama ne bude dvanaest.' Poslanik je govorio dalje, ali ga ja nisam mogao čuti. Pitao sam svoga oca šta je Poslanik rekao. On mi tada reče: 'Svi oni će biti od Kurejšija.'“³⁰⁷

4.5 Zagrobni život (mead)

Vjerovanje u proživljenje (arap. mead) je peto načelo alevitske vjere. Koncept proživljenja u islamu obuhvaća vjerovanje da će svaka osoba biti proživljena nakon smrti i stoga se naziva i Dan proživljenja (arap. Yavm ul-Kijame). Ovo temeljno načelo usko je povezano s Božijom pravdom (arapski: adala). Svi ljudi koji su doživjeli nepravdu u zemaljskom životu primit će nagradu za svoja djela u zagrobnom životu kroz božansku pravdu. Koncept zagrobnog života ili proživljenja također je i centralno načelo Kur'ana. Zagrobni život opisan je kao sveobuhvatan prikaz svih faza vječnog života koje slijede nakon smrti. Prvo, umrlog na grobu dočekuju dva meleka Nekir i Munkir i ispituju ga o temeljnim (alevitskim) islamskim načelima tevhida, nubuvveta i imamata. Zatim se umrli uvodi u vremenski ograničenu međufazu (arap. berzah).

Sljedeći kur'anski ajet se odnosi na berzah:

Onoga dana kada svaki čovjek pred sobom nađe dobro djelo koje je uradio i hrđavo djelo koje je učinio – poželjet će da se između njih i njega nalazi udaljenost velika. A Allah vas na Sebe podsjeća i Allah je milostiv prema robovima svojim.³⁰⁸

U ovom ajetu sure Al-i Imran opisuje se nova faza u kojoj se ljudi nakon smrti kaju za svoje grijeha i zato mole još jednom da se vrate u ovozemaljski život, što će im biti onemogućeno. U međufazi će umrli (u ograničenoj mjeri) biti konfrontiran s posljedicama svojih djela, tako da će na osnovu svojih djela patiti ili će biti obradovan. U sljedećoj pjesmi od Pir Sultan Abdala jasno je prepoznatljiva islamska predodžba zagrobnog svijeta:

Pir Sultan sam ja, prolazan je ovaj kratki svijet
Ljudima se život povjerava
Put iz ovog života na sljedeći je uzvišen
Nema drugog puta osim ovog, kojim bi se mogao vratiti.

Najveći stupanj Dženeta, u kojem se nalaze vjerovjesnici, Ehli Bejt i šehidi, naziva se Firdevs³⁰⁹. Pir Sultan Abdal je pojam Firdavs obradio na sljedeći način:

³⁰⁷ Muslim: engleski prevod od Sahih Muslim, Tom. 5, str. 145 (Imara/Hadis 4705/5).

³⁰⁸ Sura Ali-i Imran, ajet 30 (3:30).

³⁰⁹ Onima koji budu vjerovali i dobra djela činili – dženetske bašče će prebivalište biti. (Sura al-Kahf, ajet 107/18:107)

Pir Sultan sam ja, svijet je prolazan
Kod nas je znak istine
Moj život je predan Božijoj istini
Firdevsu, najuzvišenijem Dženetu.

U skladu sa brojnim predajama, Imam Hasan i Imam Husejn su predvodnici mladića u Dženetu, a Fatima Zehra je prvakinja svih žena. U svojoj jednoj pjesmi Junus Emre govori o Fatiminoj ulozi na Sudnjem danu:

Derviš Junus kaže, Sudnji dan primiće
Čovjek će tamo naći svoja djela
Ona posreduje za siromašnu zajednicu
Sa jednim zelenim barjakom dolazi Fatima.

5 Četvero vrata i 40 stupnjeva (Dort Kapi Kirk Makam)

Nakon što vjernik prihvati pet vjerskih načela alevizma i internalizira ih, po alevitskoj tradiciji on se upućuje na put Četiri vrata i 40 stupnjeva. U četiri glavne faze, od kojih svaka sadrži deset daljnjih odjeljaka, vjernik nastoji produbiti svoje razumijevanje univerzalnih i moralnih učenja iz Plemenitog Kur'ana i propisa Ehli Bejta kako bi podigao svoju svijest na veću razinu. Glavni cilj vjernika ovdje je tražiti bliskost sa svojim Stvoriteljem, i kako bi u susretu sa Bogom (arap. liqaullah³¹⁰) postigao rang savršenog ljudskog bića (Insan-i Kamil). U tom kontekstu, u najvećem i najsveobuhvatnijem djelu hadiskih znanosti Ehli Bejta po imenu al-Kafi, pored obrednih obaveza obrađuju se teme po pitanju morala.

Ovo s druge strane objašnjava visok stupanj ljudskog morala u alevitskom učenju. U skladu sa islamskim uvjerenjem, čovjek može postići status savršenog ljudskog bića samo kroz internaliziranje etičkih, moralnih i ispravnih načina djelovanja. Time vjernik kreće na put odvajanja od svojih negativnih karakternih osobina i životinjskih impulsa te postizanja vrline. Prema filozofiji četiri vrata i 40 stupnjeva, vjernik koji započne put postaja pod vodstvom muršida³¹¹ (voditelja), naziva se talip (učenik, početnik).

U ovom kontekstu važno je skrenuti pažnju na zablude današnjeg vremena. Pošto su aleviti stotinama godina pod osmanskom vladavinom proganjani i ograničavani, došlo je neizbježno

³¹⁰ *Liqaullah* znači susret s Bogom i opisuje stanje vjernika koji u svim svojim postupcima prepoznaje Božiju esenciju i time svoje djelovanje uređuje u skladu s Božijim zadovoljstvom (*rizalullah*).

³¹¹ Muršid znači „onaj koji ispravno vodi“; to je titula visoko rangiranog učitelja-majstora (tur. *Pir*). U alevizmu se muršidom smatraju one osobe koje raspolažu potpunim i dubokim znanjem o Kur'anu i učenju Ehli Bejta, i čije porijeklo seže nazad do Poslanika. Stoga im pripada obaveza predsjedavanja ili vođenja zajednice.

do slabljenja bliskosti i važnosti veze između uputitelja (muršida) i učenika (talipa). Iako je učitelj prethodno procjenjivao talipovu sposobnost razumijevanja i prema tim kriterijima ga vodio u dubine mističnog islama, s vremenom se pojavio trend samoprocjene – ili, bolje rečeno, samopogrešnog prosuđivanja – onih talipa koji ulaze ili vjeruju da ulaze na neka od četiri vrata (najčešće ona višeg ranga) i četrdeset stupnjeva. Često ovo stajalište dolazi do izražaja pošto mnogi neuki ljudi prva vrata (Šerijat) dovode u vezu sa fanatičnim selefističkim razumijevanjem šerijata nekih ekstremista i tako se kroz to smatraju superiornijim od šerijatskih vrata. Svaki vjerujući alevit je, međutim, obavezan da ispuni zahtjeve određenih vrata kako bi se mogao popeti na veća vrata ili stupanj. Konačno, čovjek se na prvim vratima treba distancirati od niskih strasti i obući ogrtač talipa. Nažalost, mnogi ljudi precjenjuju sopstveni ego i ovaj pristup smatraju besmislenom formalnošću. Ustvari, novajlija neće ispuniti uvjete za internaliziranje filozofije odgovarajućih vrata jer nije internalizirao zadatke s vrata ispod njih.

Hadži Bektaš Veli, koji je značajno oblikovao sistem četiri vrata i 40 stupnjeva kakav danas postoji, vjernika prvih vrata naziva štovateljem, pobožnjakom (abid), koji treba internalizirati zakone ili rituale (šerijat) alevizma kako bi ostvario mir i harmoniju u društvu. Na drugim vratima vjernika se naziva asketom (zahid), pošto se on okreće od svih svjetovnih požuda i okreće se samo kreposnom i moralnom ponašanju. U trećim vratima se talip naziva mudracem (arif), zato što je do određenog stupnja priskrbio spoznaju o kreaciji. U četvrtim vratima talip doseže stupanj voljenog (muhib) i svoje srce je potpuno preobrazio u boravište Božije, tako da se njega smatra potpunim čovjekom (Insan-i Kamil).

U nastavku je opisan sadržaj četiri vrata i 40 faza te je kao primjer za svaku fazu naveden jedan ili više kur'anskih ajeta.

Kako bi se ilustrirao značaj četvero vrata i 40 stupnjeva u alevitskom učenju, može se, naprimjer, ukazati na pjesmu Teslim Abdala:

Leti li Teslim Abdal uvijek tako visoko?

Bježi li onaj ko se preda evlijama?

Može li proći kroz četvero vrata i 40 stepenica?

Može li onaj ko postane jedno i postigne jedinstvo plakati?

5.1 Prva vrata – šerijat (zakon)

Deset stupnjeva vrata – šerijata (Tr. šerijat kapis) glase:

1. Posvjedočiti vjerovanje (očitovanje izgovorom).³¹²

³¹² Alevitsko svjedočenje vjere (šehadet) glasi: *La ilahe illallah, Muhamedun Resulullah, Aliyyun Velijjullah*. Ovo znači: „Nema boga osim Allaha, Muhamed je Božiji Poslanik, a Ali je Božiji prijatelj (štićenik).“ Dok šiiti, poput alevita, obznanjuju ovo vjerovanje, suniti ne izgovaraju dio *Aliyyun Velijjullah*.

„Gospodaru naš, mi u ono što ti objavljuješ vjerujemo i mi Poslanika slijedimo, zato nas upiši među vjernike!“³¹³

Prvi stupanj vrata šerijata i svjedočenje vjerovanja u Boga, Svemoćnog. Nadalje, ovaj korak zahtjeva prihvaćanje poslanstva svih Božijih poslanika i vodstvo Dvanaest Imama.

2. Stjecanje znanja

„I, eto tako, Mi na razne načine izlažemo dokaze da bi oni rekli: ‘Ti si učio!’ i da bismo to objasnili ljudima koji hoće da znaju.“³¹⁴

U skladu sa poznatom izrekom Hadži Bektaš Velija: „Put bez znanja završava u tami“, vjerujući alevit teži ka znanju kako bi znakove Božije u svom prirodnom okruženju bolje razumio i time stekao kako samospoznaju, tako i spoznaju Boga.

3. Obavljanje ibadeta

„Vjernike koji su dobra djela činili On će prema zasluži nagraditi i još će im, iz izobilja Svoga, više dati; a one koji su zazirali i oholili se – na nesnosne muke će staviti i oni neće naći sebi, mimo Allaha, ni zaštitnika ni pomagača.“³¹⁵

Iako se koncept ibadeta često promatra kao skup radnji koje treba izvršiti, ovdje će se istražiti mnogo dublje razumijevanje. Prvo, treba naglasiti da nije Bog, Svemogući, taj koji ovisi o ljudskom ibadetu, već da ibadet (obožavanje) u sebi sadrži korist za ljude. Zbog toga se, sa alevitskog stajališta, iskrenim pobožnim čovjekom smatra ona osoba koja se, kroz obavljanje svoga ibadeta, oslobađa od svih ovozemaljskih požuda i u susretu s Bogom (Liqaulah) postiže unutarnje zadovoljstvo.

4. Težiti ka onome što je dozvoljeno i kloniti se onoga što je zabranjeno

„I siročadi imetke njihove uručite, hrđavo za dobro ne podmećite i imetke njihove s imecima vašim ne trošite – to bi, zaista, bio veliki grijeh.“³¹⁶

³¹³ Sura Al-i Imran, ajet 53 (3:53)

³¹⁴ Sura a-An'nam, ajet 105 (6:105)

³¹⁵ Sura an-Nisa, ajet 173 (4:173)

³¹⁶ Sura an-Nisa, ajet 4 (2:4)

Ova faza obuhvaća mnoga značenja. Između ostalog, naglašava da vjernik treba, naprimjer, pošteno zarađivati svoj prihod i ne stjecat ništa nepravедно. Istovremeno, vjernik se potiče da se distancira od svih oblika iskorištavanja.

5. Sklapanje braka i brižnost prema svojoj porodici

„I Allahu se klanjajte i nikoga Njemu ravnim ne smatrajte! A roditeljima dobročinstvo činite, i rođacima, i siročadi, i siromasima, i komšijama bližnjim, i komšijama daljnjim, i drugovima, i putnicima, i onima koji su u vašem posjedu. Allah, zaista, ne voli one koji se ohole i hvališu.“³¹⁷

Budući da je ljudska sreća povezana s porodičnim mirom, u ovoj se fazi naglašava važnost porodice. Stoga se religiozna osoba potiče da osnuje porodicu i tako doprinese društvenom miru.

6. Ne nanositi štetu okolini

„I ne pravite nered na Zemlji, kad je na njoj red uspostavljen, a Njemu se molite sa strahom i nadom; milost Allahova je doista blizu onih koji dobra djela čine.“³¹⁸

U ovoj fazi talip treba naučiti živjeti sa svojom okolinom. Ne potiče se samo živjeti ekološki osviješteno, već i da poduzima mjere opreza protiv potencijalnih opasnosti i rizika za okoliš i bližnje ljude. Vjernik svijet smatra prolaznim i stoga nije vezan za ovaj svijet. Ipak, pridaje veliku važnost korištenju darova koje mu je Bog povjerio na način koji je Bogu ugodan.

7. Slijediti naredbe Božije, Poslanika i Imama

„O vjernici, pokoravajte se Allahu i pokoravajte se Poslaniku i predstavnicima vašim. A ako se u nečemu ne slažete, obratite se Allahu i Poslaniku, ako vjerujete u Allaha i u onaj svijet; to vam je bolje i za vas rješenje ljepše.“³¹⁹

Na sedmom stupnju se naglašava da slijeđenje uputa Poslanika i Imama treba smatrati božanskim naredbama i zabranama.

8. Biti brižan i milostiv

³¹⁷ Sura an-Nisa, ajet 36 (4:36)

³¹⁸ Sura al-Ar'raf, ajet 56 (7:56)

³¹⁹ Sura an-Nisa, ajet 59 (4:59)

„Došao vam je Poslanik, jedan od vas, teško mu je što ćete na muke udariti, jedva čeka da Pravim putem pođete, a prema vjernicima je blag i milostiv.“³²⁰

Na ovom stupnju se naglašava bratska ljubav između ljudi. Posljedično, odbacuje se diferencijacija ljudi na temelju religije, denominacije, jezika, boje kože ili spola.

9. Obratiti pažnju na unutarnju i vanjsku čistoću

„Allah zaista voli one koji se često kaju i voli one koji se mnogo čiste.“³²¹

Deveti stupanj naglašava važnost čistoće i urednosti za jednog vjernika. Pored vanjskog izgleda i osobne higijene, velika se važnost pridaje čistoći vjernikove okoline. Nadalje, vjernik se potiče da se odvoji od svih negativnih i nemoralnih misli te da svoj um održava čistim i neokaljanim. U poznatoj predaji, koja se prenosi od poslanika Muhameda, glasi: „Čistoća je dio vjere.“

10. Naređivanje dobra i odvrćanje od zla

„Jedni druge nisu odvrćali od grijешnih postupaka koje su radili. Ružno li je zaista to kako su postupali!“³²²

Završna faza šerijatskih pravila nalaže suzdržavanje od svih djela koja bi mogla imati negativne učinke na pojedinca ili društvo, kao i poduzimanje svih djela koja su korisna za pojedinca i društvo.

Ukratko sažeto, može se reći da Šerijatska vrata služe produbljivanju i prakticiranju islamskih propisa, pripremajući vjernika (talipa) za njihovo putovanje prosvjetljenja kroz sljedeća vrata. Čak i ako neće svi moći proći put Četiri vrata i 40 faza do toga da postanu potpuno ostvareno ljudsko biće (Insan-i Kamil), prva vrata služe za prenošenje temeljnih vrijednosti kako bi se osigurala harmonija unutar društva. Kao što se može vidjeti iz izjava Imama Alija: „Šerijat služi odgajanju samoga sebe“. Stoga na prvim vratima vjernik ima za cilj odgajanje nefsa (samoga sebe).

³²⁰ Sura at-Tevbe, ajet 128 (9:128)

³²¹ Sura al-Bekare, ajet 222 (2:222)

³²² Sura al-Ma'ide, ajet 79 (5:79)

5.2. Druga vrata – tarikat (mistični put)

Deset stupnjeva tarikata (tur. tarikat kapisi) glase:

1. Slijediti uputu učitelja (pir) i pokajanje za svoje grijehе.

„Ali onima koji se poslije toga pokaju i poprave, njima će Allah oprostiti i samilostan biti.“³²³

Nakon što je uspješno savladao deset stupnjeva, talip se suočava s još deset stupnjeva na sljedećim vratima. Došavši do ovih vrata, talip je već prošao kroz unutarnju transformaciju i približio se svom cilju. Stoga se na početku drugih vrata talip poziva na nepovratno pokajanje za sva nemoralna djela. To naglašava da za talipa nastupa nova faza života.

2. Biti vjerni učenik i sljedbenik

„O vjernici, pokoravajte se Allahu i pokoravajte se Poslaniku i predstavnicima vašim. A ako se u nečemu ne slažete, obratite se Allahu i Poslaniku, ako vjerujete u Allaha i u onaj svijet; to vam je bolje i za vas rješenje ljepše.“³²⁴

Kao što je već spomenuto, druga vrata predstavljaju put kojim se talip kreće. Zato druga vrata zahtijevaju određene principe kao i hijerarhijsku strukturu. Posljedično, talip je dužan pridržavati se vodstva svog učitelja (pira ili muršida) na svom putu samospoznaje.

3. Oblačiti se uredno i jednostavno

„O sinovi Ademovi, lijepo se obucite kad hoćete molitvu obaviti! I jedite i pijte, samo ne pretjerujte; On ne voli one koji pretjeruju.“³²⁵

U ovoj fazi biva naglašen značaj skromnosti. Talip treba, između ostalog, kroz jednostavno odijevanje voditi ponizan i bogobožan život. Međutim, treba napomenuti da talip i pored jednostavnosti svom izgledu treba dati značaj čistoći, kako bi služio kao uzor u društvu.

4. Borba protiv nagonске duše

„I borite se na Allahovom putu i znajte da Allah sve čuje i sve zna.“³²⁶

³²³ Sura Ali-i Imran, ajet 89 (3:89).

³²⁴ Sura an-Nisa, ajet 59 (4:59).

³²⁵ Sura al-Ar'raf, ajet 31 (7:31).

³²⁶ Sura l-Bekare, ajet 244 (2:244).

U četvrtoj fazi drugih vrata, talip se poziva na borbu protiv sopstvenih nagona kako bi nemoralno ponašanje, kao što su zavist, mržnja, zloba i škrtost, odstranio. Po alevitsko-islamskom učenju, ove negativne osobine su zapravo čovjekovi neprijatelji koji čovjeka udaljavaju od božanske blizine. Zbog toga talip mora voditi unutarnju borbu protiv svih pretjeranih, odnosno pogrešnih požuda i učiti da suzbije svoje težnje prema ovomsvjetskom.

5. Služiti i biti koristan društvu

„Za one koji, i kada su u obilju i kad su u oskudici, udjeljuju, koji srdžbu savladavaju i ljudima praštaju – a Allah voli one koji dobra djela čine.“³²⁷

Talip djeluje u skladu s vodiljom: služenje društvu je služenje Bogu (tur. Hizmet Hakk içindir) i pokušava svojim djelima biti koristan u društvu. Talip svoja djela posmatra kao jednu vrstu bogoslužja i pokušava povećati svoju nesebičnost za dobrobit društva.

6. Strah da postupa nepravedno i da ne griješi, kao i da ne zapadne u nemilost Božiju

„Ne jedite imovinu jedan drugoga na nepošten način i ne parničite se zbog nje pred sudijama da biste na griješan način i svjesno dio tuđe imovine pojeli!“³²⁸

Budući da slijeđenje puta četvera vrata i 40 stupnjeva ima za cilj pronalaženje istine, talip će se sustezati i od najmanjih grijeha. Na kraju, čak i najmanji grijesi mogu dovesti do toga da vjernik skrene s pravog puta i ode u zabludu. Slijedno tome, od talipa se zahtijeva da iz svog života izbaci činjenje grijeha.

7. Ne gubiti nadu u Boga i imati povjerenje u Boga

„Donosimo ti radosnu vijest koja će se doista obistiniti – rekoše oni – zato nadu ne gubi!“³²⁹

Nada i povjerenje u Boga trebali bi uvijek igrati najvažniju ulogu u životu jednog vjernika. Zato sedmi stupanj nalaže da se stalno čuva nada i da ni u jednoj životnoj fazi, ma koliko ona djelovala bezizlazno, ne zapadne u beznadežnost.

8. Iz uvida uzimati pouku za pravi put

³²⁷ Sura Al-i Imran, ajet 134 (3:134)

³²⁸ Sura al-Bekare, ajet 188 (2:188)

³²⁹ Sura al-Hidžr, ajet 55 (15:55)

Budući da cilj talipa leži u ličnom pročišćenju ili poboljšanju nabolje, on je pozvan prepoznati božansku bit u događajima u svojoj okolini i izvući pouku iz njih.

9. Božije darove pravedno i velikodušno dijeliti

„I koji milostinju udjeljuju.“³³⁰

Pošto je uspostava pravednog i harmoničnog društva jedan od ciljeva islama, na ovom stupnju se naglašava značaj izdvajanja pravednog i dobrovoljnog udjeljivanja Božijih darova. Slijedno tome, čovjek koji praktikuje ovaj stav može razviti prikladna rješenja za zdravo i skladno društvo.

10. Ne biti ohol i biti skroman

„(...) Vaš Bog je jedan Bog, zato se samo Njemu iskreno predajte! A radosnom viješću obraduj poslušne.“³³¹

Zapovijed završne faze tarikatskih vrata nalaže odbacivanje arogancije. Talip u svojim postupcima traži blizinu i zadovoljstvo Boga (Riza). U svojoj potrazi on neizbježno dolazi do zaključka da je samo Bog uzvišen i svemoguć te da je ljudsko postojanje vezano za svemoć Stvoritelja. Na temelju ovog zaključka, on priznaje vlastitu beznačajnost i zadovoljan je jednostavnim i Bogu ugodnim načinom života.

5.3. Treća vrata – marifet/marifa (spoznaja)

Deset stupnjeva vrata marifeta:

1. Izbjegavati svako ponašanje koje je u suprotnosti s pravilima puta (biti pristojan).
(...) Ne približujte se nevaljalštinama, bile javne ili tajne, ne ubijajte onoga koga je Allah zabranio ubiti, osim onda kada to pravda zahtijeva – eto, to vam On preporučuje da biste razumjeli.³³²

U prvoj fazi trećih vrata pojašnjava se značaj pristojnosti, morala i etike u životu jednog vjernika. Talip je pozvan da se ponaša u skladu s islamskom etikom i da svaku formu nepravde odbaci i pokori. Zbog toga je talip, naprimjer, obavezan osloboditi se negativnih

³³⁰ Sura al-al-Mu'minun, ajet 4 (23:4)

³³¹ Sura al-Hadž, ajet 34 (22:34)

³³² Sura al-An'am, ajet 151 (6:151)

osobina kao što su mržnja i neprijateljstvo te se zauzimati za prijateljsku i bratsku atmosferu u društvu. Shodno tome, on se mora distancirati od postupaka drugih koje za sebe smatra neprimjerenima. Naprimjer, on ne smije širiti glasine i laži o ljudima, pošto on ovo ponašanje također ne bi odobrio ni prema vlastitoj ličnosti. Nadalje, u ovoj fazi se daje veliki značaj vjernosti ruci (eline), slabinama (beline), jeziku (diline), radu (išine), hrani (ašina) i ženi (ešine), budući da se suzdržavanje od velikih grijeha i prijestupa može postići samo pridržavanjem ovih šest zapovijedi.

2. Kloniti se zlobe, mržnje i egoizma.

„I iz oholosti, ne okreći od ljudi lice svoje i ne idi zemljom nadmeno, jer Allah ne voli ni gordog ni hvalisavog.“³³³

3. Biti gospodar svojih želja, distancirati se od svake vrste ekstremnih misli i ponašanja.

„(...) ta ljudi su stvoreni lakomi! I ako vi budete lijepo postupali i Allaha se bojali – pa, Allah dobro zna ono što radite.“³³⁴

Na drugom i trećem stupnju opisuje se potreba za distanciranjem od bilo kakvog oblika egocentričnosti i svih negativnih posljedica te perspektive. Talip se stoga mora odvojiti od svojih egocentričnih misli, koje služe samo postizanju njegovih osobnih ciljeva. Umjesto toga, sada je pozvan uskladiti svoje misli i želje s općim dobrom. Posljedično, mora se odreći i negativnih osobina poput mržnje, arogancije i samoveličanja.

4. Biti strpljiv i zadovoljiti se skromnim životom

„Mi ćemo vas dovesti u iskušenje malo sa strahom i gladovanjem, i time što ćete gubiti imanja i živote i ljetine. A ti obraduj izdržljive.“³³⁵

Na ovom stupnju se proširuje strpljivost i postojanost vjernika. Talip treba da se na svome putu samospoznaje pozove na Stvoritelja, kada bude konfrontiran zamorom i naporom. Na kraju u Časnom Kur'anu se kaže: I budite izdržljivi, jer Allah je, zaista, na strani izdržljivih.³³⁶

5. Držati se pristojnosti i stida

³³³ Sura Lukman, ajet 18 (31:18)

³³⁴ Sura an-Nisa, ajet 128 (4:128)

³³⁵ Sura al-Bekare, ajet 155 (2:155)

³³⁶ Sura al-Anfal, ajet 46 (8:46)

„Šejtan vas plaši neimaštinom i navraća vas da budete škrti, a Allah vam obećava oprost i nagradu Svoju; Allah je neizmjereno dobar i zna sve.“³³⁷

Ova faza ističe da su pristojnost i sram sastavni dio nečije osobnosti. Posljedično, osoba se mora držati podalje od svih djela koja vrijeđaju čast i koja bi je u javnosti mogla osramotiti.

6. Velikodušnost

„Ne drži ruku svoju stisnutu, a ni potpuno otvorenu – da ne bi prijekor zaslužio i bez ičega ostao.“³³⁸

Jedan od suštinskih koraka na putu spoznaje Boga (ma'rifa) predstavlja usvajanje velikodušnog odnosa spram drugih ljudi. Vjerniku se nalaže da, pored svog materijalnog imetka, također i svoj nematerijalni imetak dijeli s ljudima, kao što su znanje, iskustva i sposobnosti.

7. Konstantno traganje za znanjem

„Čitaj, u ime Gospodara tvoga, Koji stvara, stvara čovjeka od ugruška! Čitaj, plemenit je Gospodar tvoj.“³³⁹

Iako je značaj traganja za znanjem već obrađen u drugom stupnju prvih vrata, talipu se sada nalaže da produbi svoje znanje u tematskim područjima koja je već stekao. Pod nadzorom učitelja (tur. pir) ili uputitelja (tur. muršid), vjernik se zato u ovoj fazi treba zauzeti istraživanjem kako očiglednih i jasnih (arap. zahir), tako također i dubokih, skrivenih (arap. batin) ajeta iz Kur'ana i predaja.

8. Ponašati se tolerantno

I oni koji ne svjedoče lažno, i koji, prolazeći pored onoga što ih se ne tiče, prolaze dostojanstveno.³⁴⁰

Na ovom stupnju se naglašava da samo oni ljudi koji s potpunom predanošću, angažmanom i lojalnošću pređu put četvera vrata i 40 stupnjeva mogu steći spoznaju Boga (marifa). Zato je na ovom stupnju posebno istaknut značaj tolerancije i poštovanja.

³³⁷ Sura al-Bekare, ajet 268 (2:268)

³³⁸ Sura al-Isra, ajet 29 (17:29)

³³⁹ Sura al-Alaq, ajet 1-3 (96:1-3)

³⁴⁰ Sura al-Furkan, ajet 72 (25:72)

9. Biti vjeran sebi, poznavati sebe, samospoznaja

Od Gospodara vašeg dolaze vam dokazi, pa onaj ko ih usvaja – u svoju korist to čini, a onaj ko je slijep – na svoju štetu je slijep, a ja nisam vaš čuvar.³⁴¹

10. Okrenuti se od želja nagona, zanemariti nagonsku dušu.

„O vjernici brinite se o sebi; ako ste na Pravome putu, neće vam nauditi onaj ko je zalutao! Allahu ćete se svi vratiti i On će vas obavijestiti o onome šta ste radili.“³⁴²

Do devetog i desetog stupnja trećih vrata, vjernik je prošao dug proces sazrijevanja i od tada ga se smatra mudrim čovjekom (Arif). Po alevitskom vjerovanju, one osobe koje dosegnu ovaj stupanj mogu čistoćom svoga srca spoznati mnoge božanske istine koje drugi ljudi ne mogu spoznati. Sažeto, može se reći da se dosadašnji talipov cilj zasnivao na mudrosti spoznaje Boga.

5.4. Četvrta vrata – hakikat/haqiqa (istina)

1. Biti skroman

„Vaš Bog je – jedan Bog! Srca onih koji u onaj svijet ne vjeruju poriču, oni se ohološću razmeću; nema sumnje da Allah zna i ono što oni taje, a i ono što javno iznose; On doista ne voli one koji se ohole.“³⁴³

Prvi stupanj četvrtih vrata naglašava skromnost. Vjernik koji je nakon dugog procesa sazrijevanja dosegao stupanj mudrog čovjeka, pokušava u svome okruženju i u svim Božijim stvorenjima vidjeti dobro. Na osnovu njegovog visokog stupnja kod Boga, on sada može zanemariti sve ono što je loše i potpuno se usredotočiti na pozitivno. Otuda on otvara svoje ruke svim ljudima, kako bi im bio od pomoći pri pronalaženju istine.

2. Ne vidjeti greške drugih

„I duše i Onoga Koji je stvorio, pa joj put dobra i put zla shvatljivim učinio, uspjeh će samo onaj ko je očisti.“³⁴⁴

³⁴¹ Sura al-An'am, ajet 104 (6:104)

³⁴² Sura al-Ma'ida, ajet 105 (5:105)

³⁴³ Sura an-Nahl, ajet 22-23 (16:22-23)

³⁴⁴ Sura aš-Šems, ajet 7-9 (91:7-9)

Iako je ovdje vjernik već dosegao stupanj mudraca, on se i dalje usredotočuje na otklanjanje sopstvenih grešaka i nedostataka, umjesto da se zaokuplja nedostacima drugih ljudi. Međutim, kada on otkrije nedostatke kod drugih ljudi, Na primjeren način im ukazuje na to i pripomaže im pri tome da ih otklone. Njegov cilj je vidjeti dobro u stvaranju Božijem i u prvom planu vidjeti lijepe aspekte.

3. Nijednu priliku ne propustiti, činiti dobro

„I imetak na Allahovom putu žrtvujte, i sami sebe u propast ne dovodite, i dobro činite – Allah, zaista, voli one koji dobra djela čine.“³⁴⁵

Na ovom stupnju, arif je pozvan da pomaže potrebite ljude u svojoj okolini sa svim sredstvima koja mu stoje na raspolaganju, kao što su duhovna spoznaja, iskustva i vještine.

4. Brinuti se za Božija stvorenja

5. Sve ljude posmatrati kao jedno

„Teško vama!“ govorili su učenici – „onome koji vjeruje i čini dobra djela bolja je Allahova nagrada, a bit će samo strpljivima pružena.“³⁴⁶

Na četvrtom i petom stupnju biva jasnije naglašen ljubazan i milosrdan pristup Božijem stvaranju. Temeljeno na njegovom tevidu, arif prati razumijevanje svog života od Boga, Svemogućeg, i stoga smatra sva živa bića Božijim stvorenjima. Posljedično, u ovom kontekstu, on ne pravi razliku između religije, denominacije, jezika, spola ili boje kože, niti između ljudi, životinja i biljaka. Takva razlika unutar stvaranja u konačnici bi dovela do nepoštivanja božanskog unutar stvaranja.

Njegov pristup Božijem stvaranju je milosrdan jer se nada Božijoj milosti za sebe i za one oko sebe. Arifova perspektiva se stoga može sažeti sljedećom maksimom Junusa Emrea: „Smatraj stvaranje dobrim radi Stvoritelja.“

6. Okrenuti se jedinstvu i druge uputiti

³⁴⁵ Sura al-Bekare, ajet 195 (2:195)

³⁴⁶ Sura al-Qasas, ajet 80 (28:80)

„O ljudi, Mi vas od jednog čovjeka i jedne žene stvaramo i na narode i plemena vas dijelimo da biste se upoznali. Najugledniji kod Allaha je onaj koji Ga se najviše boji; Allah, uistinu, sve zna i nije Mu skriveno ništa.“³⁴⁷

Na šestom stupnju četvrtih vrata se obrađuje Božanska blizina kao i susret s Bogom (Liqaulah). Arif (mudrac) osjeća kako u svojim namazima tako i u svojim dnevnim radnjama stalnu prisutnost Boga, zbog čega ga se naziva i Muttaqi (čovjek svjestan prisustva Božijeg). Naročito se molitve smatraju susretom, odnosno tihim i prisnim razgovaranjem s voljenim Prijateljem (Bogom).

7. Stjecanje znanja o misteriji apsolutne istine

„I istinu s neistinom ne miješajte i istinu svjesno ne tajite!“³⁴⁸

Fokus sedmog stupnja četvrtih vrata leži u tome da arif stjecanje znanja produbljuje stalnim ponavljanjem i ispravljanjem. Na ovaj način mu se otvaraju vrata božanskog znanja, omogućujući mu pristup povjerljivim informacijama i tajnama.

8. Razumjeti mudrost u svim stvarima

„U stvaranju nebesa i Zemlje i u stvaranju noći i dana su, zaista, znamenja za razumom obdarene.“³⁴⁹

Na osmom stupnju četvrtih vrata, arif doseže ovu mudrost u svim stvarima u četiri faze. Ovaj proces se zove Seyr-i Suluk (Putnikovo putovanje putem).

U prvoj fazi Seyr il-Allah (Putovanje prema Bogu), arif se distancira od svih svjetovnih potreba i prema Suri 51, ajet 50³⁵⁰, kreće na putovanje ka Bogu, kako bi se predao Njegovoj božanskoj volji. U drugoj fazi Seyr fi Allah (Putovanje u Bogu), arif pokušava manifestirati božansku bit u svojoj ličnosti, tako što djeluje potpuno u skladu sa voljom Božijom.

U trećoj fazi, Seyr ma-Allah (putovanje sa Bogom), cilj je stopiti se s Jedinstvom Božijim i prepoznati božanstvenost u stvaranju.

U četvrtoj fazi, Seyr an-Allah (putovanje od Boga), arif se vraća nazad sa svoga puta spoznaje kako bi svoje znanje upotrijebio za dobrobit čovječanstva. Cjelokupnost ovog putovanja znanja o misticizmu se također smatra uzašašćem, nebeskim putovanjem (arap. Miradž) jednog arifa.

³⁴⁷ Sura al-Hudžurat, ajet 13 (49:13)

³⁴⁸ Sura al-Bekare, ajet 42 (2:42)

³⁴⁹ Sura Al-i Imran, ajet 190 (3:190)

³⁵⁰ Zato požurite Allahu, ja sam vam od Njega da vas javno upozorim. (Sura ez-Zarijat, ajet 50/51:50).

9. Zazivanje Boga (arap. munadžat) i bogobožnost (arap. taqwa)

„Allah svjedoči da nema boga osim Njega – a i meleki i učenici – i da On postupa pravedno. – Nema boga osim Njega, Silnog i Mudrog!“³⁵¹

10. Biti potpuno zadovoljan odredbama Božijim.

„To je vrhunac njihova znanja – Gospodar tvoj dobro zna one koji su skrenuli s Njegova puta i On dobro zna one koji su na Pravom putu.“³⁵²

Na devetom i desetom stupnju arif se usredotočuje na namaze i dove upućene Bogu, svjesno usklađujući svoja djela s Božijim zadovoljstvom. Na taj način arif postiže rang savršenog ljudskog bića (Insan-i Kamil). Nadalje, u ovoj fazi arif doseže sljedeće stupnjeve znanja: Ilm el-Yaqin, Ayn el-Yaqin i Haqq el-Yaqin.

U prvoj fazi arif koristi svoj intelekt (arap. Aql) kako bi stekao znanje o Bogu. Stoga se ovaj proces naziva „sigurnost kroz znanje“, budući da se arifova sigurnost temelji na znanju. Pojam se spominje u Kur'anu u suri At-Takasur (102:5). U drugoj fazi arif se oslanja na vlastite percepcije kao dodatni kriterij za produhovljenje stečenog znanja. Ovaj proces se stoga naziva Ayn el-Yaqin (doslovno: sigurnost kroz promatranje) i spominje se u suri At-Takasur (102:7). U trećoj fazi arif je u potpunosti internalizirao cijeli svoj svjetonazor, crpeći inspiraciju uz znanje i percepciju. Ovaj proces se stoga naziva Haqq al-Yaqin (sigurnost kroz istinu). Pojam se spominje u Kur'anu u suri Al-Haqqa (69:51) kao i u suri Al-Waqia (56:95).

6. Pisani izvori alevizma

Budući da se bitna načela svake religije ili denominacije mogu izvesti iz pisanih izvora, ispitivanje alevitskih izvornih tekstova od ogromne je važnosti. Samo na toj osnovi mogu se razviti istraživačka pitanja. Posljedično, neizbježno smo prisiljeni ozbiljno i sveobuhvatno se pozabaviti izvorima alevizma. Kao rezultat temeljitih istraživanja, ovi izvori mogu se podijeliti u sljedeće dvije skupine:

- Opći izvori
- Posebni izvori

³⁵¹ Sura Al-i Imran, ajet 18 (3:18).

³⁵² Sura an-Nedžm, ajet 30 (53:30).

Pošto sljedbeništvo Ehli Bejta obuhvaća otprilike 15%³⁵³ muslimana širom svijeta, opći izvori alevitskih učenja uključuju sve autentične izvore sljedbenika Ehli Bejta. U raznim dijelovima svijeta nekoliko stotina miliona ljudi iz različitih nacija vjeruje u vodstvo Dvanaest Imama (Imamat) i smatraju Časni Kur'an i učenje Ehli bejta središnjim temeljem svoje vjere. Aleviti su, naravno, među tim ljudima.

Međutim, posebni izvori sastoje se prvenstveno od djela koja su napisali istaknuti alevitski sljedbenici Ehli Bejta, turskog govornog područja, na temelju općih izvora. Budući da su povijesni događaji prekinuli bliske veze između alevita i drugih sljedbenika Dvanaest Imama, i budući da su ta djela često pisana na turskom jeziku i nisu prevedena, ona nažalost ne uživaju široko priznanje među drugim (nealevitskim i neturskog porijekla) sljedbenicima Ehli Bejta.

6.1. Opći izvori

Kao što je prethodno već spomenuto, opći izvori alevizma sadržani su u Časnom Kur'anu i učenjima Dvanaest Imama. Ovaj pristup oslanja se prvenstveno na predaju Poslanika Muhameda vezano za dva teška i dragocjena povjerenja (arap. *Thaqalayn*)³⁵⁴, koja je autentično prenesena kako u šiitskim, tako i u sunitskim izvorima:

Jednog dana (nakon njegovog posljednjeg hodočašća), Allahov Poslanik održao je govor pored izvora Hum, koji se nalazio između Meke i Medine. On je slavio Allaha i nakon toga rekao: „O ljudi! Uistinu! Ubrzo će doći poziv da se moram vratiti Allahu i ja ću se odazvati tom pozivu. Uistinu! Ostavljam vam dva teška i dragocjena povjerenja (Sekalejn). Jedna je knjiga Allahova, u kojoj je svijetlo i uputa. Druga je moj Ehli Bejt. Ja sam ovo tražio od svoga Gospodara i On je to prihvatio. Zato ne idite ispred njih, inače ćete zalutati. Ne pokušavajte ih poučavati, jer su oni mnogo učeniji od vas. Podsjećam vas u Ime Allaha na moj Ehli Bejt. Podsjećam vas u Ime Allaha na moj Ehli Bejt. Podsjećam vas u Ime Allaha na moj Ehli Bejt.“ Postoje još mnoge predaje ove vrste, ipak na ovom mjestu ćemo se zadovoljiti sa navedenim izvorima. Nakon što je ova činjenica sad je jasno potvrđena, sad ćemo se skoncentrisati na ove dvije teške i dragocene stvari.

Pir Sultan, istovremeno i Hajdar sam ja,
Dim prekriva planine,
Evo Biblije, Evo Kur'ana,
Istupi naprijed ako možeš razaznati.

³⁵³ Halm: *Die Shiiten*, str. 9.

³⁵⁴ Hadis Sekalejn, odnosno predaja o dva teška i dragocjena povjerenja, jedna je od najvažnijih izjava Poslanika Muhameda vezano za njegovo nasljeđivanje. Ovim povodom informisao je svoje sljedbenike u više prilika, posljednji put na Gadir-Humu, da se čvrsto drže ovih dviju teških i dragocenih stvari kako nikada ne bi zalutali: jedna je Kur'an, knjiga Božija, a druga je Poslanikova porodica, Ehli Bejt.

Još jedan razlog zbog čega se Časni Kur'an smatra glavnim izvorom alevizma jeste to što je Bog ovu plemenitu Knjigu objavio kao milost svom čovječanstvu. Bog najbolje poznaje snage, slabosti i potrebe Svojih stvorenja i zbog toga je ljudima, da bi pronašli sreću i blaženstvo, u Kur'anu dao uputstvo za svakodnevni život. Kul Himmet je objavu Kur'ana opisao na sljedeći način:

Po Božijem naređenju sišao je Džibril sa neba,
Sišao je i objavio Sultanu,
Bog selami Muhamedu,
Ti si Muhamed, koji osloboda od okova.

Nadalje poznati alevitski pjesnik Derviš Mehemed izražava u jednoj od svojih pjesama nedvosmisleno spuštanje monoteističkih knjiga:

Osamnaest hiljada svijetova On je stvorio,
Džibril je donio riječ sa Prijestolja,
Pero, koje je napisalo četiri³⁵⁵ knjige.
Oni koji govore ne znaju, oni koji znaju šute, kakav blagdan.

Nakon svih ovih zaključaka, od velikog je značaja da se osvrnemo na jednu glasinu koja ciljano kruži zadnjih 20-ak godina među alevitima. Pri tome se u prostor postavlja isprazna tvrdnja da su svi ajeti koji su objavljeni u vezi Ehli Bejta sakupljeni za vrijeme trećeg halife Osmana i uklonjeni iz danas dostupnog Kur'ana.

Ova tvrdnja ispostavlja se kao neutemeljena kada se uzme u obzir da i sunitski izvori potvrđuju kako je još za vrijeme života Poslanika Muhameda sve kur'anske ajete sakupio Imam Ali i uobličio ih u jednu knjigu. Također, nije tajna da je većina muslimana za vrijeme Poslanika poznavala Kur'an napamet i da bi svako krivotvorenje neizbježno vodilo ka velikim nemirima među muslimanima. Dok su druge tri božanske knjige (Tora, Zebur i Biblija) tokom historije pretrpjele redukcije i dopune, te se stoga od muslimana ne mogu prihvatiti kao autentične objave, Kur'an važi kao posljednja neiskrivljena poruka Božija čovječanstvu. Pri tome, Kur'an sam ukazuje na neizmjenjivost:

„Mi, uistinu, Kur'an objavljujemo i zaista ćemo Mi nad njim bdjeti!“³⁵⁶

Ovaj ajet biva potvrđen kada se usporede stoljećima stari manuskripti Kur'ana sa današnjim kur'anskim tekstom, pri čemu se ne mogu utvrditi razlike. Naime, da je Kur'an zaista izmijenjen, s alevitsko-islamskog stajališta neizbježno bi se morale dogoditi dvije stvari: ili bi par novih poslanika trebalo biti poslano sa novim objavama, ili bi kvarenje Kur'ana morali

³⁵⁵ Četiri božanske knjige su islamskom uvjerenju: Tora (Tevrat), Psalme (Zebur), Evanđelje (Indžil) i Kur'an.

³⁵⁶ Sura al-Hidžr, ajet 9 (15:9).

otvoreno osuditi Dvanaest Imama, koji su čuvari vjere Božije nakon Poslanikove smrti. U nekim poznatim predajama Poslanik je u ovom kontekstu rekao:

„Ali, ti ćeš se boriti za tumačenje Kur'ana, baš onako kako sam se ja borio za njegovu objavu.“

„Jedan od vas će se zalagati – kao što sam se ja zalagao za objavu Kur'ana – za ispravno tumačenje Kur'ana.“ Ebu Bekr je tada upitao je li on ta osoba, Poslanik je to porekao. Omer je zatim upitao je li to on, ali je Poslanik to ponovo porekao i dodao: „Trenutno je zauzet krpljenjem cipela.“ U tom trenutku, Ali je bio zauzet krpljenjem Poslanikovih cipela.

„Ti (Ali) ćeš mome narodu učiniti vidljivim ono što ih je nakon mene navelo na sukob.“

Iz navedenih predaja kristalno jasno se može zaključiti da je Imam Ali, kao zastupnik svih Dvanaest Imama, zadužen za čuvanje i nadziranje Časnog Kur'ana od skrnavljenja.

Neizbježno, tvrdnja da je Kur'an oštećen ukazuje na to da Dvanaest Imama nisu ispunili svoj zadatak. Već spomenuta tvrdnja da su svi ajeti koji su objavljeni vezano za Ehli Bejt sakupljeni i iz danas dostupne knjige odstranjeni za vrijeme trećeg halife Osmana ibn Affana, ispostavlja se zornijim promatranjem kao neutemeljena. U konačnici, objava brojnih ajeta može se pratiti do Ehli Bejta:

„Allah želi da od vas, o porodico Poslanikova, grijehe odstrani, i da vas potpuno očisti.“³⁵⁷

„Vaši zaštitnici su samo Allah i Poslanik Njegov i vjernici koji ponizno molitvu obavljaju i zekat daju.“³⁵⁸

Na drugom kur'anskom ajetu, Časni Kur'an spominje Boga, Poslanika Muhameda i neke vjernike koji prilikom namaza izdvajaju sadaku, te prethodno objašnjava da su to pravi zaštitnici muslimana i islama. Prema svim poznatim sunitskim i šiitskim tumačenjima Kur'ana, pojam „vjernici“ odnosi se na Imama Alija, koji je svoj prsten udijelio kada mu je prišao jedan prosjak dok je bio na rukuu tokom namaza. Isto tako, sura Al-Kewser, koja se sastoji od tri ajeta, objavljena je vezano za Fatimu:

„Mi smo ti, uistinu, mnogo dobro dali, zato se Gospodaru svome moli i kurban kolji, onaj koji tebe mrzi sigurno će bez spomena ostati.“³⁵⁹

Ovaj ajet je objavljen kada je sin Poslanika Muhameda umro. Idolopoklonici Meke ovaj tragičan događaj uzeli su kao povod da dovedu u pitanje poslanstvo Poslanika Muhameda, pošto nakon smrti svoga sina više nije imao muškog potomstva. Nakon toga je objavljena

³⁵⁷ Sura al-Ahzab, ajet 33 (33:33)

³⁵⁸ Sura al-Ma'ida, ajet 55 (5:55)

³⁵⁹ Sura al-Kewser, ajet 1-3 (108:1-3)

sura Al-Kewser i objašnjava da potomstvo Poslanika Muhameda slijedi preko njegove jedine kćerke Fatime i njene djece.

Iako je Časni Kur'an završio spuštanjem trećeg ajeta Sure al-Maida³⁶⁰ 632 godine, prilikom događaja na Gadir Humu, univerzalnost Kur'ana pojašnjava se pozivanjem, kako je detaljno opisano u sljedećem ajetu, upućivanjem na događaj na Kerbeli, koji se dogodio 680. godine:

„A ti, o dušo smirena, vrati se Gospodaru svome zadovoljna, a i On tobom zadovoljan, pa uđi među robove Moje, i uđi u Dženet Moj!³⁶¹

Iako bi se sa popisom ajeta o Ehli Bejtu moglo nastaviti, spomenuti primjeri trebali bi pokazati čistoću i neizmjenjenost Kur'ana. Sve do unazad nekoliko decenija bilo je jasno vidljivo koliko poštovanja i uvažavanja je uživao Časni Kur'an među alevitskom zajednicom. Iako su spomenute tvrdnje dovele do određenog stupnja otuđenja, Časni Kur'an i danas uživa veliki ugled unutar alevitske zajednice. To je prvenstveno zbog činjenice da aleviti vide Imama Alija kao utjelovljenje Kur'ana an-Natik (Kur'an koji govori). Nadalje, u pjesmama i knjigama istaknutih alevitskih ličnosti ne mogu se pronaći tvrdnje o iskrivljivanju Časnog Kur'ana. Integritet i vodeća uloga plemenitog Kur'ana potvrđeni su čak i bezbrojnim primjerima iz izjava i spisa istaknutih alevitskih ličnosti. Pir Sultan Abdal lijepo ilustrira ovu činjenicu u pjesmi:

Pir Sultan Abdal, ovo je Kur'an
Čitaj ga i donosi selam na Muhameda.

Muhidin, još jedan alevitski pjesnik, neiskrivljenost i vodeću ulogu Časnog Kur'ana za vjerujuće alevite opisao je na sljedeći način:

Mi obavljamo namaz, mi ga ne izbjegavamo.
Mi nismo neznalice o naredbama Božijim.
Kur'an je naša Knjiga, islam je naša religija,
Ajete i predaje mi ne odbacujemo.

U jednoj drugoj tvrdnji postavlja se teza da je Časni Kur'an ustvari sastavljen od 6666 ajeta. Pošto je ova tvrdnja uglavnom prenesena u sunitskim izvorima, danas je, tipično, zastupaju neki samozvani (tur. aydin) „oni koji se smatraju upućenim“, čiji jedini cilj bez ikakve sumnje leži u tome da unesu iskrivljenje u alevizam. Iako nikakvi zadovoljavajući dokazi za to ne

³⁶⁰ „Sada sam vjeru vašu usavršio i blagodat Svoju prema vama upotpunio i zadovoljan sam da vam islam bude vjera. – A onome ko bude primoran – kada hara glad, bez namjere da učini grijeh, Allah će oprostiti i samilostan biti.“ (Sura Al-Ma'ida, 5:3)

³⁶¹ Sura el-Fedžr, ajet 27-30 (89:27-30)

postoje, spomenute osobe oslanjaju se na usmene pretpostavke i uspostavljaju tvrdnju da Časni Kur'an mora da je iskrivljen ako u stvarnosti ne postoji Kur'an koji ima 6666 ajeta. Umjesto da Časni Kur'an i Ehli Bejt smatraju neodvojivom jedinkom, ovi takozvani „upućeni“ čine istu grešku i pozivaju se na spomenute sunitske predaje. Kako bismo Časni Kur'an mogli bolje razumjeti, ove osobe morale bi se u prvoj liniji osvrnuti i obratiti na znanje Imama Alija. Konačno, sam Imam Ali je sebe opisao kao „živi“, odnosno „govoreći Kur'an“³⁶²

Zato je od velikog značaja da se prepoznaju stvarne namjere iza spomenutih glasina i da se poduzmu protumjere. U stvarnosti, određene grupe pokušavaju svim tim glasinama uzdrmati alevizam u njegovim temeljima i potpuno izbrisati učenje Ehli Bejta. Ovo stanje se može usporediti sa rijekom koja teče, koja opskrbljuje vodom vegetaciju u dolini i udahnuje joj život. Međutim, ukoliko izostane voda u rijeci, vremenom će i biljke malo-pomalo uvenuti. Upravo tako će i alevizam uvenuti ukoliko se više ne hrani božanskom rijekom Kur'ana i Ehli Bejta. Kako bi se zaštitili od asimilirajuće politike, aleviti se stoga moraju kretati putem Kur'ana i Ehli Bejta i svoje znanje uzimati iz te dvije teške i dragocjene stvari. Konačno, čovječanstvo može samo i jedino doći do blaženstva i spasa preko kombinacije Kur'ana i Ehli Bejta, kako je Poslanik Muhamed objasnio u poznatom hadisu Sekalejn: „Ove dvoje stvari (Kur'an i Ehli Bejt) su neodvojivi, dok ne dođu ponovo kod mene da se ujedine.“

U jednoj pjesmi Pir Sultan navodi ovaj hadis na sljedeći način:

Pir Sultan sam ja, koji se radosno smije,
Od Časne Kabe začuo se glas,
Po naredbi Božijoj četiri su spuštene knjige,
Onaj koji čita je Muhamed, onaj koji piše je Ali.

Dakle, vidljivo je da za alevite Kur'an nije „samo jedna od mnogih knjiga“, kako kažu neki takozvani „eksperti“, nego Sveta Božija Knjiga alevita. Time izjave ovih ljudi ne počivaju ni na čemu drugom nego na njihovom neznanju ili čak na političkim namjerama koje, moguće je, stoje iza takvih neodrživih izjava.

Osim toga, aleviti prihvataju samo izjave i tumačenja Kur'ana koji potječu od porodice Poslanika Muhameda. Stoga su samo Ehli Bejt i njihovi sljedbenici s dovoljnim znanjem i obrazovanjem u kur'anskim studijama ovlašteni tumačiti Kur'an. Očito je da onima koji su tumačili Kur'an po nalogu moćnih i tiranskih halifa nedostajalo je potrebno duhovno znanje i čistoća srca za ispravno tumačenje svetih ajeta. Nadalje, treba napomenuti da plemeniti Kur'an sadrži i nedvosmislene (arap. muhkam) i dvosmislene (arap. mutešabih) ajete, koji se

³⁶² U ovom kontekstu Imam Ali je rekao sljedeće: „Pitajte me prije nego me izgubite! Tako mi Allaha! Pitajte me za sve što će se dogoditi do Sudnjeg dana, i ja ću vas izvijestiti o tome! Pitajte me za Allahovu Knjigu! Jer, tako mi Allaha, ne postoji ajet o kome nisam obaviješten, je li objavljen noću ili danju, u dolini ili na brdu!“

moraju tumačiti i razmatrati u njihovom kontekstu, uzimajući u obzir razloge njihovog objavljivanja. Jer, pogrešnim tumačenjem, čak i božanska poruka Plemenitog Kur'ana može ljude odvesti na krivi put. Prema alevitskom shvaćanju, Plemeniti Kur'an, koji je objavljen da vodi čovječanstvo, lako može postati knjiga zablude ako se u njegovom tumačenju zanemari značaj Ehli Bejta kao Kur'an an-Natiq-a (govorećeg Kur'ana). Sljedeća pjesma Pira Sultana pojašnjava značenje Ehli Bejta:

U kojoj se knjizi nalaze Omer i Osman?
Nije li Ali taj koji se spominje u Kur'anu?
Pir Sultan Abdal sam ja, siromah,
Hoće li biti lijeka za moju patnju?
Ja sam grešnik, kako da se pojavim pred njim.
Ne sjedi li Ali na Divanu?

6.1.2 Ehli Bejt

Nakon Časnog Kur'ana, Ehli Bejt predstavlja drugi glavni izvor alevizma. Sljedeća pjesma Pir Sultan Abdala u ovom kontekstu je jedan od bezbroj primjera u alevitskoj literaturi:

O Pir Sultane, kako iko može ovo podnijeti?
Imam jednog prijatelja, koji nekad spava, a ponekad se budi,
Ehli Bejt je umrljan crvenom krvlju,
Misli na Ehli Bejt i budi strpljiv.

Kako je već spomenuto, nakon preseljenja Poslanika Muhameda, unutar islamske zajednice nastao je raskol u vezi s položajem Ehli Bejta, što je dovelo do glavnih ogranaka (sunita i šiita). Iako je Sveti Poslanik Muhamed u više navrata imenovao svog nasljednika, neki od njegovih ashaba protivili su se njegovim detaljnim uputama i uzurpirali pravo Ehli Bejta. Kako bi opravdali ovaj postupak, također su izmijenili i uništili važne izjave o vrlinama Ehli Bejta. Naprimjer, dobro poznata predaja „Hasan i Husejn su predvodnici mladih stanovnika dženneta“ često je u određenim krugovima prešućivana ili mijenjana³⁶³ u „Dženetu“, također vrlo poznata i među sunitima, po Muavijinom naređenju u izmišljenoj predaji, Ebi Bekr i Omer su prikazani kao gospodari starješina u Dženetu. Drugi, i možda najvažniji, primjer izmjene ili krivotvorenja Poslanikove tradicije je spomenuta predaja Sekalejn. Iako je ova predaja potvrđena i u knjigama sljedbenika Ehli Bejta i u sunitskim tekstovima, Ehli Bejt je zamijenjen terminom Sunnet. Međutim, ova dva oblika se ne proturječe, jer samo Ehli Bejt besprijekorno slijedi poslaničke smjernice i može biti primjer istinskog i nepatvorenog Sunneta Poslanika.

³⁶³ Titula „predvodnici mladih u Dženetu“ (*Sayyidā shabāb ahl al-janna*), po Božijem naređenju Poslaniku Muhamedu, data je Imamu Hasanu i Imamu Husejnu kako bi oslikala njihov visoki stupanj kod Allaha.

U međuvremenu, određene osobe koje u sunizmu uživaju veliki ugled, poput Muavije ibn Sufjana, očito su odstupile od prakse Poslanika Muhameda, pa čak i nametnule neke od svojih praksi i običaja muslimanima.

Prenosi se od Mervan ibn Hakima³⁶⁴, da je Osman ibn Affan za vrijeme svoje vladavine, zabranio spajanje dobrovoljno hodočašće (arap:Umra) i Hodočašće (Hadž), a Imam Ali mu se po osnovu te okolnosti usprotivio sljedećim riječima:

„Ja neću zbog riječi nekih osoba odstupiti od Poslanikovog Sunneta!“

Iako bi se lista sistematskih zločina prema Ehli Bejtu mogla još dugo produžiti, cilj ove knjige nije da bliže navodimo te činjenice. Spomenuti primjeri trebaju samo pojasniti da je Ehli Bejt stalno pravi Sunnet Poslanika Muhameda štitio i čuvao od izmjena. U sljedećim izjavama Sveti Poslanik Muhamed je pojasnio ko je zaštitnik njegovog Sunneta u islamskoj zajednici:

„Ali je od mene, a ja sam od Alija. Ono što ja radim, također radi Ali!“

„Ja sam grad znanja, Ali je kapija tog grada. Ko hoće da uđe u taj grad, treba da uđe na kapiju!“

„Onaj čiji sam ja Gospodar i Predvodnik, njegov Gospodar i Predvodnik je također Ali!“
Kada se izjava iz sljedećeg ajeta kao i historijski odnos prema Ehli Bejtu usporede, prilično brzo će se zaključiti da su vlastodršci poduzimali velike napore kako bi namjerno smanjili položaj Ehli Bejta unutar islamske zajednice:

„(...) Allah želi da od vas, o porodico Poslanikova, grijeha odstrani, i da vas potpuno očisti.“³⁶⁵

Iako veliki broj učenjaka, kako sunita tako i sljedbenika Ehli Bejta, smatra da se ovaj ajet odnosi na Alija, Fatimu, Hasana i Husejna, neke fanatične sunitske struje pokušavaju također i žene Poslanika Muhameda staviti u vezu sa ovim ajetom. S druge strane, oni predstavljaju

³⁶⁴ Mervan ibn Hakem bio je član omejadске porodice i jedan od najbrutalnijih halifa u ranoj islamskoj historiji. Prema historijskim zapisima, rođen je 623. godine. Budući da je bio bratić i zet halife Osmana ibn Affana, imenovan je za upravitelja Medine. Nakon ubistva Osmana, Imam Ali ga je smijenio s dužnosti. Nakon toga, on je podržavao Aišu bint Ebu Bekr u takozvanoj bici kod Deve (656), a kasnije Muaviju u bici na Sifinu (657) protiv Imama Alija.

Mervan ibn Hakem bio je član omejadске porodice i jedan od najbrutalnijih halifa u ranoj islamskoj historiji. Prema historijskim zapisima, rođen je 623. godine. Budući da je bio bratić i zet halife Osmana ibn Affana, imenovan je za upravitelja Medine. Nakon ubistva Osmana, Imam Ali ga je smijenio s dužnosti. Nakon toga, on je podržavao Aišu bint Ebu Bekr u takozvanoj bici kod Deve (656), a kasnije Muaviju u bici na Sifinu (657) protiv Imama Alija. Mervan je 684. godine preuzeo vlast kao četvrti halifa omejadске dinastije (nakon Osmana, Muavije i Jezida), a umro je godinu dana kasnije.

³⁶⁵ Sura al-Ahzab, ajet 33 (33:33)

pogrešno tumačenje Časnog Kur'ana. Vezano za objavu ovog ajeta, između ostalog, na vjerodostojan način se od Aiše,³⁶⁶ prenosi slijedeće:

Plemeniti Poslanik je jednog dana nosio dugi ogrtač od crne vune. Nakon toga pozvao je Alija, Fatimu, Hasana i Husejnu pod pokrivač učeći ovaj kur'anski ajet. Kada je Umm Seleme³⁶⁷ upitala: „Oh Resulallah! Smijem li i ja ući pod ogrtač“, Poslanik joj je odgovorio: „Ne, ali i ti si na pravom putu.“

To znači da žene Poslanika Muhameda, kako je i Aiša lično potvrdila, ne pripadaju Ehli Bejtu. Shodno tome, pokušaji da se iz ideoloških razloga dokaže pripadnost Aiše Ehli Bejtu, djeluju više nego besmisleno.

6.1.3 Knjige i spisi Ehli Bejta

- **Imam Ali**

Tefsir ul-Kur'an odnosno Musaf Imam Ali:

U nekim predajama se prenosi postojanje tumačenje Kur'ana (arap. tefsir), koje je Poslanik diktirao Imamu Aliju.³⁶⁸ Po Ibn Nadim Warrakiju (Umro 994.), Nakon Poslanikovog preseljenja i Ebu Bekrovog otimanja hilafeta u Sakifi, imam Ali se povukao iz društvenog

³⁶⁶ Aiša bint Ebu Bekr bila je jedna od supruga Poslanika Muhameda i kćerka prvog halife, Ebu Bekra. Kako bi legitimizovala halifat Ebu Bekra i Omera te osporila pravo na halifat Imama Alija, služila se navodima o poslaniku Muhamedu iz perioda njegove bolesti na smrti. Nakon toga se neko vrijeme držala po strani od politike.

Kada interesi njene porodice za vrijeme trećeg halife, Osmana ibn Affana, više nisu bili zaštićeni, okrenula se protiv njega i podržala pobunu. Nakon što je Imam Ali, voljom većine muslimana, preuzeo dužnost halife, Aiša je iskoristila Osmanovo ubistvo kao sredstvo protiv Imama Alija. Zajedno s Talhom ibn Ubejdullahom i Abdullahom ibn ez-Zubejrom, povelila je 656. godine ustanak protiv Imama Alija, koji je okončan bitkom kod Deve (*Džemel*). Nakon što ju je Imam Ali pomilovao i u pratnji četrdeset žena ispratio prema Medini, dugo se vremena povukla iz politike.

Međutim, njeno neprijateljstvo prema Ehli Bejtu nije jenjavalo. Posebno nakon smrti Imama Hasana, stala je na stranu Umejada i naredila da se tijelo Imama Hasana gađa strijelama kako bi se spriječilo njegovo ukopavanje pored Poslanika Muhameda. Prenosi se da je Muavija 678. godine naložio njeno pogubljenje jer je javno osudila ubistvo svog brata Muhameda ibn Ebu Bekra i Poslanikovog druga Hudžr ibn Adija.

U tradicionalnim historijskim djelima starost Aiše bint Ebu Bekr u trenutku sklapanja braka s Poslanikom često se navodi kao šest, sedam ili devet godina. Ti su navodi prvenstveno oslonjeni na Aišine vlastite tvrdnje, koje sadrže kontradiktorne informacije, a cilj im je bio predstaviti je kao omiljenu suprugu Poslanika Muhameda. S druge strane, od Imama iz Ehli Bejta prenosi se da je prilikom udaje za Poslanika Muhameda imala osamnaest godina.

³⁶⁷ Umm Seleme bila je žena Poslanika Muhameda i time majka vjernika.

³⁶⁸ Medžlisi: Bihar ul-Anwar, tom. 28, str.266.

života, kako bi sastavio ovo jedinstveno tumačenje Kur'ana. Kao uputu na pravi put muslimana, on je ovo neprocjenjivo djelo ponudio muslimanima; međutim Ebu Bekr i Omer su odbacili njegov tefsir. Kada je Imam Ali vidio da ovo tumačenje Kur'ana ne doživljava³⁶⁹ neophodnu pažnju među muslimana, nije im ga više nudio. Po alevitskom vjerovanju ovaj jedinstveni Tefsir se naslijeđuje Od Imama Alija unutar linije Dvanaest Imama od oca na sina i trenutno se nalazi pod brigom Imama Muhameda Mehdija.

Vezano za ovo, mora se naglasiti da Kur'an koji je sastavio Imam Ali ne opravdava optužbe da je dostupan Kur'an iskrivljen (proširen ili skraćen). U konačnici, Imam Ali je ovu knjigu napisao iz tri sljedeća razloga:

- a. Za vrijeme Poslanika, muslimani su Kur'an uglavnom učili napamet, a u pisanom obliku bio je dostupan tek u određenim dijelovima. Sastavljanjem u pisanoj formi s tumačenjem, trebao je postati dostupan široj javnosti.
- b. Imam Ali je ajete zapisao po redoslijedu njihove objave, uz povode spuštanja, kako bi muslimani Kur'an bolje razumjeli i mogli živjeti po njegovom učenju.
- c. Najveći cilj Imama Alija pri sačinjavanju ovoga djela, i istovremeno najvažnije obilježje, jeste to što ova knjiga sadrži Poslanikovo tumačenje (tefsir) i razloge za objavu ajeta. Na ovaj način pojasnio je značaj mekanskih i medinskih ajeta, muhkam (jasnih) i mutešabih (alegorijskih) ajeta, kao i nasih (ukidajućih) i mansuh (dokinutih) ajeta.

Na osnovu ovih faktora, Mushaf Imama Alija smatra se tumačenjem Kur'ana, a ne alternativom sada dostupnom Kur'anu. Isto tako, može ga se smatrati jednim od najvrijednijih izvora hadisa, pošto se u njemu nalaze riječi i izreke Poslanika Muhameda.

Nahdž ul-belaga

Nahdž ul-belaga je zbirka propovijedi, izreka, savjeta, dekreta, spisa i načela Imama Alija, koju je sastavio Šerif er-Radi (970–1015). Do danas se njen sadržaj smatra jedinstvenim u umjetnosti govorništva i retorike. Govori objašnjavaju temeljne islamske teme, kao i pravne odluke o političkim okolnostima tog vremena, tako da čak i danas političari mogu crpiti mudrost i vodilju za svoje odluke. U tom kontekstu, može se pozvati na direktivu Maliku el-Aštaru (53. pismo). Ovu direktivu Imama Alija čak je preporučio generalni sekretar UN-a Kofi Annan kao primjer svim političkim nosiocima vlasti.³⁷⁰

Kitab ul-Ali

Po predajama, sadržaj ove knjige Poslanik Muhamed diktirao je Imamu Aliju. U nekim izjavama dvanaest Imama prenose se sadržaji ove knjige. Međutim, danas ova knjiga ne postoji u pisanoj formi.

³⁶⁹ Iako ova knjiga sadrži tumačenje svih ajeta.

³⁷⁰ Annan: Ujedinjene nacije u 21. stoljeću: Govori i prilozi 1997-2003, str.133

Sahife-i Aleviyye

Ovo djelo je zbirka dova Imama Alija. Pisac ove knjige, šejh Abdullah ibn Salih Semahiji el-Bahraini (1665–1723), u njoj je sabrao ukupno 151 dovu.

- **Fatima**

Mushaf Fatima

Fatimina knjiga (Mushaf Fatima), prema alevitskoj tradiciji, djelo je kćerke Poslanika Muhameda. Iako se riječ mushaf u arapskom jeziku upotrebljava kao sinonim za Kur'an, ova knjiga ne sadrži kur'anski sadržaj. Prema alevitskoj tradiciji, nakon smrti Poslanika Muhameda, Džibril je poslat Fatimi kako bi je utješio i obavijestio o budućim događajima. Ona je prepričala znanje koje joj je Džibril otkrio Imamu Aliju, koji je zabilježio sadržaj njihovih razgovora. Prema Imamu Muhamedu el-Bakirom, objava koju je Fatima primila nije usporediva sa poslaničkom porukom, već je bliža inspiraciji koju su dobile Merjem³⁷¹, Johebed³⁷² ili pčele³⁷³. Budući da danas ne postoji izdanje ovog djela, vremenom se uvriježilo pogrešno uvjerenje da sljedbenici Ehli Bejta vjeruju u iskrivljeni Kuran – Fatimin Musaf, iako knjiga ne sadrži kur'anske reference.

- **Imam Zejn el-Abidin**

Sahifet es-Sedždžadije

Sahifet es-Sedždžadije je najstarija sačuvana alidijska knjiga nakon Kur'ana. Sadrži zbirku 54 molitve Imama Zejn el-Abidina, četvrtog Imama. Budući da je nakon tragedije na Kerbeli imam Zejn el-Abidin doživio najveće represalije umejadskih vlasti te proveo mnogo godina po njihovim zatvorima, odabrao je molitvu kao formu kojom je odgajao ljude. Shodno tome, molitve i zazivanja Boga u ovom djelu odlikuju se visokim jezičkim kvalitetom.

Risalet el-hukuk

³⁷¹ Majka Isaova. Kada su meleki rekli: „A kada meleki rekoše: 'O Merjem, Allah ti javlja radosnu vijest, od Njega Riječ: ime će mu biti Mesih, Isa, sin Merjemin, biće viđen i na ovome i na onome svijetu i jedan od Allahu bliskih.'“ (Sura Al-i Imran, ajet 45/3:45)

³⁷² Majka Musaova: „I Mi nadahnu smo Musaovu majku: 'Doji ga, a kad se uplašiš za njegov život, baci ga u rijeku, i ne strahuj i ne tuguj, Mi ćemo ti ga, doista, vratiti i poslanikom ga učiniti.'“ (Sura el-Kasas, ajet 7/28:7)

³⁷³ Gospodar tvoj je pčelu nadahnuo: „Pravi sebi kuće u brdima i u drveću i u onome što naprave ljudi.“ (Sura En-Nahl, ajet 68/16:68)

Ovo djelo, koje opisuje 50 prava i obaveza pojedinca prema Bogu, bližnjima, pa čak i vlastitim dijelovima tijela, smatra se jednim od najpoznatijih hadiskih djela koja se pripisuju Imamu Zejn el-Abidinu. Prema predaji, Imam Zejn el-Abidin je ovim mudrostima podučio svog vjernog sljedbenika Sabita ibn Dinara (Ebu Hamzu el-Sumalija).

- **Imam Muhamed el-Bakir**

Tefsir ul-Kur'an

Iz historijskih bilješki proizlazi da je Imam Muhamed Bakir napisao tumačenje Kur'ana. Ovo djelo je prenio zejdijski Jarudi-predvodnik Ebu Jarud Zijad ibn Mensura³⁷⁴. Stoga se ovaj tefsir također naziva i Tefsir ul-Ebu Jarud. U djelu Tefsir ul-Qommi 205 puta se citira iz ovog djela.

Još dva djela od Imama Muhameda Bakira su:

- Pismo Umejadu Saad ul-Hayyr
- Kitab ul-Hidaya (Knjiga upute)

- **Imam Džafer Sadik**

Tevhid al-Mufaddal

Ovo djelo sadrži izlaganje koje je Imam Džafer Sadik diktirao svome vjernom sljedbeniku Mufaddalu. U njemu Imam Džafer Sadik objašnjava čuda stvaranja kod ljudi, životinja i u prirodi.

Traktat (arapski: Risaala) od Džabir ibn Hajjana.³⁷⁵

U ovoj knjizi obrađuje se 500 tema koje je Džabir ibn Hajjan prenio i zapisao u jednoj knjizi.

Pismo njegovim vjernim sljedbenicima

Šejh Kulejni se na ovo pismo osvrnuo u svojoj knjizi Reuda al-Kafi o Ismail ibn Džabiru.

³⁷⁴ Ebu Džarud Zijad ibn Mensur bio je utemeljitelj struje Džarudija unutar zejdijske škole u osmom stoljeću i istovremeno savremenik Imama Muhameda Bakira. On i njegovi sljedbenici, za razliku od zejdija Butrita, nisu priznali halifat Ebu Bekru, Omeru i Osmanu. Džarudije su zastupale stav da se među nasljednicima Imama Hasana i Imama Husejna nalazi legitimni Imam kojeg se ima priznati, koji je uzeo mač i porazio vladavinu Umejada. Na osnovu toga su Džarudije podržale ustanak Zejda 740. godine kao i brojne kasnije alevitske pobune, kao što je ustanak Muhameda Nafs az-Zakije 762. godine. Zbog toga neki historičari Ebu Džaruda ne smatraju odanim sljedbenikom Imama Muhameda Bakira, pošto ga nije smatrao legitimnim Imamom.

³⁷⁵ Džabir ibn Hajjan bio je učenik i vjerni sljedbenik Imama Džafera Sadika. Rođen je 721. godine u gradu Tusu, na sjeveroistoku Irana. Budući da je otkrio 19 hemijskih elemenata i njihove specifične težine, njega se do danas smatra jednim od utemeljitelja hemije. Pri tome, njemu se pripisuje otkriće carske vode, spoja koji je u Evropi postao poznat tek u 13. stoljeću. Umro je 815. godine u iračkom gradu Kufi.

Traktat o Kijasu (komparativni zaključak) i Reju (zaključak)

Druga djela koja se pripisuju Imamu Džaferu Sadiku:

- Rasprava o ekonomskim prinosima
- Rasprava o finansijskim prihodima
- Traktat o sufijskim pokretima njegovog perioda
- Traktat o stvaranju čovjeka
- Traktat o objašnjavanju religioznih prava
- Pismo Nedžašiju (Upravitelju Ahvaza)
- Upute Abdullah ibn Džandebu
- Knjiga koja sadrži mudrosti Imam Džafer Sadika

Knjiga Imama **Džafera Sadika Bujruk (Zapovjedi Imama Džafera Sadika)**, kako se često pogrešno pretpostavlja, ne potječe od Imama Džafera Sadika. Porijeklo Imam Džafer Sadik – Bujruk u 16. stoljeću, detaljnije je objašnjeno u sljedećem poglavlju (Posebni Izvori).

• **Imam Ali Riza**

Traktat o Muhamed ibn Sinanu

U ovoj knjizi se pobliže objašnjavaju vjerske zapovjedi, koje je Imam Riza napisao za Muhamed ibn Sinana.

Sljedeća djela koja se pripisuju Imamu Aliju Rizi :

- Traktat o mudrosti i pozadini vjerskih zapovjedi
- Traktat upućen abasdiskom halifi Abdullahu al-Mamunu o Islamu i šerijatu
- Rasprava upućena abasidskom halifi Abdullahu al-Memunu
- Tibb ur-Riza (Medicina od ar-Rize)
- Fikh ur-Riza (Jurisprudencija od ar-Rize)
- Sahifat ur-Riza (Stranice od ar-Rize)

• **Imam Ali Naki**

Tefsir ul-Kur'an

Historijski izvori govore da je Imam Ali en-Naki napisao tumačenje Kur'ana u 120 tomova. Međutim, sporno je je li ova knjiga identična Tefsir el-Askeri, koji se pripisuje Imamu Hasanu

el-Askeriju. Dok neki autori smatraju da je Tefsir el-Kur'an samo jedan dio Tefsir el-Askerija, drugi autori su čvrstog uvjerenja da se radi o zasebnom djelu.

Rasprava o Džabru³⁷⁶ i Tafvidu³⁷⁷

U ovom djelu prvenstveno se objašnjava jesu li ljudska djela nametnuta od Boga ili čovjek ima slobodu izbora da sam čini djela. Zato Imam Ali en-Naki opisuje razliku između prisile (džabr) i prepuštanja (tefvid), kao i između predodređenja (kadar) i sudbine (kada).

Druga djela koja se pripisuju Imamu Aliju en-Nakiju su:

- Odgovor na pitanje kadije Jahje
- Traktat o pojašnjenju vjerskih pitanja

Imam Hasan el-Askeri

Tefsir el-Askeri

Prvi svezak ovog kur'anskog komentara dostupan je danas i obuhvata, uz prvu suru Kur'ana (El-Fatiha), dijelove druge sure (El-Bekare: 2:1–114, 2:158–179, 2:198–210 i 2:282). Prema predaji, Jusuf ibn Muhamed ibn Zijad (Ebu Jakub) i Ali ibn Muhamed ibn Sejjar (Ebu Hasan) sastavili su ovo djelo pod vodstvom Imama Hasana el-Askerija tokom razdoblja od sedam godina. Stoga se može pretpostaviti da je ovo djelo trebalo biti još opsežnije od verzije koja je danas dostupna. Istovremeno, mora se spomenuti da neki savremeni kur'anski učenjaci dovode u pitanje autentičnost ovog djela.

Risala al-Manqaba wal-Muqnia³⁷⁸

Ova poslanica obrađuje teme halala (dozvoljeno) i harama (zabranjenog) prema islamskom zakonu. Druga djela koja se pripisuju Imamu Hasanu al-Askeriju:

- Pismo koje je Imam Hasan al-al-Askeri napisao Ishaqu ibn Ismailu Nišaburiju
- Mudrosti i pisma.

³⁷⁶ Džabr: doslovno: prisila. Stav da je čovjek potpuno prisiljen u svojim djelima. Sve što radi, radi isključivo Allahovom voljom, bez stvarnog izbora. Po ovom shvatanju, čovjek nema pravu odgovornost jer nema stvarnu slobodu djelovanja. Historijski se veže za Džebrije i smatra se krajnošću.

³⁷⁷ Tafvid: doslovno: prepuštanje. Stav da je Allah potpuno prepustio čovjeku njegova djela, pa čovjek sam stvara svoja djela bez Allahove direktne uloge. Ovdje se naglašava ljudska sloboda do te mjere da se umanjuje Allahova sveobuhvatna moć. Ovo je druga krajnost, vezana za neke racionalističke škole.

³⁷⁸ Poslanica o vrlini i uvjerljivom dokazu.

6.1.4 Predaje (hadisi)

U ovom poglavlju će biti predstavljena neka, među današnjim alevitima većinom nepoznata, ali izuzetno vrijedna djela. Naprimjer odlomci spomenuti u arapskim djelima kao što su Kafi³⁷⁹, Faqih³⁸⁰, Tahzib³⁸¹, Istibsar³⁸², Bihar ul-Enver³⁸³, Tewhid³⁸⁴, Tuhaf ul-Ukul³⁸⁵, Imamat³⁸⁶, al-Iršad³⁸⁷, Safi Tefsir³⁸⁸ i Ajjaši³⁸⁹, također su reproducirani na turskom jeziku u spomenutim zapovjedima Imama Džafera Sadika. Ovi izvorni tekstovi, koje su aleviti nekada cijenili i poštovali, izgubljeni su zbog stoljeća ugnjetavanja i progona pod tiranskom vlašću i tako su pali u zaborav. Stoga ćemo, iako samo površno, raspraviti neka od ovih djela.

Knjige

Kafi, Faqih, Tahzib kao i Istibsar smatraju se pouzdanim zbirkama hadisa za donošenje zaključaka o vjerovanjima sljedbenika Ehli Bejta. Budući da su najpoznatije sunitske zbirke hadisa – Sahih Buhari, Sahih Muslim, Sunen ibn Madže, Sunen Ebu Davud, Sunen Tirmizi i Sunen Nasai – nosile naslov Kutub us-Sitte (šest knjiga), ova četiri glavna izvora za Imamijsku tradiciju nosila su naziv Kutub al-Arbā (četiri knjige). Dvotomni kur'anski komentar Tefsir al-Ajjaši, koji se smatra još jednom izvornom knjigom na arapskom jeziku, napisao je u devetom stoljeću učenjak Ajjaši.

Iako su spomenuti izvorni tekstovi prije korišteni kao referentna djela alevitskih učenjaka i mislilaca, danas su uglavnom pali u zaborav, a mnogi ih čak smatraju šiijskim (a ne alevitskim) djelima. U informacijskom dobu, gdje čovječanstvo ima bezbroj načina da pristupi znanju svojih predaka, dužnost je svakog alevita istražiti izvore tradicija koje su nam

³⁷⁹ Ebu Džafer Muhamed ibn Jakub (Šejh Kulajni): *Al-Kafi* (Dovoljno). *Al-Kafi* se dijeli na sljedeća tri dijela: *Usul al-Kafi*, *Furu al-Kafi* i *Rawdat al-Kafi*.

³⁸⁰ Ibn Babawajh (Šejh Saduk): Man la jahduruhu u-Faqih (Ono što je izvan dohvata pravnih učenjaka)

³⁸¹ Ebu Džafer Muhamed ibn Hasan at-Tusi: Tahzib al-Ahkam (Odbor za pravne odluke)

³⁸² Ebu Džafer Muhamed ibn Hasab at-Tusi: Ali-istibsar fi ma ikhtulifa fihi min al-Akhbar (Razmatranje spornih predaja)

³⁸³ Muhamed Bakir Medžlisi (Allame Medžlisi): Buhar al-Anwar (Okean svjetlosti)

³⁸⁴ Ibn Babawajh (Šejh Saduk): Et-Teuhid (Jedinstvo Božije)

³⁸⁵ Hasan ibn Ali ibn Šuba al-Harrani: Tuhaf ul-Uqul (Dar razumnom)

³⁸⁶ Hasan ibn Jusuf ibn Alli ibn Mutahhar (Allama Hilli): al-Imamat (Imamat)

³⁸⁷ Muhamed ibn Muhamed ibn Numan al-Bagdadi (Šejh Mufid): Kitab ul-Iršad (Knjiga upute)

³⁸⁸ Muhsin Muhamed al-Kašani (Fayd al-Kašani): al-Safi fi Tafsir Kalam-Allah al-Wafi

³⁸⁹ Abu al-Nadir Muhamed ibn Masud al-Ajjaši al-Salami al-Samarqandi. Bio je poznati učenjak, kao sakupljač i prenosilac hadisa. Kao bivši sunitski učenjak, Ajjaši je prihvatio kao učenik Šejh Saduka pravnu školu sljedbenika Ehli Bejta.

stigle od Ehli Bejta. Samo se na taj način mogu spriječiti tuđe manipulacije i asimilacija alevizma. Alevite nipošto ne bi trebalo odvratiti od ideje da bi bavljenje ovim izvornim tekstovima moglo dovesti do šiizacije alevita, samo zato što ih danas prvenstveno citiraju šiiti. S obzirom na to da ova djela sadrže riječi i tradicije Poslanika Muhameda i dvanaest Imama, svakako je nemoguće kategorizirati ove knjige kao šiitske, sunitske ili alevitske. Naprotiv, ova djela su korisna svim muslimanima u rješavanju kontroverznih vjerskih pitanja, jer sadrže detaljne informacije Ehli Bejta o historijskim događajima. Pretpostavke da bi se aleviti mogli šiitizirati ili čak sunitizirati ukoliko se budu bavili ovim stotinama godina starim islamskim izvorima su neosnovane. Ako progon i ubistva koja su počinili umejadski, abasidski, seldžučki i osmanlijski vladari, kao i pokušaji sunitizacije i asimilacije turske države, nisu odvratili alevite od njihovih uvjerenja, onda znatiželjni aleviti sigurno neće odstupiti od tradicionalnog alevizma jednostavnim traženjem autentičnih i provjerljivih izjava od Ehli Bejta. U tom smislu, Hadži Bektaš Veli poziva vjernike da uvijek teže znanju:

„Put bez znanja završava u tami.“

6.2 Posebni izvori

Sljedeće poglavlje predstavlja sekundarne izvore alevita napisane na turskom jeziku. Ova vrijedna djela, temeljena na Kur'anu i učenjima Ehli Bejta, napisana su kako bi anadolijskim alevitima omogućila pristup temeljima svoje vjere na vlastitom jeziku. Kao i stariji izvori alevizma, koji su prvenstveno napisani na arapskom, i ova djela su nastala u izuzetno teškim okolnostima.

6.2.1 Upute (buyruk)

Prakse i ceremonije alevitizma detaljno su objašnjene kao male (kučuk) i velike (bujuk) upute, koje su pisane u različitim vremenskim periodima. Velika uputa se pripisuje šejhu Safiju, utemeljitelju safavijskog reda i pretku Šah Ismaila. Druge, među današnjim alevitima poznate upute, formiraju male upute.

Ovo vrijedno izvorno djelo danas je široko poznato pod nazivom Imam Džafer-i Sadik Buyruk (Zapovijedi Imama Džafera es-Sadika). Također se spominje pod naslovima Menakib ul-Esrar Behcet ul-Ahrar (Priče o tajnama i slobodama), Menakib-i Evlija (Povijest evlija), Futuvenama (Knjiga rodoslovlja) i Risale-i Šejh Safi (Priče šejha Safija).

U četrdeset poglavlja bliže se objašnjavaju suštinske osnove i tradicije tokom džem ceremonije. Nadalje, sadrže razne molitve, takozvane molitve za poziv ruže (Gulbang), pravila i upute za društveni život te kazne za prekršaje. Stoga se ovaj izvorni materijal prvenstveno koristi kao nastavno i referentno djelo za alevitske učenjake (rehber, pir, muršid).

Prema istraživanju Abdulbakija Golpinarlija i Mehmeta Fuata Koprulua, prva izdanja Buyruka mogu se pratiti do 16. stoljeća. Pretpostavlja se da je prvi primjerak ovog vrijednog remek-djela napisao učenjak po imenu Bisati za vrijeme vladavine safavidskog vladara Šaha Tahmasba (1524–1576). Ovi spisi, napisani na osmanskome (turskom) pismu, više su puta prepisivani od svog početnog zapisa do 19. stoljeća i razmjenjivani među najutjecajnijim sejjidskim porodicama (Ocak).

Budući da izdanja Buyruka u posljednje vrijeme objavljuju razni izdavači uz dodatke i redukcije, zasigurno je od najvećeg značaja da se objavi prevod baziran na originalu. Pri usporedbi sa ranijim primjercima biva jasno da su originalnom djelu tokom vremena dodata nova poglavlja. Tim slijedom, ovo vrijedno djelo danas je dostupno u više verzija. Iznenadjujuće, neke „alevitske“ organizacije koje se smatraju neislamskim pozivaju se na Buyruk, iako se u njemu obrađuju isključivo islamske teme. Istovremeno, turska Direkcija za vjerska pitanja (Diyanet) je 1984. godine naložila islamskim teolozima da naučno transkribuju i prevode alevitske izvore, kako bi izgradili naklonost i simpatije među alevitskim stanovništvom. Nadovezujući se na Diyanetov prethodni pristup alevitima, ti pokušaji zbližavanja prvenstveno imaju za namjeru daljnju tursku asimilaciju. Posljedično tome, različite verzije moraju se nanovo preispitati i tumačiti sa alevitsko-islamske perspektive, jer ni neislamski ni sunitski pristup knjizi neće dati zadovoljavajuće rezultate za buduće generacije.

6.2.2 Traktati (Risala)

Traktati (arapski: risala) poznatih alevitskih vjerskih učenjaka i mudraca predstavljaju još jedan važan i značajan dio alevitskog izvornog materijala. Mnogi revolucionarni traktati na arapskom, perzijskom ili osmanskome (turskom) jeziku još uvijek čekaju prevod na pristupačniji jezik u arhivima brojnih knjižnica. Stoga je još važnije da se nabava ovih vrijednih rukopisa ne prepusti onima koji žele nametnuti vlastite političke ideologije alevizmu i iskoristiti trenutni nedostatak znanja među većinskim dijelom alevita.

Svaki pobožni alevit mora biti svjestan vlastite odgovornosti i učiniti sve što je moguće da prevede ove vrijedne tekstove na razumljiv jezik. Važno je da se ova djela prevedu na turski, njemački i engleski jezik. Uostalom, većina mladih ljudi u Evropi više nije dovoljno upoznata sa maternjim jezikom svojih roditelja, pa potreba za njemačkom i engleskom književnošću stalno raste. Neke od ovih tekstova napisali su sljedeći alevitski mudraci i učenjaci:

Ebu Futuh Radi:³⁹⁰

³⁹⁰ Ebu al-Futuh Džemaludin Husejn al-Nišaburi al-Radhi bio je poznati šiitski tumač i učenjak hadiskih znanosti dvanaestog stoljeća. Rođen je 1078. godine u gradu Rayu (današnji Teheran) i unuk je Nafia ibn Budayla ibn Waqa al-Huza'ia. Njegovo djelo *Al-Risalat al-Husniyya* ubraja se među glavne izvore anatolijskih alevita. Umro je 1161. godine.

1. Minhadž ul-Manadžih
2. Rawd al-Džinan wa Rawh al-Džinani fi Tafsir al-Kur'an
3. Risala al-Husniyya
4. Risala Yohanna
5. Ruh al-Ahbab wa Ruh al-Albab fi Šarh al-Šihab
6. Tabsirat al-Awam fi Ma'rifet Maqalat al-Anam

- Baba Iljas Horasani:

1. Džihadname

- Hadži Bektaš Veli:

1. Fevaid
2. Makalat
3. Makalat-i Gaybiyye ve Kelimat-i Ayniyye
4. Šerh-i Besmele
5. Tefsir al-Fatiha

- Kaygusuz Abdal:

1. Eliname
2. Budalaname
3. Dil-Guša
4. Kitab-i Miglate
5. Risale-i Kuygusuz Abdal
6. Sarayname
7. Vudžudname

- Mehemmed Fuzuli:

1. Hadikat us-Sueda
2. Husn-u Ašk
3. Rind-u Zahid
4. Matla ul-Itiqad fi Ma'rifet il-Mabde wal-Mead

- Seyyid Husejn Gajbi:³⁹¹

1. Šarh-u Hutbet il-Bayan

³⁹¹ Seyyid Husejn Gajbi bio je alevitski mislilac, duhovnjak i autor koji je živio u Anatoliji u 15. stoljeću. Poznato je da je njegovao velike simpatije i naklonost prema Safavidima. Njegovo poznato djelo *Hutbet ul-Beyan* sve do sadašnjeg vremena uživa veliki ugled među alevitima.

- Virani Abdal:

1. Fakrname
2. Ilm-i Cavidan
3. Risala-i Virani

Nakon što su 1826. godine sve bektašijske ustanove u Osmanskom Carstvu oduzete, bektašijski su autori u 20. stoljeću napisali brojna djela kako bi osnove alevitsko-bektašijskog puta prenijeli sljedećim generacijama.

6.2.3 Upute za djelovanje (Erkanname)

U djelima tipa Erkanname prvenstveno se obrađuju bektašijski principi unutar džem ceremonije. Stoga se tu obrađuju i detaljno opisuju teme iz svakodnevnog života, kao što su molitva, sklapanje braka, obrezivanje, davanje imena djetetu i klanje kurbana. Budući da su skoro svi postupci svakodnevnog života, kao što su molitve i zazivanje blagoslova, preneseni iz priručnika i referentnih djela, ovakva literatura je od iznimne važnosti.

Prema riječima stručnjaka, prvo Erkanname djelo izdato je pod imenom Erkanname-i Bektašijan ve Kavanin-i Yeničarian. Sve do 1826. godine sve bektašije su ovo djelo koristili za svoje dnevne molitve. Nakon što su Pir Hamdullah Čelebi (1767–1836) i Mehmed Nebi Dedebaba (1813–1834) smijenjeni sa svojih položaja poglavara dergaha Hadži Bektaša, djelo je izmijenio šejh Mehmed Said Efendija, predstavnik nakšibendijskog reda. Međutim, pretpostavlja se da je djelo kasnije preradio bektašijski vođa Mehmed Ali Hilmi Dedebaba (1842–1907) uz pomoć derviša po imenu Sitki Istanbuli. Od ovog djela do danas su ostala još tri originalna primjerka, dok je jedan primjerak bio u posjedu Bedrija Noyana Dedebabe (1912–1997)³⁹² i Turgut Koća Halifebabe (1921–1997), jedno izdanje nalazi se u Bibliotheca Apostolica Vaticana u Rimu. Nakon posljednje obrade djela nastala su brojna nova Erkanname djela, pri čemu će neka biti dolje navedena:

- Adab ve Erkan-i Bektašijje
- Adab-i Tarikat-i Bektašijje
- Erkan-i Bektašijje
- Risale-i Erkan-i Bektašijje
- Silsilname-i Tariktaname-i Bektašijje

³⁹² Badri Noyan Dedebaba rođen je 1912. godine u gradu Serresu, u grčkoj regiji Centralne Makedonije. Bio je posljednji zajednički duhovni vođa (*dedebaba*) bektašija u Turskoj. Nakon što je završio osnovno obrazovanje u provinciji Samsun, studirao je medicinu na Univerzitetu u Istanbulu, gdje je diplomirao 1937. godine. Nakon što je 1940-ih godina predavao na Medicinskom fakultetu u Istanbulu, 1950-ih se nastanio u Izmiru, gdje je radio kao ORL ljekar. Na dan sultana Nevruza, 21. marta 1960. godine, izabran je za poglavara (*postnišin*) bektašijskog reda. Nakon njegove smrti 1997. godine, došlo je do razilaženja unutar bektašijskog reda, što je rezultiralo time da jedno vrijeme u Turskoj postoje dvojica dedebaba.

6.2.4 Priče o čudima, životne priče i herojska djela (Menakibname, Velayatname & Futuветname)

Takozvane Menakibname i Velayatname još su jedni važni pisani izvori alevita koji uglavnom sadrže informacije o djelima i čudima poznatih alevitskih učenjaka. Prvi Menakib spisi (arap. Kitab Menakib) napisani su u devetom stoljeću, a u njima su opisane vrline i odlike poslanika Muhameda i njegovih najbližih povjerenika. Naprimjer, poznato djelo Menakib Al-i Ebu Talib napisao je učenjak Ibn Šahrašub (1095–1192) o zaslugama porodice Ebu Taliba, oca Imama Alija. U jedanaestom i dvanaestom stoljeću napisano je više djela mudrosti od poznatih mistika. Posebno je vrijedno napomenuti da su ova djela od velikog značaja zbog svog folklornog, turskojezičnog sadržaja i njihovog odraza na kulturnu, ekonomsku i društvenu strukturu tog vremena. Neke od ovih Velayatnama i Menakibnama djela su u nastavku:

- Menakib al-Kudsijje fi Menasib al-Unsijje – Baba Iljas Horasani
- Velajetname-i Hadži Bektaš Veli
- Menakibname-i Karača Ahmed Sultan
- Velayetname-i Osman Baba
- Velaytename-i Abdal Musa
- Menakibname-i Kaygusuz Abdal
- Velayetname-i Sejid Ali Sultan
- Velayetneme-i Sućadedin Baba
- Velayetname-i Koyun Baba
- Velayetname-i Demir Baba
- Velayetname-i Veli Baba

Daljnja djela, koja u prvoj liniji opisuju herojske podvige Imama Alija, nazivaju se Futuветname. Naziv za ovu vrstu pisanja potiče od Poslanikove izjave: „La feta illa Ali, la sejfa illa Zulfikar“ („Nema junaka kao što je Ali i nema sablje kao što je Zulfikar“). Iako su od 9. do 16. stoljeća napisana brojna djela u ovoj oblasti, naredna četiri djela su za alevite od najvećeg značaja:

- Futuветname-i Yahya Burgazi
- Futuветname-i Sejjid Husejn Gajbi
- Futuветname-i Džafer Sadik
- Miftah ud-Dekaik fi Beyan ul-Futtuvv vel-Hakaik

6.2.5 Dozvole (idžazetname)

Idžazetname (Dozvola) prvenstveno su izdavane kako bi se osobi dalo pismeno ovlaštenje za prenošenje hadisa (predaja) i za reprodukciju određenih djela. Prema riječima učenjaka, Imam Džafer Sadik je izdao prvu Idžazetnamu, kojom je ovlašten prenos predaja, vjernom sljedbeniku po imenu Salim ibn Ebu Hajje 796. godine. S obzirom na to da zaštita poruke zahtijeva ne samo sadržaj predaje već i kredibilitet prenosioca (arap: Rawi), ova praksa postaje razumljivija. Međutim, u alevizmu su Idžazetname sve češće izdavale dvije glavne obrazovne institucije (Dergah)³⁹³ nakon jedanaestog stoljeća. Iako su, u pravilu, samo Sejjid-i Sadat, Evlad-i Resul odnosno Odžakzade mogli dobiti Idžazetnamu kako bi vršili lidersku i smjerničku funkciju (Muršidluk) unutar alevitske zajednice, ovo pravilo je vremenom ublaženo tako da je vjerski kompetentnim talipima (odnosno sljedbenicima) također bilo dozvoljeno da prime Idžazetname kako bi obavljali određene zadatke unutar alevitske zajednice. Dok se s vremenom termin dede počeo odnositi na Sejjide³⁹⁴, termin dikme dede uveden je kako bi se razlikovali od nesejidskih dedea.

Primjer idžazetname koje su usavršavane tokom stoljeća, uglavnom su uređene na sljedeći način:

- Bismilla³⁹⁵
- Slava Bogu
- Molitva za mir i blagoslov na Poslanika Muhameda i Dvanaest Imama
- Kur'anski ajeti i hadisi
- Principi alevijskog puta (tur. Yolun ilkleri)
- Porijeklo, položaj i zasluge izlagača
- Porijeklo predaka, status i zasluge osobe kojoj je izdata Idžazetnama
- Razlog za izdavanje Idžazetname
- Molitve (dove)
- Svjedoci koji su bili prisutni pri izdavanju Idžazetname
- Datum, potpis i pečat izdavaoca

Mnoge idžazetname koje su napisane na osmanskome jeziku prevedene su u međuvremenu (što profesionalno, što amaterski) na moderni turski jezik.

³⁹³ Dergah Hadži Bektaš Velija u današnjoj Turskoj i Dergah Šejh Safija u današnjem Iranu.

³⁹⁴ Dede (Veliki predak) je skupni izraz za alevitske vjerske ličnosti, koji se primjenjuje za muršide, pirove i rehbera.

³⁹⁵ Bismila, naziv islamske uvodne formule: U Ime Allaha Milostivog Samilosnog (arapski: bismi-llahi-r-rahmani-r-rahim).

6.2.6 Porodična stabla (Secere)

Secere (porodična stabla) služe prvenstveno kao dokaz o porijeklu sejidskih porodica, preko dvanaest Imama, sve do Poslanika Muhameda. Samo oni pojedinci koji mogu pratiti svoje porijeklo do Poslanika Muhameda bez praznina i s povjerljivim dokazima u alevitskoj tradiciji se nazivaju Sejjid-i Sadat, Evlad-i Resul ili Odžakzade (potomak sejidskog plemena). Pošto sejjidske porodice unutar alevizma moraju preuzeti vodeće uloge u predvođenju (muršitluk), bili su prinuđeni pokazati dokaze za svoje porijeklo. U prvoj liniji ova porodična stabla služe za zaštitu od infiltracije pojedinaca koji se predstavljaju kao sejjidi. Različiti dokumenti sejjida nastali tokom vijekova uglavnom slijede sljedeći obrazac:

- Bismila
- Molitva za mir i blagoslov na Poslanika Muhameda i Dvanaest Imama
- Kur'anski ajeti i hadisi
- Principi alevijskog puta
- Rodoslovlje osobe koja izdaje primjerak Secere
- Dove
- Svjedoci koji su bili prisutni pri izlaganju Secere
- Datum, potpis i pečat izdavaoca

Mnoga porodična stabla napisana na osmanskoturskom jeziku sada su prevedena na moderni turski jezik. Najstarije porodično stablo do danas datira iz 1150. godine.

6.2.7 Husnija konslutacije (Husniye Risalesi)

Ovo jedinstveno remek-djelo je klasik među alevitskim izvornim djelima. Iako je knjiga prvi put odštampana 1881. godine u Kairu i na arapskom jeziku širim masama učinjena dostupnom, dostupne su i neke starije verzije u rukopisu na perzijskom jeziku. Po usmenim predajama je Ibrahim Asterabadi 1551. godine, koji je porijeklom Perzijanac, u Damasku našao mogućnost da se upozna sa arapskom verzijom knjige i napravi prepis, koji je on potom učinio dostupnim sljedbenicima Ehli Bejta (perzijskog porijekla), željnim znanja. Pošto je knjiga izvorno napisana na arapskom jeziku, nije mogla biti od koristi sljedbenicima perzijskog porijekla. Slijedom toga, traktat je na njihov zahtjev preveden na perzijski. Kako bi se omogućio pristup najvećim dijelom neobrazovanom stanovništvu, velika pažnja se obratila kod prevoda na jednostavnost i lako razumljive formulacije. Od tada je knjiga više puta sa arapskog originala, odnosno perzijskog/osmanskog, prevedena na turski jezik. Knjiga opisuje konsultacije između Husnije, sluga Imama Džafera Sadika i vodećih sunitskih učenjaka tog vremena. Duboko odan Ehli Bejtu, dvadesetogodišnji Husnija je u debatama razotkrio neznanje sunitskih dvorskih učenjaka, čime je uspio razotkriti abasidskog vladara Haruna al-Rašida (763–809) u njegovoj palači pred svojim vodećim zapovjednicima, pisarima

i državnim dužnosnicima. Konačno, islamsko vodstvo Haruna al-Rašida, tj. halifat, indirektno je dovedeno u pitanje kada je sunitsko vjersko uvjerenje dovedeno u pitanje u okvirima debate. Činjenica da je neustrašivo predstavljao svoja uvjerenja dvorskim učenjacima željnim moći i tiranskom halifi ostaje motivacija za pobožne alevite da se i danas suprotstave nepravdi i tiraniji.

6.2.8 Alevitske pjesme (teopoezija)

Ovaj oblik alevitske teopoezije prije svega se sastoji od pjesama poznatih alevitskih pjesnika i mislilaca koji izražavaju uvjerenja alevizma u poetskom obliku. Bezbroj pjesama napisano je na turskom jeziku, a one se bave jedinstvom Boga, poslanstvom Muhameda, Alijevim Imamatom i ostalih jedanaest Imama. Međutim, ideološki motivisani pojedinci danas pokušavaju reinterpretirati, a u nekim slučajevima i prepisati ove vrijedne alevitske pjesme, time relativizirajući i potpuno negirajući nepogrešivo islamsko uvjerenje i alevitsko-islamsko priznanje pjesnika. I ovdje oni koji teže takvim ciljevima očito djeluju s političkom agendom. Samo iskreno i naučno ispitivanje alevitske poezije može definitivno utvrditi da su veliki pjesnici alevizma bili odani sljedbenici Poslanika Muhameda i njegove čiste porodice, Ehli Bejta, te da su živjeli, radili i umrli kao alevitski muslimani. Nažalost, ove vrijedne pjesme se danas namjerno tumače prema hirovima i koriste kao štit za određene druge ideologije, što u konačnici predstavlja duhovnu eksploataciju alevizma. Stoga je dužnost svakog alevitskog sljedbenika da se bavi ovim neprocjenjivim pjesmama i nastoji razumjeti njihova prava značenja. Samo na taj način alevizam se može zaštititi od utjecaja stranih i zlonamjernih ideologija. Naprimjer, sljedeće vrste alevitske teopoezije mogu biti primijenjene:

- Nat: napisano u čast Poslanika Muhameda
- Duvazdeh-i Imaman / Duvaz: posebna forma ilahije koja spominje i veliča dvanaest Imama i odanost Ehli Bejtu
- Deyiş: fraza, pjesma ili himna koja se pjeva zajedno prilikom obreda Džem
- Nefes: dah
- Devriyye: pjesme koje opisuju duhovni krug povratka (seyr i suluk)
- Destan: ep
- Nevruzije: pjesma napisana povodom Nevruza
- Ayetname: stih
- Miradžname: spjev o Miradžu
- Zulfikarname: spjev o Zulfikaru
- Taşlama: satira
- Şathiyye: izražavanje duhovnog zanosa (vedžd)
- Mersiye (Ağıt): elegija (lament)

7 Obrazovne ustanove (dergah) alevizma

U sljedećem poglavlju detaljnije će se raspravljati o povjesti važnih vjerskih središta (tr. cdergah)³⁹⁶, koja su za razvoj i unapređenje alevizma odigrala važnu ulogu. Prva i najvažnija obrazovna institucija (arap. madrasa) muslimana je nesumnjivo Mesdžid un-Nabi (Poslanikovo mjesto molitve). Kako su se politički pritisak i odmazde mekanskih mnogobožaca prema muslimanima povećavali, Poslanik Muhamed je emigrirao u Jesrib³⁹⁷ 622. godine, gdje ga je toplo dočekaio veliki broj pobožnih muslimana. Iako su mnogi stanovnici bili u bliskim ekonomskim vezama s mekanskim idolopoklonicima, sumnjičavo su gledali na rastući utjecaj muslimana u Jesribu i stoga su planirali brojne spletke protiv njih. Poslanik je mogao mnogo slobodnije širiti učenje islama u Jesribu. Posljedično, ime grada Jesrib preimenovano je u Medinat un-Nebi (Poslanikov grad). Međutim, s vremenom se počela koristiti skraćena verzija, Medina. Kao rezultat toga, ubrzo nakon njegovog dolaska, Mesdžid un-Nabi je izgrađen kao središte za rješavanje političkih, vjerskih i društvenih pitanja muslimana. Budući da su Poslanik Muhamed, Imam Ali i mnogi muslimani izgradili svoje domove uz Mesdžid un-Nabi, muslimani su se tamo svakodnevno okupljali kako bi se molili s Poslanikom i produbili svoje islamsko znanje. Na taj je način Mesdžid un-Nabi postao prva obrazovna institucija u kojoj su prvi muslimani naučili osnove islama. Nakon što je Poslanik Muhamed preminuo 632. godine i pokopan u dvorištu svoje kuće, prva trojica halifa nastavila su koristiti Mesdžid un-Nabi u svrhu upravljanja političkim, vjerskim i društvenim poslovima muslimana. Budući da su halife politički marginalizirale imama Alija, prenošenje znanja je tokom tog razdoblja uglavnom stagniralo. Iako su prva trojica halifa srušila okolne kuće Poslanikovih ashaba kako bi proširili područje Mesdžid un-Nabija, oklijevali su oštetiti kuću Fatime Zehre i Imama Alija, koja je imala izravan pristup Mesdžid un-Nabiju. Tek za vrijeme četvrtog Imama Zejna al-Abidina, umejadski halifa Velid ibn Abdulmelik (668–715) srušio je kuću Fatime Zehre i Imama Alija kako bi obuzdao politički i vjerski utjecaj Ehli Bejta. Kada su se politički oslabljeni umejadi upleli u borbu za vlast sa sve moćnijim Abasidima, peti Imam Muhamed Bakir i šesti Imam Džafer Sadik pronašli su način da neko vrijeme podučavaju studente raznim predmetima u džamiji Mesdžid un-Nabi. Tokom tog razdoblja, Imam Džafer Sadik, osim islamskih predmeta poput arapske književnosti, kur'anske egzegeze (tefsir), jurisprudencije (fikh) i osnova vjere (kalam), obučavao je i brojne studente u prirodnim znanostima poput matematike, fizike, hemije i medicine. Među njegovim

³⁹⁶ Dergah, odnosno tekija, centar je sufijskog bratstva (tarikata) i znači mjesto povlačenja i skloništa. Rjeđe se naziva samostanom, jer dergah nije uporediv s kršćanskim konceptom samostana. Tamo se prvenstveno održavaju zikr-ceremonije, tokom kojih derviši zazivaju Boga Njegovim najljepšim imenima. Mjesto može poslužiti za učenje i druge aktivnosti. U brojnim alevitskim dergahima, koji su izgrađeni i djelovali u raznim regijama Bliskog istoka i Balkana od 12. do 19. stoljeća, obrazovali su se mnogi alevitski mislioci, vjerski učenjaci i znanstvenici.

³⁹⁷ Jasrib je izvorni naziv za grad Medina.

najpoznatijim studentima bio je Džabir ibn Hajjan (721–815), koji je iza sebe ostavio značajan opus djela o prirodnoj filozofiji, alhemiji i medicini.

Ali nakon što su Abasidi učvrstili svoju moć, prenos islamskog znanja je sistematski sprječavan tako što su sljedeći Imami zatvarani ili držani u kućnim pritvorima pod nadzorom. Pri tome, Abasidi su promovirali osnivanje brojnih (sunitskih) pravnih škola, od kojih su neke osnovane u ime bivših učenika Imama Džafera Sadika, kako bi produbili postojeća neslaganja među muslimanima. Posljedično, broj studenata koji su tražili znanje o Ehli Bejtu naglo je opao. Kada su Abasidi, slijedeći umejadsku tradiciju, počeli zloupotrebjavati džamije i obrazovne institucije (medrese) u političke svrhe, svi muslimani koji su im bili suprotstavljeni isključivani su iz društvenog života.

Zbog toga su mnogi sljedbenici Ehli Bejta bili prinuđeni od devetog stoljeća da pobjegnu u udaljene regije kao što je Transakosnija³⁹⁸, Taberistan³⁹⁹, Horasan, Indija ili Sjeverna Afrika. Budući da nisu predstavljali ozbiljnu prijetnju abasidskim vladarima u time područjima, mogli su osnovati vlastite vjerske, obrazovne i molitvene centre (dergah). Kao rezultat toga, ljudi u tim regijama došli su u kontakt sa učenjima Ehli Bejta i masovno, svojom slobodnom voljom, prihvatili islam, tako da su neki potomci Imama Alija, poput Hasana ibn Zejda al-Alavija (864–884), čak uspjeli osnovati alidsku državu u Taberistanu. Godine 814. dinastije Idrisida (789–985) i Fatimida (909–1171) također su osnovali potomci Imama Alija koji su pobjegli u sjevernu Afriku. Nakon što su Fatimidi učvrstili svoju moć u sjevernoj Africi, 970. godine naložili su izgradnju poznatog univerziteta Al-Azhar u Kairu kako bi se podučavala doktrina Ehli Bejta. Tek kada je dinastija Ajubida pod sultanom Salahudinom (1137–1193) nasilno okončala vladavinu Fatimida, univerzitet Al-Azhar je 1171. godine pretvoren u sunitsku visoku školu i od tada se smatra najvećom obrazovnom institucijom sunitskog islama. Nekoliko važnih medresa osnovano je i na teritoriji današnjeg Irana i Iraka, koji imaju veliku šiitsku populaciju. Korijene još uvijek važnog islamskog teološkog fakulteta (Hoze-je Ilmije) u Qomu postavilo je u tom kontekstu jemensko pleme Al-Aš'ari, koje je migriralo u Perziju zbog sve veće umejadske represije. Čak i dok su se abasidske politike ugnjetavanja i progona intenzivirale za vrijeme Imama Muse al-Kazima, neki odani sljedbenici Ehli Bejta nisu oklijevali tražiti blizinu Imama i osnovali su male grupe kako bi produbili svoje razumijevanje vjerskih pitanja. Na taj se način s vremenom razvilo nekoliko važnih obrazovnih institucija na području gdje je živjelo i radilo dvanaest Imama. Jedna od tih obrazovnih institucija nesumnjivo je medresa koju je osnovao šejh Mufid za vrijeme dinastije Bujida (930–1062) u Bagdadu. Ova je institucija kasnije izgorjela tokom političkih nemira u Bagdadu i šiitski su je učenjaci u Nedžefu morali obnoviti. Iako tačan datum nastanka oba šiitska teološka fakulteta vjerovatno leži u devetom ili desetom stoljeću, doživjeli su ogroman rast, posebno nakon uspona alevitsko-šiitske dinastije Safavida u 16. stoljeću.

³⁹⁸ Transoksanija (zemlja s onu stranu Oksa) naziv je važne povijesne regije u zapadnoj Srednjoj Aziji, koja uključuje drevne metropole Samarkand i Buharu.

³⁹⁹ Taberistan je sjevernoperzijska provincija.

Međutim, prvi obrazovni i molitveni alevitski centri (Dergah) nastali su kada su pretežno turkmenska plemena, koja su prakticirala islam na mističan način, u dvanaestom stoljeću migrirala na Bliski istok.

Tako su se Aleviti okupljali u većim kućama ili jednostavno na otvorenom prostoru kako bi zajedno obavljali vjerske obrede. Upečatljiv stil gradnje Dergaha je da su, za razliku od džamija i medresa koje su naručile vladajuće vlasti radi samoproslave, građene jednostavno i funkcionalno, daleko od bilo kakve razmetljivosti. Bilo je važno da Dergah ima veliku glavnu dvoranu za vjerske obrede. Iako je tačan broj Dergaha vjerovatno znatno veći, najpoznatiji alevitsko-bektašijski Dergasi koji su još uvijek dostupni nakon 1826. nabrojani su u zapisima Ali Jaman Dede na sljedeći način:

1. Antalya: Abdal Musa Sultan Dergahi
2. Ardabil: Šejh Safi Dergahi
3. Eskişehir: Seyyid Battal Gazi Dergahi, Šuccattin Veli Dergahi
4. Istanbul: Karacaahmet Sultan Dergahi, Šahkulu Sultan Dergahi, Camlica Dergahi, Karayagdi Baba Dergahi, Karaagac Dergahi, Erikli Baba Dergahi, Takkeciler Dergahi, Nafi Baba Dergahi, Bademler Dergahi, Dilaver Baba Dergahi
5. Merzifon: Piri Baba Dergahi
6. Nevşehir: Hadži Bektaš Veli Dergahi
7. Budimpešta (Mađarska): Đul Baba Dergahi
8. Didymotiko (Grčka): Seyyid Ali Kizildeli Sultan Dergahi
9. Kairo (Egipat): Kaygusuz Abdal Dergahi

Zapisi Ayfer Karakaya-Stump, koji obuhvataju opsežno istraživanje o situaciji dergaha u Iraku, sadrže iračke dergahe u Kerbeli, Nedžefu, Kazimejnu, Samari, Bagdadu i Kirkuku. Ahmet Taşgin nadalje navodi još neka hodočasnička mjesta kod turkmenskih Alevita (Šabak) u blizini iračkog grada Mosula:

1. Mekam Abbas u Dord Abbasiya
2. Mekam Zejnulabdin u selu Reš
3. Markad Mahsen i Yahya Abz Qasim u Mosulu
4. Abdullah Bahir ibn Zejnulabidin u Mosulu

Budući da se na ovom mjestu mogu nabrojati stotine značajnih alevitskih odgojno-obrazovnih i hodočasničkih mjesta, opisuju se samo najvažnije ustanove. Pri tome se treba pokazati da alevizam, kako je prethodno u nekim tezama utvrđeno, nije na Anadoliju ograničena religija, pravna škola ili kultura. Iz zapisa Fahrija Madena, koji se koncentrisao na obrazovna i hodočasnička mjesta koja se dovode u vezu sa Božijim prijateljem i svecem Hidrom, može se jasno zaključiti da su aleviti od desetog stoljeća uspostavili obrazovna i hodočasnička mjesta na tri kontinenta (Azija, Evropa i Afrika).

1. Turska: Hizirlik Tekija (Tokat), Hizir Baba Tekija (Erzincan), Hizir Halife Tekija (Yozgat), Šejh Hizir Tekija (Ankara), Šejh Hizir Tekija (Ankara), Hizir Dede Tekija (Amasya), Hizir Baba Tekija (Amasya), Hizir Baba Tekija (Isparta), Hizir Abdal Tekija (Isparta), Hizir Işik Tekija (Konya), Hizir Baba Tekija (Samsun), Ahi Hizir Turbeta (Afyon), Hizir Ilyas Tekija (Kayseri), Hizir Dede Turbe (Sakarya), Baba Hizir Turbe (Bolu), Hidir Baba Turbe (Elazığ), Hidir Makamlari (Hatay), Hidirlik Tekija (Edirne), Hizir Baba Demirtaş Bey Tekija (Edirne), Kara Hizir Baba Turbe (Edirne), Hizir Baba Tekija (Edirne), Hizir Baba Tekija (Edirne), Hizirlik Tekija (Filibe), Hizir Baba Tekija (Kırklareli), Hizir Baba Tekija (Gelibolu), Hizir Baba Tekija (Gelibolu).
2. Bugarska: Hizir Baba Tekija (Kjustendil), Tadž Hizir Ali Baba Tekija (Russe), Hizir Baba Tekija (Karčali).
3. Albanija: Hizir Baba Tekija (Kočanaj)
4. Makedonija: Hizir Baba Tekija (Skoplje), Hizir Baba Tekija (Gostivar)
5. Rumunija: Tadži Hizir Baba Tekija (Mesembria)
6. Mađarska: Hizir Baba Tekija (Budimpešta)
7. Kipar: Hizir Mekami (Nikosia)
8. Irak: Hizir Ilyas Tekija (Bagdad)
9. Iran: Hizir Samit Turbeta (Tabriz)

7.1 Dergah Hadži Bektaš Veli u Nevşehir (Turska)

Hadži Bektaš Veli bio je ličnost koja je u sebi sažimala, kako znanje i duhovnost, tako i predvodništvo mačevanjem u borbi, što se, kod dubljeg promatranja, oslikava jasno kao revolucionaran život. On se priključio 1239. godine Babaiskom⁴⁰⁰ ustanku.

Nakon što je ustanak ugušen, povukao se u područje Sulućakarahojuk (Sulucakarahöyük) u današnjoj Turskoj i osnovao veliki religijski centar koji je služio kao odgojno-obrazovna ustanova. Pored vjerskog odgoja i zbrinjavanja siromašnog stanovništva, cilj Hadži Bektaš Velija bio je da oživi ustanak protiv nepravde vladavine Seldžuka.

Uistinu, gušenje Babajskog ustanka i kasnija mongolska invazija Anadolije gurnuli su narod u neizvjesnu budućnost. Upravo u to vrijeme Hadži Bektaš je, posjećujući ih i reorganizirajući, okupio anadolsko stanovništvo oko sebe. Tokom svog života obučavao je brojne učenike i slao ih u sve dijelove Anadolije kako bi obrazovali i politički organizirali narod. Time je postavio temelje za brojne ustanke protiv opresivne politike Osmanlija.

Na ovom mjestu treba detaljnije razmotriti kritiku upućenu Hadži Bektašu. Budući da se povukao u svoju obrazovnu i vjersku instituciju nakon gušenja Babajeve pobune i nije

⁴⁰⁰ Ustanak Babaija (tur. *Babai ayaklanması*) bio je najveći ustanak anadolijskih alevita u historiji protiv Rum-Seldžuka. Seldžuska vojska je uz velike poteškoće uspjela ugušiti ustanak (1239. godine), koji je predvodio Baba Ilyas (umro 1240.). Kao jedan od najznačajnijih alevitskih učenjaka svoga vremena, Baba Ilyas se suprotstavio tlačiteljskom ponašanju seldžučke vlasti i time stekao veliki broj sljedbenika među alevitskim Turkmenima.

sudjelovao ni u kakvim daljnjim ustancima, ovu veliku figuru socijalistički orijentirani često glupo optužuju za kukavičluk. Da se Hadži Bektaš potpuno povukao nakon poraza pobune i pokorio se volji tiranskih vladara, ovaj argument bi mogao biti opravdan. Međutim, povijesni zapisi pokazuju da se povukao samo kako bi okupio raspršeno anadolsko stanovništvo za obnovljeni ustanak. Uostalom, očito je da se prvo moraju ispuniti svi potrebni uvjeti za takav poduhvat. U suprotnom, nepromišljeni obnovljeni ustanak završio bi još težim porazom od prethodnog. Posebno kao vodeća figura među alevitima, Hadži Bektaš je imao odgovornost da pomno čeka povoljan trenutak za ustanak, kako ne bi bezobzirno ugrozio živote desetina hiljada ljudi. Stoga bismo željeli ukratko obraditi ovu temu i detaljnije objasniti razlog ove pogrešne analize. Razlog za ovu lažnu optužbu leži prvenstveno u činjenici da dotične osobe nisu pravilno shvatile osnove alevizma niti pravu bit revolucionarne misli u islamu. U konačnici, ne čudi da se dolazi do pogrešnog rezultata ukoliko se ovoj tematici prilazi s pozicije materijalističkog načina poimanja. Pri tome, činjenica da je Hadži Bektaš umro prirodnom smrću ni na kakav način ne potvrđuje pasivnost ove značajne ličnosti. Naprotiv, u teškim uvjetima svoga vremena pokazao je viziju i mudrost te svoje znanje koristio za dobrobit anadolskog stanovništva. Hadži Bektaš je alevitskom narodu pružio najveću uslugu koja se mogla pružiti tokom ovog izazovnog razdoblja. U tom kontekstu, Imam Džafer Sadik opisao je vrijednost mudrog vjerskog učenjaka ili mudraca na sljedeći način:

„Na Sudnji dan, Allah će okupiti ljude na jednom mjestu. Vaga će biti postavljena. Krv šehida i tinta učenjaka bit će izvagani. Tada će postati jasno da je tinta s pera učenjaka teža od krvi šehida.“⁴⁰¹

Kao što je jasno vidljivo iz prethodne predaje, status mudrog učenjaka superiorniji je od statusa mučenika. U konačnici, mudar učenjak je dužan osloniti se na svoje znanje i pažljivo razmotriti sve okolnosti prije nego što poduzme bilo kakvu akciju, kako ne bi nepromišljeno ugrozio ne samo vlastiti život već i živote hiljada sljedbenika. Činjenica da je Hadži Bektaš tokom cijelog svog života ulagao velike napore kako bi očuvao i promovirao učenje Ehli Bejta jasno pokazuje da su optužbe koje se iznose protiv njegove ličnosti neosnovane. Osim toga, to je naglašeno činjenicom da Hadži Bektaš smatra učenje Četiri vrata i četrdeset stupnjeva (Dört Kapı Kirk Makam), koje je prvi put formulisao i usavršio njegov učitelj Hodža Ahmed Jesevi, a koje je do danas uticalo na razmišljanje alevitskog stanovništva, dokazom njegovog visokog ugleda. Također, obučio je veliki broj učenjaka i mudraca te ih poslao u razne krajeve.

⁴⁰¹ Medžlisi: Bihar ul-Anwar, tom 2, str.14.

Kako bi širio učenje Ehli Bejta među ljudima, poslao je, naprimjer, Kaygusuz Abdala⁴⁰² za Egipat i Sari Saltuka⁴⁰³, na područje današnjih balkanskih zemalja. Nakon smrti Hadži Bektaša, misiju dergaha redom su vodili Sejjid Ali Sultan (1310–1402) i njegova dva sina, Resul Bali (1361–1441) i Mursel Bali (1384–1483). Zato što su osmanski vladari imali kritičan stav prema dergahu i doživljavali ga kao prijetnju njihovoj moći, nakon Mursel Balija provodili su politiku asimilacije unutar tih obrazovnih institucija. Iako su ta iskrivljenja donekle mogla biti spriječena povratnim pokretom pod Kalender Čelebijem (1476–1527), taj pokret su osmanski vladari ugušili nasilnim putem. Kalender Čelebi i do 40.000 njegovih vjernih sljedbenika protjerani su i ubijeni. Među neposrednim žrtvama ugušenog ustanka bili su Pir Sultan Abdal i 72 njegova sljedbenika, koji su obješeni po nalogu upravitelja Sivasa, Hizir-paše⁴⁰⁴.

Nakon što je vjersko središte Hadži Bektaš Veli ostalo bez vođe više od četvrt stoljeća poslije mučeništva Kalender Čelebija, dotad autonomni dergah je 1551. godine pod Sersem Ali Babom (umro 1569.) transformiran u bektaški red i podređen osmanskom državnom sistemu.

Zapravo, transformacija u red i uvođenje sunitske jurisprudencije (fikh) omogućili su Osmanskom Carstvu da učinkovitije provodi svoju politiku ugnjetavanja stanovništva. Iako su Osmanlije ciljano provodile politiku sunitske asimilacije sve do svog propadanja, tokom vremena bilo je ponovljenih pokušaja da se red vrati na put Ehli Bejta, koji su često brutalno gušeni. Čak i u današnjoj Turskoj vlada namjerno ignoriše ovu želju alevita da red otvore za alevitske ceremonije.

⁴⁰² Kaygusuz Abdal rođen je 1341. godine kao sin Husamedin-Mahmuda, guvernera Alanye. Nakon susreta sa svecem Abdal Musaom, napustio je svjetovne službe i pristupio dužnosti bektaškog reda. Kao obrazovani učenjak, otputovao je u Egipat kako bi osnovao dergah i širio učenje Ehli Bejta. Ostavio je značajan opus djela, od kojih su neka znatno utjecala na mnoge pjesnike i mistike. Iako se malo zna o njegovom životu, mnogo se može razaznati o njegovoj misli, posebno u njegovom *Divanu*. Umro je u Egiptu 1444. godine i dalje uživa veliki ugled kao islamski mistik.

⁴⁰³ Sari Saltuk bio je alevijsko-islamski pjesnik i mistik koji je upoznao stanovništvo Balkana s islamom prije nego što su osmanske trupe zauzele Balkan. Marokanski historičar Ibn Battuta (1304–1377) opisuje ga kao ekstatičnog posvećenika Bogu. Iz spisa osmanskog putopisca Evlije Čelebija (1611–1683) može se zaključiti da Sari Saltuk potiče iz Buhare i da se zvao Mehmed. Prema predajama, bio je učenik Sejjida Mahmuda Hajranija (umro 1269.) i Hadži Bektaš Velija. Osmanski šejhu-l-islam Mehmed Ebu Suud-efendija u jednoj svojoj fetvi nazvao ga je kršćanskim monahom, pošto je učenje koje je Sari Saltuk širio na Balkanu smatrao neislamskim. Sari Saltuk je umro 1297. godine. Posebno zbog njegovog pristupa religijskim pitanjima u pretežno kršćanskom stanovništvu, do danas uživa veliki ugled ne samo među muslimanima, nego i unutar kršćanskog stanovništva na Balkanu. U brojnim legendama Sari Saltuk se identificira s kršćanskim svecima kao što su sveti Đorđe, Ilija, sveti Nikola, sveti Simeon, sveti Naum ili sveti Spiridon. Stoga je grad Babadag (Planina Baba) u rumunskoj Dobrudži nazvan po njemu. Prema jednoj predaji, osmanski sultan Bajazid II tokom jedne vojne kampanje naredio je gradnju socijalno-vjerskog kompleksa pored grobnice (turbeta) Sari Saltuka, oko kojeg se grad razvijao, a unutar kojeg je mauzolej Sari Saltuka dovršen 1488. godine. Tokom rusko-osmanskog rata u 17. stoljeću grad i grobnica su izgorjeli. Nakon što je grobnica obnovljena 1828., ponovo je renovirana 2007. godine.

⁴⁰⁴ Zbog nemilosrdnosti osmanskih poreznika, sunit Hizir našao je utočište kod mistika Pir Sultan Abdala. Nakon sedam godina službe kod Pir Sultan Abdala, Hizir je otišao u Istanbul i započeo obrazovanje u službi sunitskih Osmanlija. Na kraju je postao upravitelj Sivasa, gdje je svog učitelja Pir Sultan Abdala dao pogubiti vješanjem. Zbog toga su ga aleviti nazvali Hinzir-paša (svinja-paša).

7.2 Dergah šejha Safija u Ardabilu (Iran)

Porijeklo safavidskog dergaha može se pratiti do šejha Safija, koji je osnovao red u Ardabilu 1301. godine. Kao zet i nasljednik poznatog mistika Šejha Zahida Gilanija⁴⁰⁵, preuzeo je vodstvo Zahedijskog reda nakon Gilanijeve smrti, i od tada je nazvan Šejh Šejhova. Zahedija red je preimenovan po njemu i postao poznat kao Safavijski red (Safevi tarikat). U naslijeđu je ostavio poznato djelo Šejh Safi Buyruğu sa značajnim uputama za alevite.

Potomci šejha Safija su preuzeli ovaj dergah i stalno pružali mogućnost stanovništvu za obavljanje njihovih vjerskih obreda. Na ovaj način mogli su sve više ljudi uvjeriti u stvarnu poruku islama, Ehli Bejta. Šejhovi safavidskog reda su:

- Pir Šejh Safiyudin Ishak-i Erdebili (Šejh Safi) (1252-1334)
- Pir Sadredin Musa (1334-1391)
- Pir Sultan Hadži Ali (1391-1429)
- Pir Sultan Šah Ibrahim Veli (1429-1447)
- Pir Šejh Džunejd (1447-1460)
- Pir Šejh Haydar (1460-1488)
- Pir Ali Mirza (umro 1494)
- Pir Šah Ismail Hatayi (1487-1524)

Kako je safavidski red pod šejhom Džunejdom, od druge polovice 15. stoljeća nadalje, uz svoje vjerske i obrazovne aktivnosti dobio na političkoj i vojnoj važnosti, vladar dinastije Kara Kojunlu protjerao ga je iz Ardabila. Nakon što je šejh Džunejd proširio svoju vojnu snagu, sklopio je savez s Uzun Hasanom (1423–1478), vladarom dinastije Ak Kojunlu, i oženio se njegovom sestrom Hatidže Begum. Međutim, kada je došlo do vojnog sukoba sa širvanšahskim vladarom Halilullahom I (1417–1464), šejh Džunejd je smrtno ranjen, prisiljavajući svog sina, šejha Hajdara, da u mladoj dobi preuzme vodstvo safavidskog reda. Kako bi osigurao kontinuiranu podršku safavidskih ratnika Kizilbaša, Uzun Hasan je udao svoju kćer, Alemšah Halime Begum (1460–1532), za svog bratića, šejha Hajdara. Iz ovog braka rodila su se tri sina: Ali Sultan, Ibrahim i Ismail. Kada je safavidski red ponovo dobio na vojnoj i političkoj snazi pod vodstvom šejha Hajdara, udružili su se šejh Hajdarov zet, sultan Jakub (1478–1490), i širvanšahski vladar Faruk Jasar (1462–1500) i ubili šejha Hajdara 1488. godine. Nakon ubistva Šejh Hajdara Safavija, njegovi sinovi su zarobljeni u tvrđavi Istakhr⁴⁰⁶,

⁴⁰⁵ Šejh Zahid Gilani bio je mistik. Bio je šejh i vođa Zahedijskog reda, koji je kasnije preimenovan po imenu njegovog zeta, Safijudina el-Erdebilija, u Safavijski red. Prema historijskim zapisima, izvjesno je da je rođen 1216. godine, a da je umro 1301. godine.

⁴⁰⁶ Grad Istahr je historijsko mjesto u provinciji Fars u Iranu, koje je osnovao Aleksandar Veliki nedaleko od ruševina grada Perzepolisa koji je on spalio.

sve dok ih 1493. godine nisu oslobodili sljedbenici (talip) safavidskog reda. Nakon što su sinove godinama krili safavidski kizilbaş-derviši i poučavali ih vjerskim znanjima, oni su preuzeli vodstvo safavidskog reda i utemeljili Safavidsko Carstvo. Nakon toga, kao simbol svojih alevijsko-šiitskih uvjerenja, dao je šampati kovanice s imenima Dvanaest Imama i javno držao propovijedi o vrlinama Ehli Bejta. Nadalje, u područjima koja su bila pod njegovom vlašću, poput današnjeg Irana, današnjeg Azerbejdžana, dijelova današnjeg Afganistana, velikih dijelova današnjeg Iraka i, naravno, istočne Anadolije, težio je ciljanom šiiziranju i aleviziranju stanovništva. U tu svrhu angažovao je istaknute učenjake iz Nedžefa, Kerbele i Libana da uspostave vjerske institucije na njegovom teritoriju.

7.3 Dergah Abdul Musa Sultana u Antaliji (Turska)

Dergah Abdal Musa Sultana u selu Tekke, u blizini grada Antalije, drugi je najvažniji dergah u Turskoj nakon dergaha Hadži Bektaš Velija u Nevşehiru. Ove odgojno-obrazovne institucije osnovao je u 14. stoljeću alevitski svetac Abdal Musa Sultan i stoljećima su služile za prenošenje znanja Ehli Bejta među alevitsko-bektašijskim stanovništvom u Osmanskom Carstvu. Abdal Musa Sultan je u ovoj ustanovi obrazovao učenjake, mislioce i pjesnike. Najpoznatiji među njima je Kajgusuz Abdal, koji je napisao veliki broj alevitskih pjesama. Tekelu Turkmeni, sljedbenici Abdal Musavog dergaha, odigrali su značajnu ulogu u osnivanju i usponu Safavidskog Carstva pod šahom Ismailom. Prema historijskim zapisima, više od 15.000 Tekelu Turkmena pridružilo se vojsci šaha Ismaila nakon ustanka Šahkulua (1510–1511)⁴⁰⁷. Trajna važnost Abdal Musa Sultana sve do danas među alevitskim stanovništvom vidljiva je u činjenici da je specifičan oblik ceremonije džem poznat kao Abdal Musa Džemi. Ova se ceremonija obično održavala tokom zimskih mjeseci, kada je dede posjećivao svoje sljedbenike (talipe) u ruralnim područjima i podučavao ih o vjerskim pitanjima. Danas se ovaj oblik ceremonije džem izvodi po volji kako bi se pobožni aleviti podučili temeljnim principima alevizma. Iako je dergah kroz historiju nekoliko puta obnovljen, sada je uglavnom oronuo, a ostalo je samo grobno mjesto.

7.4 Dergah Šahkulu Sultana u Istanbulu (Turska)

Još jedan alevitski obrazovno-vjerski centar, dergah Šahkulu Sultana, nalazi se u istanbulskoj četvrti Kadıköy. Prema historijskim zapisima, zgrada je izgrađena za vrijeme vladavine drugog osmanskog sultana, Orhana Gazija (1281–1359), koji je osvojio velike dijelove Bizantskog Carstva uz pomoć alevitskog stanovništva. Kada se alevitski mistik Šahkulu (15. stoljeće) pri osvajanju Konstantinopolja nastanio u azijskom dijelu Istanbula, njegovo mjesto je pretvoreno u alevitsku odgojno-obrazovnu instituciju, pa se od tada naziva dergah

Šahkulu Sultana. Iako se o njegovom životu malo zna, pretpostavlja se da je poginuo tokom osvajanja Istanbula te je stoga ukopan u vrtu svoje tekije. Važno je napomenuti da ga se ne smije miješati sa Šahkulu Sultanom iz 16. stoljeća. Kada su 1826. godine sve alevitsko-bektašijske ustanove u Osmanskom Carstvu, po naređenju osmanskog sultana Mahmuda II (1785–1839), zatvorene ili oduzete, ovaj dergah je dugo vremena izgubio na značaju. Džem-kuća osnovana na mjestu bivšeg dergaha, koja se sastoji od nekoliko zgrada, sobe za molitvu i groblja, sada je pod upravom alevita i nosi ime Šahkulu Sultan Dergah.

7.5 Dergah Karadža Ahmet Sultana u Istanbulu (Turska)

Dergah Karadža Ahmet Sultana je nakon dergaha Šahkulu Sultana druga najveća alevitska obrazovno-odgojna ustanova u Istanbulu i nalazi se pored groba Karadža Ahmet Sultana (14. stoljeće) u istanbulskoj četvrti Üsküdar. Danas se objekt koristi kao Džem-kuća. Iako jedva postoje informacije o Karadža Ahmet Sultanu, poznato je da je sin Sulejmana Horasanija i da je u 14. stoljeću stigao u Istanbul kako bi tamo osnovao dergah. Nadalje, on i njegov sin Ešref Sultan bili su među najpoznatijim liječnicima svoga vremena. Legenda pripisuje povratak dergaha Mahidevran (umrla 1581), jednoj ženi sultana Sulejmana I, i njihovom sinu šehzadi Mustafi (1515–1553), koji su i sami bili pripadnici bektašijskog reda. Natpis iznad ulaznih vrata, datiran 1866. godine, ukazuje na to da je mauzolej te godine obnovio bektašijski dužnosnik po imenu Ziya Bey. Mauzolej je pokriven jednom jednostavnom kupolom, dok je sama grobnica ukrašena drvenim lijesom.

7.6 Dergah Sejjid Battal Gazija u Eskišehiru (Turska)

Dergah Sejjid Battal Gazija najveći je alevitski odgojno-obrazovni centar u Anadoliji i vjerovatno je izgrađen oko 1208. godine. Centar je nazvan po Sejjid Battal Gaziju (690–740) i godišnje ga posjete hiljade ljudi. Prema historijskim zapisima, sljedeći su vladari proširili kompleks:

- Ala ad-Din Kajkubad I. (1190–1237), jedanaesti rumsko-seldžučki sultan
- Orhan Gazi (1281–1362), drugi osmanski sultan
- Fatih Sultan Mehmed (1432–1481), sedmi osmanski sultan
- Bajazid II. (1448–1512), osmi osmanski sultan
- Javuz Selim I. (1470–1520), deveti osmanski sultan
- Sulejman I. (1494–1566), deseti osmanski sultan

Po onome što je zabilježeno u historijskim spisima, Hadži Bektaš Veli je ovo mjesto posjetio i naglasio njegov značaj. Nakon proširenja dergaha, najprije je postalo mjesto okupljanja kalendarijskih derviša, prije nego što je kasnije prenamijenjeno u alevitsko-bektašijsku odgojno-obrazovnu ustanovu.

7.7 Druge obrazovne institucije izvan Anadolije

Kao što je već prethodno spomenuto, Aleviti su sve do 16. stoljeća njegovali bliske odnose s drugim dergasima koji se nalaze u neposrednoj blizini mauzoleja Imama. Mnogi alevitski mislioci i vjerski učenjaci, kao što su Mehmed Fuzuli i Virani Abdal, čak su u ovim dergasima izučavali islamske znanosti, misticismizam, kao i arapska i perzijska djela. Prema historijskim dokazima, Fuzuli i Virani djelovali su kao učenjaci u mauzolejima Imama Alija (Nedžef), Imama Husejna (Kerbela) i Imama Muse Kazim (Bagdad), te su pored alevitskih poučavali i šiitske učenjake.

Fuzuli je nakon preseljenja ukopan u unutrašnjem dijelu mauzoleja Imama Husejna u Kerbeli. Kada se uzme u obzir da ugledni šiitski vjerski učenjaci toga vremena nisu imali tu čast da budu ukopani u dvorištu mauzoleja Imama Husejna, može se spoznati visoki Fuzulijev stupanj. Ovo je dovelo do toga da se u većinski šiitskom Iraku formiraju i alevitski dergasi, koji su posjećivani sve do 20. stoljeća. Međutim, osmanska ugnjetavačka politika doprinijela je tome da je opao bliski kontakt s ovim dergasima.

7.7.1 Dergah Abdul Mumin Babe u Kerbeli (Irak)

Jedan od četiri velika dergaha u Iraku je dergah Abdul Mumin Babe u unutrašnjem dijelu mauzoleja Imama Husejna. Pretpostavlja se da je ovaj dergah prije 500 godina osnovao bektašijski derviš po imenu Abdul Mumin. Iz historijskih spisa proizlazi da je alevitski pjesnik Fuzuli, pod vjerskim vodstvom Abdul Mumin Babe, obavljao službu džerakčije (prosvjetitelja) u mauzoleju Imama Husejna. U spisima bektašije Dedebabe Bedri Noyana ovaj dergah se još naziva i Kerbela Dergah-i Šerif i Tekija Abdalan-i Rum. Početkom 20. stoljeća primjenjivan je naziv Dede vat (tekija dede). Nakon 17. jula 1826. godine, kada su svi bektašijski dergasi u Osmanskom Carstvu zatvoreni i konfiscirani, dergah Abdul Mumin Babe je zatvoren i vremenom je izgubio na svom značaju. Kako bi se prilagodio prilivu posjetilaca mauzoleja Imama Husejna, dergah je morao biti srušen tokom radova na proširenju, te stoga više nije otvoren za javnost.

7.7.2 Dergah Virani Abdala u Nedžefu (Irak)

Ovaj odgojno-obrazovni centar nalazi se u dvorištu mauzoleja Imama Alija, a u zapisima ga nazivaju Tekyenišin-i Nedžef ul-Ašraf odnosno Tekyenišin-i Imam Ali. U zapisima bektašije Dedebabe Bedri Noyana ovaj se dergah bilježi pod nazivom Virani Abdal Dergah, pošto je alevitski mistik Virani Abdal dugo vremena djelovao kao nadređeni (postnišin) ovog dergaha. Nadalje, istraživanje iračkog historičara Abbasa al-Azzavija ukazuje na to da se turban bektašijskog predvodnika al-Hadž es-Sejjid Ahmed Virani Sultana čuva u ovom dergahu. Nakon 17. jula 1826, kada su svi bektašijski dergasi zatvoreni ili oduzeti, i ova je obrazovna

ustanova zatvorena. Nekoliko godina kasnije, beктаški derviš Sukuti Baba želio ga je oživjeti, ali je njegovom smrću dergah izgubio na značaju.

7.7.3 Dergah u Kazimejnu (Irak)

Kazimejn je predgrađe Bagdada. Mjesto je nazvano po imenu sedmog Imama, Muse Kazim, koji je po naređenju abasidskog halife Haruna er-Rešida otrovan i ovdje ukopan. Kada je njegov unuk, deveti Imam Muhamed Taki, 835. godine po naređenju abasidskog halife Mutesima također otrovan, ukopan je pored svog djeda. Iz ovog razloga su sljedbenici Ehli Bejta izgradili dvije kupole na ovom svetištu, koje su kasnije pozlaćene. U unutrašnjosti ovog mauzoleja nalaze se drugi dergasi. Prema historijskim spisima, Mirza Ferhad, daidža kadžarskog vladara Naser ed-Din Šaha (1831.1896), sagradio je dergah u čast beктаškog predvodnika Husejn Mazlum Babe. Nadalje, prenosi se da je Husejn Mazlum Baba prije svoje smrti jednog derviša po imenu Sejjid Velija postavio kao vođu (postnišin). Da je dergah sve do 20. stoljeća igrao značajnu ulogu u prenošenju znanja, možemo zaključiti iz zapisa Bedri Noyan Dedebabe. U tim zapisima stoji da je dergah predvodio derviš rođen u Albaniji po imenu Selman Džemali Baba.

7.7.4 Dergah u Samari (Irak)

Samara je grad u Iraku, sjeverno od Bagdada. Za sljedbenike Ehli Bejta grad je od velikog značaja pošto su ovdje ukopani deseti Imam Ali Naki i jedanaesti Imam Hasan al-Askeri. Abasidski halifa Mutevekil (847-861) naložio je 848. godine da se Imam Ali Naki nasilno dovede iz Medine u Samaru kako bi ga držao u kućnom pritvoru. Kada je Imam Ali Naki 868. godine, po naređenju abasidskog halife Mutaza (866-869), otrovan, njegovog sina, Imama Hasana al-Askerija, halifa Mutamid (870-892) držao je pritvorenim sve do njegovog trovanja 873. godine. Razlog zbog kojeg su Imam Ali Naki i Imam Hasan al-Askeri 25 godina bili zatvoreni leži u činjenici da se željelo spriječiti rođenje dvanaestog Imama, Muhameda Mehdija, ili ga makar nakon rođenja ubiti. Konačno, znali su da najveći dio muslimana čeka na rođenje dvanaestog Imama iz linije Ehli Bejta kako bi se digli protiv nepravedne vlasti Abasida i drugih tiranina.

Tamo gdje se nalaze grobovi dvojice Imama i njihove porodice nastao je mauzolej Al-Askarajn. Građevina je bila poznata po svojoj zlatnoj kupoli iz 1905. godine, koja je u vehabijskom ekstremističkom napadu uništena 22. februara 2006. godine. Druga građevina obilježava mjesto s kojeg je, prema predajama, dvanaesti Imam ušao u veliku skrivenost (arap. ghaybat). Iz zapisa Bedri Noyan Dedebabe može se zaključiti da se dergah mora nalaziti također u unutrašnjem dijelu dvorišta Askarajn svetišta. Putopis poznatog osmanskog pisca Evlije Čelebije (1611–1683) također opisuje dergah i spominje da su beктаški derviši u Iraku ostvarivali prihod od svetišta Askarajn.

7.7.5 Dergah Seyyid Ali Sultana u Didimotici (Grčka)

Ova obrazovna ustanova nazvana po jednom od najznačajnijih alevitskih učitelja (pir odnosno muršid) Sejid Ali Sultanu (1310-1402). Sejid Ali Sultan, koji zauzima veoma važno mjesto kako u historijskoj tradiciji tako i unutar alevitske molitvene ceremonije, u alevitskim pozdravima ruži (tr. Gulbanglar), naziva se čuvarom rimo-bizantijskih provincija (Rum ilinin gozcusu)⁴⁰⁸. Po jednoj legendi, Sejjid Ali Sultan bio je sin Hadži Bektaš Velija i Fatme Nuriye (Kadincik Ana). Nadalje, u ovoj legendi njegovo ime se navodi kao Ibrahim. Po jednoj drugoj legendi, trebalo bi da je bio sin Sejjid Hasana Ata, jednog mudraca iz Horasana. Bedri Noyan Dedebara (1912–1997), posljednji duhovni učitelj (dedebaba) bektašija u Turskoj, po ovom pitanju pozvao se na izvor Ahmed Hamdi Zaza-paše, objavljen u Kairu 1929. godine, i naveo da je njegov otac bio Sejjid Husejn Ata, a da mu je nadimak bio Hidr Lala. Također se u nekim izvorima ime njegovog oca spominje kao Hasan Husejini Atabaj, derviš iz Horasana. Prema prenesenim pričama, trebalo bi da je Sejjid Ali Sultan nakon smrti Hadži Bektaš Velija nekoliko godina vodio njegov dergah, a nakon toga otišao za Rumeliju.⁴⁰⁹, kako bi u selu Kučuk Derbend (Roussa) u blizini grčkog grada Dimotikije osnovao obrazovnu ustanovu (dergah). Pošto se ova ustanova nalazi na obalama rijeke Kizildeli (grč. Eritropotamos), lokalno stanovništvo je za Sejjid Ali Sultana koristilo epitet Kizildeli Sultan. Dergah Sejjid Ali Sultana smatra se jednim od pet najvažnijih bektašijskih dergaha te tako uživa veliki ugled među alevitskim stanovništvom. Sa zatvaranjem i oduzimanjem svih bektašijskih ustanova u Osmanskom Carstvu 17. jula 1826. godine, također je oduzet i veliki dio imovine Kizildeli dergaha. Međutim, obrazovna ustanova nije zatvorena.

7.7.6 Dergah Kajgusuz Abdala u Kairu (Egipat)

Kajgusuz Abdal je ličnost čije je djelo stoljećima znatno oblikovalo alevitsko vjerovanje. Prema historijskim zapisima, rođen je 1341. godine. Njegova grobnica nalazi se u pećini na brdu El-Mukatam u Kairu. Kaygusuz Abdal se ustvari zvao Gajbi i bio je sin utjecajnog upravitelja Alaije⁴¹⁰. U Menakibnami se prenosi da je mladi Gajbi prilikom lova ranio strijelom jednog jelena i prateći ga došao u dergah Abdal Musa Sultana u Antaliji. Nakon što je Gajbi ranjenog jelena pratio sve do dvorišta dergaha, pozdravio ga je Abdal Musa Sultan i pitao ga šta namjerava. Nakon toga Gajbi priča o ranjenom jelenu, koji je u bježanju našao pribježište u dergahu. Nakon što ga je Abdal Musa Sultan upitao za strijelu, izvukao mu je strijelu ispod ruke i predao je Gajbiju. Impresioniran ovim čudesnim činom, Gajbi je dao

⁴⁰⁸ Ova titula mu je dodijeljena jer je kratko vrijeme nakon osvajanja Rumelije odselio u nekadašnje područje Bizantskog Carstva kako bi se bavio misionarskim radom na širenju islama.

⁴⁰⁹ Rumelija znači zemlja Roma ili Rimljana. Od 15. stoljeća pa nadalje, Turci su evropski dio Osmanskog Carstva koji se nalazio na Balkanskom poluotoku nazivali Rumeli.

⁴¹⁰ Područje današnje Albanije.

ostavku na položaj budućeg vladara Alaiye i postao derviš Abdal Musa dergaha. Nakon što je nekoliko godina služio u dergahu, dato mu je počasno ime Kajgusuz Abdal (bezbrižni sluga). Nadalje, dobio je nalog od svog učitelja Abdal Muse da iseli za Egipat kako bi osnovao obrazovno-odgojnu ustanovu. Dergah koji je utemeljio Kajgusuz Abdal u Kairu ispunjavao je sve do 1957. godine važnu odgojno-obrazovnu ulogu bektašijskih derviša. Prije nego što je umro 32. poglavar reda, Ahmed Sirri Baba (1895–1963), svome učeniku Redžep Ferdi Babi (1901–1995) predao je nalog da odseli za Sjedinjene Američke Države kako bi osnovao jedan dergah. Prvu albansku bektašijsku tekiju, osnovanu 1954. godine u Detroitu, posjećuju uglavnom albanske bektašije.

8. Izgradnja alevitske društvene strukture

Nakon što su obrađene osnove alevitskog vjerskog učenja, kao i pisani izvori, u ovome poglavlju se obrađuje tema izgradnje alevitske društvene strukture. Kao što je prethodno već spomenuto, alevitsko stanovništvo je stalno bilo izloženo represijama i progonima zato što su osuđivali nepravedne sunitske vladare i zato što su zahtijevali pravedan sistem zasnovan na načelima učenja poslanika Muhameda i Dvanaest Imama. Kako bi održali vlastitu moć, vladari su sljedbenike Ehli Bejta bezrezervno proglašavali rafidijama ili murtedima i isključivali ih iz javnog života. Tokom vremena (naročito pod osmanskom vlašću, od 16. stoljeća nadalje), aleviti su stoga bili prisiljeni razviti zatvorenu društvenu strukturu, jer ih je država smatrala devijantima. Kako bi uvelike sačuvali svoja vjerovanja i prakse od erozije tokom vremena, morali su uspostaviti jasno definirane odnose između učenja alevitske doktrine i ostatka zajednice.

8.1 Sistem odžaka

Stoga su prvenstveno sejjidske porodice (odžak) preuzele ulogu prenošenja znanja i poučavanja anadolskog stanovništva osnovnim principima alevizma. Dok je sunitsko stanovništvo stalno imalo pristup medresama i vjerskim institucijama, sejjidske porodice su morale stoljećima u tajnosti prenositi znanje alevitskom stanovništvu, pri čemu su se zasigurno određena znanja izgubila. Pošto je vjerski odgoj pod ovim okolnostima predstavljao veliki izazov, alevitski vjernici su potaknuti da se podvrgnu odgojnom i vjerskom vodstvu ovih sejjidskih porodica, te da ih smatraju kao pira (učitelja) i muršida (uputitelja). Kako su se vremenom razvijale različite grane među sejjidskim porodicama, polazi se od toga da danas postoji više od 140 ovakvih odžaka. U tom smislu, alevitske vjerske vođe moraju pokazati ne samo porijeklo od jednog od Dvanaest Imama, već i sposobnost prenošenja znanja talipima (učenicima). Budući da je kroz povijest bilo i pojedinaca koji su, iako nisu potomci Dvanaest Imama, činili određena čuda (tur. keramet) prema narativima, i oni i njihovi potomci nazivani su dikme-dede (imenovane vjerske vođe) ili rehber (vodič) kako bi se razlikovali od sejjida. Međutim, ova praksa se vrlo rijetko primjenjivala u iznimnim slučajevima. Pošto alevitske porodice nisu mogle lično nadzirati sve talipe, uspostavljena je

hijerarhijska struktura u kojoj su muršid-odžaklari (porodice koje ispravno upućuju) imali vodstvo nad pir-odžacima (porodice koje poučavaju). Naprimjer, ova struktura izgleda ovako:

Muršid	
Pir	Pir
Talib	Rehber
Talib	Talib
Talib	Talib

Kako je veliki dio anadolijskog stanovništva emigrirao iz sela u veće gradove ili inostranstvo počevši od druge polovice 20. stoljeća, to je dovelo i do promjena unutar alevijskog društva. Stoljećima se prenošenje vjerskog znanja u ruralnim područjima unutar alevitskog društva oslanjalo prvenstveno na odnos pira i talipa. Sa masovnim prilivom u turske i evropske gradove, sistem odžaka izgubio je znatno na značaju jer su velike sejjidske porodice bile lišene talipa. Umjesto toga, aleviti u Turskoj i Evropi osnovali su brojne udruge, zaklade, zajednice i organizacije kako bi zadovoljili svoje vjerske i društvene potrebe. Naročito su krvavi sukobi između lijevih i desničarskih grupa, koje su željele alevitsko stanovništvo ograničiti u vjerskom, socijalnom i političkom pogledu, osnažili tendenciju ka formiranju udruženja.

Iako su osnovana brojna udruženja i zaklade kako bi alevite zaštitila od bilo kakve asimilacije, suštinski su doprinijela tome da je veza između pira i talipa decenijama gubila na značaju. Konačno, hijerarhijski postavljena veza između talipa, rehbera, pira i muršida dokinuta je kroz jedan sistem koji počiva na uređenju: član – udruženje – federacija – krovna organizacija. Iako su osnovana udruženja na najbolji način ispunila političke, socijalne i vjerske potrebe, te svoje članove zaštitila od političke, vjerske ili kulturne asimilacije, kod uspostave stoljetne tradicije alevizma bila su djelimično nedostatna. Ova okolnost se može objasniti time da se dosadašnja veza između pira i talipa sada zasnivala na vezi člana udruženja sa udrugom.

Slabljenjem veze između pira i talipa uslijed toga dolazi do infiltracije brojnih (izvan-alevitskih) ideologija unutar alevitskih udruženja. Kao što je već u prvom poglavlju obrađeno, mnoge grupe su svoje lične stavove obilježile kao „alevitske“ kako bi alevitsko stanovništvo zloupotrijebile za svoje političke ciljeve. Kako bi se ugušio utjecaj ovih izvan-alevitskih utjecaja, stoga je od velikog značaja – pored brojnih udruženja i federacija koje ispunjavaju potrebe za političkom i kulturnom afirmacijom alevita – potreba da se iznova osnaži veza pira i talipa.

8.2 Put Bratstva (Duhovno bratstvo)⁴¹¹

Put bratstva (tur. *musahiplik*), koji se praktikovao među muslimanima za vrijeme poslanika Muhameda, dodatno je proširen kako bi se osnažila solidarnost i harmonija unutar alevijske zajednice. U ovoj tradiciji, dva bračna para (dva muškarca i dvije žene) sklapaju pakt putnog bratstva tokom ceremonije Džem, stupajući u doživotnu povezanost na putu ka Bogu. U pravilu se bratstvo na duhovnom putu sklapa između dvije porodice koje su jednakog socijalnog i finansijskog statusa. Posljedično, obje porodice su odgovorne jedna za drugu, dijeleći odgovornost za svoje doprinose i postignuća unutar zajednice. Stoga, ako jedna porodica zapadne u finansijske poteškoće, prvenstveno je *musahip* porodica odgovorna da pokriva troškove pogođene porodice. Bratstvo duhovnog puta treba pažljivo odabrati, jer raskidanje partnerstva može dovesti do isključenja iz alevitske zajednice.

Prema historijskim zapisima, princip za duhovno bratstvo utemeljen je nakon iseljenja iz Meke u Medinu 622. godine, kada je Poslanik Muhamed sklopio savez pobratimljenja između mekanskih iseljenika (arap. *muhađžirun*) i medinskih pomagača (arap. *ansar*). Čak i u predislamsko doba na Arapskom poluotoku nastanila su se dva rivalska staleža stanovništva. Jemenski Kahtani su se nastanili u Jesribu (Medina) i bavili su se stočarstvom i poljoprivredom. Mekanski Adnani, kojima pripada također i pleme Kurejš, koji su prije toga vodili beduinski život, nastanili su se u priobalnim dijelovima i nastavili od tada da žive kao trgovci. Time su našli mogućnost da svoje životne uslove značajno poboljšaju te su mogli svoje posjede obilno uvećati. Zbog toga su Adnani osjećali određenu odbojnost prema Kahtanima, pošto su bavljenje stočarstvom i poljoprivredom smatrali inferiornim. Tokom predislamskog perioda džahilijeta (arap. *jahiliyya*) postojala je ozbiljna konkurencija između dva plemena, Kahtana i Adnana.

Kada je politički pritisak mekanskih idolopoklonika, nakon smrti Ebu Taliba, oca Imama Alija i zaštitnika poslanika Muhameda, za šire mase postao nesnošljiv, mekanski muslimani su napustili svoja ognjišta i većinu svog imetka ostavili u Meki. Pri tome, postojala je stoljetna unutar-medinska krvna osveta između zaraćenih plemena Beni Aus i Beni Hazredž, koja je često rezultirala brojnim smrtnim ozljedama i ranjavanjima.

⁴¹¹ *Musahiplik* (doslovno: „druženje“ ili „duhovno bratstvo“) temeljni je alevijski ugovorni odnos između muškaraca (često i njihovih supruge), koji se obavezuju na doživotnu brigu o duhovnim, emotivnim i fizičkim potrebama onog drugog. To je „put bratske ljubavi“ (*yol kardeşliği*), gdje četiri osobe postaju jedno tijelo. Ključne odrednice:

- Svečani zavjet: Sklapa se u prisutnosti alevijskog duhovnog vođe (*dede*).
- Duhovno srodstvo: Partneri postaju „braća“ ili „duhovni saputnici“.
- Doživotna odgovornost: *Musahiplik* je temelj alevijske kulture i društva koji osigurava zajedničku podršku.
- Značenje: Alevije smatraju da nije dovoljno biti rođen od alevijskih roditelja; *musahiplik* je nužan uvjet za duhovno sazrijevanje.

Ovaj običaj važan je dio alevijsko-bektašijske tradicije i kulture.

Stoga je ubrzo nakon dolaska u Medinu Poslanik Muhamed poduzeo određene mjere kako bi pomirio konkurentna i zaraćena arapska plemena. Ponovno oživljavanje krvnih osveta, tradicija i praznovjerja predstavljalo je značajnu prijetnju islamskom društvu uspostavljenom u Medini. Jačanje solidarnosti među muslimanima bilo je od najveće važnosti u uspostavljanju zdrave i snažne državne strukture utemeljene na temeljnim islamskim načelima.

„Oni koji vjeruju, i iseljavaju se, i u borbi na Allahovom putu zalažu imetke svoje i živote svoje, i oni koji daju utočište i pomažu, oni jedni druge nasljeđuju. A onima koji vjeruju, a koji se nisu iselili – vi ne možete, sve dok se ne isele, nasljednici biti. A ako vas zamole da ih u vjeri pomognete, dužni ste im u pomoć priteći, osim protiv naroda sa kojim o nenapadanju zaključen ugovor imate. – A Allah dobro vidi ono što radite.

Nevjernici jedni druge nasljeđuju. Ne postupite li tako, nastaće smutnja na Zemlji i nered veliki.“

Oni koji vjeruju i isele se, i bore se na Allahovom putu, i oni koji daju sklonište i pomažu – oni su, zbilja, pravi vjernici – njih čeka oprost i obilje plemenito.“⁴¹²

Bazirano na ovim ajetima, Poslanik Muhamed je okupio muhadžire i ensarije i uspostavio veze srodstva i bratstva među njima. Ovo pobratimljenje trebalo je prvenstveno osnažiti materijalnu i duhovnu solidarnost među muslimanima, tako da se pobratimljeni ljudi mogu čak i nasljeđivati. Na ovaj način trebalo je biti izliječena tuga siromašnih muhadžira.

Naspram toga, Mekelije su svoja znanja i radnu snagu stavili na raspolaganje pobratimljenim Medinelijama. Nakon što su ensarije i muhadžiri zajedno radili i zajedno privređivali, dijelili su zajednički imetak. U ovom kontekstu, međutim, mora se istaći da Poslanik Muhamed nije ljude pobratimljivao po principu slučajnosti. Tek nakon detaljnog informisanja o snazi i potrebama, kao i finansijskoj situaciji porodica, spajao bi određene porodice koje je on smatrao prikladnim. Ova veza bratstva pažljivo je uspostavljana tako da obje strane nakon smrti pobratima imaju učešće u njegovom nasljeđivanju. A kada je uspostavljeno društveno blagostanje u Medini i kada su muhadžiri znatno poboljšali svoje životne okolnosti, došlo je djelom do pojavljivanja sporova između ensarija i muhadžira. Nakon toga, objavljen je sljedeći ajet, koji je isključio nasljeđivanje među pobratimskim porodicama:

„A oni koji kasnije vjernici postanu pa se isele i u borbi zajedno s vama učestvuju – i oni su vaši. A rođaci su, prema Allahovoj Knjizi, jedni drugima preči. – Allah, zaista, sve zna.“⁴¹³

Kako bi dodatno ojačao društvenu koheziju među muslimanima, Poslanik Muhamed je također uspostavio bratstva među iseljenicima i pomagačima. Prema predaji, nakon što je završena ceremonija bratstva među muhadžirima i ensarijama, Imam Ali je tužan i žalostan došao Poslaniku i rekao: „O Allahov poslaniče, pobratimio si svoje ashabe među sobom.

⁴¹² Sura al-Anfal, ajet 72-74 (8:72-74)

⁴¹³ Sura al-Anfal, ajet 75 (8:75)

Zašto nisi pobratimio jednog od svojih ashaba sa mnom?“ Kaže se da je Poslanik odgovorio: „Ali je moj brat na ovom i na onom svijetu.“

Poznati sunitski historičar Ibn Hišam (umro 833) spominje u svome historijskom djelu Siret ibn Hišam imena poslanikovih prijatelja koji su pobratimljeni jedni sa drugima:

1. Poslanik Muhamed/Imam Ali
2. Hamza ibn Abdulmutalib/Zejd ibn Haris
3. Džafer ibn Ebu Talib/Muaz ibn Džebel
4. Salman al-Farisi/Ebu Derda
5. Bilal al-Habaši/Abudllah ibn Abdurahman Has'ami
6. Ammar ibn Jasir/Huzejfa ibn Yaman
7. Ebu Zer al-Gaffari/Munizr ibn Amr
8. Ebu Huzejfa ibn Utba ibn Rabia/Abbad ibn Bišr ibn Vakš
9. Said ibn Zejd ibn Amr ibn Nufejl/Ubayy ibn Ka'b
10. Mus'ab ibn Umejr ibn Hašim/Ebu Ejub Halid ibn Zejd
11. Hatib ibn Ebu Balt'ah/Uwajm ibn Sa'ida
12. Ebu Bekr ibn Abu Kuhafa/Haridža ibn Zuhajr
13. Omer ibn Hatab/Itban ibn Malik
14. Osman ibn Affan/Aus ibn Sabit ibn Munzir
15. Ebu Ubejda ibn Abdullah ibn Džerah/Saad ibn Muaz ibn Numan
16. Abudrahman ibn Avf/Sa'd ibn Rabi
17. Zubejr ibn Avvam/Salame ibn Salame ibn Wakš
18. Talha ibn Ubejdullah/Kab ibn Malik

Pri bratimljenju ensarija i muhadžira Poslanik Muhamed je obraćao pažnju da obje strane posjeduju isti nivo vjere i moralnih vrлина. Zbog toga je Poslanik Muhamed Alija uzeo za svog pobratima, odnosno musahipa, jer je jedini on stajao na istoj čistoj i besprijekornoj razini kao i Božiji poslanik. Prema nekim kur'anskim komentatorima (arap. mufesir), sljedeći ajeti su također objavljeni u vezi sa bratimljenjem muslimana. Dok neki od ovih ajeta pozivaju na djelovanje, drugi su čisto informativne prirode:

„Reci: 'Ja vam savjetujem samo jedno: ustanite iskreno prema Allahu, dvojica po dvojica, ili jedan po jedan, pa zatim razmislite da drug vaš nije lud. On vas samo prije teške patnje opominje.'“⁴¹⁴

„Vjernici su samo braća, zato pomirite vaša dva brata i bojte se Allaha, da bi vam se milost ukazala.“⁴¹⁵

⁴¹⁴ Sura Saba, ajet 46 (34:46)

⁴¹⁵ Sura al-Hudžurat, ajet 10 (49:10)

„Mi smo odredili nasljednike svemu onome što ostave roditelji i rođaci. A onima s kojima ste sklopili ugovore, podajte njihov dio – Allah je, zaista, svemu svjedok.“⁴¹⁶

„Allah je zadovoljan prvim muslimanima, muhadžirima i ensarijama i svima onima koji ih slijede dobra djela čineći, a i oni su zadovoljni Njime; za njih je On pripremio džennetske bašče kroz koje će rijeke teći, i oni će vječno i zauvijek u njima boraviti. To je veliki uspjeh.“⁴¹⁷

Međutim, pobratimljenje poslanika Muhameda sa Imamom Alijem razlikuje se značajno od pobratimljenja ensarija i muhadžira, kao što jasno proizlazi iz prethodno spomenutog hadisa („Ali je moj brat na ovom i na onom svijetu“). Kako bi se naglasio značaj ovog bratimljenja, objavljen je 61. ajet sure Al-i Imran (3:61), u kome se Imam Ali spominje kao sami neufs (duša/sebstvo) poslanika Muhameda:

„A onima koji se s tobom budu raspravljali, pošto si već pravu istinu saznao, ti reci: 'Hodite, pozvaćemo sinove naše i sinove vaše, i žene naše i žene vaše, a doći ćemo i mi, pa ćemo se usrdno pomoliti i Allahovo prokletstvo na one koji neistinu govore prizvati!'“⁴¹⁸

Prethodno spomenuti ajet ukazuje na događaj Mubahale. Naime, kada su se kršćani iz Nedžrana prepirali sa poslanikom Muhamedom oko toga da li je poslanik Isa sin Božiji, što muslimani osporavaju, Poslanik je pozvao na Mubahalu (uzajamno moljenje Boga da zazovu Božije prokletstvo na onu stranu ukoliko ne govori istinu). Kršćani su došli sa 70 ljudi iz Nedžrana. Oni su se nadali da će se Poslanik pojaviti sa više sljedbenika na Mubahalu, te bi oni time odnijeli moralnu pobjedu jer bi njih tada bilo manje. Posebnost učestvovanja na Mubahali je u tome da svaka od strana zaziva prokletstvo na samu sebe ukoliko bi ona bila u krivu. Međutim, kada se Poslanik Muhamed na Mubahali pojavio u pratnji Imama Alija, Fatime, Imama Hasana i Imama Husejna, biskup je prepoznao visoki stupanj Ehli Bejta. Zato je pozvao kršćane da se distanciraju od Mubahale, jer je uvidio da su ovi blagoslovljeni ljudi u pravu i da bi se zato Božije prokletstvo spustilo na njih.

Islamski učenjaci su usaglašeni u tome da je ajet 61 iz sure Ali-i Imran (3:61) objavljen zbog odlika Poslanikove porodice. Posebnost ovog ajeta je to što se u njemu opisuju Imam Hasan i Imam Husejn kao sinovi, a Fatima kao žena islama. Pored toga, Poslanik Muhamed i Imam Ali opisuju se kao duša islama (arap. neufs), pošto bratstvo među njima dvojicom ima značajnu težinu. U dovi Dua al-Nudba, koja se prenosi od Imama Džafera Sadika, jasno proizlazi da je Poslanik Muhamed u raznim prilikama pred zajednicom jasno isticao položaj bratstva (musahip) sa Imamom Alijem:

⁴¹⁶ Sura en-Nisa, ajet 33 (4:33)

⁴¹⁷ Sura at-Tawba, ajet 100 (9:100)

⁴¹⁸ Sura Al-i Imran, ajet 61 (3:61)

„(...) Ti (Ali) si moj brat, nasljeđe i nasljednik. Tvoje meso je moje meso, tvoja krv je moja krv, tvoja istina je moja istina, tvoja borba je moja borba. Vjera je isprepletena i pomiješana u tvome mesu i tvojoj krvi, baš kao što je i u mojoj stvorena. Na Sudnjem danu bit ćeš moj predstavnik na Kevser-vrelu. Ti ćeš izmiriti moje dugove i provoditi moj način života (sunnet). Tvoje šije (prijatelji i sljedbenici) govorit će sa uputama, uživati poštovanje i postići čast dobrih manira i profinjenosti. Njihova će lica biti ispunjena svjetlošću u Džennetu oko mene. Oni će biti moji saputnici. O Ali, da nije bilo tebe (mog nasljednika) poslije mene, vjernici više ne bi znali istinu. (...)”⁴¹⁹

Iako je značaj bratstva među muslimanima naglašavan u najranijim historijskim izvorima islama, put bratstva među muslimanima (tur. *musahiplik*) izgubio je na značaju kroz stoljeća. Dok sunitski izvori samo spominju historijski događaj koji se praktikovao za vrijeme života poslanika Muhameda, čemu se ne pridaje nikakav dalji značaj, tradicija pobratimljenja se među sljedbenicima Ehli Bejta (aleviti i šiiti) praktikuje do sadašnjeg vremena. Naprimjer, izgovaranje sljedeće zakletve između dva brata (*musahip*) preporučuje se kao visoko pohvalan čin na dan Gadir Huma u zbirci *dova* Mafatih al-Jinan, šiitskog vjerskog učenjaka šejha Abbasa Qommija (1877–1940):

„Postavio sam te za svoga brata na Allahovom putu. Na Allahovom putu postao sam tvoj brat i držao sam te za ruku na Allahovom putu. Sklopio sam savez sa melekima, knjigama, vjerovjesnicima, poslanicima i bezgriješnim Imamima (Allahov mir neka je na sve njih). Kada mi na onom svijetu bude dozvoljen šefa'a (zagovor) i ulazak u Džennet, neću ući dok ti ne budeš uz mene.“

Ipak, treba naglasiti da se veza bratimljenja kod šiita, pored spominjanja u tradicionalnim izvornim djelima, ne praktikuje sa istim značajem kao unutar alevitske zajednice. Na kraju, *musahiplik*-sistem u alevitskoj zajednici zasnovan je na određenim pravima i obavezama između pobratimljenih porodica. Poznato je da sve religije i filozofske škole mišljenja svojim proklamovanim moralnim kodeksima stavljaju veliki naglasak na bratstvo i mir među ljudima. Međutim, sveobuhvatna praktična provedba propagirane doktrine bratstva koja obuhvata sve aspekte života istinski se nalazi samo u alevitskom sistemu vjerovanja. U konačnici, veza bratstva između dvije porodice formirana je slobodnom voljom i čak ima prednost nad krvnim vezama.

S obzirom na to da materijalni interesi dominiraju ljudskim odnosima, postaje jasno da se ljudske vrijednosti često zanemaruju u profitno orijentisanim ekonomskim sistemima. Koncepti temeljeni na sebičnosti i konkurenciji potkopavaju ljudske odnose. Posljedično, ti nemilosrdni i brzo razvijajući ekonomski sistemi, kojima upravljaju tržišna pravila, smatraju ljudski faktor nužnim samo dok zadovoljava tržišne zahtjeve. To podstiče i pojačava sve negativne osobine, poput sebičnosti, zavisti i pohlepe, koje umanjuju ljudsko dostojanstvo. Ljudska bića tako postaju asocijalni potrošači. Put bratstva, koji je značajno doprinio jačanju islamske zajednice, sistem je koji poziva sve članove na sudjelovanje u dobrotvornim i

⁴¹⁹ Qommi: *Mafatih-ul-Jinan*, atr. 539

solidarnim akcijama. Solidarnost, zajednička proizvodnja i zajednička potrošnja unutar ovog sistema vode do preuzimanja društvene odgovornosti ljudi. Cilj bratimljenja jeste da prvenstveno čovjeka oslobodi od sebičnog načina razmišljanja te da kreira socijalnu psihologiju. Tako što se smatra neizostavnom nužnošću vjerovanja, istovremeno se ljudskom egu nameće ograničenje. Veza bratstva se stoga smatra najvećom vrlinom u alevitskom učenju.

Ipak, valom useljavanja anadolijskog alevitskog stanovništva od polovine 20. stoljeća u velike gradove i inostranstvo, bratstvo puta doživjelo je značajan pad. U konačnici, princip zajedničke proizvodnje i zajedničkog konzumiranja u užurbanosti gradskog života nije bilo više moguće potpuno sprovoditi, kako su to aleviti stoljećima praktikovali. Još k tome, yotežane okolnosti uslova života u gradu dovele su do toga da je značajno opao osjećaj društvene odgovornosti između musahip-porodica. Ukratko, može se zaključiti da je alevizam, prvenstveno zbog stoljeća progona, razvio društvenu strukturu koja, na vjerskoj razini kroz odnos između pira i talipa, te na ekonomskoj razini kroz bratstvo puta, osigurava solidarnost i sklad unutar alevijske zajednice. Ta se činjenica jasno odražava u pjesmi Šaha Ismaila:

Pažljivo izgovaraj svoje riječi
Ne skidaj pogled sa ova dvojna vrata
Predaj se pravednom muršidu
Pronađi vrata musahipa (saputnika) i tako dođi.

9 Džem ceremonija i Dvanaest službi (Oniki Hizmet)

Nakon što smo u prvim poglavljima obradili definiciju alevizma kao i pojedine teze o alevizmu, u nastavku ćemo bliže rasvijetliti osnove vjerovanja, praksu i pisana djela alevizma sa izjavama i pjesmama značajnih alevitskih učenjaka i pjesnika. Kako bismo do sada spomenute argumente o islamskom identitetu osnažili, želimo se fokusirati na praktične rituale alevizma u džem ceremonijama. Dosadašnje istraživanje pokazuje da se alevizam u islamskoj literaturi naziva i Šija-i Batinija i da pokazuje veoma blisku historijsku srodnost sa šiitskim islamom. Istovremeno se naglašava da se alevizam, kroz pristup misticismu (tur. tasavvuf) kao i kroz svoje kulturološke i sociološke posebnosti koje su se kroz stoljeća formirale, razlikuje od dogmatski prožetog šiizma.

Kao što je prethodno već naglašeno, asimilacijska politika Osmanskog Carstva, kao i odsustvo fundamentalnih alevitskih obrazovnih ustanova u Nedžefu, Kerbeli i Ardabilu, doprinijelo je tome da alevizam vremenom razvije praktične rituale uz svoje temeljne principe. Izraz džem potječe iz arapskog jezika i znači „okupiti se“ ili „ujediniti“. Stoga su, Naprimjer, izrazi džamija (arap. džami') i univerzitet (arap. džami'a) također izvedeni iz iste korijenske riječi, budući da funkcioniraju kao središnja mjesta susreta. Primarni cilj obreda

džem jeste okupljanje vjernika na jednom mjestu kako bi zajedno prakticirali bogoslužje. Alevizam se razlikuje od drugih ortodoksnih⁴²⁰ islamskih tradicija, posebno kroz rituale koji se izvode tokom ceremonije Džem. Nadalje, obred džem ima za cilj očuvanje alevitskog identiteta i tradicije te jačanje osjećaja zajedništva među vjernicima. Karakteristično za mistično i dublje (batin) razumijevanje islama jest zahtjev za dobijanjem pristanka i saglasnosti (tur. rızalık) vjernika koji učestvuju prije početka službe. Ako postoji bilo kakvo neslaganje ili razdor među članovima zajednice, dede (duhovni vođa obreda) mora riješiti sukob i vratiti harmoniju. U konačnici, cilj službe je traženje unutarnjeg mira i zadovoljstva u prisutnosti božanskog. Međutim, prije nego što osoba to može učiniti, mora biti u skladu sa svojom okolinom. Bez ovog temeljnog preduslova, osoba ne može postići ni božansku blizinu ni rang Insan-i Kamil (što znači savršeno ljudsko biće). U tom kontekstu, poznata pjesma Šaha Ismaila Hatayija opisuje nužnost ovog principa na sljedeći način:

Ne može svako pristupiti skupu erenlera (Džemu) mudrih, bez pristojnosti i dostojanstva.
Ne može svako ko se naziva kanberom⁴²¹, zaista kanber i biti. Sve dok ne postane kanber šaha (Imama Alija).

Ne može svaka duša ući u zajednicu erenlera bez manira i bontona
Ne može svako ko tvrdi da je kanber kanber biti
Osim ako nije sluga kanbera moga Alija, Imama Alija
Šejh Hatayi otkriva ovu tajnu
Je li onaj ko slijedi riječi neukog zaista mudar
Plakanje je gubljenje života, osim ako nema Ljubavnika s obje strane

Iako se cijela ceremonija džem ne može ovdje u cijelosti prepričati, upotrijebit ćemo nekoliko primjera kako bismo ilustrirali islamski karakter alevizma. Nadalje, Dvanaest službi pruža dovoljno argumenata za opovrgavanje teorija predstavljenih u 2. poglavlju. Uostalom, brojne naznake koje podupiru iznesene teorije trebale bi se pronaći u samom obredu Džem, ako su istinite. Stoljećima se obred džem održavao u tajnosti zbog osmanlijskog progona i ugnjetavanja. Stoga, ako bi alevizam doista predstavljao neovisnu (neislamsku) religiju ili čak

⁴²⁰ Pojam ortodoksije u svom osnovnom značenju opisuje ispravnost doktrine, ali se često koristi u smislu „prevladavajuće doktrine“. Budući da dominira javnom percepcijom, definira normu i zapravo se smatra „ispravnom“ i „istinskom doktrinom“. Nasuprot tome, sve različite doktrine smatraju se „falsificiranima“ (heterodoksija). Posljedično, pripisivanje ortodoksije prevladavajućoj doktrini ne bi se trebalo shvaćati kao „ispravna“ doktrina.

⁴²¹ Kanber je bio rob Imama Alija. Nakon što ga je Imam Ali oslobodio iz ropstva, ostao je u službi kao njegov sluga. Budući da se iskreno i neustrašivo zalagao za istinu, bio je veoma blizak Poslaniku Muhamedu i Imamu Aliju. Nakon Imama Alijeve mučeničke smrti, stupio je u službu Imama Hasana i Imama Husejna. Jednog dana, Hadždžadž ibn Jusuf (661–714), koji je ostao zapamćen po svom neprijateljstvu i okrutnim postupcima protiv sljedbenika Ehli Bejta, raspitao se o preostalim sljedbenicima Imama Alija u Kufi. Saznao je za Kanbera i naredio njegovo trenutno uhićenje. Nakon što je Kanber prisilno doveden u vladarevu palaču, izbila je žestoka svađa između Hadždžadža ibn Jusufa i Kanbera. Budući da Kanber nije odustao od svoje naklonosti prema Ehli Bejtu, po Hadždžadžovom naređenju je obezglavljen. Njegov grob se nalazi u Bagdadu.

neku vrstu prisilno islamiziranog oblika zoroastrizma ili jazidizma, koji je samo predstavljajući islamski oblik samozaštite, morali bi se u centralnom bogoslužju alevita, dakle džem ceremoniji, pronaći brojni znakovi za ispravnost ove teze. Stoga bi na ovom mjestu bilo preporučljivo zainteresiranom čitaocu da sam posjeti džem ceremoniju, kako bi stekao cjelovito razumijevanje alevitske vjerske prakse.

U sljedećim potpoglavljima će biti bliže pojašnjeno Dvanaest službi.⁴²²

9.1 Pir (duhovni učitelj/starješina)

Službu pira (učitelja) uglavnom mogu obavljati samo članovi sejidskih porodica, budući da on, kao potomak Ehli Bejta, mora preuzeti vodeću i usmjeravajuću ulogu. Slijedom toga, pir predstavlja službu poslanika Muhameda i Imama Alija. U konačnici, aleviti priznaju samo poslanika Muhameda i nepogrešivih Dvanaest Imama kao svoje legitimne vjerske vođe i vodiče. Iz poštovanja prema Ehli Bejtu, zajednica stoga povjerava potomcima poslanika Muhameda vođenje i blagoslov obreda Džem. Tokom ceremonije Džem, dede uči sljedeće ajete iz Kur'ana:

„Gospodaru naš“ – rekoše oni – „sami smo sebi krivi, i ako nam Ti ne oprostiš i ne smiluješ nam se, sigurno ćemo biti izgubljeni.“⁴²³

O vjernici, bojte se Allaha i budite s onima koji su iskreni!⁴²⁴

Kada se na početku džem ceremonije prostre Sedžada⁴²⁵ odnosno Post⁴²⁶, dede uči sljedeći ajet kako bi naglasio da stvarno upravljanje džem obredom pripada poslaniku Muhamedu i Dvanaest Imama, a dede preuzima samo funkciju zastupnika u ime Ehli Bejta:

⁴²² Ovdje treba spomenuti da danas postoje regionalne kulturološke razlike u odvijanju džem ceremonije i praksi Dvanaest službi, što je više nego normalno s obzirom na stoljeća progona, ugnjetavanja i izolacije alevita u Osmanskom Carstvu.

⁴²³ Sura al-A'raf, ajet 23 (7:23)

⁴²⁴ Sura at-Tawba, ajet 119 (9:119)

⁴²⁵ Sedžada je pojam koji se na turskom jeziku upotrebljava za tepih na kojem se klanja. Međutim, u džem ceremoniji sedžada utjelovljuje službu Poslanika Muhameda i Dvanaest Imama. Uz suglasnost (*rizalık*) zajednice, dede preuzima vođenje džem ceremonije nakon što zauzme mjesto na sedžadi. Budući da u samom toku džem ceremonije postoje određene regionalne razlike, pojam *post* (jagnjeća koža) koristi se sa značenjem istovjetnim sedžadi.

⁴²⁶ Perzijski pojam *post* znači koža, odnosno jagnjeća koža, i opisuje mjesto koje u dergahu tekije zauzima alevijski duhovni učitelj. Zbog toga se bektašijski poglavari, naprimjer, nazivaju *postnišin* (upravitelj posta), zato što ne samo da preuzimaju dužnost svoga prethodnika nego i u doslovnom smislu sjedaju na mjesto svojih prethodnika. Porijeklo posta se prema tradiciji veže za krzno životinje koja je žrtvovana kao kurban, a što je poslaniku Ibrahimu spušteno kao objava. Prema alevijskoj tradiciji, koža se s oca na sina prenosila od vjerovjesnika Ismaila pa sve do Poslanika Muhameda. Alevije su čvrstog uvjerenja da su svi preci Poslanika Muhameda svoje bogoslužje, kao Bogu predani ljudi, obavljali na toj kožici.

„Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!“⁴²⁷

U tom kontekstu treba naglasiti da dede mora svojim postupcima zaslužiti vjerodostojan i iskren položaj u zajednici te biti smatran časnom i kompetentnom osobom. U tu svrhu mora dobiti pristanak svakog pojedinog sudionika džem ceremonije kako bi preuzeo vodeću i usmjeravajuću ulogu tokom ceremonije.

Nakon toga, recitira se takozvani Prijestolni ajet (arap. Ayat al-Kursi) iz Kur'ana kako bi svi učesnici džem ceremonije, a posebno dede, mogli položiti račune pred Bogom i zatražiti oprost za svoje grijehe:

„Allah je – nema boga osim Njega – Živi i Vječni! Ne obuzima Ga ni drijemež ni san! Njegovo je ono što je na nebesima i ono što je na zemlji! Ko se može pred Njim zauzimati za nekoga bez dopuštenja Njegova?! On zna šta je bilo i prije njih i šta će biti poslije njih, a od onoga što On zna – drugi znaju samo onoliko koliko On želi. Moć Njegova obuhvata i nebesa i zemlju, Njemu ne dojadi održavanje njihovo; On je Svevišnji, Veličanstveni!“⁴²⁸

Potom dede uči sljedeći ajet, nakon što osoba koja pali i održava svijeće (tur. čeragdži) džem ceremonije obavi obred paljenja svijeća:

„Allah je izvor svjetlosti nebesa i Zemlje! Primjer svjetlosti Njegove je udubina u zidu u kojoj je svjetiljka, svjetiljka je u kandilju, a kandilj je kao zvijezda blistava koja se užije blagoslovljenim drvetom maslinovim, i istočnim i zapadnim, čije ulje gotovo da sija kad ga vatra ne dotakne; sama svjetlost nad svjetlošću! Allah vodi ka svjetlosti Svojoj onoga koga On hoće. Allah navodi primjer ljudima, Allah sve dobro zna.“⁴²⁹

Ako član zajednice želi zaklati kurban za dobrobit drugih, dede uči sljedeće ajete:

I njih dvojica poslušajte, i kad ga on čelom prema zemlji položi, Mi ga zovnusmo: „O Ibrahim, ti si se objavi u snu odazvao; – a Mi ovako nagrađujemo one koji dobra djela čine – to je, zaista, bilo pravo iskušenje!“ – i kurbanom velikim ga iskupismo..⁴³⁰

Izvan džem ceremonije, dede preuzima ulogu teologa i obraća se potrebama zajednice. Tipične dužnosti koje obavlja uključuju vjenčanja, dženaze, inicijacije u bratstvo (musahiplik) i imenovanje novorođenčadi. Rastuća emigracija seoskog stanovništva prije trideset ili

⁴²⁷ Sura al-Ahzab, ajet 56 (33:56)

⁴²⁸ Sura al-Baqara, ajet 255 (2:255)

⁴²⁹ Sura an-Nur, ajet 35 (24:35)

⁴³⁰ Sura es-Saffat, ajet 103-107 (37:103-107)

četrdeset godina u turske ili evropske velike gradove suštinski je pridonijela tome da su familijarne veze oslabile. Koje su ponovo doprinijele porastu unutarporodičnih tenzija, zbog čega je dede sve više morao preuzimati ulogu socioloških i psiholoških obaveza kako bi ostvario mir u porodicama. Po tome se može prepoznati stvarni značaj Sejjid-i Sadata i Evlad-i Resula (poglavlara alevitske zajednice) u alevitskoj zajednici.

9.2 Zakir (svirač lutnje)

Zakir (recitator), često nazivan i ašik, recitira pjesme (nefes, deyiş, mersiye) poznatih alevitskih učenjaka i pjesnika na svom anadolskom žičanom instrumentu (saz). Tokom ceremonije Džem, Zakir predstavlja ulogu poslanikovog saputnika Bilala al-Habešija⁴³¹, koji je zbog svog prekrasnog glasa učio Kur'an u vrijeme poslanika Muhameda.

9.3 Gözcü (stražar, onaj koji nadgleda)

Gözcü (posmatrač) je odgovoran za održavanje reda i nadzor džem ceremonije. Ako se vjernici koji sudjeluju u ceremoniji ne pridržavaju smjernica, on izdaje upozorenja i osigurava nesmetan tok obreda; također prati dostojanstvenike dvanaest službi pri izvođenju njihovih zadataka. Kod džem ceremonije gözcü predstavlja dužnost poslanikovog saputnika Ebu Zerra al-Gaffarija.

9.4 Delilci odnosno čeragdži (osoba koja pali svijeće)

Delilci (doslovno: budi svjetlo) simbolično pali svjetlo džem ceremonije. Služba koju obavlja tokom džem ceremonije naziva se paljenje svijeća (tur. čeragdži uyandirmak). Bazirano na citiranom 35. ajetu sure En-Nur (24:35), pale (ili bude se) tri svijeće kako bi na simboličan način džem ceremoniju osvijetlili božanskim svjetlom. Istovremeno, paljenje svijeća treba da objasni da svi prisutni manifestiraju ljepotu svjetla božijeg. Dok se tri svijeće pale odnosno bude, čeragdži uči sljedeću „molitvu ruže“ (gülbang):

U Ime Šaha (vladara), Allah, Allah!
Upaljena svijeća, pohvala dervišima
Pojava vjere, himmet Pira

⁴³¹ Bilal al-Habeši bio je tamnopusi prijatelj Poslanika Muhameda, koji je kao nearap (arap. *muwallad*) rođen u Meki 573. godine. Kada se upoznao s Poslanikom Muhamedom, bio je rob Umejje ibn Halafa, jednog utjecajnog idolopoklonika. Zbog toga je od vodećih idolopoklonika Meke zlostavljan kada je prihvatio islam. Kako bi spriječio njegovo ubistvo mučenjem, Poslanik ga je otkupio iz ropstva za određenu sumu novca. Zbog njegovog jakog glasa, Poslanik ga je imenovao prvim pozivateljem na namaz (arap. *muezzin*) u islamu. Prenosi se da nakon smrti Poslanika Muhameda, Bilal zbog protesta prema Ebu Bekrovom nelegitimnom halifatu više nije učio ezan. Po naređenju Imama Alija otišao je u Siriju kako bi pridobijao sljedbenike za Ehli Bejt. Umro je 642. godine u Damasku i tamo je pokopan. Njegov grob nalazi se na groblju Bab al-Saghir.

Pir Horasana, mjesto junaka
Namjera Abdala, zakon Božijih prijatelja
Hu, neka se znaju činjenice
La feta illa Ali la Seyfa illa Zulfikar
Tako mi svjetlosti Tvoje veličine, o Allah, o Allah, o Allah!
Svjetlom tvoga poslanstva, o Muhamede, o Muhamede, o Muhamede.
Svjetlom tvoga velajeta, o Ali, o Ali, o Ali.

Posljednje tri strofe u pravilu uči cijeli skup zajedno. Nakon što čeragdži upali svijeće, dede uči sljedeću molitvu Ruže:

Iz ljubavi i saglasju s Bogom oživjeli smo svijeću
Za ljubav prema Seyyidu Muhamed Mustafi, vladaru oba svijeta
Iz ljubavi prema Aliju el-Murtezi, ljubavi prema Kevser vreli
I ljubavi prema Hatidži i Fatimi, najplemenitijim ženama
Za ljubav prema šahu Hasanu, Hulki Rizi i šah Husejnu od Kerbele
Za ljubav prema Imamu pobožnih, Zejn ul-Abidinu
Za ljubav prema učenom Muhamedu Bakiru, čije je porijeklo čisto
Za ljubav prema Murtezi Džafer al-Sadiku, Imamu upute
Za ljubav prema Musi al-Kazimu, Imamu Svevišnjeg, Narodu istine, i Aliju Musi Rizi
Za ljubav prema Šahu Takiju i Hadi Nakiju, i Hasanu al-Askeriju
Za ljubav prema Muhamedu Mehdiju, vlasniku zastave
Iz ljubavi prema Hadži Bektašu, našem učitelju i uputitelju
Iz ljubavi prema onima koji vječno plamte iz ljubavi.

Tokom ceremonije Džem, delilci predstavlja dužnost Poslanikovog ashaba Džabira ibn Abdullaha el-Ansarija.

9.4 Süpürgeci odnosno ferraš (čistač džem ceremonije)

Süpürgeci simbolično mete ili čisti vjernike – učesnike džem ceremonije od nemoralnih nečistoća. Njegova služba treba da naglasi, pored izvanjske, značaj unutarnje čistoće. U pratnji stražara on ulazi na mjesto gdje će se vršiti obred džem ceremonije i pred dedeom i vjernicima, uz učenje „Ya Allah, Ya Muhamed, Ya Ali“, obavlja svoju službu. Pri tome on mete sa tri simbolična pokreta mjesto džem ceremonije i uči sljedeću molitvu ruže (gülbang):

Sa tvojim dopuštenjem, moj učitelju!
Ja sam iz skupine iskrenih

Ja sam čistač na mjestu Četrdesetorice⁴³²
Stojim u prisutnosti pira
Moje oči su krvave od suza za Husejnom na Kerbeli
Neka je proketo Jezidovo srce, čije srce je crno kao kamen
Ali al-Murteza je glavni na mjestu svetaca
Na špir je Seyyid-i Faraš⁴³³ među četrdesetoricom
Hvaljen neka je Allah, dah je sa pirom.

Nakon što je čistač obavio svoju službu, dede uči sljedeću molitvu Ruže:

Čistač je Selman, neka oslijepi Mervan⁴³⁴, u Dženetu je Ridvan⁴³⁵
Neka se pojavi Mehdi, Gospodar Vremena.
Neka nam Dvanaest Imama budu pomagači
Neka ti zbog tvoje službe bude podaren zagovor
Neka je blagoslov Seyyid-i Ferraša na tebi.
Hu je istina.

Zatim kao znak blagoslova njegove službe, vjernici uče sljedeću molitvu (salavat):

Allahume salli ala Seyyidina Muhamed ve ala Al-i Seyyidina Muhamed.⁴³⁶
Allahume salli ala Muhamed ve Al-i Muhameda ve Evlad-i Ehlibejt.⁴³⁷

Tokom ceremonije Sūpürgeci predstavlja služenje Poslanikovog prijatelja Selman al-Farsija.

9.4 Semahči ili pervane (oni koji izvode semah)

Semahči su oni koji tokom džem ceremonije predstavljaju službu Ebu Zerra al-Gaffarija. Ova služba se, po alevitskom vjerovanju, zasniva na okupljanju četrdesetorice (Kirklar Meclisi), tokom kojeg se turban Poslanika Muhameda razvio u sedamnaest pojaseva. Kao znak svoje

⁴³² Kirkler (Četrdesetorica) skrivene su evlije (sveti) u alevizmu. Prema alevijskom vjerovanju, Poslanik Muhamed se nalazio u silasku s nebeskog putovanja (Miradž) na mjestu Kirkler (tur. *Kirkklar meydani*), gdje je, po alevijskom uvjerenju, bio svjedok jednog rituala.

⁴³³ Nadimak Poslanikovog prijatelja Selmana al-Farsija.

⁴³⁴ Mervan ibn Hakim bio je četvrti Umejadski halifa i ljuti neprijatelj Ehli Bejta.

⁴³⁵ Ridvanom se smatra Melek koji nedzire Dženet.

⁴³⁶ O Bože, blagoslovi našeg gospodina Muhameda i porodicu našeg gospodina Muhameda.

⁴³⁷ O Bože, blagoslovi Muhameda, porodicu Muhamedovu i potomstvo Ehli Bejta.

odanosti Poslaniku Muhamedu, kaže se da su sedamnaest kemerbesta (sedamnaest pojasanih) zatim vezali pojaseve oko struka. Tokom ostatka okupljanja, kaže se da su sedamnaest kemerbesta, obuzeti ljubavlju prema Bogu i Poslaniku Muhamedu, ušli u stanje ekstaze i vrtjeli se u krug. Prema alevitskom narativu, ovaj događaj je porijeklo ritualnog plesa semah.

9.5 Sakkaci ili saki (onaj koji napaja prisutne kod obreda džem)

Sakkaci dijeli prisutnim učesnicima džem ceremonije vodu, u sjećanju na ubistvo Imama Husejna. Kod džem ceremonije sakkaci predstavlja službu Imama Husejna. Pošto postoje određene regionalne razlike prilikom džem ceremonije, sakkaci ponekad dijeli vjernicima zaslađenu vodu ili mlijeko.

9.6 kapidži ili bekči (čuvari džem ceremonije)

Zadatak kapidžija je u tome da nakon početka ceremonije ne dozvoli da nijedna više osoba uđe na skup, kao i da spriječi prijevremeni odlazak. U prošlosti na njih je padala jedna posebno važna obaveza: da uglavnom brinu da okupljanje vjernika na džem ceremoniji bude obavljeno u tajnosti i skriveno od osmanskih vladara. Pošto su aleviti za vrijeme Osmanlijskog Carstva morali džem ceremoniju obavljati u skrivenosti, djelovali su kao izviđači, osiguravajući da se zajednica pravovremeno obavijesti tako da se ceremonija otkaže na vrijeme kako bi se vjernici mogli skloniti na sigurno. Tokom džem ceremonije, kapidžija predstavlja dužnost poslanikovog saputnika Ghulama al-Keysanija.

9.7 Pejkidžija (glasnik džem ceremonije)

Pejkidžija ima dužnost da objavi mjesto i vrijeme naredne džem ceremonije unutar zajednice. U prošlosti su i pejkidžije imale posebno važno mjesto u pripremama za džem ceremoniju, pošto su aleviti za vrijeme Osmanlijskog Carstva svoje obrede morali održavati u tajnosti. Stoga je on preuzimao dužnost da samo jednu osobu obavijesti i pozove na džem ceremoniju – osobu koju bi se smatralo pouzdanom. U konačnici, aleviti su za vrijeme osmanske vladavine morali računati na masovne represije državnog aparata. Tako u mnogim regijama Anadolije nisu mogli dozvoliti da sve ljude pozivaju ili obavještavaju o održavanju džem ceremonije. Pri džem ceremoniji pejkidžija bi predstavljao poslanikovog saputnika Amr-al Ayyara.

9.8 Iznikdži (čistač džem ceremonije)

Iznikdži je odgovoran za pripremu kuće u kojoj će se održati bogoslužje. S tim u vezi, on prije početka džem ceremonije prostire post, na kojem će mjesto uzeti dede kako bi vodio

ceremoniju. Tokom džem ceremonije on još prostire sedžadu (tepih na kojem se moli). Kod džem ceremonije iznikdži predstavlja poslanikovog saputnika Huzayma al-Ansarija.

9.9 Tezekar (onaj koji obavlja obredno pranje učesnika džem ceremonije)

Zadatak ove službe sastoji se od simboličnog pranja i pročišćenja vjernika koji sudjeluju u ceremoniji, koju obično obavlja bračni par. Ova služba temelji se na sljedećem hadisu poslanika Muhameda:

„Čistoća je dio (iskrene) vjere!“

Čistoća je također sastavni dio prvih vrata (šerijata). Vjernici su obavezni obaviti pranje cijelog tijela (gusul-abdest) te s čistom odjećom otići na džem ceremoniju. Time ispunjavaju zahtjeve pravila vrata-šerijata. Međutim, mora se naglasiti da, pored izvanjskog čišćenja, i unutarnje čišćenje ima veliki značaj u džem ceremoniji. Zbog toga se u ovim drugim vratima (tariqa) veliki značaj daje na unutarnju, duševnu čistoću vjernika. Vjernik ne treba vodu koristiti samo za pranje svoga tijela, nego i pročišćavajući utjecaj čiste vode sprovesti u svojim postupcima. S tim u vezi, aleviti se oslanjaju na sljedeću izjavu Hadži Bektaš Velija: „Voda je kako čista, tako i pročišćavajuća. Voda ima položaj spoznavaoca.“

Stoga je vjernik obavezan očistiti svoje vanjsko i unutarnje biće od svih oblika nečistoće. U konačnici, samo oni koji su se očistili i pročistili mogu biti od koristi svojoj okolini. U alevizmu se ritualno pranje (abdest) stoga shvata ne samo u svom vanjskom obliku već i u dubljem, mističnom. Od velike je važnosti da se, osim vanjske čistoće, osoba usredotoči na čistoću svoga srca i učini ga Božijim prebivalištem. Tokom čišćenja vodom, vjernik mora očistiti svoje srce od svih nečistoća, uz svu fizičku čistoću. U konačnici, pravi pristup Bogu može se postići samo s čistim srcem.

9.10 Lokmadžije, sofradžije odnosno kurbandžije (oni koji dijele hranu)

Zadatak lokmadžija je pravedno i ravnomjerno dijeljenje hrane i kurbanda među prisutnima, koju su vjernici donijeli na džem ceremoniju. Vezano za ovo, on mora, nakon što je hranu podijelio, tri puta pitati za pristanak prisutnih prije nego pred dedeom prouči molitvu ruže (gülbang) i svoju dužnost privede kraju. Tokom džem ceremonije lokmadžija predstavlja službu Mahmuda al-Ansarija.⁴³⁸

⁴³⁸ Najvjerojatnije se misli na Mahmud ibn Maslama, koji je pao kao šehid na bitci na Hendeku.

10 Molitve ruže (Gülbang)

10.1 On iki Hizmet nefesi (Poema o Dvanaest službi)

Haktan bize nida geldi
Pirim sana beyan olsun
Şahdan bize name geldi
Rehberime haber olsun

Stigao nam je poziv od istine,
Neka ti se objavi moj učitelju,
Poruka nam je stigla od Šaha (Alija),
Neka to bude vijest mom vodiču.

Şah kuluna kildi nazar
Dört kaliptan adem süzer
Zeval gelemiş cemi bozar
Gözcü sana haber olsun

Šah baca pogled na svog slugu,
Iz četiri kalupa formira Adema,
Štetne stvari kvare zajednicu,
Neka ti ovo bude upozorenje, o vodiču

Zakirin zikri saz ile
Kuran okur avaz ile
Mümin Müslim niyaz ile
Zakirlere haber olsun

Zakir zikra prati zvuk Saza,
Uči Kur'an jasnim glasom,
Vjernik, musliman upućuje dove ponizno,
Nek se obavijeste oni koji vode zikr

Hak kuluna nazar eyler
Hakkin kelmini söyler
Mümin gelmiş mürvet diler
Peyik sana haber olsun

Bog gleda na svog slugu,
Riječ istine mu se govori,
Vjernik je došao tražiti milost,
Nek ti ovo bude poruka, glasniče.

Mümini çekti meydana
Münkiri sürdü zindana
Hizmet verildi Selman'a
Faraşçı'ya haber olsun

Vjernik će biti pozvan na poprište,
Poricatelj će biti bačen u tamnicu,
Selman je imao zaduženje čistača,
Toga budite svjesni

Mümin yolun yakın ister
Münkirlerden sakın ister
Delil yanmaz yağın ister
Delilci'ye haber olsun

Vjernik teži putu uvjerenja,
Zahtjeva da se izbjegava poricatelje,
Traži ulje od svijeće koje se gasi,
Neka prosvijetitelj toga bude svjestan

Bu yolun giden nâcidir
Erenler kardeş bacidir
Cem kilidi kapacidir

Spašen je onaj koji korača ovim putem,
Erenleri su braća i sestre,
džem čuva vratar,

Kapici'ya haber olsun

Zakirlerin zikri sazdir
Okunan deyiş düvazdir
Mümin hak ile niyazdir
Niyazci'ya haber olsun

Hak kulunakildi rahmet
Sana niyaz Ya Muhamed
upućujme ka tebi,
Hizmet görüldü muhabbet
Tezeker sana haber olsun

Yola giden haslar hasi
Mümin giyer Hak libasi
Doldur ver engürün tasi
Sakaci'ya haber olsun

Şah Hatayi''m vari geldi
Müminlerin kâri geldi
Hakkin armağani geldi
Iznikçiye haber olsun

Čuvar treba da je svjestan toga

Učenje zikra prati zvuk,
Uče se dove (pobožne pjesme),
Iskrena je molitva vjernika,
Darivalac je upoznat sa tim

Bog je podario milost svome slugi,
Moli te, o Muhamede, za zagovorništvo

Služenje se pruža s ljubavlju,
Promišljanjem se to saznaje

Najodaniji vjernici kreću na put,
Vjernici nose Božiju odjeću,
Pune čašu soka od grožđa
I šalju vijest vodonoši

Stiglo je bogatstvo Šah Hatayia,
Stiglo je spasenje vjernicima,
Stigao je dar istine,
Neka to zna onaj koji čisti.

10.2 Cemin açiliş gülbangi (Uvodni Gülbang pri otvaranju džema)

Bism-i Şah Allah Allah!
Çeragi Ruşen, Fahri DerviŞan,
Mana-i Piran, Kuvveyi Abdalan,
Selamet-i gariban, Huzur-u Hazirun,
Kanun Evliya, Nur-u Āl-i Āba. Allah Allah!

U ime Šaha (vladara) Allah Allah!
Osvjetljavajuća svijeća, slava derviša,
Značenje pira, snaga Abdala⁴³⁹,
Spasenje siromašnih, zadovoljstvo prisutnih,
Zakon prijatelja Božjih, svijetlo Ehli Bejta o Allah, Allah!

⁴³⁹ Naziv za anadolijske dervişe.

10.3 Tarikat telkini (Zakletva puta)

Geldiğin Ali yolu, durduğun Mansur dari, gördüğün Hak didari.
Hak cesedine can verdi, Kalbine iman verdi. Ağiz talib, dil mürsid.
Erenler meydanında ne gördün, ne işittin?

Dolaziš sa Alijevog puta, stojiš pred Mensurovim⁴⁴⁰ prebivalištem,
Lice koje si vidio je Božje lice. Bog je udahnuo život u tvoje tijelo, i
unio vjeru u tvoje srce. Tvoja usta su tražitelj, tvoj jezik je vodič.
Šta ste vidjeli ili čuli na Erenlerovom mjestu?

10.4 Dar Tercumani (Ispovjed)

Can-i dilden aşk ile bağlandım Âl-i Aba'ya.
Siğindim el-Âman Hz. Muhamed Mustafa'ya.
Mededim mürvet carım Ali libaya. Bu yolda canım kurban pirim
Hünkâr Hacı Bektaş Veli'ye. Ber Cemal-i Muhamed, Kemal-i
Imam Hasan Hüeyin, Ali ra bolend salâvat.

Vežan sam svim srcem i dubokom predanošću za Al-i Aba⁴⁴¹.
Tražim milost uzimajući utočište kod Muhameda el-Mustafe.
Moja molba za pomoć je uz hrabrog i brzog Alija.
Neka moj život bude žrtvovan na putu za Hadži Bektaš Valija, Učitelja.
Veliki blagoslov besprije kornom Muhamedu, savršanim Imamima, Hasanu, Husejnu i Imamu
Aliju.

Çerağ-i evliya, nur us-Semavat. Ki, bu menzildir ol turu munacaat.
Kaçan kim ruşen ola kil niyaz. Muhamed Ali'ye candan salavat.

Svjetlost evlijanskih svijeća je blistavost neba. Jer utočište je planina zazivanja.
Kakvo bježanje kada je molitva prosvjetljujuća.
Šaljemo iskreni blagoslov Muhamedu i Aliju.

10.5 Çerağ duasi (Služenje paljenja svijeće)

Allah 'tan bize ulaşan çerağımız sonsuza dek kilavuzumuz olsun!

⁴⁴⁰ Aluzija na Halladž al-Mensura.

⁴⁴¹ Al-i Aba ili „Ljudi pod pokrivačem“ (arap. *Ahl al-Kisa*) jesu one osobe (Ali, Fatima, Hasan i Husejn) koje su bile zajedno s Poslanikom Muhamedom pod pokrivačem kada je objavljen kur'anski ajet 33:33.

Çerağımız yansin yakilsin, Allah'in nuru aŞkina!
Çerağımız yansin yakilsin, Peygamberliğin nuru aŞkina!
Çerağımız yansin yakilsin, Velâyetin nuru aŞkina!
Çerağımız yansin yakilsin, Ehlibejt'in nuru aŞkina!
Çerağımız yansin yakilsin, Pir Hünkâr Hacı i Veli Aşkina!
Çerağımız yansin yakilsin, ylumuzun, birliğimizin, dirliğimizin aŞkina!
Sосу dek bu çerağ yolumuzun ve yaŞantamizin işiği ola. Gerçeğe HÜ.

Neka nam svjetlost koja dopire od Boga bude vodič zauvijek!
Neka naša svjetiljka gori jako, iz ljubavi prema Božijem svjetlu!
Neka se naša svjetiljka upali i snažno gori, iz ljubavi prema svjetlu poslanstva!
Neka se naša svjetiljka upali i snažno gori, iz ljubavi prema svjetlu svetosti velajeta!
Neka se naša svjetiljka upali i snažno gori, iz ljubavi prema Ehli Bejtu!
Neka se naša svjetiljka upali i snažno gori, za ljubav Pir Hunkar Hadži Velija!
Neka se naša svjetiljka upali i snažno gori, iz ljubavi prema našem putu, našem jedinstvu i našoj solidarnosti!
Neka ova svjetiljka zauvijek bude svjetlo našeg puta i naših života. Istina je On!

10.6 Sofra duasi (Molitva za stolom)

Nimeti Celil, bereketi Hali, Şefaati Resul, inayati Ali, himmeti Veli ola!
Bu gitti ganisi gele, Hak-Muhamed-Ali bereketine vere!
Arta eksimeye, taŞip dokûlmeye! Üçlerin, BeŞlerin, Yedilerin, Oniki Imamlarin, Ondört Masum-u Pâkların, Onyedi Kemberbestlerin, Kirkların, Rical-ül Gayb Erenlerin dergâhına yazıla!
Her kazaya kalkan, her belaya bekçi ola!
Yiyp yedirenlere, pişirip getirenlere nur-i iman,aşk-i şevk ola!
Lokma sahipleri lokmadan şefaât bula; Evleri, ocakları şen,
Kismetleri gür ola!Her neye niyet ettiyseniz, Allah kabul eyleye!

Neka mu blagodat bude od Svemogućeg, blagoslov od Halila, zagovor od Poslanika, milost od Alija i podrška od Valija (Hadži Bektaša)! Neka ovo prođe i neka još više dođe u izobilju; neka Bog, Muhamed i Ali podare svoje blagoslove! Neka se povećava kroz Hak-Muhameda-Alija i neka se uvećava bez umanjenja i prelije bez ostataka! Neka bude upisano u svetište trojice, petorice, sedmorice, Dvanaest Imama, četrnaest bezgrešnih, sedamnaest kemberbesta (opasanih), četrdesetorice i skrivenih derviša! Neka budu štit od svake nesreće, čuvari od svake nedaće! Neka oni koji jedu i hrane, oni koji kuhaju i donose, budu ispunjeni svjetlošću vjere i zanosa ljubavnog! Neka oni koji osiguravaju hranu nađu zagovor kroz nju; neka njihovi domovi i ognjišta budu radosni, a njihova sreća obilna! Neka Allah primi sve što ste naumili!

10.7 Erkan Selami (Selam puta)

Essalām-u aleykūm ey Şeriat erenleri. Essalām-u aleykūm ey Tarikat pirleri.
Essalām-u aleykūm ey Marifet kāmilleri. Essalām-u aleykūm ey Hakikat şahlari.
Ve aleykūm selām ve rahmetullah-i ve berekātuh.

Mir neka je na vas, o derviši šerijata (zakona).
Mir neka je na vas, o učitelji tarikata.
Mir neka je na vas, upotpunjeni marifetom (spoznaje).
Mir neka je na vas, o gospodari hakikata (istine).
Neka je Božiji mir i blagoslov na vas.

10.8 Salavat (Molitva Blagoslova)

Allahuma salli ala Muhammadin wa ala Ali-i Muhammad kama sallayte ala Ibrahim wa ala Ali-i Ibrahim innaka hamidu-majid. Allahuma barik ala Muhammadin wa ala Ali-i Muhammad kama barakta ala Ibrahima wa ala Ali-i Ibrahim innaka hamidu-majid.

Allahu, blagoslovi Muhameda i njegovu porodicu, kao što si blagoslovio Ibrahima i njegovu porodicu! Zaista si Hvaljen i Slavljen!
Allahu, obaspi blagodatima Muhameda i njegovu porodicu, kao što si obasuo blagodatima Ibrahima i njegovu porodicu! Zaista si Ti Hvaljen i Slavljen!

Allahumme Salli ala Seyyidina Muhamed Mustafa
Allahumme Salli ala Seyyidina Ali el-Murteza
Allahumme Salli ala Seyyidina Hasan ul-Mudžteba
Allahumme Salli ala Seyyidina Husejn-i Kerbela
Allahumme Salli ala Seyyidina Zeynel Aba
Allahumme Salli ala Seyyidina Bakir ul-Baka
Allahumme Salli ala Seyyidina Džafer Rehnüma
Allahumme Salli ala Seyyidina Kazim Musa
Allahumme Salli ala Seyyidina Ali Sultan Riza
Allahumme Salli ala Seyyidina Muhamed Taki
Allahumme Salli ala Seyyidina Ali Naki
Allahumme Salli ala Seyyidina Hasan Askeri
Allahumme Salli ala Seyyidina Muhamemd Mehdi

Allahu blagoslovi našeg predvodnika Muhamed Mustafu
Allahu blagoslovi našeg predvodnika Ali Murtezu
Allahu blagoslovi našeg predvodnika Hasana Mudžtebu

Allahu blagoslovi našeg predvodnika Husejna sa Kerbele
Allahu blagoslovi našeg predvodnika Zejnul Abidina Sedžada
Allahu blagoslovi našeg predvodnika Bakira učitelja
Allahu blagoslovi našeg predvodnika Džafera Sadika uputitelja
Allahu blagoslovi našeg predvodnika Musa Kazima
Allahu blagoslovi našeg predvodnika Alija Rizu
Allahu blagoslovi našeg predvodnika Muhameda Dževada Takija
Allahu blagoslovi našeg predvodnika Alija Hadi Nakija
Allahu blagoslovi našeg predvodnika Hasana Askerija
Allahu blagoslovi našeg predvodnika Muhameda Mehdija

10.9 Kurban Duasi (Molitva blagoslova Kurvana)

Bism-i Şah Allah Allah!
Fermani Celil, Kurvani Halil
Can-i Ismail, Peyk-i Cebrail
La ilahe illallah, Muhamed Resulullah, Aliyyuun Veliullah
Alluhu Ekber, Allahu Ekber
La ilahe illallah ve Allah Ekber
Allahu Ekber ve illahil hamd
Bismillahu tekbir, Allahu Ekber
La feta illa Ali la Seyfa illa Zülfikar

U ime vladara Allah Allah!
Uzvišeni dekret, žrtva Halila
Duša Ismaila, poslana od Džebraila
Nema Boga osim Allaha, Muhamed je Božiji Poslanik, Ali je prijatelj Božiji
Allah je najveći, Allah je najveći
Nema boga osim Allaha, Allah je najveći
Allah je najveći, Njemu je hvala
Tekbir u ime Boga, Allah je najveći
Nema junaka iznad Alija niti sablje iznad Zulfikara

Tekbir, Allahu Ekber (üç kere okunur)
Kurbani Halil, Fermani Celil, Tiği Cebrail, Itaati Ismail
Allahu Ekber, Allahu Ekber. La ilahe illallahu ve Allahu Ekber
Allahu Ekber, Allahu Ekber ve lillahi hamd (üç kere okunur)
Kurbaniniz kabula ola, dergāhi izzetine yazılmış ola,
Her ne niyetle lokma eyledi iseniz Hak Muhamed Ali dergāhina kayit ola,
Yüce Allah dildeki dileğiniz gönüldeki muradinizi vere.

Sizleri merde, namerde muhtaç etmeye.
Lokmalarinizdan hayir hasened bulasiniz.
Hayirli ve berketli bir ömür dileği ile, Hak Muhamed Ali yardimciniz ola
Üçlerin, Beşlerin, Yedilerin, Oniki Imamlarin, Ondört Masumu
Paklarin, Onyedi Kemerbestlerin, Kirkclarin ve Rica'ül Gayb
Erenlerin dergähin yazilmış ola. Gerçek Erenler Demine Hü.

Tekbir⁴⁴², Bog je najveći (izgovara se tri puta)
Žrtva Halila, dekret Veličanstva, mač Džibrila, poslušnost Ismaila. Allah je najveći, Allah je najveći. Nema boga osim Allaha i Bog je uistinu najveći, Bog je najveći i Njemu pripada hvala. (izgovara se tri puta)
Neka tvoja žrtva bude primljena i zabilježena u Njegovom slavnom prisustvu. Kakva god bila tvoja namjera prilikom prinošenja obroka, neka bude zabilježena u prisustvu Hak-Muhameda-Alija. Neka ti Bog Svemogući ispuni želje koje izražavaš jezikom i želje tvoga srca. Neka nikada ne budete ovisni o bezvrijednima ili nedostojnima. Neka u svojim obrocima nađete blagoslove i dobra djela. Neka ti je život blagoslovljen i uspješan, a Bog, Muhamed i Ali pomagači. Neka budeš upisan u svetište među trojicom, petoricom, sedmericom, dvanaest Imama, četrnaest nepogrešivih, sedamnaest kemerbesta (opasanih), četrdeseticom i nevidljivim svetim ljudima. U vrijeme istinskih svetaca, Hu.

11 Historija alevizma u Anadoliji

Kao što je opisano već u prethodnim poglavljima, uspon Safavida i pokušaj Osmanlija da dergah Hadži Bektaš Velija usklade s režimom, doveli su do toga da je Šah Ismail stekao znatne simpatije među anadolskim alevitima. Uz ovu rastuću podršku Safavidima, brojni su se ustanci dogodili u raznim regijama Anadolije⁴⁴³, prvenstveno zbog društveno-političkih problema unutar Osmanskog Carstva. Neki od tih ustanaka dosegli su takve razmjere da je osmanski sultan (Kanuni) Sulejman I (1494.-1566.) morao privremeno zaustaviti svoju ugarsku kampanju kako bi na razne načine ugušio pobune u srcu Osmanskog Carstva. Ustanak Bozoluka Celala⁴⁴⁴, posebno je okupirao Osmansko Carstvo jedan znatan period. U

⁴⁴² Tekbir je glagolska imenica izvedena iz arapskog glagola *kabbara*, što znači reći „Allahu ekber“ (Bog je najveći). Ova formula se često koristi u islamu.

⁴⁴³ Ustanak Šahkulu-babe (Šahkulu sultan) u regiji Teke (Antalija/Burdur) – 1511.
Ustanak Nur Ali-halife u Sivasu, Tokatu i Amasiji – 1512.
Ustanak Bozoklu Dželala – 1519.
Ustanak Sulun Hodže i babe Zununa u Samsunu i Adani – 1526.
Ustanak Kalender Čelebija u Kırşehiru i Ankari – 1527.
Ustanak Karayazıcı Abdulhalim-šaha – 1595.
Ustanak Deli Hasan-paše – 1602.

⁴⁴⁴ Bozoklu Dželal bio je alevijski vjerski učenjak koji je 1519. godine podigao ustanak protiv nepravde u Osmanskom Carstvu. Iako je njegov ustanak ugušen u 16. stoljeću, kasniji ustanci koji su se nastavili tokom 17.

isto vrijeme, pir Sultan Abdal, među ostalima, također se pobunio protiv represivne politike Osmanlija.

Ipak, osmanski vladari su uspjeli ugušiti raširene ustanke optužujući pobunjeničke vođe za razne prekršaje, poput hereze i otpadništva od Islama. Tom prilikom, dvorski učenjaci odani Osmanskom Carstvu, poput šejh ul-Islama Mehmeda Abu Suud Efendije⁴⁴⁵ 932. godine, izdali su brojna vjerska mišljenja (Fetve) o navodnom nevjerstvu alevitskog stanovništva i njihovih vodećih ljudi. Na kraju, ova politika je dovela do toga da je deset hiljada alevitskih muslimana bilo prisiljeno da pređu na sunitski islam, protjerano ili ubijeno pod optužbama za separatizam od (sunitskog) islama. Bezbrojne fetve o otpadništvu alevita izdane su samo za vrijeme vladavine sultana Javuz Selima, što je dokumentirano u poznatom zapisu Selimšahname od šejha Idrisa-i Bitlisija (1452–1520):

„Sultan (padišah) je naredio dužnosnicima sljedeće: „Bez sumnje, svi oni kizilbaškog uvjerenja, bez obzira gdje žive, po sljedećoj rečenici (...) Onaj ko vjeru zamijeni za nevjerovanje, odstupio je od pravog puta.“ Te bez ikakve odgode moraju biti (na licu mjesta) ubijeni ili prisiljeni na preobraćenje⁴⁴⁶ ako tvrde da su sljedbenici trojice Safavida⁴⁴⁷ kroz tri generacije. Neka visoki dvorski dužnosnici odmah registruju sve one između sedam i sedamdeset godina iz ove skupine.“ Tako su pisari zabilježili sva imena, tako da je broj, od mladih do starih, premašio 40.000. Nakon toga, ta su imena prijavljena regionalnim sucima kako bi se oštri mačevi mogli korak po korak usmjeriti protiv njih. (...)

Kao posljedica ovog nemilosrdnog pristupa, mnogi aleviti su bili prisiljeni povući se u svoje enklave. Ovo povlačenje i rezultirajuća izolacija prekinuli su bliski kontakt sa Safavidima, a time i s iranskim i iračkim sljedbenicima Ehli Bejta tokom stoljeća. Čak i nakon osnivanja Republike Turske, diskriminacija i mržnja prema alevitskom stanovništvu se nisu posebno smanjili. Pored brojnih masakara, koji su počinjeni dijelom uz državnu podršku, aleviti su i

stoljeća nazivani su Dželali-ustanci (tur. *Celali ayaklanmaları*), a bili su usmjereni protiv socijalne nepravde i krize unutar Osmanskog Carstva.

⁴⁴⁵ Mehmed Ebu Suud-efendija bio je hanefijski pravni učenjak i sudija (arap. *qadi*, tur. *kadi*) u Osmanskom Carstvu, rođen 1490. godine u Iskilipu, u turskoj provinciji Çorum. Na osnovu porijekla nazivao se i el-Imadi, pošto je njegova porodica doselila iz Amedije u Iraku. Svojim vjerskim presudama (fetvama) podržavao je političke napore sultana svoga vremena. Tako je blagoslovio osvajanje Kipra za vrijeme sultana Selima I, ubijanje Jezida za vrijeme sultana Sulejmana I, kao i borbu protiv alevijskih sufijskih redova i Safavida, također pod Sulejmanom. Zbog njegove političke bliskosti osmanskom dvoru, 1545. godine imenovan je za velikog muftiju i šejhul-islama, nakon čega je izdao smjernice za provedbu šerijatskog prava u državnoj upravi prema hanefijskoj pravnoj školi. Budući da su ovi pravni dekreti izdani za vrijeme vladavine Sulejmana I, sultan Sulejman ušao je u povijest kao Kanuni Sultan (Sultan koji daje zakone).

Što se tiče alevita i šiita, Mehmed Ebu Suud-efendija izdao je, naprimjer, sljedeću pravnu odluku: „Ova vrsta zajednice je i nevjerna i paganska, kao i zla. Iz ova dva razloga vjerska je dužnost ubiti ih. Bog pomaže onima koji pomažu vjeri i čini zlo onima koji čine zlo muslimanima. (...) Ko god pogine u borbi protiv ove skupine, pada kao šehid na Božijem putu. (...) Ubijanje ove skupine (alevita) važnije je od ubijanja drugih nevjernika.“ Također je proglasio sufijske učenjake Junusa Emrea i šejha Bedrudina nevjernicima. Umro je u Istanbulu 1574. godine u dobi od 84 godine.

⁴⁴⁶ Prelazak (arap: *tabdil*), a ovdje se misli na prisilno konvertiranje na sunizam.

⁴⁴⁷ Misli se na Šah Ismaila i njegove pretke.

dalje suočeni s nepravdama fanatičnih sunita. Najružasniji i najveći masakr koji su aleviti pretrpjeli nakon osnivanja Republike Turske odigrao se 1937/38. godine u istočnoturskoj regiji Dersim.⁴⁴⁸ Pod izgovorom gušenja ustanka Seyyida Rize⁴⁴⁹, po zvaničnim izvještajima države Turske, c.10% od ukupno 70 000 stanovnika, ubijeno je tokom sukoba. Nakon što je ustanak konačno ugušen u oktobru 1938., do 50.000 stanovnika je deportirano u druge dijelove zemlje, prvenstveno u pokrajine Manisa, Tekirdağ, Balıkesir, Kırklareli, Edirne i Izmir. Daljnji veliki masakri su potaknuti od lijevo orijentiranih alevita i tursko-sunitskih nacionalista početkom osamdesetih godina u provinciji Maraš.⁴⁵⁰ i Çorum⁴⁵¹. Naročito jer se alevite smatralo bezbožnim komunistima, turska država zatvorila je oči kada su vjersko-fanatični nacionalisti naoružani upali u alevitska naselja i počinili masakr. Takav stav turske države doveo je do neobuzdanih napada na alevitsko stanovništvo u sljedećim godinama. Dana 2. jula 1993. godine, podmetanje požara na alevitskom festivalu u Sivasu rezultiralo je smrću 37 ljudi. Budući da se ovaj pogrom na turskom jeziku službeno naziva Sivas Olayları (Događaj u Sivasu), aleviti do danas uzalud čekaju da događaji budu priznati kao masakr i da tursko pravosuđe osudi počinitelje i inspiratore. Visoki kazneni sud u Ankari 2012. godine čak je oslobodio inspiratore i nalogodavce masakra, tvrdeći da je „tragičan događaj“ sada, nakon 19 godina, zastario. Kao da odluka Vrhovnog suda već nije predstavljala poniženje i nepoštovanje prema žrtvama i njihovim porodicama, premijer Redžep Tajip Erdogan dodatno je ismijao osjećaje alevita sljedećom izjavom:

„Nadam se da je ta presuda za dobrobit našeg naroda i nacije.“

Nadalje, aleviti se u svakodnevnom životu suočavaju s isključenošću i netolerancijom sunitski orijentirane turske države. Iako bi država prema ustavu trebala djelovati sekularno, od 1950-ih postala je značajan predstavnik sunitske društvene klase. Konačno, turska država je, nedugo nakon osnivanja republike, imenovala kao reprezent sunitsko-hanefijskog islama i preko državnog direktorata za vjerska pitanja (tr: Diyanet İşleri Başkanlığı) vrši utjecaj na vjeru stanovništva. Pri tome država nameće stanovništvu uvjerenje hanefijskog islama. U

⁴⁴⁸ Regija Dersim proteže se uglavnom preko teritorije današnje provincije Tunceli, kao i na neke okruge provincija Erzincan, Bingöl, Elazığ, Muş i Sivas.

⁴⁴⁹ Seyyid Riza bio je četvrti i najmlađi sin Seyyid Ibrahima. Prema historijskim spisima, rođen je 1862. godine. Nakon smrti svoga oca, dobio je na upravljanje alevijsko sejjidsko pleme Abasan. Poznato je da je stekao dobro obrazovanje kod značajnog učenjaka Mehmed Ali-efendije. Godine 1937. predvodio je ustanak u Dersimu protiv tlačiteljske politike turske države, koji je brutalno ugušen. Kako bi spriječio dalje prolijevanje krvi među civilnim stanovništvom, Seyyid Riza se predao s još 50 svojih najodanijih sljedbenika. Četiri dana nakon pritvaranja, on i njegovi ljudi osuđeni su na smrt od putujućeg suda. Sa Seyyid Rizom pogubljen je i njegov maloljetni sin Resik Husejn. Seyyid Rizina posljednja želja – da ne bude obješen pred sinom Resikom kako on ne bi morao gledati njegovu smrt – odbijena je. Prije vješanja izgovorio je sljedeće stihove: „*Evladı Kerbelayih. Bî hatayih. Ayrıptır. Zulümdür. Cinayettir.*“ (Mi smo djeca Kerbele. Mi nismo ništa zgriješili. To je sramota. To je užas. To je ubistvo.)

⁴⁵⁰ Pogrom u Marašu, poznat i kao pokolj u Kahramanmarašu, dogodio se od 19. do 26. decembra 1978. godine. Tokom ovog napada, nacionalistička rulja ubila je više od 100 ljudi.

⁴⁵¹ Pogrom u Çorumu dogodio se 4. jula 1980. godine u turskoj provinciji Çorum. Prilikom ovog podlog napada na alevitsko stanovništvo, 57 nevinih ljudi izgubilo je život.

tom kontekstu sekularizam, koji bi trebao garantovati odvojenost države od religije, koristi se samo kao izgovor da se alevitima spriječi slobodno prakticiranje njihove religije. Ta se ograničenja namjerno ukidaju za sunitsko stanovništvo. Iako svi građani plaćaju porez državi podjednako, favoriziraju se samo vjerske institucije koje podučavaju islamske principe hanefijske pravne škole prema turskim državnim smjernicama. Stoga, kako šiitske bogomolje tako i džem-kuće, ne mogu dobiti finansijsku podršku od direktorata za vjerska pitanja (tr: Diyanet). Pristup alevitskim obrazovnim ustanovama (tekijama i dergahima), koje su stoljećima iznjedrile važne alevitske ličnosti, država je ograničila pod krinkom sekularizma. Najbolji primjer za to je pretvaranje spomenutog dergaha Hadži Bektaša Velija u muzej. Međutim, državna ograničenja za sunitske tekije, koje obavljaju usporedive funkcije, postupno su ublažavana, tako da suniti sada mogu obavljati svoje vjerske obrede i u džamijama i u tekijama lojalnim režimu. Nadalje, turska vlada provodi namjernu podjelu alevita na razne podgrupe i pokušava na ovaj način provesti asimilaciju na suniti islam. Uostalom, očito je da se ljude koji su stoljećima imali samo ograničen pristup vlastitim obrazovnim institucijama može lakše iščupati iz korijena i pridobiti za druge vjere. Posebno nakon što tursko državno vodstvo konzervativno-islamske AKP pokušava kroz izgradnju suniti džamija u alevitskim područjima nametnuti politiku asimilacije. Turska Republika, koja je proizašla sa ruševina Osmanskog Carstva, nije začuđujuće, da se većina državnih službenika orijentira prema osmanlijskoj ideologiji. U vezi sa izgradnjom džamija u alevitskim četvrtima, sljedeća izjava Redžep Taipa Erdogana jasno odražava ovaj pogrdan i prezriv stav: „Kuće u kojima se obavlja obred džem, nisu mjesta bogoslužja. Jedino mjesto bogoslužja u islamu je džamija. Kuće u kojima se prakticira obred džem, tek su samo kulturni centri.“ Ovi pokušaji asimilacije usmjereni su pored alevita također i protiv šiita, koji čine jednu značajnu manjinu turskog stanovništva. Iako šiiti u ovom kontekstu obavljaju pet dnevnih namaza, turska država ni u kom slučaju ne razlikuje alevite i šiite i smatra ih nasljednicima safavidskih kizilbaša. Posljedično, država pokušava svim sredstvima spriječiti jačanje šiizma i spriječiti šiite u izgradnji i finansiranju šiitskih bogomolja. Iako bi ove molitvene kuće, izgrađene vlastitim sredstvima, zakonski trebale primati i finansijsku pomoć, šiiti se suočavaju s brojnim teškoćama koje im nameće turska država. Stoga ne čudi da neki vladini predstavnici koriste agresivan ton protiv šiita, optužujući ih da su agenti iranske države. To dovodi do kontinuirane radikalizacije suniti stanovništva i, između ostalog, jačanju selefističkih terorističkih organizacija poput Al-Kaide i ISIS-a.⁴⁵² Još jedan problem koji pogađa i alevite i šiite je obavezna vjerska nastava u turskim školama, koja isključivo podučava vjersku doktrinu prema hanefijskoj školi mišljenja. Vjerska uvjerenja alevita i šiita ili se samo površno obrađuju ili se uopće ne obrađuju. Sve ove okolnosti značajno doprinose tome da se aleviti i šiiti osjećaju marginalizirano kao građani drugog reda i, u nekim slučajevima, traže bliže veze jedni s drugima. U konačnici, očito je da svi sljedbenici Ehli Bejta moraju ostaviti po strani svoje razlike i uključiti se u sve vjerske i denominacijske

⁴⁵² U borbi protiv sirijske vlade turska država godinama podržava ekstremističke teroriste iz svih dijelova svijeta, prije svega iz graničnih područja sa Sirijom. Tako je Turska, zahvaljujući AKP režimu, postala tranzitna zemlja za međunarodni selefistički terorizam.

struje. Posebno u vrijeme kada razumijevanje islama, temeljeno na umejjedskom modelu, dobiva na snazi, ovaj pristup može pomoći u prevladavanju postojećih razlika i razjašnjavanju miroljubive poruke istinskog islama. Međutim, zbližavanje i dijalog među sljedbenicima Ehli Bejta ne bi se trebali tumačiti kao zahtjev da jedna strana napusti svoje posebnosti i razlike te da se pokori drugoj. Umjesto toga, različita tumačenja i pristupi temeljima islama među alevitima i šiitima trebali bi se smatrati obogaćenjem. U tom smislu, svaki čovjek bi trebao shvatiti ozbiljno sljedeće riječi duhovnog učitelja Mevlane Dželaludina Rumija, u kojima on opisuje mirnu razmjenu između ljudi različitih vjera:

„Dođi, dođi! Ko god da si dođi, dođi, i ako si nevjernik, vatropoklonik ili idolopoklonik. Ovaj naš dergah nije dergah beznadežnosti, opet dođi, čak i ako si pokajanje stotinu puta prekršio, dođi.“

Kako bi spriječili ovo zbližavanje i razmjenu znanja među sljedbenicima Ehli Bejta, i turska država i pokret Alisiz Alevilik slijede metode terminološke podjele alevita na kizilbaše, Bektašije, Tahtačije, Nusajrije itd. Nadalje, zabija se jaz između alevita koji žive u Anadoliji i njihovih povijesnih vjerskih obrazovnih institucija u Nedžefu, Kerbeli, Erdebilu i drugdje. Činjenica da je učenje i prakticiranje temeljnih načela alevijske vjere otežano, zauzvrat, dovodi do dugoročnog narušavanja mira između različitih vjerskih i ideoloških skupina. Kao što je naglasio Imam Ali, od najveće je važnosti da ljudi prihvate jedni druge i smatraju se braćom u čovječanstvu:

„Neka tvoje srce osjeća milost prema Božijim robovima, kao ljubav i dobrotu prema njima, i ne stojte nad njima poput proždrljivih grabežljivaca koji im otimaju hranu, jer oni su od dvije vrste: ili je tvoj brat u vjeri ili ti je jednak po stvaranju.“⁴⁵³

12 Sažetak i zaključak

U sažetom pregledu do sada raspravljenih tema jasno je da je alevizam, kako u prošlosti tako i u sadašnjosti, bio pijun u raznim ideološkim igrama. Razne političke organizacije i ideologije pokušavaju iskoristiti alevitsko stanovništvo za vlastite svrhe neutemeljenim i iskrivljenim argumentima. Posebno je vrijedno napomenuti da mnogi od ovih stručnjaka izražavaju naklonost i interes za alevizam, ali istovremeno otvoreno odbacuju bitne temelje alevitske vjere. Iako se samo mala manjina onih rođenih u alevitskim porodicama smatra nemuslimanima, neke frakcije pokušavaju prikazati ovaj stav kao univerzalno obavezujući za sve alevite. Pritom, ovi pojedinci ignorišu teorijske i praktične temelje alevizma i predstavljaju ga kao nezavisnu, vanislamsku religiju. Međutim, ova knjiga je predstavila brojne primjere alevitskih mislilaca, vjerskih vođa i učenjaka kako bi se razjasnio islamski identitet alevizma.

⁴⁵³ Ali ibn Ebu Talib: Nahdž ul-Belaga.

Nadalje, prihvaćena je teorija da alevizam predstavlja dodatnu islamsku pravnu školu pored četiri sunitske škole. Iako historijski zapisi jasno pokazuju da Imam Džafer Sadik nije osnovao pravnu školu, i alevitski izvori, poput Buyruka Imama Džafera Sadika, i brojne alevitske pjesme naglašavaju da se aleviti smatraju pripadnicima džaferijske pravne škole, tj. kao Džaferije (Džeferi). Međutim, oznaku Džaferi su im prvenstveno pripisali suniti, koji su Imama Džafera Sadika izjednačavali sa osnivačima četiri sunitske pravne škole i pretpostavljali da je on samo izražavao svoje lične stavove o islamskim pitanjima. Vremenom su aleviti i šiiti usvojili termin Džaferi kako bi se razlikovali od sunitskih pravnih škola, kao i da obznane privrženost slijeđenju učenja dvanaest Imama. Iz ovog razloga se u alevitskim pjesmama i spisima uvijek iznova naglašava pripadnost alevita džaferijskoj pravnoj školi.

U jednoj drugoj teoriji pokušavali su neki autori ograničiti alevizam na bektaški ili safavidski red, bez da objasne stvarne osnove njegovog porijekla. Dok je Hadži Bektaš Veli udario temelje nastanka bektaškog reda u 13. stoljeću, kako bi stanovništvo poučavao učenju Ehli Bejta, safavidski red je dobio na snazi u 16. stoljeću, kada je šah Ismail osnovao Safavidsko Carstvo. Kako bi smanjili politički utjecaj i sferu utjecaja Safavida nad anadolskim stanovništvom, osmanski sultani su, uz pomoć državi lojalnih učenjaka, težili ka cilju da bektaški red stave pod svoju kontrolu i ojačaju ga. Međutim, budući da nisu bili u mogućnosti da dugoročno sprovode svoju politiku asimilacije, osmanski vladari su na kraju bektaški red smatrali prijateljom i borili se protiv njega. To je prvenstveno zato što su nadređeni (postnišini) bektaškog reda odbili da se odreknu svojih alevitsko-islamskih uvjerenja i stoga su se, u svojim osnovama, jedva razlikovali od sljedbenika safavidskog reda. Iz tog razloga razlika između dva reda izgleda više nego upitna, iako se različite religijske prakse mogu pratiti do danas zbog historijskog razvoja. Oba pravca odražavaju alevizam, ali se on ne može u potpunosti svesti na jedan ili čak ni na jedan od redova.

Još jedna optužba s kojom se alevizam stalno suočava jest apsurdna tvrdnja da anadolski aleviti obogotvoruju imama Alija. Ova ideja se u literaturi opisuje kao pretjerivanje (arap. ghuluw). Iako su kroz historiju sigurno postojali pravci mišljenja, a neki postoje i danas, koji Imamu Aliju pripisuju božanstvenost, vjerovanje ove manjine ne može se smatrati reprezentativnim za alevite. U konačnici, ova optužba se ne može naći ni u teoretskim ni u životnim praksama alevita.

Druge škole mišljenja pokušavaju alevizam definirati kao kulturni oblik sunitskog islama, koji je nastao kroz sintezu s predislamskim elementima. U ovom kontekstu, zastupnici ove teorije, u skladu s asimilacijskom politikom Osmanskog Carstva, pokušavaju učenjake, mislioce i svete ljude alevita predstaviti kao sunitske muslimane. Pošto teološke razlike između sunizma i alevizma ipak ne mogu biti objašnjene tako neodrživim i banalnim argumentima, ovi ljudi pokušavaju alevizam reducirati na anadolsku ograničenu kulturnu pojavu sunitskog islama. Pošto se čak ni s tim argumentima razlike ne mogu objasniti, oni dalje tvrde da se alevizam nije odrekao utjecaja predislamskih elemenata i stoga nije u potpunosti prihvatio sunitski islam.

U ovom kontekstu, međutim, mora se naglasiti da kultura opisuje ukupnost svih intelektualnih, umjetničkih i kreativnih dostignuća koje je proizvela sama zajednica u određenoj regiji i tokom određene ere. Stoga je kultura podložna stalnim promjenama i oblikuje se novonastalim događajima. Nasuprot tome, religija je uglavnom stabilna i nije fundamentalno mijenjana vanjskim utjecajima. Naprimjer, njemačka kultura se značajno promijenila tokom historije, dok su kršćanske vrijednosti (uglavnom) ostale nepromijenjene. Na osnovu ove činjenice, pokušaj „istraživača“ da reduciraju alevizam na kulturni način života predstavlja veliko krivotvorenje. Umjesto toga može se govoriti o alevitskoj kulturi, koja je tokom historije trpjela razne utjecaje od drugih kultura, ali se ipak, stalno prilagođavajući, nepromjenjivo orijentirala ka principima Ehli Bejta i alevitskog islama. Jednostavno rečeno, to znači da su aleviti sve svoje novonastale kulturne običaje, prakse i tradicije podvrgli usklađivanju s islamskim principima prije nego što su ih integrirali u svoj način života. Ove prakse, koje ni na koji način nisu bile u suprotnosti sa islamskim zapovijedima i zabranama, čak su se smatrale kulturnim obogaćenjem. Stoga ne čudi da se mnoge geografski uvjetovane kulturne razlike mogu primijetiti čak i među alevitima, dok su temeljna načela vjere (vjerovanje u Boga, poslanika Muhameda, dvanaest Imama itd.) ostala nepromijenjena u svim regijama. Nadalje, to se može vidjeti i u stoljećima staroj alevitskoj literaturi, koja se isključivo bavi islamskim vjerovanjima i odanošću Ehli Bejtu.

Na drugom mjestu, teorija da je alevizam pretača socijalističkih i komunističkih ideologija detaljnije je razmatrana. Paradoks ove teorije leži, prvo, u njenom pokušaju da izjednači vjeru zasnovanu na postojanju Boga sa svjetonazorom koji odbacuje svaki oblik razumijevanja Boga. Nadalje, zagovornici ove teorije pokušavaju dovesti u sumnju fundamentalnu ulogu Imama Alija, imenjaka alevizma, i promovirati „alevizam bez Alija“ (tr: Ali'siz Alevilik). U svojim argumentima oni čak eksplicitno pozivaju alevite da se distanciraju od Imama Alija, za kojeg tvrde da je bio umiješan u prisilnu islamizaciju azijskih naroda. Pa ipak, dok se Imam Ali ocrnjuje, oni istovremeno pokušavaju njegovati simpatije prema komunističkim despotima poput Mao Zedonga, Josifa Staljina i drugih počinitelja zločina protiv čovječnosti unutar alevitske populacije.

Nadalje, do izražaja dolaze etnološki i nacionalistički naponi koji nastoje povezati alevizam s turskim ili kurdskim korijenom i na toj osnovi žele prisvojiti alevizam sebi. Ovim povodom neke značajne alevitske učenjake i duhovne učitelje, koji su imali ključnu ulogu u osnivanju Osmanskog Carstva i širenju alevitskog učenja na turskom jeziku, turske nacionalističke frakcije u okviru tursko-islamske sinteze predstavljaju kao pionire turskog identiteta.

Nadalje, neki turski nacionalisti pokušavaju proširiti među alevitima vjerovanje u (savremeno) mehdijско postojanje Mustafe Kemala Atatürka, koji je uveliko odgovoran za ukidanje hilafeta i osnivanje moderne Turske. Kurdski nacionalisti, s druge strane, pokušavaju pratiti porijeklo alevizma do nekih predislamskih religija (zoroastrizam i jezidizam) kako bi izazvali simpatije za svoje političke ciljeve među alevitima koji govore kurdski. Iako se namjere iza ovih napora i tvrdnji razlikuju, svi oni dijele zajednički cilj podređivanja alevizma vladajućem sistemu dijeleći ga u odvojene grupe. Najbolji primjer za to je namjerno razlikovanje između dva reda, bektašija i safavidskih kizilbaša. Ova

diferencijacija ide toliko daleko da dodatno dijeli već podijeljene alevite na kizilbaše, Bektašije, Tahtačije, Fellahe (arapski aleviti) i tako dalje. Slično tome, pod izgovorom sekularnog državnog sistema, turska država sistematski uskraćuje pristup alevitskim obrazovnim institucijama (tekijama i dergahima), ozbiljno ometajući obuku alevitskih vjerskih vođa i učenjaka. Činjenica da se sunitsko stanovništvo ne suočava s istim nivoom ograničenja ilustrira da se sekularizam samo koristi kao izgovor da se alevite sprječava u slobodnom ispovijedanju svoje vjere. Na ovaj način turska država pokušava stanovništvo dugoročno usmjeriti ka sunitsko-hanefijskom smjeru.⁴⁵⁴ Štaviše, kontakt s bivšim alevitskim obrazovnim institucijama (dergah) kritiziraju one ideološke skupine koje žele alevizam korumpirati za svoje političke ciljeve. Zato, pored hanefijski orijentirane turske države, također i sunitski fanatici i (turski/kurdski) nacionalisti ovom približavanju pristupaju s velikim nepovjerenjem. Naročito unutar Alisiz Alevilik-struje se širi propaganda i zastrašivanje, tvrdeći da kontakt sa vjerskim obrazovnim institucijama u Nedžefu, Kerbeli i Erdebilu predstavlja prozelitizam i šiitski islam i da bi u konačnici doveo do odstupanja od temeljnih alevitskih načela. Međutim, da bliski i svjesni kontakt s grobnicama dvanaest Imama ne mora nužno dovesti do šiitizma, pokazali su prije stoljeća alevitsko-bektašijski učenjaci, mislioci i duhovnici poput Muhameda Fuzulija, Viranija Abdala i drugih, služeći i podučavajući u poznatim dergahima u Nedžefu, Kerbeli, Kazimejnu i Samari.

Kako bi se suprotstavio sistemskoj asimilaciji različitih ideoloških skupina, svaki je alevit stoga obavezan proučavati temeljna načela alevizma (Kur'an i Ehli Bejt). U konačnici, alevizam se temelji na Časnom Kur'anu, koji je Bog objavio poslaniku Muhamedu, i uputi četrnaest nepogrešivih (tur. 14 Masum).

Ovo gledište se prvenstveno temelji na tradiciji poslanika Muhameda o dvije važne stvari (sekalejn) koje je autentično preneseno i u šiitskim i u sunitskim izvorima. Svi muslimani se slažu da je Božiji poslanik, nakon svog posljednjeg hodočašća (arap. Hadž ul-Wida), održao govor kod izvora Hum i istakao značaj dvoje važnih naslijeđa. Prenosi se da je poslanik, nakon slavljenja i hvaljenja Boga, sljedeće rekao:

„O ljudi! Vrijeme je skoro došlo da budem pozvan natrag (Allahu) i ja ću se odazvati tom pozivu. Zaista! Ostavljam vam dvije važne stvari (thagalayn). Jedna je Allahova knjiga u kojoj je svjetlost i uputa. Druga je moj Ehli Bejt. To sam tražio od svog Gospodara i On je to prihvatio. Zato ne žurite ispred njih, da ne biste bili zavedeni. Ne pokušavajte ih podučavati, jer su oni daleko učeniji od vas. Podsjećam vas, u ime Allaha, na moj Ehli Bejt. Podsjećam vas, u ime Allaha, na moj Ehli Bejt. Podsjećam vas, u ime Allaha, na moj Ehli Bejt.“

Posljedično, obje komponente (Kur'an i Ehli Bejt) čine značajan temelj za vrijednosti alevitske vjere i oblikuju svakodnevni život alevita. Budući da šiiti također smatraju ova dva naslijeđa poslanika Muhameda temeljem svoje vjere, ne čudi da alevizam pokazuje velike sličnosti sa šiitskim islamom i na historijskoj i na ideološkoj razini (temelji vjerovanja).⁴⁵⁵ Ipak,

⁴⁵⁴ Ovaj državni kurs, zasnovan na hanefijskoj pravnoj školi, nametnut je ne samo alevitima već i šafijskim Kurdima i šiitskim azerbejdžanskim Turcima.

⁴⁵⁵ Budući da su ličnosti i razlike između alevizma i šiizma u dosadašnjim poglavljima iscrpno obrađene, na ovom mjestu se ta tematika neće dalje produbljivati.

ne smiju se sličnosti shvatati kao istovjetnost ili jednakost alevizma i šiizma. Konačno, moraju se, pored brojnih zajedničkih elemenata, također bliže razmotriti kulturološke i filozofske razlike. To će omogućiti tačnu i iskrenu definiciju alevizma. Stoga, kako bi se pronašao pravi alevizam, praktična praksa alevizma mora se razmotriti uz teorijske temelje vjere. Kao što je opisano u 4. poglavlju (4 vrata i 40 stupnjeva), iz teološke perspektive od najveće je važnosti usredotočiti se prvenstveno na dogmatske temelje religije (zapovijedi i zabrane) u prvim vratima (tj. kapija šerijata) i živjeti u skladu s tim kako bi se prepoznala mudrost (tj. hikmet) u njima. U konačnici, prema učenjima četvera vrata i 40 stupnjeva, vjernik može postići znanje (tj. marifet) istine (tj. hakikat) samo slijedeći mistični put (tj. tarikat) u skladu s odredbama islamskih pravnih normi (tj. šerijat). Samo na taj način može postići rang insan-i kamil (doslovno: savršeno ljudsko biće). Pogotovo zato što mnogi istraživači danas često zanemaruju ovaj pristup alevizmu, javljaju se različite definicije alevizma. Slijedom toga, odgovornost je svakog alevita da se bavi osnovama alevizma i da to znanje podijeli sa svojom zajednicom. Samo kroz ovo stečeno znanje i ujedinjenje kompetentnih pojedinaca mogu se spriječiti strateške spletke u vezi s alevizmom. Konačno, možemo se pozvati na ključnu izjavu Hadži Bektaš Velija:

„Put kojim se ide bez znanja, vodi u tamu.“